

Completed 1/11/11

Dr. Gröhl.

4° 1444

6 dls.

Pinos Jus

178927

Comparavit F. Anselmus B.E. 1764.



APPARATUS ERUDITIONIS

PRÆSERTIM

AD

JURISPRUDENTIAM,

In quo

Præter Juris Universalis Principia

JUS NATURÆ, GENTIUM, DIVINUM,
APOSTOLICUM, & PONTIFICIUM, JUS SYNODALE
OECUMENICUM, NATIONALE AC PROVINCIALE,

Unacum

Provinciarum ac Regnorum Ecclesiastico & Politico Statu,
Disciplina Ecclesiæ, Hæresibus exortis &c. continua sæculorum serie
ad præsens usque tempus deductum, insertisque pro re nata multis
observationibus criticis, ac controversiis juridicis,

Publicis, ac Polemicis,

METHODO HISTORICO-DOGMATICA

colliguntur, & brevi ac clara idea delineantur,

In utilitatem eruditionis amantium, quibus vasta Conciliorum, Decretorum,
Historiarum &c. volumina perlegendi aut occasio aut tempus deficit,

AUTHORE

P. JOSEPHO BINER, S.J.

Monasterii


PARS IX,

Essalensis.

Complectens

STATUM REGNORUM ET RERUM PUBLICARUM
SÆCULI XVII.

CUM APPROBATIONE.



Augustæ Vindelicorum & Friburgi Brisgojæ

Sumptibus Fratrum Ignatii, & Antonii Wagner, Bibliop. MDCCLXIV.

FACULTAS

R. P. PRÆPOSITI PROVINCIALIS.

Cum librum, cui titulus: *Apparatus Eruditionis &c. Pars IX, X, & XI*, a P. Josepho Biner, Societatis JESU sacerdote, idiomate latino conscriptum, Patres ad id deputati recognoverint, probaverintque, ego Ignatius Rhomberg, ejusdem Societatis per Germaniam Superiorem Præpositus Provincialis, potestate ad hoc mihi facta ab A. R. P. N. Laurentio Ricci, universæ Societatis JESU Præposito Generali, Authori ejusdem facultatem impertio, eum typis vulgandi per D. Ignatium Wagner, Bibliopolam Augustanum ita cupientem. In cujus rei fidem has ei manu propria subscriptas, & consueto officii mei sigillo munitas dedi. Eustadii 22 Februarii 1764.

(L.S.)

Ignatius Rhomberg.



PRÆFATIO.

Tanta est rerum sæculo XVII per Europam gestarum ubertas atque varietas, ut earum relationem in duas partes dividere necesse sit. Et ea quidem, quæ ad Historiam Germaniæ ac Galliæ pertinent, Parte VIII pertractavimus: reliqua vero, quæ Italiam, Hispaniam, Lusitaniam, Belgium, Helvetiam, Angliam, ac Regna septentrionalia concernunt, hac parte obiter delibabimus.

Occurrent Revolutiones Regnorum, bella gravissima, Heroum victorias, Pacificationes Monasterienses, Pyreneæ, Aquisgranenses, Risvicenses, Olivenenses, Carolovicenses; magna fœdera, Tractatus commerciales, controversiæ. Obversabuntur oculis, Hispaniæ partitiones, Lusitanicæ mutationes, Londinenses secures, Regalibus cervicibus cruentæ, Cromwellianum novum systema, Regum exilia; coronæ translatio in Anglia, Polonia, Suecia, Russia, ex Turcarum unguibus vindicata Hungaria aliæque mutationes notabiles.

Statum Ecclesiasticum quod spectat, quoniam Concilium Generale nullum sæculo XVII fuit celebratum, Provincialia autem rarissima, Pontifices vero Moralem præsertim doctrinam, a quibusdam corruptam, in rectam semitam reducturi, propositiones varias, tum justo laxiores, tum in alterum rigoris extremum excurrentes, recto judicio condemnare cœperunt, quas in tractatione rerum Italicarum cum observationibus Theologicis subjicio, ac demum in fine hujus partis Concilia Orientalia, contra Calvinistarum errores ac falsa asserta subnecto.



CAPUT I ITALICA

SÆCULO XVII.

De rebus Italicis equidem crebro in hoc apparatu memoravimus, pluraque ex instituto Parte X & XI dicemus, ubi statum ejus Ecclesiasticum & Politicum recensebimus. Nunc autem aliqua, quæ Sæculo XVII sunt propria, delibabimus. Incipiamus ab Ecclesiasticis, & doctrina morum, a quibusdam scriptoribus nimium laxata, aut nimium constricta, a summis autem Pontificibus ab utroque extremo, & laxitatis & rigoris, ad veritatis normam revocata.

ARTICULUS I.

*Disciplina Morum per Pontifices ab erroribus
vindicata*

SÆCULO XVII.

§. I.

*Propositiones 45 ab Alexandro VII damnatæ
anno 1665 & 1667.*

I.

Alexander VII anno 1665 constitutionem edidit, qua 28 Propositiones, nimium laxas damnavit atque prohibuit, postquam non sine magno animi sui mœrore audivit, complures opiniones disciplinæ Christianæ relaxativas, & animarum perniciem inferentes, partim antiquas iterum suscitari, partim noviter prodire, & summam illam luxuriantium ingeniorum licentiam in dies magis excrefcere, per quam in rebus, ad conscientiam pertinentibus modus opinandi irrepsit alienus ab Evangelicâ simplicitate, sanctorumque Patrum Doctrina, & quem si pro recta regula fideles in praxi sequerentur, ingens eruptura esset Christianæ vitæ corruptela. Sunt autem propositiones ab eo damnatæ sequentes.

Propositio I.

Homo nullo unquam vitæ suæ tempore tenetur elicere actum fidei, spei, & charitatis ex vi præceptorum Divinorum, ad eas virtutes pertinentium.

De
virtut.
Theol.

Observatio. Propositio in terminis absurda, falsa, & scandalosa! est contra legem naturalem & Divinam. Quid enim evidentius, ac obligari nos ad colendum DEUM: per quid autem magis colitur, quam per virtutes istas theologicas, quæ nos cum DEO, auctore nostro, conjungunt, & ad finem, nobis præfixum, nos conducunt? & quot Divina effata hanc obligationem nobis inculcant? *Accedentem ad DEUM oportet credere.* Sine fide impossibile

bile est placere DEO. *Diliges Dominum DEUM tuum ex toto corde tuo &c. qui non diligit, manet in morte. Spera in DEO. Spe salvi facti sumus &c.* Et ad quid habitus harum virtutum, in baptismo nobis infusi? an otiosi relinquendi? an tantus thesaurus in sudario abscondendus? ad quid gratiæ actuales? an non sæpe necessariae hæ virtutes ad vincendas tentationes? an ad SS. Sacramenta accedendum sine fide, sine spe, sine charitate?

Prop. 2.

Vir equestris, ad duellum provocatus, potest illud acceptare, ne timiditatis notam apud alios incurrat.

Observ. Duellum est privata duorum pugna, ex condicito, Duellum. omni jure prohibita, sive offeratur, sive acceptetur; quia homo non est dominus suæ vitæ, ut de ea possit disponere. Aliud foret, si quis ad defendendam vitam suam, aut bona fortunæ maximi momenti, cum moderamine inculpatae tutelæ, injustum aggressorem, hominem privatum occideret: aut si auctoritate publica id fieret ex causa gravissima ac publica, e. g. ad finiendum bellum, prout David cum Goliath, & S. Wenceslaus cum Duce Curimensi fuit congressus; nam tunc habet rationem necessariæ defensionis, non autem duelli, proprie dicti, quod est privata duorum pugna, sponte & ex condicito suscepta, ac proin jure naturali, Divino, & humano gravissime prohibita.

Prop. 3.

Sententia asserens, Bullam Cænæ solum prohibere absolutionem hæ- Absolutio ab hæresi. *resis & aliorum criminum, quando publica sunt, & id non derogare facultati Tridentini, in qua de occultis criminibus sermo est, anno 1619 die 18 Julii in consistorio S. Congregationis Emin. Cardinalium visa & tolerata est.*

Observ. Trid. Episcopis tribuit potestatem absolvendi subditos suos in sua Diocesi, per se ipsos, aut per Vicarium, ad id specialiter deputandum in foro conscientiae, ab omnibus casibus occultis, etiam sedi Apost. reservatis: ab hæresi etiam occulta, per se ipsos tamen, non per Vicarium; in Bulla autem Cænæ prohibetur, ne quis absolvat a casibus in ea contentis, nisi in mortis articulo.

Putarunt aliqui, per Bullam Cœnæ non esse derogatum Episcoporum facultati, eo quod Tridentini in ea non fiat expressa mentio; & aliquis, vel aliqui, ut hanc opinionem firmarent, asseruerunt, opinionem, quæ dicit, quod Bulla Cœnæ tantum prohibeat Episcopis absolutionem ab hæresi & aliis criminibus publicis, non autem ab occultis, adeoque Tridentino nihil derogari, a S. congregatione visam & toleratam esse.

Negat, hoc factum a S. Congregatione Pontifex, ne per assertum opinioni illi auctoritas addatur: quæstionem autem Juris de potestate absolvendi ab occulta hæresi, Episcopis a Trid. concessa, videtur in medio relinquere. Quæ sit praxis circa hoc in Germania notum est. Episcopi vel utuntur facultate, sibi a Trid. concessa, vel privilegio, Ultramontanis singulis quinquenniis innovari solito.

Prop. 4.

Absoi.
Regul.

Prælati Regulares possunt in foro conscientie absolvere quoscunque sæculares ab hæresi occulta, & ab excommunicatione, propter ipsam incursum.

Observ. Regulares olim, cum deficeret Clerus sæcularis, propter merita sua in Ecclesiam magna acceperunt privilegia, quæ postea a Pontificibus vel sunt revocata (præsertim ea, quæ vivæ vocis oraculo fuerunt concessa) vel limitata.

Prop. 5.

Quamvis evidenter tibi constet, Petrum esse hæreticum, non teneris denuntiare, si probare non possis.

Denuntiatio.

Observ. Ratio damnandi hanc propositionem est, quia hæresis est malum maximum contra bonum publicum, quod facile inficiat alios: unde si constet tibi, teneris denuntiare, licet probare non possis, ut accedentibus indiciis inquisitio institui possit. Nec obstat, quod talis diffametur; nam bonum publicum privato præferri debet. Correctio vero fraterna privata non est tunc necessaria, nisi certum sit, delinquentem emendatum iri. Exemplum habemus in obligatione denuntiandi confessarium sollicitantem.

Prop.

Prop. 6.

Confessarius, qui in Sacramentali confessione tribuit penitenti char- Sollicitatio.
tam, postea legendam, in qua ad venerem incitat, non censetur
sollicitasse in confessione, ac proinde non est denuntiandus.

Observ. Ratio damnandi est, quia per traditionem talis ve-
neræ chartæ gravissima irrogatur irreverentia & injuria Sacra-
mento pœnitentiæ, & forte plus scandali parit personæ sollicitatæ,
quam si in ipso tribunali sacro, ubi erat contrita, fuisset sollicitata,
quamvis etiam in ipso confessionali sollicitatio facta censi possit,
ubi scheda sollicitans est tradita.

Prop. 7.

Modus evadendi obligationem denuntiandæ sollicitationis est, si sol- Idem.
licitatus confiteatur cum sollicitante; hic potest ipsum absolvere
absque onere denuntiandi.

Observ. Hoc esset aperire portam gravissimo huic sceleri:
ut sæpius sollicitare possit pœnitens: (si tamen pœnitens) & in
fraudem præcepti, de sollicitante denuntiando, licentius in rui-
nam contentis agi posset. Varii alii excogitati sunt modi, ab
onere hoc denuntiationis se liberandi, sed non sunt convenientes.
Habemus in Jure Cæsareo Aphorismum: *lex dura quidem est: sed*
tamen lex.

Prop. 8.

Duplicatum stipendium potest Sacerdos pro eadem Missa licite acci-
pere, applicando petenti partem etiam specialissimam fructus, Duplex
ipsimet celebranti correspondentem, idque post Decretum Urba- Stipendium.
ni VIII.

Observ. Merito prohibita est Ecclesiastica hæc nundinatio &
usura. Cur non dicis, quod triplex stipendium pro una Missa pe-
ti possit, præter fructum *specialem*, qui obvenit illi, pro quo
sacrificium offertur, & specialissimum, sacrificanti proprium, ap-
plicando etiam *generalem*, omnibus Christi fidelibus vivis atque
defunctis, assistentibus præsertim pro rata suæ devotionis & dispo-
sitionis communem? cur non dicis, quinque vel sex integra sti-
pendia aut sustentationes pro una Missa accipi posse a diversis per-

sonis, uni applicando fructum generalem, alteri specialem, tertiæ specialissimum, quartæ meritorium, quintæ satisfactorium, sextæ impetratorium, cum sacrificium in se ipso, & in actu primo infinitæ sit efficaciz & valoris?

Ab sint tales abusus. Stipendium datur sacrificanti pro sustentatione diurna. Pro uno die peti non potest duplex sustentatio diurna. Qui laborat una tantum die, non potest duplicatam mercedem poscere. Intentio præbentis stipendium est, ut sibi applicetur, quidquid applicari potest: fructus generalis omnibus fidelibus, specialis sacrificanti est proprius: alteri quæ applicari vel non potest, vel saltem hoc dubium est, prout etiam dubium est, an fructus specialissimus æquivalet speciali, vel tantum mediæ, vel tertiæ, ut quidam volunt, illius parti. Non potest autem stipendium certum exigi pro fructu incerto.

Prop. 9.

Minus
Stip.

Post Decretum Urbani potest sacerdos, cui Missa celebranda traduntur, per alium satisfacere, collato illi minori stipendio, alia parte stipendii sibi reservata.

Observ. Sordidam ejusmodi negotiationem & avarum quæstum circa SS. Missæ sacrificium merito reprobatur Papa. Et quo titulo sibi reservaret partem stipendii? non donationis, ut supponitur, non operæ, quia nihil præstitit, non mercedis, quia nihil meruit. Sed quicquid sit, an ejusmodi lucrum jure naturali sit injustum, de quo aliqui dubitant, certum tamen est, illicitum illud esse jure Ecclesiastico, ex prohibitione Urbani VIII & Alexandri VII hanc propositionem damnantis. Non est autem penes subditum, an velit legem acceptare; sed obediendum est.

Prop. 10.

Unum pro
pluribus.

Non est contra justitiam, pro pluribus sacrificiis stipendium accipere, & sacrificium unum offerre. neque etiam est contra fidelitatem, etiamsi promittam, promissione etiam juramento firmata danti stipendium, quod pro nullo alio offeram.

Observ. Urbanus VIII dicit, talem peccare graviter, & teneri ad restitutionem. Ergo peccat contra justitiam. Dein propositio ista est generalis, includens etiam eum, qui pro singulis Missis

is plenum & adaequatum stipendium accipit, & unam tantum offert. Hoc autem plane est injustissimum, & in detrimentum offerentis plura stipendia. Neque obstat, quod dicunt, sacrificium Missae esse valoris & efficaciae infinitae, unumque tantum valere, quantum plura; nam hoc probaret, unam tantum toto orbe Missam esse celebrandam. Verum licet ipse principalis offerens, Christus Iesus, ejusque merita infiniti sint valoris, participatio tamen nostra, & applicatio nobis facta, non est infinita, plusque per plures oblationes participamus, quam per unam.

Prop. II.

Peccata in confessione omissa, seu oblita ob instans periculum vitae, Confessio aut ob aliam causam, non tenemur in sequenti confessione expri- peccati mere. *omitti.*

Observ. Assertio est contra unanimum Theologorum sententiam, persuasionem & praxin fidelium, imo contra institutionem Christi, qui exigit confessionem non tantum formaliter, sed quantum fieri potest, etiam materialiter integram, ita, ut omnia, etiam directe, subjiciantur clavibus; quapropter, licet quis ab iis peccatis, quae post diligentem discussionem conscientiae memoriae non occurrunt, aut quae ob justam causam omisit, indirecte sit absolutus, si tamen postea in memoriam redeunt, tenetur adhuc ea explicite confiteri; imo etiam ea, quae prius ut dubia confessus fuit, si postea ut certa agnoverit. Neque obstat Trid. dum ait, confessionem non esse carnificinam, cum nihil aliud a poenitentibus exigatur, quam ut post diligens examen omnia confiteantur peccata, quae memoriae occurrant, reliqua vero eadem confessione inclusa esse intelligi; nam intelliguntur inclusa in ordine ad absolutionem indirectam, non autem directam; nemoque aliud exigit, quam ut ea, quae memoriae occurrunt, exponantur. Atqui, si postea in memoriam redeant, utique memoriae occurrunt.

Neque obstat 2, quod generaliter absolutus ab omnibus censuris non indigeat amplius absolutione, etiamsi absolvens non omnes censuras cognoverit; nam absolutio a peccatis exigit discussionem & cognitionem causae, ut congrua poena & medicina adhiberi possit; non autem per se exigit talem absolutio a censuris, cum possit etiam conferri sine confessione. Certe, si remissio peccatorum

catorum semper sufficeret, nemo teneretur confiteri, qui perfecta contritione ea delevit.

Prop. 12.

Casus
reservati
Episcopo.

Mendicantes possunt absolvere a casibus Episcopo reservatis, non obtenta ad id Episcoporum facultate.

Observ. Mendicantes olim varia a summis Pontificibus obtulerant privilegia, absolvendi ab omnibus casibus reservatis Papæ & Episcopis, exceptis iis, qui sunt in Bulla Cœnæ, & 6 aliis, a Clem. VIII specialiter reservatis, videlicet, violatione immunitatis Eccles. aut clausuræ Monialium, duello, percussione Clerici, simonia reali, & confidentiali. Urb. VIII prohibuit, ne Regulares a casibus, Episcopo reservatis, absolvant.

Varia inde ortæ disputationes, alii dicebant, ejusmodi constitutiones tantum Romæ fuisse promulgatas, aut communitatibus, Regularibus non intimatas debito modo: alii, eas non esse debite munitas clausulis derogatoriis: alii alia effugia quærebant, donec Alex. VII præfixam propositionem damnavit. Possunt tamen Mendicantes probabiliter adhuc absolvere e casibus occultis reservatis Papæ, exceptis semper casibus Bullæ Cœnæ: imo etiam a reservatis Episcopo, qui non exstant in tabella seu catalogo reservatorum ab Episcopo. Videatur Viva in hanc propositionem.

Prop. 13.

De Cen-
tesario
non appro-
bato.

Satisfacit præcepto annuæ confessionis, qui confitetur Regulari, Episcopo præsentato, sed ab eo injuste reprobato.

Observ. Ratio est, quia Trid. præter jurisdictionem, ordinariam vel delegatam, requirit in sacerdote approbationem, ab Episcopo factam ad audiendas confessiones, tanquam requisitum essenziale; ubi ergo hæc deest, invalida est absolutio, sive juste sive injuste ab Episcopo negetur.

Injuste autem approbatio Regulari negatur, si sit idoneus; quia a Pontificibus Mendicantes acceperunt jurisdictionem universalem, velut quidam parochi delegati, consequenter jus habent ad approbationem. Si tamen Episcopus eam neget, absolutio, quam impertit secularibus, etiam sacerdotibus, omnino irrita;

rita; per confessionem autem invalidam non satisfit præcepto confessionis annuæ.

Neque verum est, quod approbatio, injuste negata, haberi possit pro concessa. Sic, licet Episcopus Petro injuste neget Beneficium parochiale, non tamen potest se gerere pro paroco. matrimonium invalidum est sine præsentia parochi, licet hic injuste illam neget. Licet etiam Ecclesia suppleat aliquando defectum jurisdictionis, ut, cum sacerdos absolvit cum jurisdictione vere probabili, aut in casu erroris communis; non tamen supplet, cum ab Episcopo negatur approbatio; alias quilibet posset, judex in propria causa, se censere idoneum, & approbationem sibi injuste negari, & cur non etiam sacerdos secularis posset ita judicare?

Prop. 14.

Qui facit confessionem voluntarie nullam, satisfacit præcepto Ecclesiæ.

Observ. Ratio damnandi est, quia Ecclesia præcipit Sacramentum poenitentiae ad remissionem peccatorum. qui autem facit confessionem voluntarie nullam, hoc præceptum nullatenus implet, sed abutitur confessione ad multiplicanda peccata. Per hoc tamen non nego, satisfactorium, qui susciperet Sacramentum validum sed informe, e. g. si de peccato furti doleret ex motivo particulari, non autem de delectatione morosa, ejus tunc non recordatur.

Quidam hanc prepositionem docuerunt ex ea persuasione, quod Ecclesia non præcipiat actum internum. Si ergo quis omittat actum internum doloris de peccatis, talem facere quidem confessionem voluntarie nullam, nihil tamen omittere, quod sub præceptum Ecclesiæ cadat. Verum probabilius Ecclesia directe etiam actus mere internos potest præcipere ac prohibere; dein certum est, quod saltem indirecte id possit, præcipiendo directe actum externum, & sic etiam indirecte internum, sine quo externus rite fieri non posset. non posset autem rite fieri peccatorum confessio externa, sine dolore & proposito interno.

Prop. 15.

Pœnitens propria auctoritate potest sibi substituere alium, qui loco ipsius poenitentiam impleat.

Observ. Cur non dicis, quod etiam per alium possit confiteri, contritionem elicere, Missam audire, jejunare, recitare Pœnitentia
a quo im-
plenda.

Pars IX.

B

Bre.

Breviarium? sicut igitur hic exigitur actio personalis, sic etiam in præstanda satisfactione. Igitur regula illa: *poteſt quis per alium, quod facere poteſt per ſe ipſum*; hic non procedit, ubi requiritur personale obſequium. Et ratio ulterior eſt, quia ſatisfactio imponitur a Confefſario in vindictam ſclerum, & pœnam medicinalem præſervativam, ut rigor ſaltem pœnitentiæ a peccatis abſterreat, unde pœnitens neque poteſt hanc ſatisfactionem in opus melius commutare. Neque paritas eſt cum voto; nam per illud vovens ſibi ipſi obligationem imponit.

Prop. 16.

De non approbato. *Qui Beneficium curatum habent, poſſunt ſibi eligere in confefſarium ſimplicem ſacerdotem, non approbatum ab ordinario.*

Obſerv. Ergo vera eſt contradictoria: *non poſſunt.* Jam Trid. S. 23. c. 15. exegit in confefſario, etiam ſæcularium ſacerdotum, vel Beneficium parochiale, vel ſpecialem approbationem Epifcopi, hoc eſt, iudicium de idoneitate.

Prop. 17.

De homicidio. *Eſt licitum Religioſo & Clerico, calumniatorem, gravia crimina de ſe, vel de ſua religione ſpargere minitantem, occidere, quando alius modus defendendi non ſuppetit; uti ſuppetere non videtur, ſi calumniator ſit paratus, vel ipſi Religioſo, vel ejus Religioni, publice & coram graviffimis viris prædicta impingere, niſi occidatur.*

Prop. 18.

Licet interficere falſum accuſatorem, falſos teſtes, ac etiam iudicem, a quo iniqua certo imminet ſententia, ſi alia via non poteſt innocens damnum vitare.

Obſerv. Scandalofa doctrina, in utraque hac propoſitione contenta, ſi vigeret, mundum impleret homicidiis, cum magna Reipublicæ perturbatione. Ut poſſit invaſor interfici, duo requiruntur. 1 quod evidenter graviffimum damnum inferat. 2 quod certo & evidenter non poſſit damnum illud alia via impediri. Quæ duæ conditiones raro concurrunt. Propoſitiones autem iſtæ duæ ſunt nimis generales, quia limitationes iſtas non apponunt. Neque etiam excipiunt Principem, cujus vita ſacroſancta haberi debet.

Prop.

Prop. 19.

Non peccat maritus occidendo propria auctoritate uxorem, in adulterio deprehensam.

Observ. Thesis est scandalosa; quia non licet homini privato interficere hominem & mittere ad infernum, qui neque vitam, neque bona fortunæ invadit. Dicitur equidem in Jure civili, ad leg. Juliam de adult. *Patri datur jus occidendi adulterum cum filia, quam in potestate habet.* Sed hoc intelligendum est de foro externo, quod leges civiles non puniant eam occisionem, non autem, quod eam positive licitam faciant. Et, si facerent, Jus civile in hac parte a Canonico esset correctum. Non vindicta privata, sed per judicia publica plectenda sunt scelera.

Prop. 20.

Restitutio, a Pio V imposita Beneficiatis, non recitantibus, non debetur in conscientia, ante sententiam declaratoriam judicis, eo quod sit pena. *Restitutio.*

Observ. Ratio proscribendi hanc thesin est; quia juxta Concilium Lateran. V sub Leone X, & Constit. Pii V Beneficiatus, non recitans horas Canonicas, *fructus non facit suos*; sed debent restitui fabricæ Ecclesiæ, vel pauperibus. Ergo hoc fieri debet ante omnem sententiam; quia res aliena, quæ nullo jure detinetur, restitui debet ipso jure naturali absque ulla interpellatione.

Pœna equidem, quæ requirit actionem positivam hominis, ordinarie non incurritur ante omnem sententiam judicis; aliud tamen est circa restitutionem rei alienæ, quæ injuste detinetur; nam Ecclesia Beneficiato non confert fructus, nisi sub conditione recitationis, quæ conditio, si non impleatur, nullum jus ad eos acquirit. Et sane, nisi daretur obligatio restituendi ante sententiam, Constitutio Lateranensis & Piana vix unquam obtinerent finem; quia vix est, qui clericum accuset de omissa recitatione Breviarii, aut probare possit, non fuisse privatim recitatum. Cæterum, si Beneficiatus vere esset pauper, non viderem, cur fructus non posset sibi tribuere tanquam eleemosynam; non enim deterioris est conditionis, ac alii pauperes.

Prop. 21.

Habens capellaniam collativam, aut quodvis aliud Beneficium Ecclesiasticum, si studio litterarum vacet, satisfacit suæ obligationi, si officium per alium recitet. *Recitatio officii.*

Observ. Dubitabatur olim, an Præstimoniam, quæ juvenibus conferuntur ad peragenda studia, sint Beneficia Ecclesiastica, quibus annexa sit obligatio recitandi Horas, an vero meræ pensiones, quibus impositum sit onus recitandi officium B. V. Pius V dubium sustulit, deciditque, quod sint Beneficia cum onere recitandi Horas, ac proin hoc onus esse *personale*, quod quilibet per se ipsum portare debeat; sicut per se ipsum Missam audire, & jejunare debet.

Prop. 22.

Simonia. *Non est contra justitiam, Beneficia Ecclesiastica non conferre gratis; quia collator conferens illa, pecunia interveniente, non exigit illam pro collatione Beneficii, sed veluti pro emolumento temporali, quod tibi conferre non tenebatur.*

Observ. Ratio damnandi est, quia collator vi proprii muneris & ex voluntate fundatoris & Ecclesiæ, tenetur ex justitia distributiva Beneficia Ecclesiastica dignioribus gratis conferre, contrahitque labem simoniæ, si exigit pecuniam, etiam sub prætextu emolumenti temporalis; nam hoc est annexum Beneficio, seu juri percipiendi fructus temporales, ut enim loquitur Pontifex, qui vendit id, sine quo alterum non provenit, neutrum invenditum relinquit. atqui emolumentum temporale non provenit, nisi ex Officio & Beneficio Ecclesiastico, seu ex jure spiritali ad fructus: ergo nec Beneficium & Officium spirituale invenditum relinquit.

Prop. 23.

Jejunium. *Frangens jejunium Ecclesiasticum, ad quod tenetur, non peccat mortaliter, nisi ex contemptu vel inobedientia hoc faciat, puta quia non vult subicere se præcepto.*

Observ. Ex hoc sequeretur, quod nunquam peccetur graviter, violando præcepta (saltem Ecclesiastica) nisi id fiat ex contemptu legis aut legislatoris. Certum autem est, quod graviter peccetur, ponendo objectum aut actum, graviter prohibitum, aut omittendo graviter præceptum, licet id fiat citra formalem contemptum legis. Cum igitur jejunium sit gravis præceptum, prout declarat consuetudo, persuasio fidelium, & perpetua Ecclesiæ traditio, non jejunando graviter peccatur, licet non accedat formalis contemptus legis: *formalis*, inquam; nam omnis deliberata transgressio legis videtur virtutalem quandam ejusdem contemptum continere.

Prop.

Prop. 24.

Mollities, sodomia, bestialitas, sunt peccata ejusdem speciei infima, ideoque sufficit dicere, se procurasse pollutionem. Peccata contra naturam.

Observ. Absurdam hanc propositionem docuit Caramuel contra communem Theologorum, falso interpretans id, quod docuit S. Thomas 2 2 q. 104 a. 1, videlicet, sex esse species luxuriae consummatae, fornicationem, adulterium, incestum, stuprum, raptum, & peccatum contra naturam. Verum S. Doctor per peccatum contra naturam non assignavit speciem infimam sed subalternam.

Sicut virtutes specificantur ab objecto formali seu motivo eas praecipendi formaliter diverso, sic etiam peccata a motivo legis, ea prohibentis, quod est specialis turpitudine foetorque, ex peccato redolens. Diversa autem omnino turpitudine redolet ex mollitie, sodomia, & bestialitate: inter istas mollities foedum est peccatum, sodomia foedius, bestialitas foedissimum. Neque differunt tantum secundum circumstantias, intra eandem speciem aggravantes, sed tota specie, propter diversam foeditatem ex iis emergentem.

Prop. 25.

Qui habuit copulam cum soluta, satisfacit confessionis praecepto, dicens: commisi cum soluta grave peccatum contra castitatem, non explicando copulam. De fornicatione.

Observ. Potest quis cum soluta varia specie peccata committere contra castitatem, e.g. tactus, pollutionem, fornicationem, stuprum, imo & adulterium, si ipse sit ligatus, aut sacrilegium, si habeat votum, vel incestum, si sit consanguinea &c. quomodo ergo potest satisfacere dicendo generice: commisi cum soluta grave peccatum contra castitatem? Possunt nempe contra eandem virtutem, generice spectatam, diversae moraliter resultare inhonestates, quae speciem peccati mutant, & in confessione sunt exponendae, ut poenitens peccatum suum exponat. Quin imo licet actus externus non differat numero & specie ab interno, tamen est exponendus, ut nemo prudens dubitat: cum vere sit peccatum; hinc non est paritas cum effectu, ex peccato secuto, e.g. morte, ex porrectione veneni secuta; quamvis etiam ejusmodi effectum exponendum esse non pauci doceant, quia saltem in causa fuit liber; imo etiam suo modo in se ipso, si mala voluntas occidendi perduret.

Prop. 26.

An iudici *Quando litigantes habent pro se opiniones æque probabiles, potest munera? judex pecuniam accipere pro sententia ferenda in favorem unius præ altero.*

Observ. Judex debet justitiam gratis administrare, ita, ut ne quidem possit acceptare munera, ultro oblata: & in calu æqualis probabilitatis non potest uni totam causam adjudicare, sed vel debet litigantibus transactionem suadere, vel, si nolint transigere, rem controversam inter eos æqualiter dividere: si autem res esset indivisibilis, per sortem uni rem vel alio modo alteri dimidium æstimationis addicere. In iudice non datur casus pro amico. Causæ merita & rationum pondera utrinque imponenda lanci, non favor aut gratia.

Prop. 27.

Probabili- *Si liber sit alicujus junioris & moderni, debet opinio censeri pro- litas. babilis, dum non constet, rejectam esse a sede Apost. tanquam improbabilem.*

Observ. Ex hoc sequeretur, quod si heteroclitum ingenium, novitatis pruritu, contra communem omnium Theologorum sententiam, opinionem novam procuderet, hæc habenda esset probabilis; quod sane est absurdissimum. Probabile est, quod nititur gravi fundamento, quæ virum constantem ad prudentem assensum movere queat. Quis autem dicat, auctoritatem unius junioris, toti reliquorum auctoritati contradicentis, tam grave esse fundamentum? temeritas est, non probabilitas. Quot improbables ac falsissimæ opiniones, sicut ab antiquis, sic etiam a modernis, in medium sunt allatæ! sicut proverbio dicimus: *nulla absurditas sine patrono, nulla fæditas sine amatore.* An probabiles dicamus? utinam scriptores quidam non tam incauti facilesque essent in asserenda hujus vel illius propositionis probabilitate, innoxius profecto esset Probabilismus, bene intellectus.

Neque obstat, quod libri, antequam edantur, censoribus subjiciantur; nam hi non raro vel ex negligentia, vel deproperatione, vel imperitia, vel aliqua auctoris æstimatione præventi, non satis considerant, quæ ex tali doctrina consequi possent.

Verum quidem est, quod homo indoctus possit sequi sententiam viri docti, vel parochi, quos satis doctos existimat; non tamen, si sciat, sententiam illam esse singularem, contra communem Theologorum assertam. Sic etiam viri prudentis est, quamvis

vis se doctum existimet, ingenio suo non nimium confidere, nec a via trita, quod exoticorum est, abhorrere. Impendat ingenium doctrinæ communi magis firmandæ.

Per hæc tamen non nego, posse unum auctorem, qui materiam mature discussit ac rationibus firmavit, propter excellentem suam doctrinam & probitatem, sententiam aliquam singularem reddere probabilem. Sic teste Gallego de *consc. prob. dub.* 21. S. Thomas multa scripsit, & docuit contra alios, qui ante ipsum scripserunt; & tamen ejus opiniones statim, ac ab ipso traditæ sunt, existimatæ sunt probabiles, tum propter maximam ejus auctoritatem apud Theologos, tum quia non levibus, sed rationabilibus fundamentis ductus est, ad sic opinandum.

Notandum etiam, quod advertit Bardi apud Viva, d. 4 de *consc. c. 4.* quod in rebus ad Theologiam spectantibus non satis sit consulere Theologum mere speculativum, magnæ licet sit auctoritatis, si in Morali Theologia & Jurisprudencia parum sit versatus. Plurimi enim pollent ingenio, non tamen judicio prudentiali, & ideo in Scholastica eminent, in Morali & Jurisprudencia claudicant. Accedit, quod aliqua speculative videantur probabilia, non tamen practice.

Prop. 28.

Populus non peccat, etiamsi absque ulla causa non recipiat legem, a Principe promulgatam.

Observ. Scandalosa & rebellis thesis! ergo vana & enervis Acceptatio est omnis potestas legislativa: Princeps dependet a subditis: non legis. regit, sed regitur: falsum est illud juris naturalis principium: *legitime imperanti obtemperandum est.* Et cur non eodem jure dicamus, nullum superioris præceptum obligare, nisi a subdito ultro acceptetur, sed in cujusque arbitrio stare, jugum obedientiæ excutere? Si ita est, omnes pœnæ sunt injustæ, quas Princeps, sive ecclesiasticus sive secularis, irrogat transgredientibus legem, & Superior communis refractario.

Dixisset saltem auctor hujus propositionis, legem non obligare, si sit nimis ardua; at dicere, populum non peccare etiam tunc, quando *absque ulla causa* non recipit legem, hoc enimvero est nimis absonum.

Supponere videtur auctor hujus erroris, ad essentiam legis requiri acceptationem populi, ac proinde, cum non acceptatur, esse nullam, consequenter populum non peccare. At suppositum istud

istud est falsum; & licet verum esset, populus tamen peccaret, non acceptando, dum Princeps jubet eam acceptari.

Princeps ecclesiasticus potestatem suam non habet a populo, sed a Christo: in Principem vero Monarchicum, secularem, sicut olim per legem Regiam, translata est potestas legislativa. Aliud est in regimine non Monarchico, in quo Princeps simul cum Optimatibus legem condit, aut in Aristocratico, in quo Optimates vel Senatus, & in Democratico, in quo populus fert legem.

Verum quidem est, populi acceptionem etiam in regimine Monarchico & independente requiri ad firmitatem & constantiam legis; nam si populus legem non acceptet aut observet, per usum contrarium abrogatur, si Princeps conniveat, & sic tacite, observantiam non urgendo, retractet; primi nihilominus, qui legem absque iusta causa non acceptant, aut eam non observant, peccant, donec usu contrario, continuato longo tempore, cum consensu, saltem legali, Principis sit abrogata.

Et ita intelligendum venit, quod dicitur *l. de quibus ff. de legib. leges ex nulla alia causa nos tenent, quam quod iudicio populi receptæ sunt*. Nam, si non recipiantur, dissimulante legislatore, per consuetudinem contrariam abrogantur, adeoque non amplius nos tenent. Et in hunc sensum loquitur Gratianus *in cap. in illis dist. 4. leges instituuntur, dum promulgantur, firman- tur, dum moribus utentium approbantur*. Id est: valent quidem & obligant; sed si populus eas non observet longo tempore, rursus abrogantur per consuetudinem contra legem.

Condemnatio harum Propositionum.

Has 28 Propositiones Alex. VII, re mature considerata, damnavit ad minimum tanquam scandalosas, ita, ut quicumque illarum aliquam docuerit, defenderit, ediderit, aut de iis etiam disputaverit, publice, aut privatim, nisi forsan impugnando, ipso facto incidat in excommunicationem, Pontifici reservatam, prohibetque gravissime, ne quis fidelium eas in praxin deducat.

§. 2.

Aliæ 17 Propositiones ab Alex. VII damnatæ.

Sequenti dein anno 18 Martii 1666 alias 17 damnavit, per plures Theologiæ Magistros, & S. R. E. Cardinales, Generales Inquisitores prius examinatas; quæ sunt sequentes.

Prop.

Propositio 29.

In die jejunii, qui sapius modicum quid comedit, etsi notabilem quantitatem in fine comederit, non frangit jejunium.

Observatio. Ratio reprobandi est; quia sic eluderetur vel omnino eviti posset præceptum jejunii; quia multæ comestitionculæ, Jejunium. eadem die factæ, coalescunt moraliter, & æquivalent uni comestitioni notabili, repugnantque non minus fini jejunii, nempe macerationi carnis. Et hinc graviter peccas contra præceptum jejunii, si sapius manducando advertas, te perventurum ad quantitatem notabilem, frangisque jejunium, sicut, qui advertit, se per parva furtiva perventurum ad summam gravem, graviter contra justitiam peccat. Imo tamen si prius sapius manducando aut furando non adverteris, te perventurum ad quantitatem gravem, si tamen advertas in ultima comestitione aut furto, te complere quantitatem gravem, mortaliter peccas, si non omittas, non quod ultima illa comestio aut furtum se solo sit peccatum grave, sed quia cum præteritis moraliter coalescit, & sic complet quantitatem gravem. Idem dicendum de eo, qui sæpe in eodem officio aliquid omittit, aut die festo sæpe aliquid laborat, nam peccat graviter, quando ad quantitatem notabilem pervenit.

Verum quidem est, quod plura venialia non æquivalent uni mortali, sed nego, quod sit veniale, si advertas te pervenire ad quantitatem gravem eadem die jejunii. Aliud est, si singulis jejunii diebus aliquid parum comedas; nam comestiones plurium dierum non ita coalescunt, cum jejunium unius diei non respiciat jejunium alterius diei; sed quodlibet sit affixum suæ diei. Idem, si voveas, quotidie modicam eleemosynam dare, aut brevem orationem peragere, & obligationem cuilibet diei affigas. Aliud autem, si in communi & conjunctim voveas.

Prop. 30.

Omnes officiales, qui in Repub. corporaliter laborant, sunt excusati ab obligatione jejunii, nec debent se certificare, an labor sit compatibilis cum jejunio.

Observ. Thesis hæc est nimium generalis, non distinguens inter corporales labores graves & leves, magnos & parvos, multum defatigantes, & parum: quali vero quilibet labor corporalis excuset ab obligatione jejunii. Si scriba aliquot lineas describat pro Republica, an propterea excusandus a jejunio?

Prop. 31.

Excusantur a præcepto jejunii omnes illi, qui iter agunt, equitando, utcumque iter agant, etiamsi iter necessarium non sit, & etiamsi iter unius diei conficiant.

Observ. Præceptum jejunii obligat, quoties sine magno incommodo servari potest. At sæpe sine magno incommodo iter peragi potest, præsertim equo vel curru, imo etiam cum oblectatione & recreatione, sine notabili defatigatione; talem autem excusari a jejuniio dici non potest, licet iter unius diei faciat.

Prop. 32.

Non est evidens, quod consuetudo non comedendi ova & lacticia in quadragesima obliget.

Observ. Consuetudo legitime præscripta, est lex non scripta, obligatque sicut leges scriptæ. Ubi ergo consuetudo introduxit, ut diebus jejunii abstinence non tantum a carnibus, sed etiam ab ovis & lacticiis, evidens est, quod detur obligatio ab iis abstinendi; nam jejunium præcipue regulatur secundum consuetudinem, legitime præscriptam. Nos autem in Germania circa ova & lacticia aliam consuetudinem habemus.

Prop. 33.

Restitutio. Restitutio fructuum ob omissionem Horarum suppleri potest per quas-cunque eleemosynas, quas Beneficiarius de fructibus sui Beneficii fecerit.

Observ. Ratio prohibendi est, quod, si quis prius eleemosynas prorsus liberaliter & gratis fecerit, ex virtute misericordiæ erga pauperes, hæc eleemosyna jam transit in dominium pauperis; unde, si postea horas omittat, non potest amplius illas eleemosynas in restitutionem, ex justitia debitam, computare: sed ex justitia debet novas eleemosynas facere, aut fructus fabricæ suæ Ecclesiæ restituere. Unde falsum est, quod restitutionem per quas-cunque eleemosynas possit facere.

Prop. 34.

In die Palmarum recitans officium Paschale satisfacit præcepto.

Officium.

Observ. Caramuelis hæc thesis, (quam postea revocavit) aperte est contra Decretum Pii V, qui in virtute S. obedientiæ præcepit, ut ritus, in Breviario Romano præscriptus, observetur, neminemque nisi hac sola formula posse satisfacere. Unde graviter peccat, qui ab ea notabiliter recedit, venialiter vero ob parvitatem

vitatem materiæ ab iis, qui citra rationabilem causam ab ea recedunt. Atqui recitans in die Palmarum officium Paschale notabiliter a ritu præscripto recedit: ergo non satisfacit præcepto, & graviter peccat; quia talis mutatio officii longissimi in brevissimum est variatio valde notabilis & substantialis; quidquid sit, an mutatio officii de uno sancto in officium de alio sancto sit notabilis & substantialis, in quo DD. non conveniunt.

Prop. 35.

Uno Officio satisfieri potest duplici præcepto pro die præsentis & crastino.

Observ. Officium est ita affixum cuilibet diei, ut pro quolibet recitari debeat, ut patet ex communi sententia, persuasione, praxi, consuetudine omnium timoratorum. Quomodo ergo unico officio satisfieri possit pro duobus diebus? solutione unius aurei debito duorum aureorum? Cur non etiam dicis, uno officio satisfieri posse pro toto anno? Aliud est de impletionem plurium præceptorum, eandem actionem præcipientium, e. g. si concurrant præceptum naturale, Divinum & humanum; quia omnia unum eundemque actum præcipiunt. Satisfacis una Missa, si concurrat Dominica & festum Apostoli, uno jejuniis, pervigilio incidente in quadragesimam, quia unum tantum, licet ex duplici motivo, præcipitur. At in nostro casu pro duobus diebus duo officia præcipiuntur.

Prop. 36.

Regulares possunt in foro conscientie uti privilegiis suis, quæ sunt expresse revocata per Concilium Tridentinum.

Observ. Ante proscriptionem hujus propositionis variæ erant de hac re sententiæ, propter varias Pontificum Ordinationes, varia privilegia, modo concedentes, modo iterum revocantes. Sed nunc assurgendum decisioni Alexandri VII, propositionem prædictam condemnantis. Rationem prohibendi videntur præbuisse variæ controversiæ, & lites, inter Episcopos, & Regulares circa usum privilegiorum exortæ.

Prop. 37.

Indulgentiæ, concessæ Regularibus, & revocatæ a Paulo V, hodie sunt revalidatæ.

Observ. Paulus V, cum Indulgentiæ nimis excreverent, non omnes certæ, anno 1606 omnes revocavit, novasque concessit. Idem Paulus V postea omnes Societati nostræ restituit, & per

De Indulgentiis revocatis.

communicationem privilegiorum, etiam aliis Ordinibus Mendicantibus. Urbanus VIII V. V. O. rursus revocavit. Unde orta inter DD. multiplex disputatio. Condemnatio hujus propositionis id solum decidit, Indulgentias, a Paulo V revocatas, hodie non esse revalidatas. Certissimæ autem sunt Indulgentiæ, quas post Urbanum VIII Pontifices concesserunt, quales sunt plurimæ; quas non vacat hic longo catalogo attexere.

P. Viva in sua Trutina ad hanc propositionem existimat, eos etiam lucrari indulgentias, qui tantum probabilitatem habent de concessione, eo quod Pontifex in tali casu suppleret easque concedat, licet in se non subsisterent, sicut supplere censetur Jurisdictionem in casu erroris communis; imo eum etiam Indulgentias lucrari, qui nescit, esse concessas, modo opera præscripta peragat; quia, sicut in auditione Missæ non præcipitur intentio satisfaciendi præcepto, sed, ut Missa audiat, sic non injungi intentionem lucrandi indulgentiam, sed opera. Ego sæpius parochis, qui dubitabant, an hæ vel illæ Indulgentiæ sint revera legitimæ, suasi, ut non multum se opponant, ex ea ratione, quod ex ea persuasionem innocenti fiat confessio peccatorum, sacre Synaxis sumptio, alia opera bona. Licet igitur Indulgentiæ re ipsa non subsisterent, ista pientissima opera nemini nocerent, operanti autem multum proderent. Certe sæpius in confessionali interrogatus, an has vel illas Indulgentias, de quibus dubitabam, lucrari possint, respondi, Sacramentum poenitentiae cum satisfactione imposita, Sacramentum Eucharistiæ devote susceperent, bona opera peragerent, semper ab his haberi indulgentiam.

Prop. 38.

De confitendo quam primum.

Mandatum Tridentini, factum sacerdoti, sacrificanti ex necessitate cum peccato mortali, confitendi quamprimum, est consilium, non præceptum.

Observ. Habemus ergo ex proscriptione hujus thesisi, mandatum illud, quamprimum confitendi, non esse tantummodo consilium, sed præceptum, & quidem grave, sicut præceptum audiendi Missam, jejunandi &c. prout DD. consensus, communis persuasio, usus & consuetudo, optimus legum interpretes, declarant. Licet enim talis sibi persuadeat, se contritionem perfectam elicuisse ante sacrificium, & per eam sibi remissum esse mortale, de hoc tamen non est certus; quare reverentia Sacramenti, quod alio die rursus vult conficere, requirit, ut prius confiteatur suum peccatum, necdum expositum; &, si longo tempore non amplius sit

sit celebraturus, nihilominus tenetur vi hujus præcepti Ecclesiastici brevi confiteri.

Prop. 39.

Illā particula quamprimum intelligitur, cum sacerdos suo tempore confitebitur.

Observ. Torta est hæc expositio & absurda. *Quamprimum* aliud significat: deinde, si hic esset sensus, otiosa esset condemnatio hujus propositionis, cum apud omnes certum sit, in proxima confessione mortale, necdum expositum, jure Divino esse subjiciendum clavibus: cæterum illud *quamprimum* DD. censent, esse accipiendum moraliter pro diversitate materiarum & circumstantiarum, & in nostro casu sumi posse pro triduo, ita, ut intra triduum sacerdos teneatur confiteri. Si tamen post celebrationem statim haberet copiam confessarii, ultra triduum non amplius habiturus, teneretur statim post Missam confiteri, ut huic præcepto satisfaciatur.

Prop. 40.

Est probabilis opinio, quæ dicit, esse tantum veniale osculum, habitum ab delectationem carnalem & sensualem, quæ ex osculo oritur, secluso periculo consensu ulteriores & pollutionis. *De osculis.*

Observ. Omnis delectatio carnalis seu venerea, deliberate quæsitā, est peccatum mortale, nec datur in ea parvitas materiæ, ab eo excusans; quia semper datur ratio graviter prohibendi, nempe periculum proximum, in tanta naturæ lubricitate, & vehementia tentationis, ad ulteriorem majoremque delectationem progrediendi; nam omnis delectatio carnalis est inchoata pollutio &c. qui autem amat periculum, peribit in illo.

Igitur osculum, amplexus, tactus, & actus quicunque positus deliberate propter delectationem veneream, quæ ex actu illo percipitur, semper est peccatum mortale, licet quis statuatur in ea sistere, & non ulterius progredi; imo delectatio morosa, etiam si in nullum actum externum prodeat, jam per se ipsam est peccatum grave.

Si doctrina hæc severior cuipiam ex carnali hoc sæculo appareat, cogitet, illam Juris naturalis, Divini & humani esse, atque hinc arctam ad cælum viam, quod vim patitur, a violentis rapiendum; relictumque nobis stimulum ad agonem, ut cælum mereamus. Jugum Domini nihilominus suave & onus leve, sed diligentibus DEUM, qui non patitur nos tentari supra id, quod cum

ejus gratia possumus; auxiliaque nobis suppeditat in tempore oportuno; qualia sunt, præter ejus gratiam (quæ suffecit Paulo contra stimulum carnis) oratio, aversio phantasie, fuga otii & occasionis, generosa resistentia, initiis opposita, edomatio carnis &c. Quamvis autem omnis delectatio carnalis extra matrimonium plene deliberata sit peccatum grave, nullaque detur in ea parvitas materie, sæpe tamen peccatum tantum veniale, aut omnino nullum, committitur ex indeliberatione actus, quia scilicet committitur, sine plena deliberatione, id est, sine plena advertentia intellectus, ad malitiam gravem, aut sine pleno consensu voluntatis. Distinguendum etiam inter delectationem carnalem seu veneream, & inter mere sensualem, quæ ex proportionem sensus cum objecto oritur, dum e. g. visus intuetur pulchrum florem, auditus percipit suavem musicam, odoratus delectatur odore grato, gustus cibo aut potu amœno, tactus panno molli &c.; nam quamdiu in hac proportionem sensus cum suo objecto sistitur, non peccatur graviter.

Prop. 41.

De concubinario,

Non est obligandus concubinarium ad ejiciendam concubinam, si hæc nimis utilis esset ad oblectamentum concubinari, vulgo Regalo, dum deficiente illa nimis agre ageret vitam, & aliæ epulæ tædio magno afficerent concubinarium, & alia famula nimis difficile inveniretur.

Observ. Scandalosa sane propositio, quam docuit Joannes Sanchez, alias etiam sæpius in laxitatem effusus. Quid hoc aliud, quam molle pulvinar peccatoribus consuetudinariis substernere? Talis concubinarium est in periculo proximo peccandi mortaliter, nec datur physica aut moralis impossibilitas, eam deferendi; neque enim talis est melancholia, tædium, molestia, quam sentit ex absentia concubinæ, quamvis deesset alia famula, quæ tam sapidas epulas præpararet.

Occasio autem proxima est, in qua sæpe peccatur, remota, in qua raro. Unde fit, ut occasio, quæ respectu unius est remota, respectu alterius possit esse proxima. Hæc rursus alia est voluntaria, quæ moraliter potest deferri, alia involuntaria, & necessaria, quæ vel omnino non potest, vel non nisi cum summa difficultate potest deferri.

Remota non debet necessario deferri: alias oporteret mundo exire; nullus posset sequi militiam, mercaturam &c. nec posset acceptare officium aliquod periculosum. Proxima voluntaria de-

ferri

feri debet, si possit. Si oculus tuus scandalizat te, evellere eum & projicere jubet Dominus. Involuntaria, cum non possit, non debet deferri materialiter, debet tamen deferri formaliter, non amplius peccando, aut ex proxima occasione faciendo remotam. Si tamen propter occasionem proximam non sublatam identidem relaberetur, neganda ei foret absolutio, nisi prius concubinam ejiciat, aut aliam occasionem proximam deferat, etiamsi maxima in hoc esset difficultas; quia alias sperari prudenter non potest emendatio, eo quod talis occasio ei sit formaliter proxima. De hac materia sæpius recurret sermo, ob plures propositiones, ab Innoc. XI damnatas.

Prop. 42.

Licetum est mutuanti aliquid supra sortem exigere, si se obliget Usura. ad non repetendam sortem usque ad certum tempus.

Observ. Propositio hæc est nimium generalis, includens etiam casum, quo mutuans ex dilatione restitutionis nullum pateretur damnum. Hoc autem est falsum; nam contractus mutui talis est naturæ, ut non plus, quam tantundem exigatur restitui, quantum fuit datum. Unde omne lucrum, quod solo titulo mutui supra sortem exigitur, est usura lucratoria, stricte dicta, omni jure, naturali, Divino, & humano prohibita, sicut furtum, intrinsece mala: imo species quædam furti, eodem cum illo præcepto septimo prohibita, ut facile agnoscunt omnes Theologi & docti Juristæ. Et quid inordinatius, quam ex re aliena velle lucrari a mutuuario, in quem totum dominium fuit translatum, cuique mutuum perit, si perit.

Neque obstat, quod mutuarius ultro usuram promittat; nam excessum supra sortem non donat, ut supponitur, sed titulo mutui exactum dat, alias non accepturus mutuum.

Per hoc tamen nequaquam reprobantur alii tituli, legitimi & iusti, pecuniam utiliter expendendi, uti emptione census, contractu societatis &c. neque in ipso etiam mutuo seu occasione mutui prohibitum est aliquod auctarium petere ratione lucri cessantis, damni emergentis, aut veri periculi amittendæ sortis, aut etiam legis, permittentis occasione mutui moderatum auctarium, illiusque dominium in creditorem seu mutuante transferentis, prout illud transfert in præscribentem: quibus titulis excusandum puto censum Germanicum, apud plures nationes consuetum. Nunquam tamen licet titulo solius mutui vel minimam quid ultra sortem exigere.

Prop.

Prop. 43.

Legatum. Annuum legatum, pro anima relictum, non durat plus, quam per decem annos.

Observ. Videtur hæc thesis supponere, quod animæ in purgatorio non detineantur ultra decennium, quod aliqui putabant, ac proin, cum cesset finis, cessare etiam obligationem annui legati, ut DD. aliqui cum Soto existimarunt; hoc autem suppositum est prorsus arbitrarium, nullo subsistens fundamento probabili. Cur non dicis eodem jure, hoc est, nullo, animas in purgatorio detineri tantum 5 annis, aut 20, aut cum aliis somniatoribus, omnes detineri usque ad extremum Judicium? Cum ergo hoc suppositum sit omnino incertum, quomodo in eo fundare possis cessationem obligationis certæ. Sed neque præscriptionis præsidio tueri te potes, quamne quidem inchoare potuisti.

Prop. 44.

Censuræ. Quoad forum conscientie, reo correcto, ejusque contumacia cessante, cessant censura.

Observ. Censuræ non cessant, nisi per absolutionem: sicut enim natæ sunt per actum jurisdictionis ecclesiasticæ, sic etiam dissolvi debent, secundum illud: *quodcunque ligaveris*. Licet ergo reus sit correctus, & contumacia cessaverit, non tamen hoc ipso ante absolutionem cessat censura, licet etiam per actum perfectæ contritionis te in statum gratiæ reposueris. Sicut post extinctum reatum culpæ, non semper etiam est extinctus reatus poenæ, censura autem non tantum est medicinalis sed etiam poenalis; in quantum est medicinalis, cessat post curationem, non autem, in quantum est poenalis ante absolutionem. Unde dicitur, licet censura dependeat a contumacia *in fieri*, non tamen *in conservari*: sicut culpa est causa poenæ, & tamen hæc saepe manet post remissam culpam: & sicut impedimentum publicæ honestatis manet post rescissa spontalia, licet illud ex his nascatur.

Quando etiam censura ferretur hac formula: *donec resipiscas*, non sequeretur, quod per ipsam resipiscentiam liberaretur a censura, sed sensus esset: *donec post resipiscentiam absolvaris*. Sicut, quando dicitur non remitti peccatum, nisi restituatur ablatum, non sequitur, quod per restitutionem formaliter remittatur peccatum, sed post restitutionem per gratiam justificantem. Excommunicatus, licet in gratia mortuus, debet adhuc absolvi, ut possit sacra sepultura & Ecclesiæ suffragiis frui. & ratio ulterior est, quia eccle-

ecclesia vult, ut innodatus censura non liberetur, donec ab habente potestatem absolvatur, ut etiam ex hac propositione damnata patet.

Prop. 45.

Libri prohibiti, donec expurgentur, possunt retineri, usque dum adhibita diligentia corrigantur. Libri prohibiti.

Observ. Libri hæreticorum, hæresin continentes, vel de religione tractantes, prohibentur in Bulla Coenæ absolute sub excommunicatione reservata, quæ incurritur etiam ab iis, qui tales libros retinent. Quidam autem libri, maxime Catholicorum, prohibentur, adjecta clausula: *donec expurgentur*; & de his putabant quidam cum Marchantio, quod possint retineri, donec corrigantur; præsertim ab eo, respectu cujus nullum est periculum perversionis, neque ex retentione, neque ex lectione libri.

Verum, cum lex prohibens retentionem & lectionem sit universalis, propositio hæc fuit damnata. Neque obstat, quod respectu alicujus in particulari nullum sit periculum, adeoque cessare videatur respectu illius finis legis; nam aliter hic discurrendum de præcepto particulari, alicui personæ particulari imposito, e. g. ut restituas bonum alienum, tu autem nullum bonum alienum habeas; tunc enim cessante fine cessat præceptum. Aliter vero, cum est præceptum generale, latum ex præsumptione periculi universalis, seu talis, quod communiter aut frequenter adesse solet, tunc enim lex obligat eos etiam, respectu quorum nullum hic & nunc est periculum: & tale præceptum est, non legendi aut retinendi libros prohibitos.

Et ratio est, quia tale præceptum non est latum propter periculum alicujus in particulari, sed propter periculum, communiter, aut frequenter adesse solitum. Licet ergo apud aliquem vel aliquos cesset periculum particulare, scilicet respectu ipsius, non cessat tamen lex etiam respectu ipsius; quia manet finis legis, nempe periculum communiter adesse solitum, qui finis non cessat. Quamvis enim respectu ipsius nullum esset periculum, est tamen periculum frequens, propter quod lex universalis fuit lata.

§. 3.

*Propositiones 65 ab Innocentio XI damnatae
anno 1679.*

3.

S. D. N. Innocentius XI opus ab Alex. VII inchoatum profecturus, multas propositiones, ex diversis libris, thesibus, scriptis excerptas, & partim noviter adinventas Theologorum plurium examini, atque S. R. E. Cardinalium, contra hæreticam pravitatem Generalium Inquisitorum judicio subjectas, ut minimum tanquam scandalosas, & in praxi perniciosas damnavit.

Propositio 1.

Non est illicitum in Sacramentis conferendis sequi opinionem probabilem de valore Sacramenti, relicta tutiore, nisi id vetet lex, aut conventio, aut periculum gravis damni incurrendi. Hinc sententia probabilis tantum non est utendum in collatione baptismi, ordinis sacerdotalis & Episcopalis.

Probabilitas
de valore.

Observatio. Merito damnata est hæc propositio; non enim est probabile, quod possis adhibere materiam aut formam dubiam aut tantum probabiliter validam, si possis habere certo validam. Unde hæc damnatio non afficit doctrinam Probabilismi, bene intellectam; nam Probabilismus non loquitur de probabilitate obiectiva & speculativa, quando probabile e. g. est hanc vel illam materiam esse validam, aut hanc medicinam conducturam ad sanitatem, sed loquitur unice de probabilitate practica, versante circa *licentiam actionis*, quando vere probabile est, hanc vel illam actionem esse licitam. Non est autem, quod dixi, vere probabile, quod liceat adhibere in Sacramentis materiam dubiam, aut probabiliter tantum validam, si possis adhibere certo validam; licet enim probabile sit, quod sit valida, non tamen est probabile, quod liceat ea uti; semper enim id vetat lex, vertiturque periculum gravis damni, & irreverentiæ erga Sacramentum, quando exponitur periculo nullitatis. (*vide part. 1, ubi hæc materia ex instituto est discussa.*)

Prop. 2.

Probabiliter existimo, Judicem posse judicare juxta opinionem, etiam minus probabilem.

Observ.

Observ. Quod hoc liceat, iterum non est probabile; nam pro ea parte est pronuntiandum, cuius causa est probabilior. Si iustitia causae utrinque sit æque probabilis, vel est pronuntiandum pro reo & possessore, vel partes litigantes bono modo sunt inducendæ ad transactionem, vel utrique dimidium est adjudicandum: nunquam vero illi, qui habet causam minus probabiliter iustam; quia hic non datur casus pro amico. Aliud est de criminalibus; nam stante utrinque æquali probabilitate de crimine, reus est absolvendus; quia iura proniora sunt ad absolvendum, quam condemnandum; imo in causis capitalibus iura requirunt probationes, luce meridiana clariores.

De opinione
probab.

Prop. 3.

Generatim, dum probabilitate, sive intrinseca, sive extrinseca, quantumvis tenui, modo a probabilitatis finibus non exeat, confisi aliquid agimus, semper prudenter agimus.

Observ. Laxa & perniciosa est hæc thesis, quam illi, qui probabilismum sobrie defendunt, nunquam admittunt, sed requirunt veram, certam, solidam, absolutam, & comparativam in conflictu rationum oppositarum, probabilitatem, id est, talem, quæ nitatur motivo gravi, quæ virum constantem ad prudentem assensum movere possit; talis autem non est tenuis probabilitas, quæ est umbra potius probabilitatis, quam vera probabilitas, versans circa licentiam actionis.

Prop. 4.

Ab infidelitate excusatur infidelis non credens, ductus opinione minus probabili.

Observ. Etiam hic agitur de probabilitate objectiva & speculativa, quando scilicet probabile sit, sectam, Catholicæ Religionis oppositam esse veram, non autem de probabilitate practica, versante circa licentiam non credendi; non enim est probabile, quod liceat non credere Ecclesiam Catholicam, quando secta opposita est ipsi minus probabilis. In re enim tanti momenti, a qua dependet salus æterna, certum est, quod debeat credere Ecclesiam catholicam, sibi probabilius veram: fides tamen hæc, nixa soli probabilitati, licet majori, quod DEUS revelaverit, non esset statim supernaturalis, quia idem Innoc. XI propos. 21 damnavit, *asserunt fides supernaturalis stare cum notitia solum probabilis revelationis.* Donec igitur habeatur moralis certitudo de

existentia revelationis, eliceretur fides naturalis. Hoc enim nisi dicatur, videntur difficulter componi posse, quæ damnantur propositione 4 & 21. Configi etiam potuit hæc 4ta propositio, quia simpliciter excusat non credentem, absque mentione obligationis ulterius in veritatem inquirendi.

Sed quid? si alicui Religio catholica, aut aliquis illius articulus videatur minus probabilis, quam articulus sectæ lutheranæ? An hunc potest & tenetur credere? *Resp.* Itali negant suppositum, quod Religio Catholica aut aliquis illius articulus possit alicui prudenter apparere minus probabilis; tot enim signis credibilitatis & veritatis est illustrata Ecclesia Catholica, ut nemo prudenter de ea dubitare possit, cum faciant evidenter credibilem, & evidenter credendam, atque certo veram. Certe facienti, quod est in se, DEUS non denegat gratiam, præsertim ad ea cognoscenda, quæ sunt necessaria necessitate Medii.

Prop. 5.

**Dilectio
DEI.**

An peccet mortaliter, qui actum Dilectionis DEI semel tantum in vita eliceret, condemnare non audemus.

Prop. 6.

Probabile est, ne singulis quidem rigoroſe quinquenniis per se obligare præceptum charitatis erga DEUM.

Prop. 7.

Tunc solum obligat, quando tenemur justificari, & non habemus aliam viam, qua justificari posſimus.

Obſerv. Certum est, ex lumine rationis & juris naturalis, ex lege Divina, in Evangelio tam energice nobis proposita, ad virtutes Theologicas sæpius exercendas nos obligari; quia tenemur DEUM colere, quod maxime fit per illas virtutes, quæ nos ad pie vivendum & conjunctionem cum DEO immediate disponunt, atque salutem æternam, utique ab omnibus quærendam, perducunt. *Qui non amat Dominum Noſtrum Jeſum Chriſtum, ſit anathema.* Neque ſufficit amor virtualis, conſiſtens in obſervatione præceptorum, ſed requiritur formalis, non modo in exortu ſufficientis rationis & in morte eliciendus, ſed sæpius etiam in vita, & quidem ſub gravi peccato. Et idem de fide & ſpe.

Prop.

Prop. 8.

Comedere & bibere usque ad satietatem ob solam voluptatem non est peccatum, modo non obsit valetudini; quia licite potest appetitus naturalis suis actibus frui. Comestio ad satietatem.

Observ. Verba praesertim ultima sunt scandalosa; quid enim ex illis non posset carnalis homo concludere? Dein cibus & potus ordinatur a DEO & natura ad restaurationem & conservationem virium ad obsequium DEI; invertit igitur ordinem naturae, qui ad alium finem, uti ad voluptatem solam, illos adhibet. Accedit, quod haec thesis non excipiat casum, quo temperantiae limites translirentur.

Prop. 9.

Opus conjugii, ob solam voluptatem exercitum, penitus caret culpa, ac defectu veniali. Copula.

Observ. Opus conjugii ordinatur ad honestam generationem proles, & ut incontinentiae peccatum evitetur; inordinatum igitur est, si ad solam voluptatem referatur.

Prop. 10.

Non tenemur proximum diligere actu interno & formali. Dilectio proximi.

Observ. Tenemur DEUM diligere etiam actu interno & formali: ergo etiam proximum; cum secundum mandatum sit simile primo, & sane dilectio residet in corde: ergo non satisfacit praecepto per actum mere externum, modo Pharisaico exercitum. Accedit, quod dilectio etiam interna sit necessaria ad conservandam pacem & concordiam inter homines.

Prop. 11.

Praecepto proximum diligendi satisfacere possumus per solos actus externos.

Prop. 12.

Vix in saecularibus invenies, etiam in Regibus, superfluum statui, & ita vix aliquis tenetur ad eleemosynam, quando tenetur tantum ex superfluo statui.

Observ. Haec doctrina si locum inveniret, frustranea essent praecepta eleemosynae, in S. Scriptura toties inculcata. Igitur non tantum in extrema necessitate succurrendum est pauperi, licet non habeantur superflua, imo etiam in gravi necessitate, quia etiam in communi, dando eleemosynam olliatis mendicantibus, de superfluis statui proprio: quod autem nemo habeat superflua, seu

ad statum proprium conservandum non necessaria, dici non potest, cum multi sint satis divites. Licet præceptum dandi eleemosynam etiam laicis sit impositum, præcipue tamen Ecclesiasticis, qui speciali etiam præcepto obligantur, superflua erogare in pias causas. Cæterum præceptum dandi eleemosynas fundatur in amore DEI & proximi.

Prop. 13.

Gaudium
de morte.

Si cum debita moderatione facias, potes absque peccato mortali de vita alicujus tristari, & de morte naturali illius gaudere, illam inefficaci affectu petere & desiderare, non quidem ex displicentia personæ, sed ob aliquod temporale emolumentum.

Prop. 14.

Licetum est, absoluto desiderio cupere mortem patris, non quidem ut malum patris, sed bonum cupientis; quia nimirum ei est obventura pinguis hæreditas.

Prop. 15.

Licetum est filio gaudere de parricidio patris, & se in ebrietate perpetrato, propter ingentes divitias, inde ex hæreditate consequi.

Observ. Cum vita hominis sit altioris ordinis, quam bonum temporale, non licet propter istud optare, aut cupere mortem alterius, maxime patris, aut de illa gaudere, sicut non licet illam desiderare, aut procurare. Orat equidem Ecclesia, ut gentes Paganorum, quæ in feritate sua confidunt, dexteræ tuæ potentia conterantur; sed hic intenditur majus earum bonum, ut videlicet convertantur, & Ecclesia ab eis secunda & quæta permaneat.

Prop. 16.

Fides.

Fides non censetur cadere sub præceptum speciale, & secundum se.

Prop. 17.

Satis est, actum fidei semel in vita elicere.

Observ. Cum fides sit initium salutis, fundamentum & radix omnis justificationis, sine qua impossibile est placere DEO, atque sæpiissime in S. Scriptura nobis commendetur, per se patet, quam enormiter absurda & scandalosa sint hæc propositiones. Videantur etiam, quæ dicta sunt ad propos. I ab Alex. VII. damnata.

Prop.

Prop. 18.

Si a potestate publica quis interrogetur, fidem ingenue confiteri, ut DEO & fidei gloriosum consulo; tacere, ut peccaminosum Professio fidei.
per se non damno.

Observ. Non tantum obligamur graviter, actus fidei internos frequentius elicere, sed etiam ad externam professionem fidei; nam *corde creditur ad justitiam, ore autem confessio fit ad salutem*, ait Apostolus ad Rom. 10. & ipse Dominus: *qui me erubuerit, & sermones meos, hunc filius hominis erubescet, cum venerit in majestate sua &c.* Luc. 9. *Qui confitebitur me coram hominibus, confitebor & ego eum coram Patre meo.* Matth. 10.

Ratio est, quia obsequium DEO & fidei debitum exigit, ut publice eam profiteamur, quando taciturnitas cederet in ejus contemptum, vilipensionem, aut in scandalum aliorum, quod praefertim fieret, si a publica potestate interrogatus de fide sua taceret, maxime si hoc silentium videretur virtualis negatio fidei.

Aliud foret, si silentium indicaret contemptum Tyranni, foretque virtualis professio fidei; ut docemur exemplis sanctorum, & ipsius Christi Domini, qui interrogatus ab Herode tacuit. Aliud item foret, si a privato interrogaretur; nam huic respondere posset, quid ad te? Cæterum sicut simulatio falsæ religionis semper est graviter prohibita, ita dissimulatio suæ fidei, imo & fuga sæpe est licita ac prudens; prout nos rursus docent exempla sanctorum, & monitum Christi: *si vos persecuti fuerint in una civitate, fugite in aliam.* Prout etiam habitus & alia signa, falsæ religionis professiva, graviter sunt prohibita, ita indifferentia non sunt illicita.

Regula generalis est: quotiescunque taciturnitas, aut positio alicujus signi cedit in contemptum aut irreverentiam DEI aut fidei, aut in scandalum proximi, jure naturali semper prohibetur. Jure autem positivo humano a variis emittenda est professio fidei, e.g. ab eis, qui recipiunt Beneficium curatum, a promovendis ad Gradus litterarios &c.

Prop. 19.

Voluntas non potest efficere, ut assensus fidei in se ipso sit magis firmus, quam mereatur pondus rationum, ad assensum impellentium. Firmitas fidei.

Prop.

Prop. 20.

Hinc potest quis prudenter repudiare assensum, quem habebat, supernaturalem.

Observ. Rationes quæ remote impellunt ad assensum fidei, sunt signa & *motiva credibilitatis*: atque sunt moraliter certa, seu faciunt evidenter mysterium credibile & credendum. Sed per hæc necdum habetur summa certitudo, qualis ad actum fidei supernaturalem requiritur, suntque principia fidei tantum extrinseca, quæ revelationem mysterii seu moraliter certam intellectui proponunt. Accedit *pia affectio*, seu imperium voluntatis (per quod fides est libera & meritoria) per hanc piam affectionem supernaturalem voluntas intellectui imperat assensum firmissimum; *illustratio* quoque supernaturalis Divina intellectui suasive proponit auctoritatem DEI revelantis: propter quam tanquam objectum formale & motivum intrinsecus intellectus elicit assensum prorsus firmissimum & infallibilem, imo certiore omni certitudine naturali, utpote nixum auctoritate DEI loquentis, per lumen supernaturale proposita.

Hinc falsum est, quod voluntas non possit facere, ut assensus fidei in se ipso sit firmior, quam mereatur pondus rationum seu motiva extrinseca fidei. Falsum etiam est, quod prudenter repudiare quis possit assensum, quem habebat, supernaturalem, cum tum ex imperio voluntatis, tum ex illustratione supernaturali, cum summa certitudine non tantum infallibilitatis sed etiam adhæisionis affectivæ adhæreat auctoritati Divinæ revelanti, tanquam objecto suo formali, & motivo intrinsece & essentialiter respecto; in quod fides ultimato resolvitur.

Accedit, quod etiam motiva credibilitatis, licet sint principia extrinseca fidei, tanti tamen, utpote moraliter certa, sint ponderis, ut nunquam prudenter repudiari possit assensus fidei. Caterum tres istas Theses 18, 19, 20 testatur Wilhelmus Sandæus desumptas esse ex Thesibus Arnaldi Marchant Minoritæ Antverpiensis anno 1674 propugnatis.

Prop. 21.

Assensus fidei supernaturalis & utilis ad salutem stat cum notitia solum probabili revelationis, imo cum formidine, qua quis formidet, ne non sit locutus DEUS.

Observ. Compluribus hæc thesis, quoad priorem saltem partem, visa fuerat probabilis, eo quod, etiam data sola probabili-
tate

Probabilitas
non sufficit
et idem.

tate de revelatione, per principia supernaturalia piæ affectionis & illustrationis Divinæ asurgere possit ad summam certitudinem actus fidei.

Verum ex hoc sequerentur non pauca falsa; nam 1. si *Minor* propositio tantum probabiliter contineretur in *Majore* universali revelata, conclusio esset de fide. Unde fide Divina credere possemus, nos esse in gratia. 2. Christum esse in hac determinata hostia. 3. Imo dari prædeterminationem physicam; nam, ut arguit P. Viva, de fide est, dari gratiam efficacem, & probabile est, eam in hac prædeterminatione consistere.

Ratio autem est, quod DEUS non concedat illustrationem supernaturalem de existentia revelationis, neque pia affectio esset supernaturalis, nec habitus fidei influeret, si tantum haberetur probabilitas de revelatione: unde non eliceretur actus fidei supernaturalis & humanæ, ut vel ex ipsa damnatione hujus propositionis constat, & ex falsis sequelis.

Quidam cum P. Viva se fundant in eo, quod, si sufficeret probabilitas revelationis, posset quis prudenter repudiare assensum fidei, quem habebat, supernaturalem. Verum videtur difficultas refundi in assensum fidei, dependenter a morali tantum certitudine de revelatione elicatum; posset enim casus contingere, præsertim in rudibus, ut revelatio ipsis ne quidem esset probabilis, si summa certitudo & firmitas fidei non ducatur a principijs supernaturalibus. Unde enim haberetur summa certitudo actus fidei, quæ sit major omni certitudine naturali, etiam metaphysice evidente? Aliud est de virtutibus moralibus, ad quas sufficit, ut earum objectum probabiliter existat. Sic exerces actum misericordiæ in pauperem, licet tantum probabile tibi sit, quod sit pauper. Licite adoras hanc determinate hostiam, quamvis tantum probabile tibi sit, quod sit rite consecrata, exercesque virtutem religionis. Absoluto tamen actu fidei supernaturali credere non potes, hoc ipso, quod is debeat esse firmissimus & certior omni actu naturali. Potes igitur credere in genere sub ratione hostiæ consecratæ, vel conditionate, si sit rite consecrata. Aliud foret, si tibi moraliter certum esset, quod sit rite consecrata, ut si tu ipse illam consecrasses.

Prop. 22.

Non nisi fides unius DEI videtur esse necessaria necessitate medii, non autem explicita remuneratoris.

Credenda
necessitate
medii.

Observ. At Apostolus ad Hebr. 11 dicit explicitè : *credere oportet accedentem ad DEUM, quia est, & inquirantibus se remunerator est.*

Qui thesin hanc defenderant, putarunt, id intelligendum de fide implicita in DEUM ut Remuneratorem, qua creduntur generaliter omnia, quæ DEUS revelavit; nam licet Scriptura passim præcipiat fidem in Christum, ut Act. 16: *crede in Dominum JESUM, & salvus eris.* Et ad Gal. 2: *Scientes, quod non justificetur homo, nisi per fidem JESU Christi*, nihilominus multos graves Doctores docere, quod fides explicita Incarnationis, imo & SS. Trinitatis, non sit necessaria necessitate Medii, sed tantum gravis præcepti; alioquin cæcum & surdum non habiturum medium necessarium ad salutem.

Ad casum, quo quis, cognita bonitate DEI eliceret actum perfectum amoris DEI, sine explicita fide in Remuneratorem, P. Viva negat suppositum, eum moraliter esse possibilem, eo quod per spem disponamur ad amorem DEI perfectum. Forte in tali casu amor DEI non esset supernaturalis, ex defectu principii elevantis.

Prop. 23.

Fides late dicta ex testimonio creaturarum, similive motivo, ad justificationem sufficit.

Observ. Fides ad justificationem requisita essentialiter innititur testimonio DEI, tanquam suo motivo intrinseco. Ergo non sufficit fides ex solo testimonio creaturarum hausta. Verum est, quod testimonium creaturarum possit esse motivum credibilitatis, non tamen ipsius fidei Divinæ, quæ sola est initium salutis, fundamentum & radix omnis justificationis.

Prop. 24.

Perjurium. *Vocare DEUM in testem mendacii levis, non est tanta irreverentia, propter quam velit aut possit damnare hominem.*

Observ. Vocare DEUM in testem falsi semper est gravis irreverentia in DEUM, in quacunque materia id contingat, semperque est ratio graviter prohibendi omne perjurium, sicut omnem blasphemiam, aut odium formale DEI. Adeoque hic nulla excusat parvitas materiæ. Quantum ad juramentum assertorium, nemo id negat. Censeo autem, id etiam locum habere in promisso-

missorio, quia juramentum videtur etiam cadere in executionem futuram, alias esset mere assertorium.

Prop. 25.

Cum causâ licitum est jurare sine animo jurandi, sive res sit gravis, sive levis.

Observ. Jurans sine animo jurandi mentitur. Deinde sic facile enervaretur omnis fides juramenti; quia animus inspicere non potest, & lata janua aperiretur deceptionibus, in perniciem fidei humanæ, judiciorum, commerciorum, Reipublicæ. Et cur non etiam liceret, promittere, pascisci, contrahere sine animo? Quare magis nomen Domini in vanum assumeretur, quam tali juramento? an blasphemare, idolo thus adolere, etiam ex metu mortis, licitum putas, ex eo, quod dicas, abesse animum?

Prop. 26.

Sz quis vel solus, vel coram aliis, sive interrogatus, sive propria sponte, sive recreationis causa, sive quocunque alio fine juret, se non fecisse aliquid, quod revera fecit, intelligendo intra se aliquid aliud, quod non fecit, vel aliam viam ab ea, in qua fecit, vel quodvis aliud additum verum, revera non mentitur, nec est perjurus.

Observ. Damnatur hic tanquam mendacium restrictio pure mentalis; & merito: quia objectum aliter est in mente loquentis, quam verba præferant, nec audiens illud, quod mente retinetur, advertere potest. Unde ex tali restrictione audientes per se deciperentur, nemo alterius verbis, quantumvis claris, posset amplius fidere; & sic periret fides humana, in perniciem omnis humani commercii.

Aliud esset, si circumstantiæ audienti indicarent sensum verum, aut id, quod mente retinetur e.g. Si tyrannus interroget Confessarium de peccato poenitentis; aut iudex, quem privata scientia scit nocentem, declararet innocentem, qui in judicio probatus est innocens; nam tunc verba judicis ex circumstantiis facile intelligi possent de foro judiciali, quod videlicet secundum illud sit innocens.

Sic Christus ipse Dominus Jo. 7 dixit: *ego autem non ascendam ad diem festum hunc*, subintelligendo: *palam*, ut per miracula Divinitatem suam manifestaret; nam deinde tamen ascendit, sed quasi in occulto. Et Marci 13 dixit, neque Filium scire diem

judicii, videlicet *scientia communicabili*, quem sensum verba in illis circumstantiis faciebant. Quia scilicet tales restrictiones in talibus circumstantiis non sunt insensibiles; nam tunc verba duos sensus faciunt, unum secundum se sola considerata, alterum ut prolata in his circumstantiis, qui sensus facile ab audiente adverti possit.

Prop. 27.

De Amphibol.

Causa justa utendi his amphibologiis est, quoties id necessarium aut utile est ad salutem corporum, honorem, res familiares tuendas, vel ad quemlibet alium virtutis actum, ita ut veritatis occultatio tunc sit expediens & studiosa.

Observ. Amphibologiæ, ex quibus audiens, ne quidem adjuvantibus circumstantiis, potest sensum occultatum eruere, damnantur, sicut restrictiones mentales, non sensibiles ac mere internæ, quia non minus sunt mendacia. Hanc materiam alias uberius discussi.

Prop. 28.

Restrictio ment.

Qui mediante commendatione vel munere ad Magistratum vel Officium publicum promotus est, poterit cum restrictione mentali prestare juramentum, quod de mandato Regis a similibus solet exigi, non habito respectu ad intentionem exigentis, quia non tenetur fateri crimen occultum.

Observ. Damnatur hic rursus restrictio pure mentalis in casu hoc determinato, ut putat Cardenas, vel, ut Viva censet, damnatur opinio, quod in casu, quo non inquiritur ad poenam, sed tantum, ut homo indignus depellatur a Magistratu, liceat uti quacunque restrictione etiam sensibili; nam hoc in casu, ait, obligari ita promotum vel ad deponendum ultro officium, vel ad fatendum crimen, licet occultum, & de quo non habetur semiplena probatio. Et sic etiam Episcopum electum teneri aut ad non acceptandum Episcopatum, vel ad fatendam irregularitatem, simoniam, aliave delicta aut impedimenta, propter quæ electio ipso jure fuit irrita. Credo autem, talem a summo Pontifice petiturum clam dispensationem.

Prop. 29.

Urgens metus gravis est causa justa, Sacramentorum administrationem simulandi.

Simulatio Sacramenti.

Observ. Certum est, omnem simulationem formalem, seu cum animo alios decipiendi, universaliter esse prohibitam, cum sit

fit mendacium, prout omnes DD. conveniunt. Joannes Sanchez autem docuit, licitam esse ex metu gravi simulationem Sacramentorum *materialem*, qua non intenditur, directe saltem, deceptio alterius, sed illa ob justam causam permittitur, sicut contingit in æquivocatione: e. g. posse sacerdotem ex metu gravi proferre verba consecrationis aut absolutionis *materialiter*, sine intentione consecrandi aut absolvendi: si indigno negari non possit Sacramentum, posse ei hostiam non consecratam porrigi.

Verum hæc omnia sunt falsa, & in hac propositione cum simulatione etiam materiali Sacramenti damnata. Quia cedunt in irreverentiam Sacramenti & DEI, sicut thurificatio materialis, facta coram idolo, cedit in irreverentiam DEI, aut blasphemia etiam materialis tantum. Hinc Innoc. III cap. *de homine* de celebr. Missarum ait, gravius eum peccare, qui simulat Sacramentum, quam is, qui indigne illud conficit. Quare, licet coram populo possit simulari absolutio, quando negatur indisposito, murmurando aliquid aliud; nunquam tamen potest proferri forma absolutionis sine intentione absolvendi, sicut nunquam potest porrigi hostia non consecrata propter periculum idololatriæ materialis.

Neque dicas, non irrogari Sacramento irreverentiam, quando quis non adhibet intentionem illud conficiendi, cum Sacramentum tunc non existat; nam, si ponatur materia & forma, a Christo instituta, & per defectum intentionis impeditur, ne fiat Sacramentum, irrogat eidem injuriam.

Prop. 30.

Eas est viro honorato occidere invasorem, qui nititur calumniam inferre, si aliter hæc ignominia vitari nequit: idem quoque dicendum, si quis impingat alapam vel fuste percutiat, & post incidium. De homicidio.
fictam alapam vel ictum fustis fugiat.

Prop. 31.

Regulariter occidere possum furem, pro consecratione unius aurei.

Prop. 32.

Non solum licitum est defendere defensione occisiva, quæ actu habemus, sed etiam, ad quæ jus inchoatum habemus, & quæ nos posseßuros speramus.

Prop. 33.

*Licitum est tam hæredi quam legatario, contra injuste impedi-
tem se taliter defendere; sicut & jus habenti in cathedram vel
Præbendam contra eorum possessionem injuste impedi-
entem.*

Observ. De hac materia dictum est aliquid ad propof. 17 Alex.
VII. Nimis generales sunt hæ theses: *quinititur caluniam inferre:*
quancunque? etiam modicam? &, si gravis sit, an non præsto
est via juris? *Si post inflictam fugiat.* Hoc non amplius esset de-
fensio, sed vindicta, privatis hominibus semper prohibita. *Pro
conservatione unius aurei.* Pro re tantilla vitam, quæ longe altio-
ris est ordinis, proximo auferre? *Quæ nos possessuros speramus.*
O prodigas humani sanguinis pennas? Vitam certam pro re in-
certa auferre? *Hæredi legatario &c.* Siccine Lapitharum instar sta-
tim in cædes ruere. Si ita est, tollantur Judicia publica, quilibet
sibi ipsi est Judex, & alterius carnifex. Quam temeraria, quam
scandalosa, quam in publicum perniciofa sunt hæc omnia?

Jam dixi ad propof. 17 Alex. VII, quid requiratur, ut inva-
sor possit occidi. Et etiam tunc salvam semper esse oportet vitam
Principis, utpote quæ tolli non potest sine magna concussione Rei-
publicæ, adeoque non nisi cum gravissimo scelere parricidii.

Prop. 34.

*Licet procurare abortum ante animationem fetus, ne puella gravi-
da deprehensa occidatur, aut diffametur.*

Abortus.

Observ. Talis procuratio abortus habetur pro homicidio,
cap. *Si aliquis de homicid.* ibi: *Si aliquis - - - mulieri aliquid
fecerit, vel ad potandum dederit, ut non possit generare, aut con-
cipere, vel nasci soboles, de homicidio tenetur:* non quod vitam
homini adimat, sed quia proxime & immediate vitam hominis
impediat. Certe, cum ne quidem ob metum mortis liceat, se-
men procurando pollutionem emittere, quanto minus licebit pro-
curare abortum foetus jam concepti.

Aliud esset, si foetus necdum animatus ab intrinseco aggre-
deretur vitam matris; nam tunc sicut alius invasor vitæ, cum
moderamine inculpatæ tutelæ, posset depelli; nunquam vero li-
cet illum expellere ad vitandam mortem prægnantis, quam alias
tertius quispiam vellet occidere, sicut nunquam licet occidere
eum, qui te non invadit, licet alius tertius tibi mortem minite-
tur, nisi occidas.

Prop.

Prop. 35.

Videtur probabile, omnem fatum, quamdiu in utero est, carere anima rationali, & tunc primo incipere eam habere, cum paritur, ac consequenter dicendum erit, in nullo abortu homicidium committi.

Observ. Quamvis incertum omnino sit, quando infundatur anima rationalis, quia incertum est, quando præcise organa sint disposita, ut anima possit operari vitaliter, certum tamen est, quod infundatur ante nativitatem, in ea etiam sententia, quæ admittit successionem animarum.

Falsa est etiam altera pars propositionis; nam licet probabile esset animam non infundi ante nativitatem, haberetur tamen pro homicidio procuratus abortus; prout ad thesin superiorem ex cap. *Si aliquis de homic.* diximus. Poenæ tamen canonicæ non incurruntur ante diem 40, si sit mas, & ante 80, si sit femella. Quamvis autem sententia illa speculativa de infusione animæ esset probabilis, nullo modo tamen esset probabile, quod liceat procurare abortum.

Prop. 36.

Permissum est furtum, non solum in extrema necessitate, sed etiam in magna.

Observ. Indocta atque inepta locutio! furtum semper est prohibitum, etiam in extrema necessitate; quia est intrinsece malum, adeoque jure naturæ semper pro semper prohibitum; nam furtum est ablatio rei alienæ, invito rationabiliter domino. Quamdiu igitur talis est, semper est illicita: si vero desinit esse talis, desinit esse furtum.

In extrema necessitate aliquid auferens, in quantum ad eam sublevandam requiritur, non committit furtum, sive quod tunc, ut aliqui putant, omnia sint communia, sive, quod dominus non sit rationabiliter invitatus, si in extrema necessitate constitutus, per modum mutui, vel alio modo, qui domino est minus nocivus, præsentis extremæ necessitati subveniat, paratus restituere vel refarcire damnum, si ad pinguem fortunam sit perventurus.

Sane, si liceret in gravi necessitate divitem rebus suis spoliare, omnia plena essent direptionibus & usurpationibus, eo quod gravis indigentia multos premat. Aliud tamen esset, si indigentia esset maxima, extraordinaria, & quasi extrema.

Prop.

Prop. 37.

Famuli & famulae domesticae possunt occulte heris suis surripere ad compensandam operam suam, quam majorem judicant salario, quod percipiunt.

Observ. Tales facile judicant, operam suam majorem salario, & alias saepe prони sunt ad clependum; unde pessime consultum esset heris, si tam laxa doctrina animarentur ad audendum. Pacto promiserunt, pro tali salario servire: stent pacto, & fide data.

Neque enim occulta compensatio hic locum habet, cum desint conditiones, ad eam requisitae; quarum praecipua est, ut debitum sit certum, quod in casu nostro non contingit; nam propter meram probabilitatem debiti nemo privandus est possessione certa. Neque Princeps potest alium bello aggredi, eumque possessione sua dejicere, nisi certum habeat, eam sibi deberi, nec alio modo obtinere possit. Neque Judex id potest, nisi probabilius ei sit, rem ad alium pertinere.

Ceterum aliud esset, si certo constaret ac manifeste, salarii esse minus infimo, herus non posset esse rationabiliter invitatus, saltem quoad substantiam, cum teneatur operas conducere secundum leges locationis conductionis, quae, sicut in emptione venditione pretium, requirunt mercedem aut summam, aut mediam, aut infimam.

Prop. 38.

Non tenetur quis sub pena peccati mortalis restituere, quod ablatum est per pauca furta, quantumcumque sit magna summa totalis.

Observ. Si magna summa totalis formaliter aut virtualiter adhuc extet, manifeste falsa est thesis: tunc enim, qui abstulit, tenetur ad restituere ex re accepta. Si autem summa non amplius extet, tunc, si advertit, se perventurum ad summam gravem, graviter peccat, consequenter tenetur ad restitutionem ex injusta acceptatione; nam furtula illa tunc coalescunt. Certe damnum, eidem illatum, non est minus, si per parva plura furta illatum, si per unum magnum: damnum autem grave, injuste illatum, sub gravi peccato reparari debet.

Prop. 39.

Qui alium movet aut inducit ad inferendum grave damnum tertio, non tenetur ad restitutionem istius damni illati.

Observ.

De furtis
restitutis.

Restitutio.

Observ. Certum & indubitatum est, non tantum eum, qui physice concurrat ad grave damnum tertii, sed eum etiam qui moraliter influit, puta, qui jubet, suadet, consilium dat, imo etiam, qui non impedit, si ex officio aut contractu impedire tenetur, uti Magistratus, parentes, tutores, confessarius, deobligans poenitentem a restitutione, ad quam tenetur. Et quidem hi omnes peccant contra justitiam, damnum tertii positive vel negative causando, consequenter obligantur ad restitutionem. Alii vero, qui non cooperantur ad damnum, neque ex officio vel contractu tenentur illud impedire, peccant quidem contra charitatem, si facile impedire possent, & non impediunt, sed ad restitutionem non obligantur; cum sola justitia sit radix restitutionis.

Prop. 40.

Contractus Mobatra licitus est, etiam respectu ejusdem personae, & cum contractu retrovenditionis praevis inito, cum intentione Mohatra. *lucris.*

Observ. Petis a mercatore mutuas pecunias: ille loco pecuniarum tibi vendit merces pretio summo, adjecto pacto, ut eas merces ei retroendas pretio infimo: hic est contractus, qui appellatur *Mobatra*, hic damnatus. Tametsi hic lucrum mercatoris videatur provenire ex emptione venditione, usura tamen est palliata; cum, praecisis verborum ambagibus, idem sit, atque pecuniam mutuam dare, & supra fortis restitutionem lucrum exigere. Et quam inordinatum vendere merces pretio summo, cum pacto, ut eas emptor mox retrovendat venditori pretio infimo!

Prop. 41.

Cum pecunia numerata sit pretiosior numeranda, & nullus sit, qui non majoris faciat pecuniam praesentem, quam futuram, potest Usura. *creditor ultra sortem a mutuatario exigere, & eo titulo ab usura excusari.*

Observ. Ad hanc thesin responsum est ad propos. 42 Alex. VII. si non vertatur lucrum cessans, damnum emergens, aut periculum fortis, pecunia praesens non plus valet, quam futura; cum pecunia sit res, de se sterilis, & nummus per se non pariat nummum. Et sane, si principium, in hac thesi assumptum, valeret, semper liceret in mutuo aliquid ultra sortem exigere, & sic usura plena porta posset ingredi.

Propositio 42.

Usura non est, dum ultra sortem aliquid exigitur, tanquam ex benevolentia & gratitudine debitum, sed solum, si exigitur, tanquam ex iustitia debitum.

Observ. Si pro re spirituali petas pecuniam, ex gratitudine debitam, committis simoniam: &, si pro mutuo auctarium petas, committis usuram lucratoriam, intrinsece malam. Et quidem injuste petis auctarium; quia mutuatarius non tenetur, hoc a te determinato modo gratitudinem exhibere, sed est penes ipsum electio. Hinc, si determinate mutuans exigit auctarium, exigit aliquid, quod est extra rationem mutui, sibi que indebitum.

Prop. 43.

Falsum crimen.

Quidni non nisi veniale sit, detrahentis auctoritatem magnam, sibi noxiam, falso crimine elidere?

Prop. 44.

Probabile est, non peccare mortaliter, qui imponit falsum crimen alteri, ut suam iustitiam, & honorem defendat: &, si hoc non est probabile, vix erit opinio probabilis in Theologia.

Observ. Falsum crimen alteri impingere, est mendacium in re gravi, detractio, gravisque violatio famæ proximi, spiratque vindictam, incertumque est, an sit medium efficax, honorem tuum defendendi, neque certum est, aliud medium non suppetere; ergo graviter peccas, si tibi detrahenti grave crimen falso imponas: non enim licet per mendacium in re gravi famam tuam defendere. Et, si alter peccat, non sequitur, quod tibi liceat peccare.

Prop. 45.

Simonia.

Dare temporale pro spirituali non est Simonia, quando temporale non datur tanquam pretium, sed duntaxat tanquam motivum conferendi, vel efficiendi spirituale, vel etiam quando temporale sit solum gratuita compensatio pro spirituali, aut econtra.

Observ. Si per temporale præcise intendas alterum movere, ut tibi det spirituale, quod inde speras absque omni pacto, etiam tacito, implicito, & virtuali, quin ullam obligationem velis imponere præciso scandalo, non committis Simoniam. Alias omnes piæ foundationes, quotidianæ distributiones, in choro præsentibus destinatae, essent simoniacæ; quia fundator per temporale vult movere ad spirituale: esset Simonia, si dando temporale pauperibus

bus Religiosis, velles eos movere, ut pro te orent, aut sacrificium offerant; esset Simonia, si servires Episcopo in temporalibus, sperans ab eo Beneficium. Si instrueres filios Patroni, sperans ab eo præsentationem. Stipendium & sustentatio, quam offers sacerdoti, ut pro te Missam legat, est aliquid temporale. DEUS ipse in veteri lege quot promissiones fecit, ut populus ille fidelem cultum exhibeat DEO? Sicut vice versa non est Simonia, si des spirituale ex spe obtinendi temporale, uti, si per orationes, aut sacrificia a DEO petas sanitatem, aut alia bona temporalia; quo sane casu, & multis aliis das spirituale, ut eveniat temporale.

Igitur in hoc sensu non est confixa thesis: sed duæ aliæ sunt causæ, propter quas est merito damnata. Prima est, quod non distinguat inter purum motivum, seclusum ab omni pacto & obligatione, cum spe sola conjunctum, & inter motivum non purum, sed conjunctum cum aliquo pacto tacito, vel voluntate obligandi: prout rem hanc optime declarat Innoc. III cap. *Tua nos*, de Simonia.

Altera stat in clausula confixæ propositionis: *vel etiam quando temporale sit solum gratuita compensatio pro spirituali*. Ecce Pus Simoniacum! quare Simonia stricte dicta Jure Divino & naturali semper est graviter prohibita, nisi quia indignissimum & DEO summopere injuriosum est, rem temporalem æquiparari spirituali? per quid autem magis æquiparas, quam si velis spirituale per temporale *compensare*? Compensatio æqualitatem comparativam inter datum & acceptum respicit.

Prop. 46.

Et id quoque locum habet, etiamsi temporale sit principale motivum dandi spirituale, imo etiamsi sit finis ipsius rei spiritualis, sic, ut illud pluris æstimetur, quam res spiritualis.

Observ. Adjicitur rursus virulenta clausula. Quid indignius, & cum contemptu rerum spiritualium conjunctius, quam temporale pluris æstimare ac spirituale. Hoc enim vero non tantum est, temporale cum spirituali æquiparare, in quo tabes Simonia nidulatur, sed omnino præhabere & anteferre.

Prop. 47.

Cum dicit Concilium Tridentinum, eos alienis peccatis communicantes mortaliter peccare, qui, nisi quos digniores, & Ecclesiæ magis utiles ipsi judicaverint, ad Ecclesias promovent, Concilium vel primo per Digniores videtur aliud significare velle, nisi

Provisio dignioris.

dignitatem eligendorum, sumpto comparativo pro positivo: vel secundo, locutione minus propria ponit Digniores, ut excludat indignos, non vero dignos: vel tandem loquitur tertio, quando fit concursus.

Observ. Nulla prorsus est ratio, verba Tridentini clarissima in sensum alienum torquendi. Jam dudum antea Innoc. III *cap. un. ut Eccles. Benef. sine dimin. conf.* idem præceperat his verbis: *non ex affectu carnali, sed discreto judicio debuisti Ecclesiasticum Beneficium in personam magis idoneam dispensare.* Quamvis autem Tridentinum de Cardinalium duntaxat & Episcoporum *sess. 24 cap. 1 de Reform.* loquatur, eadem tamen est ratio de omnibus Beneficiis, quibus cura animarum incumbit, prout idem Trid. c. 18 innuit; quia nempe cultui DEI, Ecclesiæ utilitati, & animarum saluti meliori, quo fieri potest, modo provideri debet.

Unde, siue Beneficium sit collativum, siue electivum, siue patronatum, digniori (spectatis omnibus) conferri debet. Ad quid enim collatori, electori, patrono datur ab Ecclesia potestas providendi Ecclesiæ viduatæ, nisi ut meliori modo provideat? Et hinc etiam censeo, Beneficium quoque simplex digniori esse conferendum; quia justitia saltem distributiva exigit, ut officia & bona communia dignioribus præ minus dignis conferantur. *De hac materia alias uberius tractavi.*

Prop. 48.

Fornicatio.

Tam clarum videtur, fornicationem secundum se nullam involvere malitiam, & solum esse malam, quia interdicta, ut contrarium omnino rationi dissonum videatur.

Prop. 49.

Mollities jure naturæ prohibita non est, unde si DEUS eam non interdixisset, sæpe esset bona, & aliquando obligatoria sub mortali.

Observ. Ita visum est Caramueli; sed aliud communi Theologorum. Atque imprimis certum est, fornicationem & inollitiam Jure Divino esse prohibitas graviter, teste Apostolo 1 Cor. 6: *Neque fornicarii neque molles regnum DEI possidebunt.* Dein ipso etiam jure naturæ prohibentur; cum in utraque magna sit naturæ inordinatio, hominemque ad bestiarum rationem deprimat. Et quidem mollities impedit generationem & propagationem speciei humanæ; dum id, quod ad hanc a natura ordinatur, effunditur, non sine magno periculo consentiendi in delectationem, inde oriri solitam

solitam. Fornicatio vero, præterquam quod fornicantes deturpet, nocet rectæ generationi prolis, ac præsertim educationi, maculamque eidem affricat prolis illegitimæ. Qualis esset mundus, si vagæ ejusmodi libidines essent licitæ? quis matrimonii grave jugum subire vellet. Profecto, si ad ipsa juris naturalis principia velimus respicere, recta humani generis constitutio, Divinæque perfectiones fornicationem & mollicitem pro omni casu exigunt prohiberi tanquam intrinsece mala.

Prop. 50.

Copula cum conjugata, consentiente marito, non est adulterium, Adulterium. adeoque sufficit in confessione dicere, se esse fornicatum.

Observ. Accessus ad conjugem non suam est adulterium. In hoc autem casu datur talis accessus, nec obstat, quod maritus consentiat; nam illicite & invalide consentit; sicut clericus in sui verberationem, aut Religiosus in alienationem fundi. Habet quidem maritus jus in corpus uxoris, sed pro se, non pro alio, sicut usufructuarius, qui usumfructum alienare non potest in alium, cum sit jus personale inhærens ejus ossibus.

Talis igitur adulter, præterquam quod gravissime peccet contra castitatem, peccat etiam contra justiciam, quia gravem injuriam infert proli spurix, Sacramento matrimonii, & ipsi etiam lenoni, cujus consensus est omnino irritus, ac penitus nullus. Verum quidem est: si virgo non consentiat in sui deflorationem, vim inferens committit stuprum, si vero consentiat, tantum simplicem fornicationem. Sed diversitas specifica stupri a fornicatione referenda est in vim illatam gravemque injuriam. Consensus autem mariti non tollit rationem adulterii, prout dictum. Accedit, quod plures dicant, virginem illicite quidem, valide tamen, consentire in sui deflorationem, quod de conjugatis dici non potest.

Prop. 51.

*Famulus, qui submissis humeris scienter adjuvat herum suum ascende- Cooperatio
re per fenestras ad stuprandam virginem, & multoties eidem ad peccatum.
subservit deferendo scalam, aperiendo januam, aut quid simile
cooperando, non peccat mortaliter, si id faciat metu notabilis
detrimenti, puta, ne a domino male tractetur, ne torvis oculis
aspiciatur, ne domo expellatur.*

Observ. Talis famulus proxime ac formaliter cooperatur peccato: ergo est causa & complex peccati. Deinde tales actiones,

proxime tendentes ad peccatum videntur esse intrinsece malæ, sicut invitare ac deducere concubinam ad domum concubinarum &c. Aliud esset, si famulus tantum materialiter & remote, ad declinandum grave damnum cooperaretur. Casus sunt in hoc genere innumeri, qui Theologorum Moraliū ingenia laboremque fatigant, amplioresque, quam brevissimum hoc compendium complectantur.

Prop. 52.

Præceptum servandi festa non obligat sub mortali, seposito scandalo, si absit contemptus.

Festa.

Observ. Thesis hæc est contra certam Theologorum & Canonistarum sententiam, imo contra persuasionem omnium fidelium; quis enim non certum, persuasumque habet, se peccare graviter, si absque rationabili causa die festo, ab Ecclesia præcepto, non audiat Missam, aut laborem servilem absque necessitate tota die exercent? Quare non idem dicis de jejuniis, aliisque omnibus præceptis Ecclesiæ. Certe illa in materia gravi, qualis est observatio festorum, conducente ad cultum DEI & animarum salutem, graviter obligant, tametsi non addantur expresse verba, continentia censuram, interminationem Divini judicii, aut aliam gravem poenam, aut præcipiatur in virtute S. obedientiæ, vel exprimantur: *sub gravi: sub mortali.*

Prop. 53.

Missæ.

Satisfacit præcepto Ecclesiæ de audiendo sacro, qui duas ejus partes, imo quatuor simul a diversis celebrantibus audit.

Observ. Credere non possum, quod tales canonomachi recta intentione ducantur cultus Divini, salutis animarum, & obedientiæ erga Ecclesiam, in id unice intenti, ut ejusdem leges & præcepta violente torqueant, & arbitrariis expositionibus eludant contra expressa legum verba & intentionem legislatoris, ad inducendas laxitates, & excusandas excusationes in peccatis. Ecclesia jubet, ut audiat Missa, quæ est unum, continuum atque integrum sacrificium, ad cujus singulas partes possit attendi. Et quanta erga DEUM irreverens parcitas, plures diversarum Missarum particulas eodem tempore velle consarcinare? Dico, *eodem tempore*, nam audire unam medietatem e. g. a consecratione, & postea ab alio sacerdote alteram medietatem usque ad consecrationem hic non est damnatum; quamvis hoc ipsum etiam, secluso casu necessitatis, parce sit cum DEO agere, & illiberaliter.

Prop.

Prop. 54.

Qui non potest recitare Matutinum & Laudes, potest autem reliquas Horas, ad nihil tenetur, quia major pars trahit ad se minorem. Officium.

Observ. Septem Horæ Divini Officii sunt inter se separabiles, præcipiunturque recitari omnes & singulæ; unde sequitur, non tantum te obligari, quando Matutinum & Laudes, e. g. ex defectu Breviarii, recitare non potes, ad reliquas sex Horas recitandas, sed etiam quod, si vel unam Horam recitare possis, recitare illam tenearis. Axioma illud: *pars major trahit minorem*, non habet locum, quando materia est divisibilis, & singulæ partes sunt præceptæ. Sic, si quis jejunare non possit per majorem partem quadragesimæ, possit autem per reliquam, quis dicat, quod per hanc non teneatur? Dispensatus quoad carnes usque ad Dominicam Passionis tantum, an non tenetur reliquis diebus abstinere? Qui debet centum, possit autem tantum decem solvere, an ad nihil tenetur? Si officium Divinum ita individue esset præceptum, ut non etiam singulæ Horæ essent præceptæ, sequeretur, quod, si omnes Horas recitare posses, excepto solo Completorio, ad nihil tenearis. Nescio, an tam robusto sis stomacho, ut hoc absurdum devores.

Prop. 55.

Præcepto communionis annuæ satisfit per sacrilegam Domini manducationem. Communio annua.

Observ. Præcepto annuæ Confessionis non satisfit per Confessionem voluntarie nullam (*propos. 14 Alex. VII*) ergo neque per sacrilegam communionem: hanc enim Ecclesia non præcipit: quomodo ergo per illam satisfieri potest præcepto? Quis non videt legislatoris, præcipientis annuam communionem, eam non esse mentem, sed præcipi communionem innocentem, devotam, saluiferam, sanctam?

Prop. 56.

Frequens Confessio & communio etiam in his, qui gentiliter vivunt, est nota prædestinationis.

Observ. Hæc propositio non potuit provenire, nisi ab aliquo simplici devotulo, qui habet zelum, sed non secundum scientiam. Utique non loqueris de confessione & communionem sacrilega; nam hæc est nota reprobationis, nam qui indigne sumit, judicium sibi manducat & bibit. Si autem loqueris de frequenti confessione &

& communione, cum requisita præparatione, & dispositione digne receptis, quomodo fieri potest, ut suscipiens gentiliter, id est, inter continuata scelera, vivat? Propositum sane efficax, ad confessionem requisitum, haberet aliquem emendationis effectum; alias ne quidem absolvi amplius posset. Cælestis ille ignis S. Communionis quomodo cum recta devotione & dispositione accedentem non calefaciat?

Verum quidem est, quod sanctissima hæc Sacramenta etiam ab iis sint suscipienda, qui gentiliter tanquam magni peccatores vixerunt, quia sunt pharmacum & medicina præservativa a peccatis, sed iis, qui serio sunt parati vitam gentilem emendare; alias non sunt signum prædestinationis, sed reprobationis. Certissimum enim signum prædestinationis est observatio mandatorum DEI, & exercitium bonorum operum, prout nos admonet S. Petrus: *satagite fratres, ut per bona opera certam vestram vocationem & electionem faciatis.*

Prop. 57.

Probabile est, sufficere attritionem naturalem, modo honestam.

Attritio naturalis.

Observ. A Tridentino S. 6. c. 3. dici anathema, si quis dixerit, sine præveniente S. Spiritus inspiratione atque ejus adiutorio hominem penitere posse, ut oportet, ut ei justificationis gratia conferatur: additque, attritionem, disponentem ad gratiam in Sacramento, esse donum DEI, & Spiritus S. impulsus.

Neque dicas: Concilium tantum loqui de poenitentia, ut fructifera, non autem ut valida: Sacramentum sine attritione supernaturali esse quidem validum, sed tamen informe; nam contra est; valor præsupponitur ad fructum. Si ergo ad fructum, nempe ad supernaturalem justificationis gratiam requiritur dolor supernaturalis, requiritur etiam ad valorem. Dein Sacramentum ut validum debet de se esse aptum ad pariendum fructum supernaturalem gratiæ sanctificantis. Valor autem, cui procederet ex attritione naturali, non esset de se aptus ad fructum gratiæ supernaturalis, cum ad hunc sit prorsus improporcionatus.

Dices. Attritio concepta ex metu gehennæ, aut turpitudine peccati juxta Trid. sufficit ad Sacramentum poenitentiae. Sed hæc attritio est mere naturalis. *Resp.* Neg. Min. attritio, ut sit sufficiens, debet procedere ex motivo, cognito lumine fidei supernaturali; ut, si quis doleat de offensa DEI ob metum gehennæ, per lumen fidei cognitæ, & valde probabiliter etiam, juxta sententiam multorum DD. Si quis doleat de peccato ob metum poenarum

narum temporalium, ut infligendarum a DEO vindice; cum Trid. dicat, attritionem supernaturalem concipi posse, aut ex consideratione turpitudinis peccati, aut ex gehennæ & *pænarum* metu. Modo ex his motivis, per fidem propositis, serio doleatur de offensa DEO; nam etiam, quando ex consideratione turpitudinis peccati elicitur attritio, hæc turpitude attingi debet lumine supernaturali tanquam opposita Divinæ voluntati aut virtuti supernaturali.

Prop. 58.

Non tenemur confessario interroganti fateri peccati alicujus consuetudinem.

Observ. Licet Tridentinum, per se loquendo, tantum requirat, ut pœnitens explicet numerum & speciem suorum peccatorum, cum circumstantiis aggravantibus, speciem mutantibus; nihilominus, cum Confessarius fungatur munere Judicis, Doctoris, & Medici, jus habet interrogandi de consuetudine & variis circumstantiis aggravantibus, licet speciem non mutant, ut possit rectum judicium ferre de statu pœnitentis, eum instruere, & apta remedia præscribere; unde pœnitens tenetur fideliter respondere; quod, si facere detrectet, satis indicat, se non esse satis dispositum, nec satis serio velle curari.

Neque obstat, quod sic idem peccatum bis esset exponendum; nam per accidens & indirecte id potest esse necessarium; sic, qui cognovit consanguineam suæ uxoris, si hoc peccatum fuerit confessus, postea autem ab uxore petat debitum, ut hoc peccatum suum confiteatur, necesse est, ut etiam illud prius repetat.

Cæterum aliud foret, si Confessarius interrogaret talia, quæ ad confessionem non pertinent, e. g. nomen pœnitentis, familiam, gentem &c.

Prop. 59.

Licet Sacramentaliter absolvere dimidiate tantum confessos, ratione magni concursus pœnitentium, qualis v. g. potest contingere die magnæ alicujus Festivitatæ, vel Indulgentiæ.

Observ. Tridentinum *sess. 14 cap. 5 & can. 7* ait, Jure Divino requiri confessionem, non tantum formaliter, sed etiam materialiter integram, talem videlicet, qua omnia peccata mortalia, quæ post diligentem conscientiæ discussionem memoriæ occurrunt, secundum speciem & numerum, atque circumstantias, speciem mutantem, confessario sincere exponantur.

Neque ab hac gravi obligatione excusare pœnitentem aliquid potest, nisi impotentia physica aut moralis, qualis non est allata in thesi profligata, in concursu nimirum pœnitentium. Confessiones valde longæ possunt anticipari vel differri; alias quilibet posset expectare tempus magni concursus, ut dimidiatam tantum confessionem possit deponere. Et quale ex tali iudicium confessarii? quomodo proportionatam pœnitentiam injunget? quomodo fungetur triplici suo munere.

Prop. 60.

Absolutio
consuetudi-
narii.

Pœnitenti, habenti consuetudinem peccandi contra legem DEI, naturæ, & Ecclesiæ, etsi emendationis spes nulla appareat, nec est neganda, nec differenda absolutio, dummodo ore proferat, se dolere, & præponere emendationem.

Observ. Trid. sess. 14 cap. 8 docet, eam satisfactionem esse pœnitentibus imponendam, quæ ad præteritorum peccatorum vindictam, & castigationem deserviat, & simul ad novæ vitæ custodiam, & infirmitatis medicamentum. Cum igitur confessarius agere debeat personam Judicis & Medici, non potest, certe non debet, talem consuetudinarium statim absolvere, ne facilitas absolutionis malum augeat. Et quomodo pœnitens potest habere verum, serium, & efficax emendationis propositum, si nulla est spes emendationis, si prævideat, se mox ad consuetum volutabrum reversurum?

Igitur, ut pœnitens melius miserum animæ suæ statum agnoscat, ac sentiat, ad DEUM vero ardentius per preces confugiat, pericula & occasiones peccandi cautius devitet, atque ad Sacramentum reconciliationis digne suscipiendum se melius disponat, differenda est quandoque absolutio, donec aliqua saltem emendatio sequatur.

Verum quidem est, rite dispositum, per se loquendo, habere jus ad absolutionem; sed quomodo formabitur probabile iudicium, quod talis per serium dolorem de peccatis, & efficax propositum emendationis sit dispositus, ubi nulla est spes emendationis? Et, tametsi esset dispositus, haberet quidem jus ad absolutionem, sed non statim accipiendam. Confessarius etiam habet jus, imo obligationem, ut tanquam animæ Medicus aptam morbo medicinam præscribat. Ecclesia reservat aliqua peccata Papæ aut Episcopo, a quibus non potes absolvi ab alio confessario, licet sis dispositus.

Dum-

Dimmodo ore proferat, se dolere & proponere. Ita est: credendum pœnitenti, pro se & contra se loquenti; nisi protestatio sit contraria facta, & opere evertat, quod ore profert.

Prop. 61.

Potest aliquando absolvi, qui in proxima occasione peccandi versa Occasio pro-
tur, quam potest, & non vult omittere, quin imo ex proposito xima.
& directe quærit, aut ei se ingerit.

Observ. Communis alias est doctrina, proximam occasionem peccandi esse vitandam, nisi impotentia physica vel moralis excuset. At auctor hujus propositionis non horret asserere, illam etiam ultro quæri posse. Sed quomodo talis ad absolutionem potest per efficax propositum esse dispositus, si proximæ occasione peccandi se ultro velit ingerere? Proximam occasionem peccandi quærere est peccatum: monetque Dominus eruendum oculum, si te scandalizet: & qui amat periculum, perituum in illo. Quomodo ergo cum voluntate peccandi stare poterit voluntas seria & efficax non peccandi de cætero?

Aliud est de peccatis venialibus, quorum occasiones, cum sint innumeræ, non omnes vitari possunt. Accedit, quod committens venialia tantum, longe aliter erga DEUM & animæ suæ salutem sit affectus, ut adeo, non obstante frequenti in illa relapsu, possit de uno saltem vel altero ex speciali motivo serio dolere & proponere. Quamvis nec eorum occasiones proximas liceat directe & ex professo quærere.

Prop. 62.

Proxima occasio peccandi non est fugienda, quando causa aliqua utilis aut honesta non fugiendi occurrit.

Prop. 63.

Licitum est quærere directe occasionem proximam peccandi pro bono spirituali, vel temporali nostro, vel proximi.

Observ. Absurdos profecto Aphorismos, & scandalo plenos! Proximam occasionem graviter peccandi, formaliter talem, directe quærere, est ita intrinsece malum, ut nullo fine bono, spirituali aut temporali, cohonestari possit, siue sis Judex, siue Confessarius, siue Medicus aut Chirurgus, siue quisunque alius. *Quid prodest homini, si mundum universum lucretur, animæ vero suæ detrimentum patiatur?* Unde nunquam faciendum est malum, ut eveniat bonum. (*vid. etiam prop. 41 Alex. VII.*)

Ignorantia
Myfterio-
rum.

Prop. 64.

Absolutionis capax est homo, quantumvis laboret ignorantia Myfteriorum fidei, & etiamfi per negligentiam, etiam culpabilem, nesciat Myfterium SS. Trinitatis & Incarnationis D. N. J. Christi.

Obferv. Probabile est, secundum plurimum DD. sententiam, quod noticia SS. Trinitatis & Incarnationis Domini ad salutem sit necessaria necessitate Medii: ergo nullatenus est probabile, quod capax sit absolutionis, qui hæc myfteria penitus ignorat; quia Sacramentum absque necessitate exponeretur periculo frustrationis, quod nunquam licet. Dico, *absque necessitate*; quia pœnitens potest instrui; vel, si hoc fieri tunc non potest, differri potest absolutio, donec prius instruatur.

Cæterum propositio, si loquatur de ignorantia (culpabili vel inculpabili) omnium myfteriorum fidei, etiam DEI existentis & remuneratoris, (*quantumvis laboret ignorantia myfteriorum fidei*) apertissime est falsa; quia noticia DEI, ut existentis, & ut remuneratoris ita est necessaria ad salutem, ut ne quidem sufficiat, eam habere in voto, sicut tamen baptismum sufficit aliquando habere in voto.

Prop. 65.

Sufficit, illa myfteria semel credidisse.

Obferv. De hac thesi dictum est ad propos. 1. ab Alex. VII. confixam. Plenæ sunt Scripturæ præceptis fidei. *Hæc est vita æterna, ut cognoscant te verum DEUM, & quem misisti JESUM Christum.* Joan. 17. *Nos in Christum credimus, ut justificemur ex fide Christi.* Ad Gal. 2. *Hoc est mandatum, ut credamus in nomine Filii ejus.* Joan. 3.

Cur non etiam dicis, sufficere, ut semel sis Christianus? ut semel cogites de DEO, & JESU Christo Redemptore? Quando Sacramentum Eucharistiæ suscipis, an nihil credis? *Iustus ex fide vivit.* Rom. 2. Ergo sine fide non vivit, & sicut frequens cibus ad vitam corporalem, ita frequens fides ad vitam spiritualem est necessarius.

Atque has 65 propositiones, & unamquamque ipsarum, sicut jacent, ut minimum tanquam scandalosas, & in praxi perniciosas, sua Sanctitas damnavit, & prohibuit.

§. 4.

*Propositiones 68 Michaelis Molinos damnatæ ab Innocentio XI.**anno 1687.*

Fuit is Sacerdos Hispanus, qui diu versatus Romæ, auctor est *Quietismi*, multa de interno homine, animæ quiete, & indifferentia ineptissime ac turpissime garriens, quibus non paucos homines, spurcis voluptatibus inhiantes, seduxit, corrumpitque. Sacri denique officii Decreto in carcerem coniectus est. Stultitiæ autem illius sunt istæ.

1 Oportet hominem suas potentias annihilare. Et hæc est via interna.

2 Velle operari active est velle DEUM offendere, qui vult esse ipse solus agens, & ideo opus est, se ipsum totum & totaliter relinquere, & postea permanere velut corpus exanime.

3 Vota de aliquo faciendo sunt perfectionis impeditiva.

4 Activitas naturalis est gratiæ inimica, impeditque DEI operationem, & veram perfectionem: quia DEUS vult operari in nobis sine nobis.

5 Nihil operando anima se annihilat, & ad ipsum principium redit, & ad suam originem, quæ est essentia DEI, in qua transformata remanet, ac divinizzata, & DEUS in ipsa remanet, quia tunc non sunt amplius duæ res unitæ, sed una tantum; & hac ratione DEUS vivit & regnat in nobis, & anima se ipsam annihilat in esse operativo.

6 Vis interna est illa, in qua non cognoscitur, nec amor, nec resignatio, & non oportet DEUM cognoscere; & hoc modo recte proceditur.

7 Non debet anima cogitare nec de præmio, nec de punitione, nec de paradiso, nec de inferno, nec de morte, nec de æternitate.

8 Non debet velle scire, an gradiatur cum voluntate DEI, an cum eadem voluntate resignata maneat, nec ne: nec opus est, ut velit cognoscere suum statum, nec proprium nihil, sed debet ut corpus exanime.

9 Non debet anima reminisci nec DEI, nec sui, nec cujuscunque rei, & in via interna omnis reflexio est noxia, etiam reflexio ad suas humanas actiones & ad proprios defectus.

10 Si propriis defectibus alios scandalizat, non est necessarium reflectere, dummodo non adsit voluntas scandalizandi: & ad proprios defectus non posse reflectere, gratia DEI est.

11 Ad dubia, quæ occurrunt, an recte procedatur, nec ne, non opus est reflectere.

12 Qui suum liberum arbitrium DEO donavit, de nulla re debet curam habere, nec de inferno, nec de paradiso, nec debet habere desiderium propriæ perfectionis, nec virtutum, nec propriæ sanctitatis, nec propriæ salutis, cuius spem expurgare debet.

13 Resignato DEO libero arbitrio, eidem relinquenda est cogitatio & cura de omni re nostra, & relinquere, ut faciat in nobis sine nobis suam Divinam voluntatem.

14 Qui Divinæ voluntati resignatus est, non convenit, ut a DEO rem aliquam petat; quia petere est imperfectio, cum sit actus propriæ voluntatis, & electionis, & est velle, quod Divina voluntas nostræ conformetur, & non, quod nostra Divinæ, & illud Evangelii: *petite & accipietis*, non est dictum a Christo pro animabus internis, quæ nolunt habere voluntatem. Imo huiusmodi animæ eo perveniunt, ut non possint a DEO rem aliquam petere.

15 Sicut non debent a DEO rem aliquam petere, ita nec illi ob rem aliquam gratias agere; quia utrumque est actus propriæ voluntatis.

16 Non convenit Indulgentias quærere pro poena, propriis peccatis debita; quia melius est Divinæ iustitiæ satisfacere, quam Divinam misericordiam quærere; quia illud ex puro DEI amore procedit, & istud ab amore nostri interessato, nec est res DEO grata, nec meritoria, quia est velle crucem fagere.

17 Tradito DEO libero arbitrio, & eidem relicta cura, & cogitatione animæ nostræ, non est amplius habenda ratio tentationum, nec eis aliqua resistantia fieri debet, nisi negativa, nulla adhibita industria; & si natura commovetur, oportet sinere, ut commoveatur, quia est natura.

18 Qui in oratione utitur imaginibus, figuris, speciebus, & propriis conceptibus, non adorat DEUM in spiritu & veritate.

19 qui amat DEUM eo modo, quo ratio argumentatur, aux intellectus comprehendit, non amat verum DEUM.

20 Afferere, quod in oratione opus est sibi per discursum auxilium ferre, & per cogitationes, quando DEUS animam non alloquitur, ignorantia est. DEUS nunquam loquitur: ejus locutio est

est operatio; & semper in anima operatur, quando hæc suis discursibus, operationibus, & cogitationibus eum non impedit.

21 In oratione opus est manere in fide obscura, & universalis cum quiete, & oblivione cujuscunque cogitationis particularis, ac distinctæ attributorum DEI, ac Trinitatis, & sic permanere in præsentia DEI ad illum adorandum, & amandum, eique inserviendum, sed absque productione actuum; quia DEUS in his sibi non complacet.

22 Cognitio hæc per fidem non est actus a creatura productus, sed est cognitio, a DEO creaturæ tradita, quam creatura habere se non cognoscit, nec postea cognoscit, eam se habuisse, & idem dicitur de amore.

23 Mystici cum S. Bernardo in scala claustralium distinguunt quatuor gradus, lectionem, meditationem, orationem, & contemplationem infusam. Qui semper in primo sistit, nunquam ad secundum pervenit: qui semper in secundo sistit, nunquam ad tertium pervenit, qui est nostra contemplatio acquisita, in qua per totam vitam persistendum est, dummodo DEUS animam non trahat, absque eo, quod ipsa id exspectet, ad contemplationem infusam; & hac cessante anima regredi debet ad tertium gradum, & in ipso permanere, absque eo, quod amplius redeat ad secundum, aut primum.

24 Qualescunque cogitationes in oratione occurrant, etiam impuræ, etiam contra DEUM, sanctos, fidem, Sacramenta, si voluntarie non nutriantur, nec voluntarie expellantur, sed cum indifferentia, & resignatione tolerantur, non impediunt orationem fidei, imo eam perfectiorem efficiunt, quia anima tunc magis Divinæ voluntati resignata manet.

25 Etiam si superveniat somnus, & dormiatur, nihilominus fit oratio & contemplatio actualis; quia oratio & resignatio idem sunt, & dum resignatio perdurat, perdurat & oratio.

26 Tres illæ viæ, purgativa, illuminativa, & unitiva, sunt absurdum maximum, quod dictum fuerit in Mystica; cum non sit nisi una via, scilicet interna.

27 Qui desiderat & amplectitur devotionem sensibilem, non desiderat, nec quærit DEUM, sed se ipsum, & male agit, cum eam desiderat, & eam habere conatur, qui per viam internam incedit, tam in locis sacris, quam diebus solennibus.

28 Tædium rerum spiritualium bonum est; siquidem per illud purgatur amor proprius.

29 Dum

29 Dum anima interna fastidit discursus de DEO, & virtutes, & frigida manet, nullum in se sentiens fervorem, bonum signum est.

30 Totum sensibile, quod experimur in vita spiritali, est abominabile, spurcum & immundum.

31 Nullus meditativus veras virtutes exercet internas, quæ non debent a sensibus cognosci. Opus est, virtutes amittere.

32 Nec ante, nec post communionem alia requiritur præparatio, aut gratiarum actio (pro istis animabus internis) quam permanentia in solita resignatione passiva, quia modo perfectiore supplet omnes actus virtutum, qui possunt & fiunt in via ordinaria. Et, si in hac occasione communionis insurgunt motus humiliationis, petitionis, & gratiarum actionis, reprimendi sunt, quoties non dignoscatur, eos esse ex speciali impulsu DEI; alias sunt impulsus naturæ, nondum mortuæ.

33 Male agit anima, quæ procedit per hanc viam internam, si in diebus solennibus vult aliquo conatu particulari excitare in se devotum aliquem sensum, quoniam animæ internæ omnes dies sunt æquales, omnes festivi. Et idem dicitur de locis sacris; quia huiusmodi animabus omnia loca æqualia sunt.

34 Verbis & linguis gratias agere DEO non est pro animabus internis, quæ in silentio manere debent, nullum DEO impedimentum opponendo, quod operetur in illis, &, quo magis DEO se resignant, experiuntur se non posse orationem Dominicam seu *Pater noster* recitare.

35 Non convenit animabus huius viæ internæ, quod faciant operationes, etiam virtuosas, ex propria electione & activitate, alias non essent mortuæ: nec debent elicere actus amoris erga B. V. sanctos, aut humanitatem Christi, quia, cum ista objecta sensibilia sint, talis est amor erga illa.

36 Nulla creatura, nec B. V. nec sancti sedere debent in corde nostro; quia solus DEUS vult illud occupare & possidere.

37 In occasione tentationum, etiam furiosarum non debet anima elicere actus explicitos virtutum oppositarum, sed debet in supradicto amore & resignatione permanere.

38 Crux voluntaria mortificationum pondus grave est, & infructuosum, ideoque dimittenda.

39 Sanctiora opera & poenitentiae, quas peregerunt sancti, non suffecerunt ad removendam ab anima vel unicam adhaesionem.

40 B. V. nullum unquam opus exterius peregit, & tamen fuit sanctis omnibus sanctior. Igitur ad sanctitatem perveniri potest sine opere exteriori.

41 DEUS permittit & vult, ad nos humiliandos, & ad veram transformationem perducendos, quod in aliquibus animabus perfectis, etiam non arreptitiis, dæmon violentiam inferat eorum corporibus, eosque actus carnales committere faciat, etiam in vigilia & sine mentis offuscatione, movendo physice eorum manus & alia membra contra earum voluntatem. Et idem dicitur quoad alios actus per se peccaminosos, in quo casu non sunt peccata; quia his non adest consensus.

42 Potest dari casus, quod huiusmodi violentiæ ad actus carnales contingant eodem tempore ex parte duarum personarum, scilicet maris & foeminæ, & ex parte utriusque sequatur actus.

43 DEUS præteritis sæculis sanctos efficiebat, tyrannorum ministerio, nunc vero eos efficit sanctos ministerio dæmonum, qui causando in illis dictas violentias facit, ut illi se ipsos magis despiciant, atque annihilent, & se DEO resignent.

44 Job blasphemavit, & tamen non peccavit labiis suis; quia fuit ex dæmonis violentia.

45 S. Paulus huiusmodi dæmonis violentias in suo corpore passus est; unde scripsit: *non, quod volo bonum, hoc ago, sed quod nolo malum, hoc facio.*

46 Huiusmodi violentiæ sunt medium magis proportionatum ad annihilandam animam, & ad eam ad veram transformationem, & unionem perducendam: nec alia superest via: & hæc est via facilior & tutior.

47 Cum huiusmodi violentiæ occurrunt, sinere oportet, ut Satanas operetur, nullam adhibendo industriam, nullumque proprium conatum, sed permanere debet homo in suo nihilo, & etiam si sequantur pollutiones, & actus obscœni propriis manibus, & etiam pejora, non opus est se ipsum inquietari, sed foras emittendi sunt scrupuli, dubia, & timores; quia anima fit magis illuminata, magis roborata, magis candida, & acquiritur sancta libertas. Et præ omnibus non est opus hæc confiteri, & sanctissime fit, non confitendo; quia hoc pacto superatur dæmon, & acquiritur thesaurus pacis.

48 Satanas, qui huiusmodi violentias infert, suadet deinde, gravia esse delicta, ut anima se inquietet, ne in via interna ul-

terius progrediatur; unde ad ejus vires enervandas, melius est, ea non confiteri, quia non sunt peccata, nec etiam venialia.

49 Job ex violentia dæmonis se propriis manibus polluebat, eodem tempore, quo mundas habebat ad DEUM preces. (sic interpretando locum ex cap. 16 Job)

50 David, Hieremias, & multi ex sanctis Prophetis hujusmodi violentias patiebantur, harumque impurarum operationum externarum.

51 In S. Scriptura multa sunt exempla violentiarum ad actus externos peccaminosos, ut illud de Samfone, qui per violentiam se ipsum occidit cum Philistæis, conjugium iniit cum alienigena, & cum Dalila meretrice fornicatus est, quæ alias erant prohibita, & peccata fuissent: de Juditha, quæ Holoferni mentita fuit: de Elisæo, qui pueris maledixit: de Elia, qui combussit Duces cum turmis Regis Achab. An vero fuerit violentia immediate a DĒO peracta, vel dæmonum ministerio, ut in aliis animabus contingit, in dubio relinquitur.

52 Cum hujusmodi violentiæ, etiam impuræ absque mentis offuscatione accidunt, tunc anima DEO potest uniri, & defacto semper magis unitur.

53 Ad cognoscendum in praxi, an aliqua operatio in aliis personis fuerit violenta, regula, quam de hoc habeo, nedum sunt protestationes animarum illarum, quæ protestantur, se dictis violentiis non consensisse, aut jurare non possint, quod in iis consenserint, & videre, quod sint animæ, quæ proficiunt in via interna, sed regulam sumere a lumine quodam actuali, cognitione humana, ac theologica superiore, quod me certo cognoscere facit, cum interna certitudine, quod talis operatio est violenta, & certus sum, quod hoc lumen a DEO procedit, quia ad me pervenit conjunctum cum certitudine, quod a DEO proveniat, & mihi nec umbram dubii relinquit in contrarium; eo modo, quo interdum contingit, quod DEUS aliquid revelando, eodem tempore animam certam reddit, quod ipse sit, qui revelat, & anima in contrarium non potest dubitare.

54 Spirituales vitæ ordinariæ in hora mortis se delusos inveniunt, & confusos, & cum omnibus passionibus in alio mundo purgandis.

55 Per hanc viam internam pervenitur, etsi multa cum sufferentia, ad purgandas & extinguendas omnes passiones, ita, quod nihil amplius sentitur, nihil, nihil; nec ulla sentitur inquietudo.

quietudo, sicut corpus mortuum, nec anima se amplius commoveri sinit.

56 Duæ leges & duæ cupiditates, animæ una, & amoris proprii altera, tamdiu perdurant, quamdiu perdurat amor proprius; unde, quando hic purgatus est, & mortuus, ut fit per viam internam, non adsunt amplius duæ illæ leges, & duæ cupiditates, nec ulterius lapsus aliquis incurritur, nec aliquid sentitur amplius, ne quidem veniale peccatum.

57 Per contemplationem acquisitam pervenitur ad statum non amplius faciendi peccata, nec mortalia, nec venialia.

58 Ad hujusmodi statum pervenitur, non reflectendo amplius ad proprias operationes; quia defectus ex reflexione oriuntur.

59 Via interna sejuncta est a confessione, a confessariis, & a casibus conscientiæ, a Theologia & Philosophia.

60 Animabus provectis, quæ reflexionibus mori incipiunt, & eo etiam perveniunt, ut sint mortuæ, DEUS confessionem aliquando facit impossibilem, & supplet ipse tanta gratia perseverante, quantam in Sacramento recipere, & ideo hujusmodi animabus non est bonum in tali casu ad Sacramentum poenitentiae accedere; quia id est in illis impossibile.

61 Anima, cum ad mortem mysticam pervenit, non potest amplius aliud velle, quam quod DEUS vult; quia non habet amplius voluntatem, & DEUS illi eam abstulit.

62 Per viam internam pervenitur ad continuum statum immobilem in pace imperturbali.

63 Per viam internam pervenitur etiam ad mortem sensum, quin imo signum, quo quis in statu nihilitatis maneat, id est, mortis mysticæ, si sensus exteriores non repræsentent amplius res sensibiles, unde sint, acsi non essent, quia non perveniunt ad faciendum, quod intellectus se ad illas applicet.

64 Theologus minorem dispositionem habet, quam homo rudis ad statum contemplativi. 1 quia non habet fidem adeo puram. 2 quia non est adeo humilis. 3 quia non adeo curat propriam salutem. 4 quia caput refertum habet phantasmatis, speciebus, opinionibus, & speculationibus, & non potest in illum ingredi verum lumen.

65 Præpositis obediendum est in exteriori, & latitudo voti obedientiæ tantummodo ad exterius pertingit. In interiore vero aliter se res habet, quo solus DEUS & Director intrant.

66 Rifu digna est nova quædam Doctrina in Ecclesia DEI, quod anima quoad internum gubernari debeat ab Episcopo: quod, si Episcopus non sit capax, anima ipsum cum suo Directore adbeat. Novam dico doctrinam, quia nec S. Scriptura, nec Concilia, nec Canones, nec Bullæ, nec sancti, nec authores eam unquam tradiderunt, nec tradere possunt, quia Ecclesia nunquam judicat de occultis, & anima jus habet eligendi quemcunque, sibi bene visum.

67 Dicere, quod internum manifestandum est exteriori tribunali Præpositorum, & quod peccatum sit, id non facere, est manifesta deceptio; quia Ecclesia non judicat de occultis; & propriis animabus præjudicant his deceptionibus & simulationibus.

68 In mundo non est facultas nec jurisdictio ad præcipiendum, ut manifestentur epistolæ Directoris quoad internum animæ; & ideo opus est animadvertere, quod hoc est insultus Satanæ &c.

Condemnatio.

Atque has absurdissimas & spurcissimas propositiones Innoc. XI tanquam hæreticas, suspectas, & erroneas, scandalosas, blasphemias, piarum aurium offensivas, temerarias, Christianæ disciplinæ relaxativas, & everivas, & seditiosas respectivè, ac quæcunque super iis verbo, scripto, vel typo tradita, damnat, & omnibus interdicit, ne eas credant, teneant, doceant, aut in praxin deducant, sub pœna anathematis Pontifici reservati, nec non omnes libros, omniaque manuscripta ejusdem Michaelis de Molinos, quæ statim Episcopis, aut hæreticæ pravitatis Inquisitoribus ad comburendum tradi jubet, sub eadem pœna.

Tandem, ut prædictus Molinos, ob hæreses, errores, & turpia facta prædicta in aliorum exemplum & ipsius emendationem plecteretur, eundem tanquam reum convictum, & respectivè confessum, & uti hæreticum formalem, licet poenitentem, ad perpetuum carcerem, & ad peragendas alias pœnas salutaris, prævia abjuratone, servato Juris ordine, Pontifex condemnavit, lecto ex suggestu, in quo præsens adstare debuit, publico processu.

Observatio.

Turpiorem hæreticum vix unquam vidit Ecclesia. Subemendato furo indifferentiæ & quietis internæ spurcissima scelera a peccato absolvit. Libertatem, Calvinii & Jansenii exemplo, extrivit, omniaque, quæ mala voluntas peccat, dæmonis violentiæ attribuit.

buit. Fidem, spem, charitatem, omnesque virtutum actus, ac bona opera sustulit, cum cultu DEI & sanctorum, usuque sacramentorum, votis, indulgentiis. Tentationibus non resistendum: sinenda natura, quia est natura: sequendum, quocunque demon trahat. Tædium & fastidium rerum spiritualium laudat; nihil meditandum, orandumque, omnis cogitatio de morte, judicio, inferno, cœlo, imo etiam de DEO excludenda; nulla adhibenda salutis cura.

Et hæc est pulchra illius *via interna*, quam tantopere commendat: hæc quies animæ, omnium videlicet scelerum abominandorum sentina. Et tamen in confirmationem lutulentæ suæ doctrinæ ausus est adducere testimonia S. Scripturæ. Fecit hoc omnium hæresiarcharum exemplo.

§. 5.

Propositiones 31 ab Alexandro VIII 7 Dec. 1690 damnatæ.

Propositio 1.

In statu naturæ lapsæ ad peccatum formale, & demeritum sufficit De libero illa libertas, qua voluntarium ac liberum fuit in causa sua, peccato originali, & libertate Adami peccantis.

Observ. Renovantur hic damnatæ a Pio V & Greg. XIII Theses Baji, uti 67. *Homo peccat etiam damnabiliter in eo, quod necessario facit.* Et Jansenii tertia, *ad merendum & demerendum in statu naturæ lapsæ non requiritur in homine libertas a necessitate, sed sufficit libertas a coactione*, ab Innoc. X & Alex. VII profligata. Et jam antea Tridentinum S. 6 can. 5 contra Lutherum & Calvinum definivit, liberum hominis arbitrium post Adami peccatum non fuisse extinctum.

Profecto, si vera esset thesis, etiam infantes, amentes, dormientes formaliter peccarent, & demererentur, quia in Adamo fuerunt liberi; imo etiam motus primi & indeliberati concupiscentiæ essent peccata formalia, omniaque, quæ ex ignorantia, quantumvis invincibili, procedunt.

Et ratio a priori est, quia ad hoc, ut quis committat peccatum formale, requiritur, ut actus primus proximus, sit indifferens ad utrumque membrum contradictionis, seu ad positionem actus, & omissionem; nam in hoc ipso stat libertas indifferentiæ.

Et hinc, qui alterum in plena ebrietate occidit, sine libertate actuali, non committit novum peccatum, quamvis peccaverit, tam adversus temperantiam, quam adversus iustitiam peccato homicidii, quando voluit inebriari, prævidens aut intendens peccatum homicidii; sicut etiam actus externus non est novum peccatum, distinctum ab actu interno; & quamvis detur obligatio confitendi actum externum, id non provenit ex eo, quod committatur novum peccatum, sed, ut confessarius habeat sufficientem notitiam de actu interno, & possit instruere pœnitentem de incur- sis pœnis, & aptam medicinam præscribere. Idem dicendum de actu efficaciter imperato, si non sit immediate & formaliter liber.

Neque damnatis ad peccandum sufficit ea libertas, quam habuerunt in vita, sed habent potentiam physicam ad vitandas blasphemias &c. &, si neque hanc haberent, non peccarent formaliter; sed necessitarentur ad blasphemandum, sicut beati in cœlo propter visionem intuitivam necessitantur ad amandum DEUM. Neutri vero merentur aut demerentur, quia non amplius sunt viatores, sed existunt in termino.

Igitur his argumentis uti non possunt Bajani & Jansenistæ ad patrocinium damnatæ suæ thesisi, quod in statu naturæ lapsæ ad peccatum formale & demeritum sufficiat libertas in causa, seu peccato Adami. Accedit, quod hoc peccatum non commiserimus voluntate physice propria, sed tantum moraliter propria, quatenus per Decretum Divinum voluntas nostra fuit allegata voluntati Adami.

Dices. Quamvis Christus fuerit per præceptum, acceptum a Patre, necessitatus ad moriendum, mors tamen fuit ipsi libera & meritoria, præcise ideo, quia fuit libera in causa, quatenus potuit præceptum impedire, vel petere dispensationem vel facere miracula, ut Judæi eum non occiderent. Ergo etiam in casu nostro sufficit libertas in causa ad peccatum formale ac demeritum.

Resp. Prætermittis variis viis, quas Theologi tentarunt ad difficultatem istam solvendam, impositum fuisse præceptum rigorosum moriendi, non quidem Christo, sed humanitati, quæ habuit actum primum proximum indifferenter ad reprobandum malum & eligendum bonum, potuitque peccare, peccato impeditivo unionis hypostaticæ, sicut quilibet homo potest peccare, peccato impeditivo præscientiæ de consensu & decreti prædefinitivi; unde dein tota necessitas est consequens, quæ non obstat libertati, cum dependeat a scientia Media, a creatura impedibili.

Prop. 2.

Tametsi detur ignorantia invincibilis Juris naturæ, hæc in statu naturæ lapsæ operantem ex ipsa non excusat a peccato formali. De ignorantia juris naturæ.

Obsev. Ad rationem peccati formalis pertinet, ut sit voluntarium; damnata enim est hæc propositio Baji 46. *Ad rationem & definitionem peccati non pertinet voluntarium.* Et S. Thomas p. 2 q. 76 art. 3 ait: *ignorantia, quæ est causa actus, quia causat involuntarium, de se habet, quod excuset a peccato, eo quod voluntarium est de ratione peccati.* Et S. Aug. lib. de natura & gratia c. 67. *Non tibi reputatur ad culpam, quod invitus ignoras, sed quod negligis quærere.*

Atqui, quod fit ex ignorantia invincibili, non est voluntarium, cum ad rationem voluntarii requiratur cognitio, quia *procedit ab intrinseco cum cognitione finis.* Unde S. Thomas l. c. ait, quod *ignorantia causet involuntarium*: cum nihil sit volitum, nisi præcognitum. Licet enim actus aliquis, jure prohibitus, secundum se sit tibi voluntarius, non tamen, in quantum est contra legem, quam invincibiliter ignoras. Et hinc, ut loquitur S. Augustinus, est voluntarius *voluntate facti*, non autem *voluntate peccati*.

Et ratio ulteriorest, quia ad omne peccatum formale requiritur aliqua advertentia ad legem præcipientem aut prohibentem. Sed quando lex invincibiliter, & inculpabiliter ignoratur, nulla datur advertentia ad legem, imo nec dari potest. Quare merito damnata est hæc propositio Baji 68. *Infidelitas pure negativa in iis, quibus DEUS non est prædicatus, peccatum est.*

Verbi Divini oracula hoc ipsum comprobant: *si non venissem, & locutus fuisset eis, peccatum non haberent*, ait Christus Joan. 15. *Si opera non fecissem in eis, quæ nemo alius fecit, peccatum non haberent*, ibid. *Si cæci essetis, non haberetis peccatum.* Jo. 9.

Igitur Scripturæ & Patres, quæ peccata ignorantia afferunt, loquuntur de ignorantia culpabili & vincibili, non autem de invincibili. Quod servus, qui cognovit voluntatem domini, & non facit, vapulabit multis; qui vero eam non cognovit (ex ignorantia vincibili) vapulabit paucis, inde est, quod sciens voluntatem domini, & non faciens, gravius peccet, quam ille, qui eandem ignorat, ignorantia licet culpabili; prout ait S. Aug. de grat. & lib. arb. c. 3. Regula Juris, quod *ignorantia facti excuset, non juris*, non est intelligenda de foro interno, sed de externo, in quo regulariter juris clari scientia præsumitur; dico *regulariter*, quia etiam

pro

pro foro externo varios ignorantia juris excusat. Axioma vero illud: *omnis peccans ignorans*, non est intelligendum de vera ignorantia, sed de cæcitate & stultitia; ubi subintrat aliud Axioma: *video meliora proboque, deteriora sequor*.

Neque dicas, nullam dari ignorantiam juris naturæ invincibilem; quamvis enim talis dari non possit circa prima & universalissima juris naturæ principia, per se evidentia, uti DEUM esse colendum, parentes honorandos, nemini faciendam injuriam &c. prout etiam circa conclusiones, immediate & clare inde deductas, quales sunt pleraque præcepta Decalogi: potest tamen dari quoad conclusiones mediatas, & non ita clare deductas ex iis principiis moralibus. In his enim plures, etiam docti sunt decepti, uti circa fornicationem, molliem, lucrum ex mutuo, mendacium officiosum &c. Et quoties adhuc in Theologia & Jurisprudencia disputatur, an hoc vel illud jure naturæ sit prohibitum vel præceptum, e. g. an polygamia jure naturæ sit prohibita? an, & quinam gradus consanguinitatis & affinitatis jure naturæ dirimant matrimonium? An matrimonium cum pacto castitatis sit jure naturæ validum? An contractus, metu gravi & injusto extorti, obligent. Jam vero, si ignorantia invincibilis juris naturæ potest dari in doctis, quanto magis in rudibus, rusticis, fœminis, pueris? Experiuntur hoc sane confessarii. (*De duabus his thesibus uberius tractavi Part. 8 in Theologia Jansenistica.*)

Prop. 3.

Non licet sequi opinionem, vel inter probabiles probabilissimam.

De opinione
probabilissi-
ma.

Observ. Ex proscriptione hujus thesisi aperte habetur, 1 non semper sequi oportere tutiora, sed quod sequi possimus opinionem probabilissimam, faventem libertati contra legem: 2 ab omnibus docendum probabilissimum, in aliqua sua specie; quia opinio probabilissima non exit e finibus probabilitatis: & hinc pleraque argumenta, quæ pro Tutiorismo afferuntur, posse retorqueri. Quando habetur vera, solida, comparativa probabilitas de non existentia legis, consilii est, sequi tutiora, non præcepti. Imo dici potest, posse sequi opinionem vere probabilem esse formaliter tutius, propter gravissimas difficultates & anxietates, quæ animas obruerent, si semper oporteret indagare, quid sit probabilius. (*De hac materia ex professo tractavi Part. 1 de lege dubia.*)

Prop. 4.

Dedit semetipsum pro nobis oblationem DEO, non pro solis Electis, sed pro omnibus & solis Fidelibus.

Observ. At passim in sacris Scripturis aperte docetur, Christum pro omnibus omnino hominibus mortuum esse, & non pro solis fidelibus. Sic 1 Tim. 2 dicitur: *Dedit redemptionem semetipsum pro omnibus.* Item: *DEUS vult omnes homines salvos fieri.* Ibid. *pro nobis omnibus tradidit illum.* Rom. 8. *Ipse est propitiatio pro peccatis totius mundi.* Idem definivit Tridentinum contra Calvinum *sess. 6 cap. 2.* Idem Innoc. X & Alex. VII contra Janenium.

Mors Christi
pro omnibus.

Neque ullo modo eliditur tanta auctoritas dicendo, Christum mortuum esse pro generibus singulorum, non autem pro singulis generum, hoc est pro fidelibus ex omni genere, natione & conditione hominum; nam totus mundus non tantum complectitur fideles: mortuus est autem *pro peccatis totius mundi.* Et quæ ratio ita restringendi signum universale *omnis, omnes*, contra definitiones Ecclesiæ? Quid apertius ad hunc refellendum errorem, quam effatum Apostoli 1 Tim. 4, ubi Christus dicitur *Salvator omnium, maxime fidelium*, qui merita mortis Christi specialiter sibi applicant.

Non minus gratis dicunt, Christi mortem fuisse sufficientem ad omnes redimendos, sed non fuisse pro omnibus oblatam; nam hoc modo etiam dæmones fuissent redempti, quia mors Christi fuit sufficiens, etiam pro illis redimendis.

Prop. 5.

Pagani, Judei, Hæretici, alique hujus generis, nullum omnino a Jesu Christo accipiunt influxum, adeoque hinc recte inferes, in illis esse voluntatem nudam & inermem, sine omni gratia sufficiente.

Observ. DEUS omnes homines vult salvos fieri, & ex hac optima voluntate propter nos homines & propter nostram salutem descendit de cœlis, & incarnatus, passus, ac mortuus est: illuminat omnem hominem venientem in hunc mundum; pro omnibus baptismum ac reliqua Sacramenta, salutis fontes, instituit; omnibus dat gratiam sufficientem; ut adeo non stet per Christum, quo minus omnes salventur; sed, quod multi Divinis gratiis non cooperentur, atque in infidelitate persistant, perversæ suæ voluntati imputare debent. Falsum enim est, quod Christus pro infide-

De gratia.

libus non oraverit, ut patet ex oratione, in cruce pro crucifixoribus facta.

Prop. 6.

Gratia sufficiens statui nostro non tam utilis quam perniciosa est, sic, ut proinde merito possimus petere: a gratia sufficienti libera nos Domine.

Observ. Gratia efficax est etiam *sufficiens* ad actum salutarem; hanc utique non dices perniciosam. Si autem loquaris de gratia, *ut mere sufficiente*, seu *ut inefficace*, prout communiter sumitur gratia sufficiens, tunc ista duo importat, nempe i entitatem gratiæ, seu auxilii, quod complet actum primum proximum, ad actum secundum salutarem liberum. Et hoc auxilium est a solo DEO, estque beneficium DEI, qui intendit per illud actum bonum ac salutarem, completque potentiam ad illum ponendum: neque enim DEUS dat gratiam, ut ei dissentias, sed ut consentias & coopereris, & si prævideret, te eidem consenturum, tamen illam daret, & quidem lubentius.

Alterum, quod gratia, *ut mere sufficiente* seu *ut inefficax* in obliquo importat, est carentia seu privatio consensus seu cooperationis. Et hoc est a sola creatura, gratia & libertate, sibi a DEO sine optimo concessa, culpa sua abutente: atque hic abusus est utique malus & perniciosus.

Verum propter hunc abusum non cessat gratia esse donum & beneficium DEI; alias neque creatio, neque conservatio, neque incarnatio, passio, & mors Redemptoris, neque SS. Sacramenta, aliaque media ad salutem, neque dotes corporis & animi, neque bona fortunæ, essent dona & beneficia DEI, quando culpa tua iis abuteris. Hunc autem abusum DEUS prohibet, non autem tenetur impedire, imo debet creaturæ liberum permittere, supposita libertate, eidem concessa.

Falissimum igitur est, quod gratia sufficiens de se non sit utilis sed perniciosa; fac, ut coopereris gratiæ, sicut potes, & erit efficax, & utilissima ad salutem. Nunquid boni sunt oculi & utiles ad videndum? Si autem claudas oculos, an propterea desinunt esse boni & utiles. Tua solius culpa est, quod nihil videas. Æqualis gratia potest esse efficax in Petro, inefficax in Paulo; quia ille libere cooperatur, hic culpa sua libere resistit gratiæ. Quin imo major quandoque datur gratia dissentienti quam consentienti. *Perditio*

ditio tua Israel, in me tantummodo auxilium, inquit Dominus Osee 13. Et ad quid tot exprobrationes in Divinis litteris, quod caelestibus illustrationibus, inspirationibus, adhortationibus resisterint, si cum gratia sufficiente non potuissent cooperari? Ipsa vox *gratia sufficiens* aliud signat.

Prop. 7.

Omnis humana actio deliberata, est DEI dilectio vel mundi: si DEI, caritas Patris est: si mundi, concupiscentia carnis, hoc est, mala est.

Prop. 8.

Neceffe est, infidelem in omni opere peccare.

Observ. Absurdas has theses jam Part. VIII in Theol. Jansen. cap. 15 confutavi, jamque dudum in Bajo sunt damnatae, sed a Sinnichio Professore Lovaniensi, & Symmisticis, pro reverentia, ^{De virtutibus.} qua Jansenistae in sedem Apost. feruntur, resuscitatae. Dantur multi actus moraliter honesti apud fideles & infideles, qui neque sunt dilectio DEI, neque concupiscentia carnis, neque aliud peccatum. Fides etiam & spes, aliaeque virtutes, neque sunt per se dilectio DEI, nec concupiscentia carnis. In terminis absurdum est, quod misericordia in pauperes, justitia, temperantia, fortitudo, aliaeque virtutes morales, quas Gentiles quidam, Graeci & Romani amore honestatis naturalis, & ex dictamine, & lumine rationis naturalis exercuerunt, fuerint mera peccata.

Sine fide impossibile est placere DEO: hoc est, nullus actus salutaris atque ad DEUM tanquam ultimum finem supernaturalem ducens, sine fide potest elici. Item sine fide non infunditur gratia sanctificans, quae sola simpliciter facit gratum DEO. Denique licet persona sine fide non placeat DEO, cum saltem peccato originali sit infecta, possunt tamen aliqua illius opera suo modo placere, aut saltem non displicere. *Omne, quod non est ex fide, peccatum est*, hoc est, quod non est secundum dictamen conscientiae. Omnia quidem referenda sunt ad DEUM. Sed, si de hoc non cogitet, aut invincibiliter id ignoret, non peccat.

Prop. 9.

Revera peccat, qui odio habet peccatum mere ob ejus turpitudinem & disconvenientiam cum natura rationali, sine ullo respectu ad DEUM offensum.

Observ. Tridentinum definit contrarium, attritionem videlicet, ex turpitudine peccati conceptam, *non solum non facere* ^{De odio peccati ob turpitudinem.}

magis peccatorem, verum etiam donum DEI esse, & Spiritus S. impulsus; atque ad DEI gratiam in Sacramento pœnitentiæ impetrandam disponere: ergo non tantum non peccat, qui ex hoc motivo odit peccatum, sed etiam positive honeste operatur.

Cæterum videtur hæc thesis supponere, quod objectum aliquod ut disconveniens naturæ rationali possit attingi absque ullo ad DEUM offensum respectu: adeoque possibile esse peccatum mere Philosophicum. Hoc autem suppositum est falsum; quia hoc ipso, quod quis cognoscat, aliquid esse disconveniens naturæ rationali, cognoscit, illud esse illicitum atque prohibitum a supremo legislatore, cum nullus alius prohibere & illicitum facere posset, adeoque hoc ipso sub aliquo prædicato cognoscit DEUM. Ergo cognosci non potest talis disconvenientia absque ullo respectu ad DEUM offensum.

Prop. 10.

De spe.

Intentio, qua quis detestatur malum, & prosequitur bonum, mere, ut obtineat cœlestem gloriam, non est recta, nec DEO placens.

Observ. Audi Tridentinum sess. 6 can. 31 definiens: *si quis dixerit, justificatum peccare, dum intuitu æternæ mercedis operatur, anathema sit:* imo ipsam sacram Scripturam, intuitu mercedis ad beneoperandum nos excitantem: *omnis, qui in agone contendit, ab omnibus se abstinet, & illi quidem, ut corruptibilem coronam accipiant, nos autem incorruptam.* 1 Cor. 9. Paulus ipse, quia bonum certamen certavit, expectat coronam justitiæ, & David Ps. 118. *Inclinavi cor meum ad faciendas justificationes tuas in æternum propter retributionem.* Et quid aliud est spes? quid homines magis excitare solet, quam spes æternæ retributionis? quid culpandum in amore concupiscentiæ æternæ beatitudinis? In amore DEI, ut nobis boni? DEUS promissione cœlestis gloriæ nos incitat ad bona opera; & observationem mandatorum. Ergo hæc spes, & desiderium DEO placet, sicut etiam timor gehennæ.

Amor concupiscentiæ erga DEUM & amor benevolentia sibi non opponuntur, imo in eodem etiam actu sunt composibiles; cum enim DEUS sit bonus in se, & bonus nobis, potest amari propter utramque bonitatem. Quamvis hoc non sit necessarium; potest enim nunc elici solus amor benevolentia & amicitia, alia vice sola spes, seu amor concupiscentiæ. Cæterum vitiosum utique foret, si quis vellet peccare, si cœlum aut infernus non esset; sæcus vero, si odio habeat peccatum propter cœlum, quod sperat,

aut

aut propter infernum, quem timet, quin detur simul positiva voluntas peccandi, si abessent: potest enim ab hoc abstrahere; vel, si incidat, potest dicere, hanc conditionem in hac providentia esse impossibilem, adeoque se absolute dolere de peccato & proponere emendationem.

Prop. 11.

Omne, quod non est ex fide Christiana supernaturali, quæ per dilectionem operatur, peccatum est.

Observ. Hæc Bajana & Janseniana thesis, rursus expresse est contra Tridentinum, quod eam esserenti dicit anathema. Quasi vero non dentur aliæ virtutes, gratæ & acceptæ DEO, etiam in peccatore & infideli. Certe Scriptura ipsa testatur, quod orationes & eleemosynæ Cornelii centurionis fuerint exauditæ, & eleemosynæ acceptæ, antequam esset fidelis & justificatus.

Non sola
fides est
virtus.

Dicit quidem Apostolus, quod, si charitatem non habuerit, factus sit velut æs sonans &c. sed per charitatem intelligit gratiam sanctificantem, sine qua nihil meritorium vitæ æternæ potest peragi. Sæpius autem nomine charitatis intelligitur in Scriptura gratia, ut quando dicitur, *charitas DEI diffusa est in cordibus nostris per Spiritum S. qui datus est nobis*. Quandoque accipitur charitas pro quolibet amore virtutis.

Prop. 12.

Quando in magnis peccatoribus deficit omnis amor, deficit etiam fides: & etiamsi videantur credere, non est fides Divina sed humana.

In peccatore
non semper
deficit fides:

Observ. Trid. S. 6 cap. 15 ait, quocumque peccato mortali amitti justificationis gratiam, non autem fidem, nisi per peccatum infidelitatis aut incredulitatis. Ratio est, ut peccator facilius resurgere, si habitu fidei & spei sit instructus, ideo DEI bonitas eundem etiam in peccatore conservat, nisi peccatum sit directe contrarium fidei aut spei.

Prop. 13.

Quisquis etiam æternæ mercedis intuitu DEO famulatur, charitate si caruerit, vitio non caret, quoties intuitu licet beatitudinis operatur.

Spes bona
est.

Observ. Ita nempe Bajani & Jansenistæ, dum solam charitatem perpetuo commendant, spem & omnes alias virtutes eliminant: nec eliminant duntaxat, sed vitia faciunt, contra sacras Scripturas, contra Concilia, præsertim Tridentinum, contra SS.

Patres, contra totius Ecclesiæ sensum, contra ipsam adeo manifestam rationem; quid enim lumini naturæ rectæque rationi magis contrarium, quam fidem, spem, iustitiam, misericordiam, temperantiam, continentiam, mansuetudinem, religionem, humilitatem, omnesque alias virtutes, si in propria sua sphaera versentur, id est, proprio suo objecto formali, per quod a charitate distinguuntur, esse mera peccata? Odium peccati, ob spem cœli conceptum, esse peccatum? Orationes, Sacramenta, sacrificium Missæ, bona opera, ipsamque adeo DEI adorationem, esse peccata? Honestatem inhonestatem? Cur DEUS nos jubet orare: *adveniat Regnum tuum*, cur *quærese primum Regnum DEI*, cur imperat salutis nostræ æternæ curam, si hæc omnia sunt peccata? Cave Propheta sancte, ne inclines cor tuum ad faciendas justificationes *propter retributionem*: peccatum est. Apostole sancte, ne expectes coronam iustitiæ: peccatum est. Vos operarii sancti, ne speretis promissam a DEO mercedem: peccatum est.

Neque dicat quispiam, spem Theologicam non differre a charitate; nam, sicut aliæ virtutes, differunt per objectum formale seu motivum. Charitas perfecta tendit in DEUM, ut in se ipso summum bonum. Spes vero ut speranti bonum. Quamvis coniungi possint, in eodem etiam actu; quia amari potest DEUS simul, ut in se ipso bonus, & ut amanti bonus.

Prop. 14.

Timor gehennæ non est supernaturalis.

Timor gehennæ bonus

Observ. Contrarium docet Tridentinum, quod S. 14 cap. 4 timorem gehennæ, si voluntatem peccandi excludat, atque cum spe veniæ sit conjunctus, *donum DEI & Spiritus S. impulsus appellat*. Et can. 5 anathemate ferit eum, qui dixerit, *dolorem, ex gehennæ metu conceptum, non esse utilem, nec præparare ad gratiam*. Et quid frequentius in ipsa etiam S. Scriptura, quam adhortationes ad servanda mandata, & poenitentiam, propositis gehennæ aliisque poenis? *Verebar omnia opera mea, sciens, quod non parceres delinquenti*, inquit Job. c. 9, & David Ps. 118: *confige timore tuo carnes meas, a iudiciis enim tuis timui*. Christus ipse Luc. 13: *nisi poenitentiam egeritis, omnes similiter peribitis*. Et alias etiam jubet, timere eum, qui potest corpus & animam perdere in gehennam.

Sermo autem est de timore salutari, ac proin supernaturali, qui procedit ex lumine fidei supernaturali, qua gehenna tanquam a DEO revelata creditur. Neque detestans peccatum ob metum gehennæ

gehennæ est ita comparatus, ut vellet peccare, si non esset gehenna; quia tunc ex alio motivo posset detestari peccatum: & hinc absolute detestatur peccatum, ut notatum supra, ita, ut absolute deponat voluntatem peccandi, imo etiam conditionatam illam, *si non esset infernus, peccarem*; quia scit, ad evitandum infernum, qui absolute datur, & in hac providentia non potest non dari, esse necessarium, ut etiam voluntas illa conditionata deponatur.

Prop. 15.

Attritio, quæ gehennæ & pœnarum metu concipitur, sine dilectione benevolentia DEI propter se, non est bonus motus ac supernaturalis.

Observ. Trid. S. 14 cap. 4 prorsus contrarium definit, dum Attritio. ait, attritionem, ex metu gehennæ conceptam, esse donum DEI & impulsus Spiritus S. & ad gratiam in Sacramento pœnitentiæ impetrandam disponere. Ergo est motus bonus & supernaturalis; tum quia per donum DEI & impulsus Spiritus S. in negotio salutis, de quo agit Tridentinum, intelligitur donum supernaturale, quod solum est conducens ad salutem: tum quia aliquid naturale non potest disponere ad gratiam supernaturalem, per Sacramentum pœnitentiæ recipiendam; ut a Concilio Arausicano definitum est contra Semipelagianos.

Certe DEUS per metum gehennæ nos incitat ad pœnitentiam, ad detestanda & vitanda peccata: ergo hic metus est motus bonus. Et idem dicendum de metu pœnarum temporalium, dummodo istæ concipiantur, ut a DEO vindice inflictæ in pœnam peccatorum: quia sic motivum pœnarum per fidem supernaturalem aut illustrationem supernaturalem proponitur: unde ipsa dein etiam attritio est supernaturalis. Idem de dolore, ex turpitudine peccati concepto; nam etiam hæc attingitur lumine supernaturali, ut repugnans voluntati & voluntati DEI; cum non possit peccatum attingi ut dissonum naturæ rationali, quin attingatur etiam ut dissonum legi DEI; alias enim dari posset peccatum mere philosophicum.

Dices. Plures tamén DD. Catholici cum Card. Pallavicino, ut attritio sit sufficiens ad Sacramentum pœnitentiæ, requirunt dilectionem DEI, saltem *initialem*; quia Tridentinum S. 6 c. 1 ait, peccatores ad justificationem disponi, *dum DEUM tanquam omnis justitia*

stitia fontem diligere incipiunt, ac propterea moventur adversus peccata per odium & detestationem.

Verum Tridentinum per hanc dilectionem nihil aliud intellexit, quam seriam voluntatem peccatoris se reconciliandi cum DEO offenso, & adhibendi media ad hanc reconciliationem necessaria, cum odio & detestatione peccati, atque sincero proposito, DEUM non amplius offendendi, licet id fiat ex motivo cœlum consequendi, aut infernum vitandi, aut ex consideratione turpitudinis peccati, ut voluntati DEI aut virtuti alicui supernaturali repugnantis. Vel dici potest, Tridentinum per inchoatam illam dilectionem intelligere spem, quæ est DEI amor concupiscentiæ, prout ipsum Trid. l. c. non obscure indicat.

Præter hæc autem non requiri dilectionem aliquam formalem benevolentia, sententia est communis DD. & Viva eam moraliter certam dicit, sicut etiam illam de sufficientia attritionis, ex spe cœli, aut metu gehennæ, vel turpitudine peccati conceptam, cum haud obscure innitatur definitioni Concilii Tridentini.

Et quid esset ille amor initialis, ut distinctus a spe seu amore concupiscentiæ, aliisque supra memoratis? Si enim est amor benevolentia aut amicitia, licet non intensus, semper homo jam esset justificatus ante absolutionem Sacramentalem, & sic Sacramenta mortuorum nunquam vivificarent, sed semper supponerent jam ante vitam spiritualem, nec lex gratiæ præstaret legi Mosaiæ aut legi naturæ, in quibus per solam contritionem aut charitatem peccatores poterant justificari. Imo sive sacerdoti, sive laico, quem poenitens bona fide putaret esse sacerdotem idoneum, sive absolveretur per formam legitimam, semper justificatus recederet.

Et ratio est, quia ad charitatem secundum communem DD. sententiam non requiritur certus intensiois gradus, tum quia de eo constare moraliter non potest, tum quia in S. Scriptura dilectioni universim tribuitur justificatio: *qui diligit me, diligitur a Patre meo.* Jo. 14. *Omnis, qui diligit, ex DEO natus est.* Jo. 8. *Charitas operit multitudinem peccatorum &c.* Nec unquam limitatur dilectio ad tantum vel tantum gradum dilectionis, aut quæ excludat aliud commotivum a bonitate Divina. Verum quidem est, quod dilectio justificans debeat esse *ex toto corde &c.* sed per hoc non intelligitur intensio, sed appretiatio DEI super omnia, vi cujus diligens DEUM præfert omnibus creaturis: & hinc dicitur, quod charitas

ritas debeat esse *appretiative* summa, non vero *intensive*, quod manifeste docet S. Thomas in 4 dist. 17 q. 2. ubi, *quicumque parvus sit dolor*, inquit, *dummodo ad contritionis rationem sufficiat*, *omnem delet culpam*.

Neque interest, an dilectio procedat ex solo motivo charitatis, an etiam ex spe præmii aut pœnarum metu; nam semper est vera dilectio, atque adeo semper ante Sacramentum justificaret, si necessario requireretur.

Dicit quidem Scriptura 1 Jo. 3: *qui non diligit, manet in morte*. Et 1 Cor. 13: *sine charitate nihil sum*; sed hic est sermo de charitate habituali, non de actuali; alias omnes infantes, post baptismum ante usum rationis mortui, damnarentur; quia non habent charitatem actualem. Et eodem ferme modo intelligendi veniunt textus quorundam Patrum, qui dicere videntur, charitatem ad Sacramentum pœnitentiæ esse necessariam; nam per charitatem vel intelligunt amorem concupiscentiæ, seu spem, vel voluntatem feriam se reconciliandi cum DEO offenso, detestationem & odium peccati, DEO adversantis, propositum servandi omnia mandata, præsertim etiam charitatis.

Cæterum Alex. VII 5 Maji 1667 edita constitutione in virtute S. obedientiæ, & sub pœna excommunicationis prohibuit, ne, dum deinceps de materia attritionis tractaretur, quis audeat, alicujus Theologicæ censuræ, alteriusve injuriæ aut contumeliæ nota taxare alterutram sententiam, sive negantem necessitatem aliqualem dilectionis DEI in præfata attritione, metu gehennæ concepta, quæ hodie inter Scholasticos communior videtur, sive asserentem dictæ dilectionis necessitatem, donec ab hac sancta Sede aliquid in hac re fuerit definitum. Ita Pontifex.

Non est autem censura, si sententia aliqua dicatur falsa, aut improbabilis, & altera probabilissima, aut etiam moraliter certa; nam minima inter censuras videtur esse, si sententia aliqua dicatur temeraria. Nequæ ex eo, quod Pontifex vetuerit alterutram sententiam censura affici, sequitur, quod utramque agnoverit probabilem; quia prohibitio ista est facta, ut Pontifex ipse præfatur, pacis reducendæ & scandalorum finiendorum gratia, sicut prohibuit, ob eandem rationem, alterutram sententiam de Immaculata Conceptione censura notari, licet affirmativa sit moraliter certa.

Non dissimulandum tamen id, quod Card. Pallavicinus in Historia Concilii Tridentini l. 12 c. 10 refert, videlicet, cum tractaretur de attritione, additum fuisse, *eam vix sine aliquo motu*

amoris DEI esse posse; quia tamen Episcopus Tudetanus intercesserit, advertens, in hac re varias esse Theologorum sententias, ideo deleta fuisse illa verba, ut hæc materia Theologicæ discussioni relinquatur.

Sicut optandum, hortandique sunt fideles, ut semper contritionem perfectam, per dilectionem DEI constitutam, conentur elicere, sic conscientia non sunt onerandæ aut implicandæ, nec Sacramentum exponendum periculo frustrationis.

Prop. 16.

Ordinem præmittendi satisfactionem absolutioni induxit non politia, nec institutio Ecclesiæ, sed ipsa Christi lex, & præscriptio, natura rei id ipsum quodammodo dictante.

Observ. Satisfactio non est præmittenda necessario *ex lege Christi*. Nam ubi est hæc lex? Satisfactio est quidem pars Sacramenti poenitentia, sed tantum integralis, sine qua essentia Sacramenti, ejusque præcipuus effectus, nempe remissio peccati, haberi potest; ut patet in moribundis, qui non possunt amplius satisfactionem præstare; & alias forma absolutionis, *ego te absolvo*, esset falsa, quando non præmittitur satisfactio; adeoque fere semper Sacramentum esset invalidum & sacrilegum. Accedit praxis Ecclesiæ, declarans institutionem Christi.

Unde neque id exigit *ratio Sacramenti* poenitentia, instituti per modum Judicii, in quo prius fertur sententia, & deinde primum fit executio poenæ. Quare neque id exigit *natura rei*: pro ut etiam in physicis primo ponuntur materia essentialis & forma, ac deinde partes integrantes per nutritionem accrescunt, ut in composito humano dentes, ungues, capilli &c.

Certe in veteri lege, naturali, & scripta, non debebat satisfactio præcedere justificationem, sed ad eam sufficiebat contritio & propositum servandi totam legem, atque præstandi satisfactionem. Ergo etiam in lege nova sufficit, ut præcedat absolutionem contritio, propositum, & confessio.

Prop. 17.

Per illam praxin mox absolvendi ordo poenitentia est inversus.

De absolu-
tione.

Observ. Non est inversus, ut ex dictis constat; falsum enim est, quod in prima Ecclesia satisfactio debuerit præcedere absolutionem *Sacramentalem*. Conciliorum & Patrum quorundam textus intelligendi sunt de absolutione *Canonica*, quam præcedere debebat

bat satisfactio. Nam hic ordo servabatur. 1 Fiebat confessio Sacramentalis, dabaturque plerumque rite disposito statim absolutio Sacramentalis. 2 Præstanda erat satisfactio, a sacris Canonibus præscripta, etiam publica a magnis & publicis peccatoribus. 3 Præstita satisfactione imperiebatur absolutio *canonica* extrasacramentalis, per quam solvebantur a pœnis Canonicis, non amplius subeundis, admittebantur ad S. Communionem, Missæ sacrificium, & sic dicebantur reconciliari Ecclesiæ, & sacro Altari, quam reconciliationem Canonicam aliqui cum S. Cypriano *pacem* appellant.

Prop. 18.

Consuetudo moderna quoad administrationem Sacramenti pœnitentiæ, De pœnitentiæ etiam si eam plurimorum hominum sustentet auctoritas, & multi temporis diuturnitas confirmet; nihilominus ab Ecclesia non habetur pro usu sed abusu.

Observ. Non satis apparet, qualem consuetudinem modernam architecti hujus thesisi abusum vocitent. An enim carpunt usum absolvendi peccatores ante impletam satisfactionem? At ostendimus ad duas propositiones superiores, in hoc nullum abusum versari. Vel redarguunt usum frequenter confitendi venialia, atque ab iis absolvendi? At habent contra se piorum & sanctorum exempla: vel inutile dices id, per quod ex opere operantis & ex opere operato augetur gratia sanctificans. Vel vitio dant, quod nimis leves imponantur pœnitentiæ, vellenteque, ut rigor antiquorum canonum pœnitentialium reducatur?

At illum non ferrent delicata nostra tempora, quibus primum Christianorum refrinxit charitas, ac proinde plus mali quam boni sequeretur ex rigida illa disciplina, censenteque confessarii, consultius esse, purgatorio aliquid relinquere, quam acriori ungue vulnus irritare, & pœnitentem fors in gehennam mittere, Samaritanum illum imitantes, qui oleum & vinum infudit. Accedit, quod frequentior nunc sit Indulgentiarum usus. Aliud tamen foret, si gravitas morbi asperiores medicinam requireret.

Prop. 19.

Homo debet agere tota vita pœnitentiam pro peccato originali.

Falsum
dogma.

Observ. Tridentinum *sess. 5 can. 5* definit, ita tolli per Baptismum ventum peccati originalis & totum id, quod veram ac propriam rationem peccati habet, ut nihil prorsus in renatis supersit,

fit, quod eos ab ingressu celi removeretur, & S. 14 c. 2: per Baptismum Christum induentes, nova prorsus in illo efficitur creatura, plenam & integram peccatorum omnium remissionem consequentes: simulque discrimen affert inter baptismi & pœnitentiæ Sacramentum. Cum ergo per Baptismum, quicquid rationem peccati, originalis & actualis, habet, quoad culpam & pœnam deleatur, cur isti Novatores, tota vita agendam esse pœnitentiam pro peccato originali, nobis præscribunt? An propter concupiscentiam, quæ in renatis remanet? At illa est quidem effectus peccati, & ad peccatum incitat, sed secundum se non est peccatum, relicta nobis ad agonem, & magni occasio meriti, si strenue illi repugnemus.

Prop. 20.

Confessiones, apud Religiosos factæ, pleræque sacrilegæ sunt, vel invalidæ.

Invidia distavit hanc thesin.

Observ. Quare? Nunquid, quia oculos urit invidia, dum vident, pœnitentes singulari cum fiducia ad Religiosos frequentes confugere? An deest in illis potestas absolvendi? At sunt veri sacerdotes ab Episcopo approbati, habentes jurisdictionem & singularia privilegia, etiam in ordine ad audiendas confessiones, & absolutionem impertiendam, a summo Pontifice, aut Episcopo. Nec scientia & experientia tractandi animas, atque ad salutem, & perfectionem etiam perducendi, ex continua praxi minori, credo, pollent, ac sacerdotes sæculares? Cur magni Principes, Ecclesiastici & Politici, plerumque deligunt confessarios ex Religiosis?

An forte pœnitentes, dum Religiosis confitentur, non ita serium de peccatis dolorem, vel non ita efficax propositum emendationis concipiunt, aut minus sincere apud ignotum sæpe Religiosum confessarium peccata enarrant? Non credo. Quare ergo confessiones, apud Religiosos factæ, pleræque sint sacrilegæ vel invalidæ?

Prop. 21.

Parochianus potest suspicari de Mendicantibus, qui elemosynis communibus vivunt, de imponenda nimis levi & incongrua pœnitentia seu satisfactione ob quæstum, seu lucrum subsidii temporalis.

De confessionibus apud Mendicantes.

Observ. Et si hoc suspicaretur, an propterea confessio esset sacrilega vel invalida? An minus sincera esset? Quæ pars deesset, quæ Sacramentum pœnitentiæ ut validum constituit? Quinam magis urgent serium dolorem & propositum? Quod autem norint, Sacra-

Sacramentum pœnitentiæ non esse carnificinam sed medicinam, prout Tridentinum respondit Luthero & semini ejus, non est in illis culpandum.

Cæterum ritum illum & disciplinam, leviores pœnitentias imponendi nequaquam induxerunt Religiosi Mendicantes. Jam dudum ante eorum in mundum adventum rigor ille veterum canonum pœnitentialium exolevit, sæculo videlicet IX, X & XI; cum tamen Mendicantes Religiosi primum sæculo XIII sint nati. Sed neque imaginari nobis debemus, quod primis Ecclesiæ sæculis rigor ille universim fuerit adhibitus. Primis quippe Ecclesiæ duobus sæculis Ecclesia admodum fuit benigna in imponendis pœnitentiis, ferme usque ad Montanistas; neque deinceps canones pœnitentiales pro legibus habebantur, sed pro regulis ad directionem discreti confessorii, atque sæpissime pœnæ, in illis assignatæ, aut temperabantur, aut omnino remittebantur.

Sed nimis leves, inquis, pœnitentias imponunt Religiosi Mendicantes, ut eleemosynam accipiant. An ex temet ipso hoc dicis, vel alii tibi dixerunt? Quomodo probas? Quis de viris Religiosis, mundo mortuis, & ad perfectionem tendentibus id prudenter suspicetur, quod temporalis lucelli spe suo desint officio? Multi ex Religiosis etiam Mendicantibus accedunt mensam stratam, de annonâ, unde veniat, parum solliciti, curamque illam Superiori & Procuratori relinquentes.

Prop. 22.

Sacrilegi sunt judicandi, qui jus ad communionem percipiendam prætendunt, antequam condignam de delictis suis pœnitentiam egerint.

Observ. Quis non videat, quorsum hominum istorum fœratur intentio, ut videlicet a Sacramentis confessionis & communionis animas absterreant, aut eorum usum omnino eliminent. Quis scit, tametsi satisfactionem, a confessario impositam præstiterit, aut etiam scire potest, an *condignam* de delictis pœnitentiam egerit? Ergo semper abstinendum sacra communione, ne quis periculo sacrilegii se exponat; sicut Moniales Portus Regii gloriatæ sunt, se etiam a communione paschali abstinuisse?

Ita est: jubet Apostolus, ut probet se ipsum homo; sed probatio ista & præparatio necessaria stat in sincera & integra confessione peccatorum mortalium, conjuncta cum serio dolore & proposito emendationis, & sic conscientia ab omni culpa mortali

depurata. Pœnitentia seu satisfactio non est necessario præmittenda communioni, imo sæpe non potest integra præmitti, urgente e. g. in parochia necessitate sacrificandi & communicandi.

Per hoc tamen non negatur, varia committi peccata contra reverentiam, tanto Sacramento debitam, variosque casus & circumstantias posse contingere, propter quas, etiam post confessionem rite peractam, differenda sit communio, sub peccato saltem veniali, si possit differri, & major dispositio procurari.

Prop. 23.

Similiter arcendi sunt a S. Communione, quibus nondum inest amor DEI purissimus, & omnis mixtionis expers.

De communione sine amore purissimo.

Observ. Quænam sint requisita necessaria ad S. Communionem, dictum est ad propos. superiorem, neque Tridentinum alia requirit *sess. 13 cap. 7.* Inter hæc autem requisita necessaria non est amor purissimus, omnis mixtionis expers; alias enim plerique essent arcendi a S. Communione, cum pauci respectively esse videantur, qui cum amore tam puro & depurato accedant.

In veteri Ecclesia etiam pueris præbatur S. Synaxis, qui tamen erant incapaces eliciendi amorem. Deinde etiam amentes sunt capaces hujus Sacramenti, sicut baptismi, confirmationis, ordinis, ut tenet communis; non autem sunt capaces amoris purissimi.

Convenientissimum utique foret, ut omnes cum ardentissimo amore DEI ad sacratissimam mensam accederent; sed propterea non sunt arcendi, dummodo sint in statu gratiæ, & si mortalia habuerint, ab iis rite sint absoluti.

Prop. 24.

Oblatio in templo, quæ fiebat a B. V. Maria in die Purificationis suæ per duos pullos columbarum, unum in holocaustum, alterum pro peccatis, sufficienter testantur, quod indiguerit purificatione, & quod Filius, qui offerebatur, etiam macula matris maculatus esset, secundum verba legis.

Observ. B. V. Maria fuit Mater purissima, Mater inviolata, Mater intemerata, nulla unquam macula originali, actuali, vel legali infecta, nulla igitur purificatione indiguit, sicut Divinissimus ejus filius non indiguit circumcisione; sed legem Mosaicam, Levit. 12 præscriptam, qua non comprehendebatur, voluit servare, ad imitationem filii sui, volentis circumcidi, ad dandum aliis obedientiæ exemplum, ad exercendam humilitatem aliasque

vis-

virtutes, ad evitandum eorum scandalum, qui matrem sciebant, Virginem nesciebant.

Lex Mosaica eas tantum mulieres obligabat, quæ suscepto semine masculum parerent, ut a *profluvio sanguinis sui*, & macula legali mundarentur. At B. V. Mater DEI, nullo suscepto semine, sed grandi miraculo, obumbrante virtute Spiritus S. peperit, nec ullum sanguinis profluvium, aut sordes, quæ partum naturaliter sequuntur, patiebatur, sed Christus velut lux per purissimum crystallum transiit, ex purissimo Matris sanguine corpore efformato.

Prop. 25.

DEI Patris sedentis simulacrum nefas est Christiano in templo collocare.

Observ. Dan. 7 Pater Divinus apparuit Danieli in specie se- Eligies DEI
Patris.
nis sedentis. Cur ergo hac specie non possit in templo collocari, prout in multis Ecclesiis contingit? Nec obstat, quod DEUS sit incorporeus; nam etiam angeli sunt incorporei, & tamen laudabiliter eorum imagines collocantur in templo. Imo DEUS ipse jussit, Cherubim in templo Solymæo collocari. Et si Spiritus S. potest proponi in columbæ specie, ut definivit Synodus VII; quia in ea apparuit, cur non etiam æternus Pater in specie, qua apparuit? Ipsa S. Scriptura per metaphoram attribuit DEO membra, *sede a dextris meis*: & quoties manus DEI nominatur? Quot in Apocalypsi S. Joannis proponuntur nobis tales imagines? nec finis deest, ut nimirum per corporea & visibilia, ad agnitionem spiritualium & invisibilium deducamur. Ipse intellectus per ideas materiales, tanquam imagines, assurgit ad cognoscendos spiritus.

Tridentinum equidem tantum de Imaginibus Christi, Deiparæ ac sanctorum meminit, non tamen excludit Imagines DEI & Trinitatis. Prohibuit DEUS sculptile, *ne adores illud*, sicut adorabant gentes idola, & non raro etiam Judæi, quibus, cum ad idololatriam valde essent propensi, DEUS prohibendo imagines occasionem voluit adimere, nunc autem apud Christianos cessat hoc periculum.

Nam cultus, quem Imaginibus exhibemus, non est absolutus, sed respectivus, tendens in prototypum, quod per imaginem nobis exhibetur; sicut cultus, quo legatum honoramus, tendit in Principem, quem legatus repræsentat. Scimus, quod Tridentinum ait, Imaginibus nullam inesse virtutem intrinsecam, nihil-
que

que ab iis esse petendum, aut sperandum, sed a protypo, quod nobis exhibent. Dicuntur quidem Imagines quædam miraculosæ, sed tota virtus provenit a DEO.

Prop. 26.

Laus, quæ defertur Mariæ ut Mariæ, vana est.

Observ. Laus, quæ defertur aliis sanctis, non est vana: ergo neque laus, quæ defertur Mariæ; nam etiam in quantum Maria, est persona sancta, imo sanctior omnibus sanctis, Angelis & hominibus, gratia plena, ut ab Angelo prædicatur. Neque destituitur hæc laus, honor, & cultus fine optimo; quia est utilis ad impetrandum patrocinium & intercessionem apud DEUM. Quapropter tota Ecclesia Mariam honorat cultu, quem Græci *Hyperduliam* vocant, altiore scilicet, quam reliquis sanctis deferatur: neque cultus iste est civilis, sed religiosus, quia exhibetur Mariæ propter excellentiam sanctitatis; estque actus virtutis supernaturalis, atque conformis voluntati DEI, qui in sanctorum suorum honoribus honoratur: prout dicit S. Bernardus: *totis medullis cordium, totis præcordiorum affectibus, & votis omnibus hanc Mariam veneremus; quia sic est voluntas ejus, qui totum nos habere voluit per Mariam.*

Maria jam in primo instanti immaculatæ suæ conceptionis fuit gratia plena, &, ut ostendit Suarez *tom. 2 in 3 p. c. 4* gratiam & merita singulis vitæ instantibus diu noctuque in immensum adeo multiplicavit, ut omnes omnium sanctorum gratias & merita simul sumpta superaret: ac proin non desint graves Theologi, qui doceant, eam maternitatem DEI, qua sublimius donum creatum, excepta unione hypostatica, non est datum sub cœlo, de condigno fuisse promeritam, ad quod tamen meritum requiritur proportio geometrica cum præmio. Talis cum sit Maria ut Maria, non nisi impudentissime dici potest, laudem, quæ defertur Mariæ ut Mariæ, vanam esse, cum etiam ut Maria sanctitatem omnium sanctorum (Christo semper excepto) sit supergressa, atque innumeri homines potens ejus apud DEUM patrocinium sint experti, ut proin merito canat Ecclesia: *dignare me laudare te Virgo sacrata.*

Prop. 27.

Falsum. *Valuit aliquando Baptismus, hac forma collatus, in nomine Patris &c. prætermittis illis: ergo te baptizo.*

Observ. Cap. Si quis de Bapt. Alexander III ait: *si quis puerum in aqua immerferit in nomine Patris, & Filii, & Spiritus sancti,*

*sancti, & non dixerit: ego te baptizo, non est baptizatus. Expri-
menda enim est actio Ministri; prout Florentinum docet: si ex-
primatur actus, qui per Ministrum exercetur, cum sancta Trinita-
tis invocatione, perficitur Sacramentum. Et quare alias non suffi-
ceret positio solius actionis in reliquis etiam Sacramentis, quin di-
catur, ego te confirmo; ego te absolvo &c. ?*

Accedit continuus usus, praxis, traditio, & persuasio Ec-
clesiæ; quamvis enim legantur baptizasse nomine Christi, tamen
præsumi potest, quod etiam Patrem & Spiritum S. expresserint,
& in nomine Christi baptizarint, hoc est, baptismo Christi, seu
a Christo instituto: vel tandem dicendum erit, quod ex speciali
dispensatione Divina baptizarint tantum in nomine Christi.

Prop. 28.

*Valet Baptismus collatus a Ministro, qui omnem ritum externum,
formamque baptizandi observat, intus vero apud se resolvit: non
intendo facere, quod facit Ecclesia.*

Observ. At Trid. S. 7 can. 11: *si quis dixerit, in Ministris,
dum Sacramenta consciunt, non requiri intentionem saltem fa-
ciendi, quod facit Ecclesia, anathema sit.* De fide igitur est,
quod Minister debeat habere intentionem saltem faciendi, quod
facit Ecclesia.

Verum Catholici quidam DD. cum Sylvestro, Paludano, Ca-
tharino, quem speciali libello defendit Hyacinthus Serry, distin-
guunt inter intentionem, *materialiter* faciendi, quod facit Eccle-
sia, & inter intentionem *formaliter* id faciendi; illam requiri
a Trid. non autem istam. Sed Trid. ex communissima Theologo-
rum etiam hanc requirit, videlicet non sufficere velle ponere ma-
teriam & formam, seu ritum externum, quod est velle materialiter
facere, quod facit Ecclesia, sed etiam id velle in ordine ad Sa-
cramentum, quod Christus instituit, vel in ordine ad conferen-
dam gratiam, vel ponendas actiones, ut *de se* aptas ad collatio-
nem gratiæ, licet hic & nunc propter obicem (e. g. in matrimo-
nio) non conferatur. Alias enim, si lector mensæ præsentem pane
legeret verba consecrationis, vere consecraret, vel si mater aqua
lavaret a sordibus corporis infantem, dicens, *Lavo te in nomine*
Patris &c. vere illum baptizaret.

Requiritur
intentio
Ministri.

Requiritur igitur, ut velit agere ceu Minister Christi, vel no-
mine Christi. Ut autem Minister agat nomine sui principalis, de-
bet habere intentionem internam agendi ejus nomine; alias non
agit ut Minister aut legatus nomine principalis, sed nomine pro-

prio. Sane, si procurator, constitutus, ut nomine principalis sui ineat matrimonium, non agi ut procurator, si interne nolit agere nomine sui principalis, licet ritum externum observet.

Et hinc in hac thesi confixa est sententia Catharini, aliorumque, qui dicunt, sufficere intentionem materialiter faciendi, quod facit Ecclesia; nam in casu thesi damnatæ baptizans omnem ritum externum observat, & sic materialiter facit, quod facit Ecclesia; sed quia non intendit id facere, non vult formaliter facere, quod facit Ecclesia, & propterea proscripta est thesis.

Hæretici & etiam gentiles, quando baptizant, præsumuntur habere intentionem, appetitativè fortiolem ac prævalentem, faciendi formaliter, quod DEUS instituit, vel quod facit vera Ecclesia, aut quod Catholicos facere sciunt, vel quod per tale ministerium facere debent, & sic saltem implicite, formaliter tamen, volunt facere, quod facit vera Ecclesia; licet privato errore laborent, cui tamen suam intentionem non censentur ita alligare, ut non oppositam prævalentem habeant saltem implicite, aut virtualiter, quia saltem volunt, quod DEUS vult, eos per talem ritum velle, vel in quantum prodesse possit baptizando.

Prop. 29.

De summo
Pontifice.

Futilis & toties convulsa est assertio de Pontificis Romani supra Concilium Oecumenicum auctoritate, atque in fidei questionibus discernendis, infallibilitate.

Observ. Futilis, & toties convulsa est hæc impudens propositio. Futile ne dicas, quod totus prope tenet orbis Catholicus, quod ipsa Divina non obscure pronuntiant oracula. Christus, fundaturus Ecclesiam, Petro tanquam fundamento eam inædificavit, *super banc petram ædificabo Ecclesiam meam.* Illum pastorem constituit, *pasce oves meas.* Episcopi, etiam in Concilio congregati, non desinunt esse oves. Petro dedit claves cum plena solvendi atque ligandi potestate: *Tibi dabo.* An amittit illas in Concilio?

Video tamen, quantum ad infallibilitatem spectat, eam a Catholicis DD. diversimode propugnari; alii requirunt consensum majorum Pastorum illius gentis, in qua fidei controversia agitur: alii acceptatione sunt contenti: alii cum Hyacintho Serry *de Romano Pontifice in ferendo de fide moribusque judicio falli & fallere nescio*: & in *Dissertatione Apologetica* contra Aloysium Lucinum

cinum, exigunt Cardinalium iudicium & consensum, maturam ac diligentem rei discussionem, preces publicas: verum hæc ad infallibilitatem Pontificis in fidei & morum definitionibus vel non absolute sunt necessaria, vel præsumendum est, ea nunquam omit- ti, prout de facto nunquam omittuntur. Alii denique, iique plu- rimi docent, Papam in definiendis fidei morumque quæstionibus, ex providentia Christi & promissa assistentia Spiritus S. etiam si so- lus decidat esse absolute infallibilem, quando loquitur ex cathedra, seu quando alloquitur Ecclesiam, eique aliquid credendum pro- ponit: alias enim tota Ecclesia in re gravissima induceretur in er- rorem, cum Pontifici obedire debeat. Ecclesia autem ex promissis Evangelicis errare non potest.

Materia ista est amplissima; mille libris tractata, & ego ipse pro tenuitate mea, sapius de illa quoad utrumque caput disserui, uti, quando Concilium Constantiense & Basileense exposui &c. Hoc certum, insolentem thesin confixam vel ex turpi ignorantia, vel ex insigni malitia esse profectam, dum eam assertionem futi- lem & toties convulsam appellare non veretur.

Prop. 30.

*Ubi quis invenerit doctrinam in Augustino clave fundatam, illam ab-
solute potest tenere & docere, non respiciendo ad ullam Pontificis
Bullam.*

Observ. Quamvis maxima sit S. Augustini in Ecclesia aucto- ritas, præsertim in iis, quæ de gratia scripsit, non tamen usque adeo tanta, ut definitioni sedis Apost. anteferri aut coæquari pos- sit; neque enim, prout Petro & ejus successoribus, in doctrina fidei & morum promissa ei fuit Spiritus S. assistentia atque infalli- bilitas. Quapropter Bullas Pontificias non oportet ad verba Au- gustini, sed Augustini verba ad verba Bullæ, ejusque clarum sen- sum oportet sumi.

De Authori-
tate S. Augu-
stini.

Neque dicas doctrinam S. Augustini ab Ecclesia universim esse canonizatam; nam ea sunt approbata, quæ habentur in Epistola Cœlestini I ad Episcopos Galliæ apud Prosperum in fine ejus ope- rum: 1 videlicet, quod in prævaricatione Adami omnes amise- rimus facultatem expeditam ad salutaria. 2 Quod nemo sit per se bonus, nec possit sine gratia perseverare. 3 Quod nemo bene utatur libero arbitrio, nisi per Christum. 4 Quod omnes motus bonæ voluntatis sint a DEO. 5 Quod gratia non solum valeat ad peccatorum remissionem, sed etiam ad ea vitanda. 6 Quod gra-

tia Christi non solum illuminet intellectum, sed etiam immediate moveat voluntatem. 7 Quod non solum det facile posse, sed etiam simpliciter posse. Additque idem Cœlestinus Papa in eadem Epistola: *profundiores partes questionum, quas pertractarunt Augustinus & alii, qui hæreticis resistebant, sicut non audemus contemnere, ita non necesse habemus astruere.*

Et ipse Aug. l. de dono persever. c. 21 ait: *neminem velim sic amplecti omnia mea, ut me sequatur, nisi in iis, in quibus me non errare perpexerit; nam propterea facio nunc libros, in quibus opuscula mea retractanda suscepi; ut nec me ipsum in omnibus me secutum esse demonstrem.* Interpretes etiam S. Scripturæ non raro ab Augustini expositione recedunt, e. g. dum Jacobum & Davidem a mendacio excusat &c. Certe sunt in Augustino aliquæ expressiones difficiles, de quibus dici potest, quod Petrus de epistolis Pauli, quod homines indocti (hæretici) iis abutantur ad suam perditionem, prout Calvinus & Jansenius fecerunt.

Gelasius Papa, sicut etiam alii Pontifices, approbavit doctrinam Augustini generice, sicut doctrinam Cypriani, Hilarii, Hieronymi, & aliorum Patrum, quin singulas sententias approbaret. Certe in libris Cypriani extat ejus doctrina de Baptismo, ab hæreticis collato. Igitur Gelasius authenticos libros ab apocryphicis & supposititiis auctorum libris secrevit, quin singula contenta approbaret. Qui agrum laudat, non omnia quæ sunt in agro laudat.

Prop. 31.

Bulla Urbani VIII In Eminentî est subreptitia.

Bulla Urbani VIII.

Observ. Bulla hæc, anno 1641 edita, relata constitutione Pii V & Gregorii XIII. quibus 49 Michaelis Baji propositiones profligantur, eosdem errores rursus damnat, simulque librum Jansenii, quem *Augustinus* inscripsit, prohibuit.

Hanc Bullam, cujus initium *In Eminentî*, Bajani & Jansenistæ exosi, nihil non moverunt, ut aliquamdiu in Belgio suspenderetur, ut vel revocationem illius vel moderationem obtinere possent. Hoc cum evincere non possent, Bullam obreptitie obtentam dicebant, a Jesuitis per expositionem falsi, quod videlicet propositiones damnatæ extent in scriptis Baji & Jansenii in sensu damnato.

Quam autem hoc a veritate sit alienum, ex propria Urbani Pontificis confessione elucet, dum in Bulla ait, ex matura ac diligenti libri (Jansenii) lectione compertum sibi, in eo multas propositiones Baji, a dictis Pontificibus proscriptas contineri, & magno

cum

eum Catholicorum scandalo , & Sedis Apost. contemptu eas defendi.

Et quis credat , Pontificem , dum loquitur ex cathedra , prout facit , dum propositiones aliquas tanquam fidei aut bonis moribus contrarias publice damnat , Decreto , ad totam Ecclesiam directo , ita oscitanter id facere , ut obrepi sibi permittat , aut falsæ expositioni acquiescat ? Constat certe , materiam prius tum a S. R. E. cardinalibus , tum aliis viris doctissimis , tum etiam ab ipso Pontifice , magna diligentia discuti , examinari , ac ponderari , invocato etiam Divino auxilio , antequam ad sententiam condemnatoriam deveniatur.

Cum ergo tunc ex cathedra tanquam Pontifex , & Magister a Christo constitutus , alloquatur doceatque Ecclesiam , prohibendo sub censura Ecclesiastica , tales propositiones docere & tenere , ex assistentia Spiritus S. promissa , est omnino infallibilis. Quantæ ergo impudentiæ & temeritatis est , talem Apostolicam sententiam subreptionis arguere ?

Postquam Alex. VIII. has 31 Propositiones recensuit , eas tanquam temerarias , scandalosas , male sonantes , injuriosas , hæresi proximas , hæresin sapientes , erroneas , schismaticas , & hæreticas respective , damnavit , prohibuitque , ita , ut quicumque illas , aut conjunctim , aut divisim , docuerit , defenderit , ediderit , aut de illis etiam disputative publice aut privatim tractaverit , nisi forsan impugnando , ipso facto incidat in excommunicationem Pontifici reservatam.

Insuper districtè & in virtute S. obedientiæ , & sub interminatione Divini Judicii prohibet , ne quis prædictas propositiones aut aliquam ipsarum in praxin deducat.

§. 6.

De aliis Propositionibus proscriptis.

Idem Alexander VIII. Pontifex duas alias insuper Propositiones pro- 6.
scripsit , nimium laxas. Prima sic habet : *Bonitas objectiva con-* Thesis falsæ
fistit in convenientia objecti cum natura rationali , formalis vero de amore ,
in conformitate actus cum regula morum. Ad hoc sufficit , ut DEL.
actus moralis tendat in ultimum finem interpretative. Hunc homo
non tenetur amare , neque in principio , neque in decursu vitæ suæ
moralis.

Hanc thesin damnavit tanquam hæreticam, utpote quæ per ultima verba aperte & immediate est opposita veritati revelatæ; cum dicatur Jo 3: *qui non diligit, morietur in morte*, & Mai ci 12: *Diliges Dominum DEUM tuum ex toto corde tuo &c.* Neque sufficit dicere, hoc intelligendum de dilectione virtualiter & interpretative tali, inclusa in observatione mandatorum DEI; nam verba adeo clara dilectionem DEI formalem & proprie dictam manifeste requirunt, prout omnes boni Theologi facile agnoscunt. Dein inter reliqua DEI mandata est etiam mandatum diligendi DEUM, & quidem ex toto corde, ex tota anima, ex tota virtute, imo hoc est primum & maximum mandatum; qui ergo DEUM ita non diligit, non observat mandata DEI. Sicut ergo ad salutem requiritur, ut sæpius eliciatur fides & spes formalis, ita a fortiori requiritur, ut sæpius eliciatur actus charitatis DEI formalis, quæ est Regina omnium virtutum. Neque lex Divina positiva duntaxat id exigit, sed etiam naturalis, lumine rectæ rationis cordibus inscripta. Videantur, quæ de hac dilectione dicta sunt ad propos. 1 ab Alex. VII damnatam.

De peccato
Philosophi-
co.

Altera ab Alex. VIII confixa propositio est hæc: *Peccatum Philosophicum seu morale est actus humanus, disconveniens naturæ rationali & rectæ rationi: Theologicum vero & mortale est transgressio libera Divinæ legis. Philosophicum, quamvis grave, in illo, qui DEUM ignorat, vel de DEO actu non cogitat, est grave peccatum, sed non est offensa DEI, neque peccatum mortale dissolvens amicitiam DEI, neque pœna æterna dignum.*

De hac propositione tractatum fuit *Part. VIII lib. 3 cap. 24* & *Part II c. 1 n. 18*. Primæ duæ partes hujus thesis continent definitionem peccati Philosophici & Theologici; quæ, cum sit conditionata (*si detur*) non fuit damnata. Tertiam damnavit Pontifex, aitque, illam noviter ex orco emeruisse; quia videlicet Arnaldus eandem inde extraxit; quia eandem, tam turpiter vestitam, nemo docuit.

Et hinc illam, sibi oblatam, merito damnavit Pontifex, quia, prout jacet, supponit dari, aut dari posse peccatum mere philosophicum, quod est falsum; cum sit aut metaphysice aut saltem moraliter impossibile; quia hoc ipso, quod aliquid cognoscatur tanquam disconveniens naturæ rationali & rectæ rationi, hoc ipso cognoscitur etiam ut disconveniens voluntati supremi legislatoris; accedit, quod non distinguat inter ignorantiam vincibilem

& invincibilem &c. *vid. l. c.*

ARTI-



ARTICULUS II.
DE STATU POLITICO
ITALIÆ
SÆCULO XVII.

§. I.

*Salutiæ ad Sabaudum. Bellum Montferratenſe, Uſcochium, Valte-
linum, Mantuanum, Pedemontanum. Lis de tutela Ducis
Sabaudiæ, & urbe Caſtro.*

Flagrantibus civilibus Galliæ turbis Carolus Emmanuel Dux Sa-
baudiæ Marchionatum *Salutiarum* occupaverat, cuſo numis-
mate, cui hæc vox erat inſcripta: *Opportune*. Pacta regno
quiete Henricus IV Gallia Rex Salutias repetiit; cumque Dux nol-
let reſtituere, Galli mox paucas Ducis urbes & arces munitas ex-
pugnarunt, procul pariter, ut reſponſum darent, moneta cum
hac inſcriptione: *Opportunius*. Lis tandem transactione finita. Pro
aliis terris, Franciæ ceſſis, relictus Duci Marchionatus, clavis
Italiæ.

7.

Anno 1613 Bellum Montferratenſe erupit, a Carolo Emma-
nuele Duce Sabaudiæ ſuſceptum, cujus hæc erat occaſio. Fran-
ciſco IV Duce Mantuæ & Montis Ferrati hoc anno abſque liberis
maſculis deſuncto, Ferdinandus ejus frater, exuta Romana pur-
pura, ſucceſſit, ſimulque tutelam Mariæ neptis ſuæ, ſibi attri-
buit. Sabaudus hoc in præjudicium filiæ ſuæ, quam Franciſcus
viduam (Mariæ matrem) reliquerat, cedere ratus, antiquas ſi-
mul prætenſiones Domus Sabaudiæ in Montferratenſem Marchio-
natum

Bellum
Monferrat.

natum allegavit, videlicet ex Jolanthæ pactis nuptialibus. * Difficillimum insuper Carolo Emmanueli celsorum spirituum Principi accidit, Monferratenses regiones, quæ magnam Pedemontii partem complexæ ad ipsas ferme Taurini portas se se exporrigerent, terrasque Ducis variis in locis interfecarent, in alienis manibus eernere; cumque ex altera parte faciem Europæ circumspiceret, videretque, Imperatorem remotum, & turbis Germanicis involutum, minorennitatem Regis Christianissimi, turbis pariter domesticis impediti, Regem Catholicum pacis amantem, Principes Italiæ tranquillitati suæ acquiescentes, tentandum aliquid ratus, Trinum, Albim, S. Damianum occupavit.

Verum opinione sua fuisse deceptum eventus ostendit; nam & Veneti, & Mediolani Gubernator, & Francia, a Ferdinando implorati, auxilia spondebant. Quare loca intercepta restituit. Adduci tamen non potuit, ut, quod Hispania petebat, copias dimitteret; sed dimisso legato Hispano vellus aureum restituit, asserens, nolle se vinciri catenis Philippî.

Exarsit proin bellum Hispanum inter & Sabaudum, per biennium continuatum, quod tandem anno 1615, dum Gubernator Mediolanensis Aptum obsideret, conciliatoribus Papa & Rege Franciæ in pacem est mutatum; ea quidem lege, ut Sabaudus relinquat Mantuano Montisferrati ditiones, salva actione civili in curia Imperiali. Mantuanus recipiat subditos, Sabaudi partes secutos: loca ultro citroque abrepta restituantur: Sabaudus pro securitate suorum statuum non retineat ultra quatuor cohortes ex Helvetis, & totidem ex suis subditis, reliquas vero copias dimittat: Catholici Regis exercitus provinciis Sabaudi decedat: & hic abdicatis copiis invaderetur, Gallia armata manu assistat.

Nulli

* Jolantha I hæres Montisferrati ex Andronico II Palæologo, Imperatore Constantinopolitano, conjuge suo, genuit Theodorum Palæologum Montisferrati Marchionem. Hujus filia, Jolantha II Aymoni Comiti Sabaudia nupta anno 1330 pactis nuptialibus inseruit, ut, si progenies mascula Palæologorum deficeret, ex hoc matrimonio descendentes Comites Sabaudia succederent in Marchionatu Montisferratenfi. Cum igitur Comites & Duces Sabaudia ex hac Jolantha descendant, prætensionem suam post annum 1533, quo Joannes Georgius Palæologus sine masculis obiit, formant. Sed reliquit Joannes Georgius filiam Margaretham, nuptam Friderico II primo Mantuæ Duci, cui Carolus V Montisferratum in feudum concessit, protestante Duce Sabaudia & Marchione Salutarum.

Nulli contrahentium parti satis pax ista placuit, primo, quod veniam dare oporteat rebellibus subditis, alteri, quod crescere non liceat, tertio, quod Asti obsidionem solvere debeat. Certe Inojosa Mediolani Gubernator revocatus est, & novus, Petrus Toletanus, non satis e dignitate Hispana fuisse transactum, dicebat. Unde pax illa bello similis videbatur, tracto etiam ab Hispanis in partes Nemorosio Duce Sabaudiae Principe: Emmanueli vero succurrente Lediguerio.

Sopito hoc bello, aliud anno 1616 erupit Venetos inter & Bellum Ferdinandum Styriae Archiducem propter *Uscobios*, Croatiae & propter Dalmatiae Austriacae populum, raptò vivere assuetum. Vicinos *Uscobios*. equidem is Turcas maxime infestat, ad Christianos tamen etiam non nunquam rapaces manus extendit: prout hoc tempore triremem Venetam diripuit, caeso senatore aliisque, quos in eadem invenerat.

Quamvis autem sub protectione Domus Austriacae sint *Uscobii*, libertatem tamen a tributis, & hospitalione militum affeant, nullumque patiuntur sibi Praefectum imponi. Veneti nihilominus, eos non satis compesci existimantes, Gradiscam, permunitam in Carniola urbem Austriacam aggressi sunt, interceptis aliis quibusdam locis.

Gubernator Mediolanensis & Nuntius Pontificius omni ope adlaborarunt, ut Veneti coeptis desisterent, & pax alma reduceretur: quae tandem anno 1617 in Istria fuit composita.

Cum pax Astensis executione destitueretur, postulante Hispano, ut Sabaudus prius exercitum dimitteret, hoc vero exigente, ut Hispanus prius Pedemontio decedat, bellum recrudit. Hispanis accessit Dux Nemorosius, sed damno suo non levi: Lediguerius vero, contra Regis Franciae voluntatem, 8000 Gallo-um Carolo Emmanueli in Pedemontium suppetias adversus Hispanos attulit.

Captum assultu anno 1617 S. Damianum, & Alba, quam 7000 Hispanorum, imminente Duce cum Lediguerio, deseruerant Hispani vero Vercellas occuparunt. Ticini tum rursus pax inita, & Astensis confirmata, conciliatoribus Cardinale Ludovico nomine Pontificis, & Marchione Bethunio Franciae Regis legato. Iussa pars utraque intra mensem ablata restituere, & in proprias terras migrare, manumissis a Duce copiis. Archidux Ferdinandus Segnam legionem Germanorum mittit, quae *Uscobiorum* rapinas compescat, missis 133 familiis in exilium.

bellum Val-
telinum.

Ab anno 1617 Italiam motus Vallis Telinæ concussere, Venetis, Mediolano, Pontifice, quin & Gallia, & Hispania, & Helvetia in partem venientibus. Visus est Hispanus huic Italiae clavi inhiare, ut faciliorem cum Germania communicationem sortiretur. Certe Fontanus Gubernator Mediolanensis Regi suo scripsisse fertur, si Italiam velit habere constrictam, Finariam Monacum, Clavennam cum Valle Telina esse comparandam.

Quia autem Genuenses erant Hispanorum focii, & Dux Sabaudiae se laesum ab eis credebat, pariter bello involuti sunt: &, cum timeretur, ne Hispani in Italia se magis extenderent, varia cum Italiae Principibus Gallia iniit foedera, praesertim cum Duce Sabaudiae tractatum Susanum.

Anno 1626 obiit Ferdinandus Gonzaga, Dux Mantuae & Montisferrati, nulla relicta prole, æt. 39, reg. 14. Successit igitur frater Vincentius II, qui tamen vix anno regiminis exacto fratres secutus est; nam tres successive fratres imperarunt, sed omnes sine prole mascula obierunt; unde de successione magna orta est contentio, quin & bellum, summis Europæ Principibus in partem venientibus. *Vid. Germ. & Gall.*

Successit tandem Carolus Gonzaga Dux Nivernensis, qui in Gallia sedem fixerat, ex altera gentis Gonzagæ linea descendens, opponentibus se Hispano, Sabaudo, & ipso Imperatore, donec causa per pacem Ratisbonensem fuit finita. (*vid. Germ. & Gall.*)

Anno 1630 Urbanus VIII Papa in Consistorio Cardinalibus, Electoribus Ecclesiasticis, & Magno ordinis Melitenis Magistro contulit titulum *Eminentissimi*, exclusis ab eo jure omnibus aliis ecclesiasticis. Hæc tamen ordinatio non omnibus placuit; praesertim Duci Sabaudiae & Venetis, qui ad Cardinales adhuc titulo *Illustriissimi* usi sunt, in Italia passim vulgari inter Nobiles.

Obit Car.
Emmanuel.

Idem annus de mundi theatro, in quo celebrem actorem egit, abstulit *Carolus Emmanuelem* Ducem Sabaudiae, Principem, quam parvum corpore, tum magnum animo, tota propemodum vita bellis exercitum, quæ aut intulit, aut repressit, jam Cæsari, jam Gallo, jam Hispano, jam Mantuano hostis, prout, ut se extendere, visum fuit opportunum: obiit anno ætatis 69, regiminis 50, *Magni* cognomentum promeritus. Ex Catharina, Philippi II Hispaniarum Regis filia, successorem in provinciis, a Gallis ferme occupatis, reliquit *Victorem Amadeum* I, qui bello Suecico in Germania furente cum Rege Galliarum & Parmensi armorum societatem adversus Hispanos pactus est.

Ge-

Gestum itaque rursus bellum in Italia ab anno 1635. Ad Buffa-
rolam Hispani prælio victi sunt. Sed, quia pacto convenerat, ut ^{Bellum.}
tantum terrarum Galliæ in Sabaudia accederet, quantum Victori
Amadeo in Mediolanensi agro accresceret, Dux, qui neque Hispani-
am, neque Galliam augeri volebat, lente incedendum putavit.
Unde non magnus erat victoriæ fructus. Quin imo victores in
Pedemontium se recipere fuerunt coacti, affluentibus Mediolano &
Neapoli copiis.

Anno 1637 obiit Victor Amadeus I Dux Sabaudia, æt. 51,
regiminis 7. Ex Christina conjuge, Ludovici XIII sorore, reli-
quit Franciscum Hyacinthum, qui successit, sed anno vertente fu-
nus erat. Successit igitur fratri *Carolus Emmanuel II* quadrimus.
Aloysia soror Mauritio patruo suo, qui prius fuerat Cardinalis, Jo-
lanta Duci Parmensi, Adelhais, natu minima, Ferdinando Mariae
Electori Bavariae nupsit.

Sed magna orta est controversia, quis pupillorum tutelam
gereret. Mauritius & Thomas, patrum illam sibi, ceu proximi ^{Lis de}
agnati, vendicabant: erantque ab Imperatore in hoc munere ^{Tutela.}
confirmati; sed Christina mater, auxilio fratris Ludovici prævaluit, &
illico foedus cum Gallia confirmavit. Dux vero Parmensis, hortan-
te Pontifice, & comminante Hispano, ab eodem recessit.

Anno 1639 inter Thomam Principem & Leganium, Medio-
lani Governatorem, tractatum est, ut Galli ex Italia pellantur,
Principibus Sabaudia tutela nepotis committatur, cum administra-
tione statuum, atque innox Jurea, Verva, Chiva, Montallerium, ^{Thomas}
Quierum &c. Principi Thomæ se dediderunt, quin & ipsum Tau-
rinum, cui Cardinalis de Valette (filius Ducis Esperonii) cum
Gallis suis se incluserat. Christina vero vidua cum liberis suis
in Galliam profugit.

Misit Richelius in Italiam Harcurio Duce exercitum, qui ad Que-
rum Thomam & Leganium prælio vicit, ac brevi etiam ad Tau-
rinum, quod victor ingressus est, Christina mox redeunte.

Tandem anno 1641 pax inita. Confirmatur mascula successio
in Sabaudia & Pedemontio. Rex restituet omnia loca, quæ oc-
cupaverat, si Hispanus idem faciat. Nullam cum hoc inibit pacem,
in qua Principes non sint comprehensi. Consentit in nuptias Mau-
ritii Cardinalis cum Aloysia, eique Vicariatus Comitatus Nissani
traditur, Thomæ vero Principi Eperodia, seu Jurea & Biellenfis
provincia. Christina maneat tutrix sui filii Caroli Emmanuelis,

& Gubernatrix provinciarum. Thomas ex socio Hispanorum factus hostis, ex hoste Gallorum eorum Ductor.

Thomas, quem dixi, magni Principis Eugenii avus, novam Domus Sabaudicæ lineam fundavit, quam *Carignanæ* appellant, & per nuptias cum Maria Borbonica ex Domo Condæ, ultimi comitis Sueffionensis filia & hærede, Sueffionis comitatum adeptus est. Unde duplex dein linea est orta, *Carignana*, & *Sueffionensis*, quæ tamen posterior in Principe Eugenio, ejusque nepote & pronepote fuit extincta.

Lis de
Castro.

Anno 1643 post diuturnas de Ducatu *Castro* contentiones, quæ in bellum exarserunt, sancita est pax inter Urbanum VIII summum Pontificem & Ducem Parmensem. Ducatum hunc Paulus III Petro Aloysio Farnesio cum Parma & Placentia clientelari jure possidendum dederat. Odoardus I eundem Monti Pietatis Romano oppignoraverat; cumque creditum non restitueretur, Urbanus VIII eundem ad se traxit. Verum, cum & Veneti, & Dux Florentiæ, ac Mutinæ Parmensi assisterent, Urbanus Papa anno 1643 ea, quam dixi, pacificatione eundem restituit; sub onere tamen homagii, præstandi Pontifici. Anno 1649 iterum in Pontificis manus recidit, Castrumque urbs diruta, & Episcopatus Aculam (*Aquapendente*) translatus, postquam Episcopus, Castrum destinatus, in itinere fuit interfectus. Anno 1650 Ducatus Castri cum dominio Romanæ Ecclesiæ directo fuit consolidatus. Agebatur quidem anno 1664 de Ducatu restituendo Parmensi Duci, sed Camera Apostolica in possessione mansit; quamvis etiam hoc sæculo lis rursus fuerit mota, donec Cæsar anno 1738 prætensionis persecutioni renuntiavit.

Anno 1648 continuato bello Infubrico, Galli cum Mutinensi Cremonam oppugnaverunt, sed conatu irrito; Hispanis in subsidium accurrentibus.

§. 2.

Seditio Neapolitana. Captivitas Guisii. Amissa Candia. Seditio Messinensis. Cassini systema de cometis. Victoriæ Venetorum de Turcis. Pax Taurinensis, Carlovicensis. Cœptum bellum ob successionem Hispanicam.

Seditio
Neapol.

Seditio Neapolitana priori anno cœpta, hoc anno est continuata. Novi vectigalis impositio plebem in rabiem egit, cui ducem se præbuit Aniellus quidam, ultimæ fæcis homo. Auditiæ voces infru-

infrunitæ per urbem discurrentium : DEUS conservet Regem, malos autem Præfectos auferat Diabolus. 60 Palatia dicuntur in cineres redacta. Arcosius Prorex immittit militem in furentes; plateæ sanguine natant. Inter alios cadit Aniellus.

Guissus, qui tunc Romæ versabatur in causa sui matrimonii dissolvendi, audita seditione, occultis nuntiis suadet populo, ut Rempublicam formet, & protectionem Galliarum Regis imploret: pro se autem non aliam auctoritatem in nova Republica Guissus petiit, ac Princeps Auriacus in unitis Belgii provinciis obtineret. Non abnuvit populus.

Quare Guissus Neapolin abiit, in turbido, quod ajunt, piscaturus. At simul Joannes Austriacus urbem subiit cum copiis, quæ Guissii fata. una manu facem, altera nudatum enses gestabant, simulque ex arce in urbem fulminatum. Cives correptis armis in plateis dimicabant. Nobiles vero, adversus plebem irritati, cibaria, ne in urbem deveharentur, interclusere. Summa erat rerum penuria, & extrema calamitas. Guissus in urbe receptus, velut tutelaris genius, atque civium Præfectus proclamatus. Verum, cum Gallia tarde & parce militem & argentum submitteret, defensionis impar, ab Hispanis captus in Hispaniam abductus est, de capite jam sollicitus, cui coronam propediem imponendam crediderat.

Quatuor annis detentus in Hispania, ad preces Lotharingiæ Ducis libertati est restitutus: seditio vero, adveniente novo Pro-Rege sopita, confirmatis Neapolitanorum privilegiis.

Insigni interea virtute Veneti bellum adversum Turcas prosequabantur, relatis non paucis de iis navalibus victoriis. Eminere inter illas videtur, quam intra ipsas Dardanellas anno 1655 reportarunt, & anno 1657 ad Chium.

Continuato autem in Italia Gallos inter & Hispanos bello, Dux Mutinæ Valentiam ad Padum Hispanis anno 1656 eripuit. Quo Principi Thomæ, qui Galliæ copiis præfuerat, Taurini mortuo, successerunt filii, Emmanuel, & Eugenius Mauritius, Magni Eugenii pater, & ille quidem natu major Carignanæ lineam propagavit, hic vero Sueffionensem.

In annum 1662 inciderunt dissidia inter Alex. VII Pontificem & Lud. XIV propter violatum a Corsis Romæ præsidiariis Crequium, Oratorem Galliæ, quas in Gallicis perstrinxit.

Creta
amissa.

Anno 1669 Veneti amiserunt *Candiam* post 24 annorum bellum, cum Turcis gestum. Victores initio Veneti, in Hellespontum usque, Dardanellas, & Propontidem victorias suas protenderunt. Denique, cum Christiani Principes, inter se bellis collisi, subsidia non mitterent (præter 6000 Gallorum) numero victi, non virtute, nobilissimam Insulam amiserunt, *Suda* & *Spinalonga* exceptis, quæ primum anno 1715 perierunt.

Anno 1672 Sabaudia inter Ducem & Rempublicam Genuensem pace inita, finitum est bellum, quod propter finium controversias erat exortum.

Seditio Messana.

Secuta est vehemens *seditio Messinensis*; cum enim Gubernatores severius, accisis senatorum privilegiis, imperare viderentur, civitas tota arma corripuit, accitis etiam ex Gallia copiis: Gubernator beneficii loco habere debuit, quod fugere licuerit. Commisum subin Gallos inter & Hispanos, ex Catalaunia advectos, navale prælium, quo isti in fugam acti sunt.

Expectatione eventus suspensæ hærebant aliæ civitates Siciliae. Gallica præsidia Messinæ sunt recepta; quæ tamen ita in ea versabantur, ut cives aversarentur defensores suos. Fames premebat, Hispanis commeatum intercludentibus. Reverfuri ad pristinum Dominum vindicem seditionis formidabant. Integræ classes adversæ in aquis Siculis depugnabant.

Tandem vero anno 1678, ubi Gallia vidit, hanc expeditionem plus impensarum, quam emolumenti & spei asferre, Fevilladæ mandavit, ut deserta Messina Gallos in patriam reducat. Ille, simulata expeditione magni in rem momenti, Gallos omnes, etiam ægros, navibus imposuit, & cum paulum a littore remota fuisset classis, per litteras civitati denuntiat, se in Galliam rediturum. Tum vero Messinenses, protensis manibus & elatis clamoribus, rogabant, ne se desertum, & Hispanorum iræ expositum iret. Sed aliud facere non poterat, nisi, quod aliquot centenos in naves reciperet, reliquis suo fato relictis. Hispani in urbem recepti, auctoribus seditionis, qui supererant, plexis, reliquis veniam dederunt.

Cometa.

Anno 1680 mense Decembri apparuit cometa, tanta magnitudine, qualem vix unquam videre fuit. Qua occasione *Cassinus* Italus, Astronomus clarissimus, proposuit suum systema de regulari periodico reditu cometarum, ac proin docuit, prædici posse eum recursum, sicut eclypses solis aut lunæ, vel alia astrorum phænomena. Quæ sententia, si esset vera, dissolveret plures de

cometæ

cometis dubitationes, eximeretque rudibus vanam persuasionem, a cometis mali quidpiam portendi.

Anno 1683 cum Vienna depulsus esset Turca, foedus est contractum Cæsarem inter, Polonum, & Venetos; & illi quidem in Hungaria, atque ad Boristhenem insignes ei clades intulerunt, Veneti vero varias Insulas & loca maritima sunt adepti, prout etiam anno 1686 ad Nauplias insignem victoriam. Præmium fuit Peloponesus, tota propemodum expugnata, & anno sequenti Athenæ. Anno vero 1689 Turcæ navali pugna rursus victi. Certe insignis hæc fuit Reipublicæ gloria, quod sola suis viribus hostem tam potentem toties profligarit, singulis annis novis victoriis & possessionibus aucta.

Victoriæ de
Turcis.

Non tam felix Dux Sabaudia fuit, qui anno 1690 accedens magno foederi, Catinatum passus, Susam, ac postea alias quoque urbes amisit. Anno vero 1692 Dux vices redditurus, in Galliam irrumpens, Ebrodunum in Delphinatu cepit, aliaque loca, contributione indicta.

Anno 1693 horrendus adeo terræ motus Siciliam concussit, ut Catanam, & Siracusas, cum octo aliis urbibus, 140 arces, & oppida vastaret, sepulta sub ruinis magna hominum multitudine.

Eodem anno Catinatus ad Pinarolium Ducem Sabaudia, grandi illata strage, profligat. Tandem vero anno 1696 primus ex foederatis Victor Amadeus cum Gallia pacem Taurini clam composuit. Renuntiat foederi, quo Cæsari ac locis aliis fuerat illigatus, omnemque operam junget pro *neutralitate* Italiae, usque ad pacem universalem. Rex Duci restituet Pinarolium, Perusam, Monmelianum, Nicæam, Villefrancam, Susam &c. nec pacem aut inducias panget cum Imperatore & Hispano, in quibus Dux non esset comprehensus. Ad hæc matrimonium inter Ducem Burgundia & Adelhaidem Ducis filiam decernitur. Ejus legatos Rex excipiet eo honore, qui desertur legatis coronatorum capitum. Dux edicto vetabit incolis vallium Lucernensium seu Valdensibus omnem communicationem in iis, quæ religionem concernant, cum Gallis.

Pax Tauri-
rensis.

Gloriosa non minus quam utilis hæc pax Duci fuit, quia plus recepit, quam amisit. Sed Rex hoc voluit hamo Ducem a magno foedere abstractum ad se trahere. Non placuit autem Foederatis initio, ut Italia inter belligerantes esset media. Verum cum Catenatus Valentiam obsideret, consenserunt, facilioresque deinceps aures paci universali præbuerunt.

Veneri

Venetorum
Victoriæ.

Veneti his annis ad Chium Insulam semel victi, bis victores: ad Androsiam Insulam pari Marte pugnantes, præclara fortitudinis exempla præbuerunt, prout etiam anno 1697, dum intra ILEmnum & Tenedum Turcas aggressores strenue repulerunt, rursumque ad Mytelenem, 4000 barbarorum caesis.

Pax Carlo-
vicensis.

Tandem vero anno 1699 Turca, sicut cum Cæsare, Polonis, & Moëcis, sic etiam cum Venetis *Carlovicensē* pacem iniit. Relicta Venetis *Peloponesus* seu *Morea*, magnum quidem de se, sed in comparatione tot victoriarum exile præmium. Verum ne Turcam soli sustinerent, pax componenda fuit, postquam inter Illegatos ardens contentio negotium vix non abruptisset.

Bellum
Italicum.

Inchoato anno 1700 bello ob successionem Hispanicam gravissimo Imperatorem inter & Regem Franciæ, Respublica Venetorum Cardinali Estræo declaravit, se medias inter utrumque partes retenturam. Cum autem dein accessum Germanicis copiis per terras suas concederet, illæque, ut in exercitu militari amari contingere, non omnino innocue semper incederent, & quandoque etiam hoste resistente, diutius subsisterent, Veneti de utraque parte questi sunt, & pars utraque de Venetis, ac si parti adversæ faverent magis.

Contentio
de Venetis.

Et Mantua-
no.

Gallo-Hispani, antequam Eugenius Princeps cum copiis Germanis advenire posset, versus *Mantuanam* progressi, Duci significarunt per Comitem Tessæum, qui ante adventum Catenati exercitum gubernabat, necesse omnino esse, ut duo Reges Imperialem militem præveniant, & Mantuæ custodiendæ præsidium impendant. Consultius facturum Ducem, ut protinus illud recipiat, statusque suos inevitabili ruinæ subtrahat. In eandem sententiam scripsit Valdemontius Princeps, Mediolanensis Gubernator.

Dux, re in senatu suo deliberata, portas aperiendas censuit. Consilium tunc visum necessarium, sed in fine Domui Gonzaganæ exitiale; quippe Cæsar illud in eam partem interpretabatur, quod Dux cum duabus coronis colluderet. Eugenius vero Princeps Carpeni victoria felix bello initium dedit, prospero deinceps successu continuato.

Pontificum
cura circa
doctrinam
Moralem.

Romani interea Pontifices, dum sæculares Principes de conquirendis regnis terrenis, & amplificandis provinciis, inter se certant, de Regno, ejus non erit finis, comparando propagandoque per urbem solliciti, curas suas in id intenderunt, ut Pasto-
ralem,

ralem, a Christo sibi commissam, vigilantiam in omnem partem exporrigant, animasque immortales regno cœlesti inferant.

Quas summi Saecrorum Antistites hanc in rem constitutiones ediderint, quæque gesserint, postea equidem ceu coronidem operis recensebimus, juvat tamen hic de Propositionibus quibusdam laxis & exerrantibus, hoc sæculo XVII ab iisdem damnatis, aliqua interferere.

Hoc quippe sæculo potissimum ingenia quædam incauta, sibi-que ipsis nimium confisa, atque per insignem audaciam altius, quam par erat, provecta, in scopulos impeerunt, eamque, quæ de moribus est, doctrinam sphalmis suis infecerunt: quapropter summi Pontifices muneris sui Pastoralis esse duxerunt, ut laxitatem istam & sentiendi libidinem coercerent, atque concreditum sibi gregem a noxiis pascuis averterent.

Quia autem alii nervum nimium intenderant, atque rigore suo indiscreto in alteram partem, a semita recta declinantes, impeerant, Pontifices horum quoque zelum quidem, sed non secundum scientiam, reprobarunt, sapientissime judicantes ex

Verbi Divini & Patrum regula, certos esse fines, quos ultrocitraque nequeat rectum consistere.





CAPUT II.

STATUS HISPANIAE

SÆCULO XVII.

ARTICULUS I.

Status Hispaniæ sub Philippo III.

*Amplitudo Monarchiæ, opes, vires. C. uenta Ostendæ expugna-
tio. Induciæ cum Hollandis. Bellum Monferratense,
Rhaeticum, Rhenanum &c.*

110.

Foresti.

Hæreditatis
amplitudo.

In Europa.

Magno illo & quieto orbis motore Philippo II fatis defuncto, filius ejus Philippus III multo amplissimam post hominum memoriam, atque in omnes terræ partes exporrectam, hæreditatem adiit. Quippe in Europa nactus est Hispaniam, in duodecim regna diffusam, 140 urbes, 30000 oppida, 11 Archiepiscopatus, 55 Episcopatus, 25000 parœcias, 120000 Ecclesias, 12800 Monasteria, 16 sacræ Inquisitionis tribunalia, 32 Academias, 4000 inferiores Scholas, 9 Equitum ordines, 900 Commendas, completentia.

Ad hæc in Italia regnum triplex, Siculum videlicet, Neapolitanum, & Sardicum, Ducatum Mediolanensem, munimenta complura in Tyrrheno mari, quos *Status Præsidii* appellant, cum Balearibus Insulis, atque cum Burgundia. In Germania Inferiore decem Belgii provincias, cum jure in septem reliquis, quæ Batavis fœderatis necdum cessæ fuerant: Regnum denique Lusitanæ, in omnes pariter quatuor orbis partes extensum, a Philippo II im-
mensis incrementis adjectum.

In

In Asia Insulas Philippinas, Malacam, Goam, Diunum, Ormuzium, cum pluribus Insulis, Provinciis, urbibus. Asia.

In Africa Oranum, Portum Magnum, Septam, Melillam, Tingim, Veliam Rupem, Loandam, cum aliis Angolæ urbibus, Sotatam, Quiloam, Monbaciã, Insulas Fortunatas, nempe Canariæ, Teneriffæ, Ferri, Fortenventuræ, Gratiolæ, Palmæ, Maderæ, Rocæ, Gomeræ, Alegranzæ, Lancelotæ: decem Insulas Hesperides, magnam Insulam S. Laurentii (quam Madagascar appellant) cum aliis pluribus. Africa.

Nusquam vero in maiorem amplitudinem Hispana Manarchia, prout ea Philippo III fuit relicta, se dilatat, quam in America, ubi Regnum Mexicanum, Peruanum, Quittense, Chilense, Paraguariam, Brasiliam, Terram Firmam, cum Insulis Hispaniola, Cuba, Jamaica, Porto Ricco &c. pluresque alias amplas provincias accipit; ut adeo hæreditas illa multo maior censeatur, quam vastum Turcarum, aut Romanorum olim Imperium. America.

Ingentes præterea auri argentique opes ex America, & Peruvia potissimum, in Europam advehuntur, primum quidem Panamam, dein Portum Bellum, ubi aureæ quot annis instituuntur nundinæ, mercesque emptæ Havanam, principem Cubæ civitatem, ubi naves Americanæ congregantur, solent avehi, Gades inde transportandæ.

Quamvis autem tam vasta fuerit Hispanicarum ditionum amplitudo, tamque immensæ ex novo orbe asportatæ opes, non tamen iis respondit militaris potentia; multumque præstiterit Rex, si quinquaginta suorum millia in aciem possit educere: expulsis quippe multitudine ingenti Mauris, plurimis continuo ferme bello absumptis, coloniis magno numero in American abductis, accedente sicco regionis calore, exhausta non parum fuit populis Hispania. Vires.

Neque incolæ in tanta advenientis auri argentique copia abundant divitiis, cum laboris fugitantes nec agriculturam, nec commercia multum exerceant, sed Anglis, Batavis, Gallis, & Borealibus Nationibus hæc ferme relinquunt, contenti aurum Americanum mercisque Gades advehere; unde potissima lucri pars ex mercatura juxta conventiones initas ad exterarum gentes delabitur. Opes.

Quamvis verò in Regium ærarium haud parum inde importetur, in longinquas tamen provincias bellis ferme assiduè de-

pastas, plurimum inferendum fuit, adeo quidem, ut vel solum bellum Belgicum multos auri milliones absumperit.

Regnum, prout est Francia, provinciis suis cohærens, & nervis ossibusque una compage nexuque valide conjunctum, facile se tuetur, vicinisque sui formidinem ingerit; æt vero, ubi membra ingentibus terrarum spatiis sunt abstracta, nec amplius vivido illo Caroli V aut Philippi II spiritu animantur, mirum non est, ingens etiam corpus molem suam ægrius ciere, atque a potentibus vicinis mutilari.

Experti hoc sunt Philippus IV & Carolus II; nam Philippus III, quamvis in Belgio, Rhœtia, Italia, India, bello appetitus, satis adhuc strenue amplissimam hæreditatem suam defendebat. Albertus Archidux, licet anno 1600 a Maurício Batavo prælio ad Neoportum victus, *Ostendam* nihilominus anno sequenti oppugnare cœpit. Vix ulla unquam urbs tanto impendio fletit. In quartum annum producta vehemens oppugnatio. Cæso Fridrico Spinola, Hispanæ classis Præfecto, dum auxilia Batavorum arcere nititur, Ambrosius ejus frater, summus Imperator, pertiniaciam hostium tandem fregit. At acervum lapidum, lignorum, & cadaverum invenit. In urbe 73000, extra illam vero 80000 hoc oppugnationis tempore cæsa feruntur.

Batavi interea, ut Hispanos ab obsidione Ostendana abstraherent, Graviam ad Mosam, & Slusam occuparunt, Spinola vero post Ostendam Grollam & Rheinbergam.

Agebatur tum equidem de pace cum Batavis, sed quia hi postulabant, ut Rex cum iis libera velut Republica tractaret, neque a navigationibus, quod Rex petebat, tam florentibus rebus suis, abstinere vellent, transigi nil poterat. Postquam tamen Malacensem in India obsidionem solvere a paucis Lusitanis coacti sunt, duodecim annorum inducias cum Hispanis pepigere. (anno 1609). Quo medio tempore Batavi strenue in rem suam sunt usi, atque navigationes in omnem orbem & commercia in immensum auxerunt.

Induciæ. Ut vero Hispanus in futurum etiam Belgii provinciis caveret, cum Rege Angliæ fœdus iniit, ne Batavis deinceps assistat, & cum Francia gemino connubio amicitiam firmavit, data Ludovico XIII Anna Maria filia sua, natu maxima; Philippo vero filio suo Isabella Ludovici Regis sorore desponsa. (1615)

Nuptiæ.

Hac parte constituta quiete, turbæ novæ exsisterunt, defuncto Francisco IV Mantuæ Duce, nulla relicta prole mascula: qua-

quapropter ejusdem frater Ferdinandus, ante Cardinalis, successit. Sed litem ei movit Carolus Emmanuel Dux Sabaudiae, qui Ducatum *Monferratensem*, quem aliis etiam titulis sibi vendicabat, ad Mariam neptem suam, demortui Francisci Ducis filiam pertinere contendebat. Bellum Monferratense,

Philippus Rex, cum ageretur de feudo Imperii, eam causam ad consilium Caesaris aulicum remittebat: at Sabaudus, tanti Regis potentiam non veritus, sed gladio utilius dirimendam ratus, vi armata ditionem Monferratensem invasit; quapropter Toletus Mediolani Gubernator, jussu Regis, arma opposuit, captis etiam Vercellis. Restitutis dein, quæ utrinque fuerant ablata, Mantuanus mansit in possessione.

Extincto hoc in Italia incendio, in Rhoetia flamma erupit. Auctores Calvinistæ, sanguinolentum hominum genus, qui, Episcopo Curiensi expulso, Archipresbyterum ad tribunal suum tractum ea crudelitate in equuleo torquebant, ut spiritum vitamque illi eliderent.

Grisones Catholici, cum pauciores essent, quam ut Calvinistarum multitudini possent resistere, atque has aliasque injurias vindicare, ad Regem Catholicum conversi opem implorant. Is rei Catholicæ defensor acerrimus, misso cum copiis in Grisoniam Fera, Mediolani Prætor, cum Catholicis se conjunxit, atque multis Calvinistarum cæsis, Vallem Telinam occupavit, erectis munitis arcibus, Hispanicoque præsidio firmatis. Et Rhoetia cum
In Valle Telina.

Displicuit ea res Helvetis & Venetis (prout apud vicinas gentes amat contingere, quodcunque vicini incrementum iniquius ferentes) imo & Gallis, tam arctis licet nexibus Hispaniæ adstrictis; nolebant enim tam opportunum & Germania in Italiam transitum Hispanorum potestati relinquere.

Ne autem eam ob rem, non maximam, grave bellum exardesceret, Vallis Telina in fidem Gregorii XV summi Pontificis fuit deposita: qui, misso Marchione Bagnino, eam provinciam tamdiu custodiri voluit, donec causa Romæ amice foret composita.

Verum cum Bagnius Hispanis Proceribus familiarius uteretur, in eosque videretur propensior, Estreus, Christianissimi Regis apud Helvetos Orator, exuta toga, sagum induit, junctusque Sabaudæ & Venetis, bimestri spatio Vallem Telinam Hispanis eripuit. Contemptum se interpretatus Urbanus Pontifex; misso in Galliam & Hispaniam nepote suo Cardinale Barbarino, pacem Pax.
Brac.

composuit, his articulis : ut Vallis Telina restituatur Ministris Pontificis, qui securitati Religionis providerent: Munitiones, recens exstructæ, diruantur, transitu Regi utrique libero: conservatores, a Teliniis electos, Rhæti confirmet: Comitatus Wormsiensis & Clavennæ sub Valle Telinia comprehendantur; atque inde præsidia utriusque partis abducantur. Telinii certam pecuniæ summam Grifonibus pendant, in recognitionem veteris clientelæ: idque ut diligenter observetur, ambo Reges Telinios in tutelam suscipiant.

In Africam Philippus classem misit, ut in Tessano regno Principi adversus fratrem assistat; unde Larachium, opportunum Hispanis munimentum, in præmium accepit.

Spinola ad
Rhenum.

Per Ambrosium *Spinolam* vero, expugnato Juliaco partes Ducis Neoburgici adversus Brandenburgum & Batavos valide protexit. Tum vero misso exercitu in Palatinum Inferiorem sententiam Cæsaris in Fridericum Palatinum per eundem *Spinolam* est executus.

Allata proin externis ope, atque Monarchiâ sua bene defensa, Philippus III obiit pientissime, prout vixit, anno 1621 30 Martii, regni 22, ætatis 43, longiori vita multo dignissimus. Quippe Princeps erat singulari integritate, castimonia, pietate, fide, iustitia, cæterisque virtutibus, quæ magnum Regem comprimis decent, exornantque.

Mauri
puls.

Religione nihil habuit antiquius. Unde factum, ut Ferdinandi Catholici, abavi sui, exemplo omnes Mauros ex Hispania pelleret. Hi magno numero baptismum quidem Christiano ritu susceperant, & externo cultu Christianos se simulabant, sed corde Mahometem nunquam serio excluferant; quin Mahometanos in Africa, Turcasque, &, uti ferebatur, Gallos etiam Anglosque clam incitabant, ut Hispaniam invadant. Qua proditione detecta, Philippus Rex omnes exulare iussit. Multo ferme hujus fœcis emigrasse dicitur: magna quidem ararii, & frequentia, in regno non adeo populofo, jactura, sed majori Religionis puritate, & securitatis publicæ incremento.

Filios ex Margretha Caroli Archiducis filia, reliquit tres: Philippum IV, qui in Regno successit, Carolum anno 1632 demortuum, & Ferdinandum, qui Archiepiscopatu Toletano, & Cardinalis dignitate jam ornatus, victoriæ Nördlingensis pars magna fuit, ad capeffendam Belgii Præfecturam inde profectus; Filias
autem

autem duas, Annam Mariam, Ludovico XIII Franciæ Regi nuptam, & Mariam Annam, Ferdinandi III Cæsaris conjugem.

ARTICULUS II.

Status Hispaniæ sub Philippo IV.

§. I.

Tragici Ministrorum casus. Bellum Mantuanum. Trevirensis captus. Bellum Catalaunense, Italicum, Belgicum. Defectio Lusitaniæ, seditio Neapol. &c.

Sexto decimo ætatis anno Regimen tot provinciarum auspicatus, *Calderonius*. aulæ Ministros, Regum gratia & potentia sua abusus, ad poenam vocavit: *Offinæ Ducem*, & *Rodericum Calderonium*: illum quidem, quod Prorex Siciliæ feroci severitate res Neapolitanas in discrimen adduxisset, carceri mancipatum, ut per otium animi impetus frangat: hunc vero, a Philippo III ex humili fortuna ad summam dignitatem evectum, atque gemini homicidii postulatum, sive veris criminibus, sive invidia laboraret, securi percussit.

Ministri puniti.

Accessit tertius, Dux *Lermæus*, qui ipsum Regem Philippum III regere videbatur, ex aula is pulsus, purpuræ, quam ad sui tutelam a Pontifice petierat, debuit, ne acerbius in eum animadverteretur. In ejus locum assumptus Casparus Guzmannus Comes *Olivarius*.

Eo Ministro felicia erant Philippi IV initia; nam in Africa ad Mamoram fluvium valido monumento erecto, Marochii Regem illius obsidionem solvere coëgit: cum autem classis, eo transmissa, rediret, triginta tres naves Batavicas, mercibus onustas, finito jam induciarum tempore, in freto Gaditano aut demersit, aut suæ potestatis fecit. Nec minus secundam se fortuna præbuit, dum Batavi Molucis Insulis Hispanorum & Lusitanorum armis depulsi sunt; *Felix*. & in Brasilia Portu omnium sanctorum: prout etiam, cum Spinola in Belgio Bredam, a Batavis abreptam, magno licet impendio ad Regem reduxit.

Olivarius

Ad

At reliqua Philippī tempora minus, quam prima, erant prospera. Primæ ruinæ ab elementis; nam Iberus 1625 tantopere se effudit, ut Cæsaraugustam, reliquamque Arragoniam pene demergeret. Nec minus damni Formesius amnis Salmanticæ in Legionis regno intulit.

Verſio for-
tuna.

In Calabria & Apulia terræ motus continuis septem diebus urbes & oppida vehementer concusserant. Accessit insolitus Vesuvii furor, qui ignitas undas aliamque pestem tanto impetu evomuit, ut Nolam civitatem, Amalphitanam, aliasque confines regiones obrueret: eo tamen emolumento, ut, dum corpora sterneret, animas erigeret.

Bellum
Mantuanum.

Sed multo plus cladis ab hominibus acceptum, bellis videlicet assiduis, & provinciarum defectione. Et bellum quidem Italicum, præter sumptus, minus damni attulit. O tum illud est rursus propter Ducatum Mantuanum, & Montisferratensem. Quippe defuncto 1627 Vincentio II Carolus Gonzaga, Dux Nivernensis (cujus pater ducta Nivernensi in Galia domicilium transtulerat) ope Gallorum utrumque Ducatum, ceu proximus agnatus, occupavit. Quia autem solitam inaugurationem in hæc Imperii feuda a Cæsare non acceperat, neque ditiones in manus ejusdem deponere volebat, Imperator cum Hispano se opponebat. Adhæc tres alii erant competiores, Dux Guastallæ, Margaritha, Lotharingæ Ducis vidua, Vincentii defuncti soror, Dux Sabaudia, qui Ducatum Montisferrati rursus postulabat, junctis cum Cæsare & Hispano armis. (1628.)

Itaque Consalvus Corduba, Mediolani Gubernator, cum Sabaudo Montisferratum invadit: captisque reliquis locis Casalim oppugnavit, sed irrito conatu.

Anno sequenti (1629) Ludovicus XIII domita Rupella in Sabaudiam & Pedemontium irruens, ad pacem Ducem adexit. Cæsar autem, Colalto, Aldringeri, & Gallasso ducibus, exercitum, ad Lindaviam lustratum, per Rhœtiam in Italiam misit, totumque agrum Mantuanum (urbe principe excepta) occupavit: Spinola, quem amoto Cordubæ Rex Philippus in Præfectura Mediolanensi surrogarat, Casalim interea rursus incassum tentante (anno 1629)

Pax.

Proximo dein anno Astu expugnata a Cæsareis Mantua, Casalibus vero strenue defensa a Torasio, Ambrosio Spinolæ, summo illi Duci, tedium & mortem attulit. Cum autem propinqui jam adeo essent adversi exercitus, ut res prælium spectare videretur, itum,

Pon-

Pontifice per Mazzarinum annitente, in pacis leges: Nivernensis veniam a Cæsare precatus, ditionem Mantuanam & Montisfer-ratensem reciperet: Sabauda redderentur sua, deductis inde Gal-lis præsidiiis: pars nulla alterius hostibus, aut perduellibus assi-stat: Rhœiæ claustra in pristinum statum reponantur.

Quamvis autem hæc pax in Comitibus Ratisbonensibus fuerit consummata ac confirmata; non amplius tamen quinquennio te-nuit; siquidem anno 1635 magno rei Catholicæ malo erupit bellum Gallo-Hispanicum: cujus gentis culpa, DEUS novit, altera odium in alteram rejiciente. Proxima Gallis causa, Elector Trevirensis socius, alieno sane tempore, dum Sueci ac Protestantes Germa-niam cladibus miscebant, a Ferdinando Cardinale Hispano in cu-stodiam abreptus.

Missi illico in Belgium Franci, Castillionæo & Berzæo ducto-ribus: quorum conjunctionem cum Batavis dum Princeps Thomas Sabaudus, a Gallis ad Hispanos transgressus, impedire nititur, ad Aveinum magna clade affectus est, 4000 Hispanorum cæsis, 500 captis, tormentis, signis, bellico apparatu plurimo, amissis. At Batavus, premente jam tum Gallici nominis invidia, florentissi-mum exercitum, sibi junctum, fame & miseriis perdidit.

Anno sequenti Ferdinandus Cardinalis Belgarum Gubernator, intercepta Ciapella, Castelletto & Corbeja, totam pene Picardiam subruit, sparso Lutetiam usque per Joannem Werthium metu.

Condæus, collecto apud Narbonam exercitu, in Catalau-niam movit, ubi jacta jam erant seditionis semina. Sed necdum ad eam maturitatem pervenerant, ut Galli fructum inde possent metere.

Flagrabat tum in Italia bellum Sabaudicum, ea maxime cau-sa, quod Victor Amadeus I tutelam filiorum suorum ad conjugem ob suam Christinam, Ludovici XIII sororem, detulerit, præteritis fratribus suis, Mauritiæ Cardinale, & Thoma Principe Carigna-no, qui ad se, ceu proximos agnatos, curam Caroli Emmanuelis nepotis, exclusa testamentaria tutela, pertinere arbitrabantur. Ventum ad arma: Principum causam Hispanus, viduæ sororis Gallus juvabat. Gubernator Mediolani Leganesius in Pedemontio plures urbes interceptit, Thomas Princeps Juream, Nicæam, & ipsum Taurinum, faventibus oppidanis, pyroclastro reclusum. (1638)

At Rex Franciæ cum valido exercitu in Italiam misit Har-courium, qui Gubernatorem Mediolanensem, *Casalim* obsiden-tem, magna clade profligavit, omni castrensi apparatu exutum:

Pars IX.

O

cælis

Trevirensis
captus.

Initia belli
Hispano-
Gallici in
Belgio.

In Italia
tutelam.

Pugna ad
Casalim.

Taurinum
captum.

cæsis dein aliquoties Hispanis, atque *Taurino* expugnato, solenni pompa reductam viduam tutricem constituit, eadem fortuna Castilioneus Attrebatum, principem Artesiæ urbem Francis adjecit. (1639)

Belgium.

Batavi quoque, quamvis aliquoties victi, magna tamen damna Hispanis intulerunt, classe intercepta, Fernambuco in Brasilia, Sylva Ducis, Arce Schenckia, Trajecto ad Mosam, Breda, quam Spinola tantis impendiis reduxerat, in Belgio occupatis.

Cataloniæ
& Lusitani
defectio.

Sed longe funestissimus Hispaniæ fuit annus 1640, quo domesticis scissa dissidiis, dimidium velut sui amisit, *Catalaunia* & *Lusitania* abstractis. Catalauni tributorum magnitudinem, militum contubernia, privilegia violata, surdam ad clamores suos Aulam que-rebantur. Correptis proin armis totam provinciam tumultu complent. Regia præsidia expulsa, Prorex interemptus, Proceres alii regiarum partium aut necati, aut bonis exuti in exilium ejecti; ærarium quoque Regium direptum; imploratus Rex Franciæ, ejus filius, Dux Andegavensis, trimus tunc infans electus Princeps: recepta Barcino totaque provincia in fidem ac patrocinium.

Secuta exemplum Lusitania, & quidem eodem ferme tempore in Europa, India, Africa, & Brasilia, miro consensu & conspiratione, de qua nihil Hispanis antea innotuerat, res tota est acta. Olyssipone Regium palatium, prætorianis cæsis, mox occupatum, Vasconcellus, Ministrorum primus interemptus, Margaretha Sabauda, Francisci Mantuæ Ducis vidua, quæ pro Rege Philippo Lusitaniæ Regno præerat, ad fines regni deportata, electus in Regem Joannes Dux Bragantinus. Ex tot amplissimis provinciis sola Septa in Africa, quæ Hispanum Præfectum habebat, Hispanis mansit. Ut autem novum Regem Lusitani tueri possent, auxilia bellique apparatus prolixè a Gallis Batavisque, haud mediocriter tanta Hispaniæ diminutione lætis, acceperunt.

Olivarius
infelix.

Culpa tantæ defectionis conjiciebatur in Cornitem *Olivæ*, qui regnum manu versabat; & in *Castellanos Proceres*, arrogantius, quam genius ferret, in Lusitanos dominantes. Motus tum quidem loco Olivarius, Ludovico *Harao* substituto. Sed serum erat emplastrum.

Seditio Neapol.

Imo necdum ruinarum satis: quasi omnes gentes in Hispaniæ perniciem conjurassent; nam, profligato in Catalaunia Hispano exercitu, Perpiniano fame ad ditionem compulso, compluribus in Belgio tum a Gallis, tum Batavis, urbibus abreptis, anno 1647 orta est *Neapolitana seditio* & Sicula, & hæc quidem Panormi ob panis

panis caritatem adversus Proregem concitata, facilius sedata est. Illa vero, multo gravissima, prope erat, ut Regnum quoque Neapolitanum ab Hispania rescicaret.

Occasionem dedit novum vectigal, minutis rebus, pomis & oleribus impositum; auctor vero erat *Aniellus* quidam, sive *Mafaniellus*, infima de sorte homo vilissimus; audax tamen & lingua promptus, quem multitudo suum velut Regem constituit. Eo ductore ultra centum hominum millia, armis arreptis, per urbem amplissimam discurrebant, everfisque, in quibus vectigalia exigebantur, tabernis, ac publicanorum ædibus, Proregem Magnatesque ingenti terrore complebant.

Archiepiscopus cum venerabili Sacramento progressus quietem ab incondita multitudine rogavit, quam non alia conditione concessuram ferociter respondit, nisi confirmatis, quæ Ferdinandus Catholicus & Carolus V concessissent, privilegiis, tributa, annuæ imposita, omnino abolerentur, gensque Neapolitana mitius more Majorum haberetur.

Prorex, ne se ipsum regnumque præsentissimo discrimini exponeret, prolixè omnia est pollicitus. Quare *Mafaniellus*, qui, quod sane mirum, pro nutu versabat multitudinem, severe edicit, ut quiete ac modeste se gerant. Arma tamen retineri voluit, donec privilegiorum confirmatio & plena amnestia a Rege adveniret.

Quamvis autem homo iste inquires, ob turbatum curis & vigiliis caput, in delirium lapsus, a quatuor Nobilibus fuerat interceptus, necdum tamen tumultus conquievit, sed plebs armata postulatis suis insistebat. Contra vero Nobiles, ad quos non modica vectigalium portio defluebat, resumpto spiritu, clientelas suas obibant, atque Proregem hortabantur, ne insolenti plebi cederet, plura petituræ, si timidum & indulgentem cerneret.

Atque ita res in civile bellum abiit; plebs urbem. Prorex cum Nobilitate arcem ac portum occupabat. Cum autem populo dux deesset, submissus e Gallia *Guisus*, magno cum applausu fuit exceptus. At subeunte paulatim belli radio, obsequium erga Regem rediit. Dux *Guisus* vero e fuga retractus, in manus Hispanorum incidit.

*Guisus
captus.*

Rex Philippus IV vehementer equidem contendit, ut Pacis Westphaliæ socius admitteretur, sed Gallorum artibus exclusus, inita cum Fœderatis Belgii Ordinibus transactione, liberam Rempublicam, ab Hispana subjectione manumissam declaravit, cum jure, libere utendi navigatione & commerciis: bellum vero cum

Francia, cui & Anglia accessit, prosequi coactus est, iniquiori tamen plerumque fortuna.

Cum igitur, post tantas provinciarum secessiones, intestinos tumultus, Ministrorum non optimas artes, tot undique hostibus, in Italia, Belgio, Catalaunia, India, Lusitania, infestis, imparem se cerneret, pacem tandem Pyrenæam anno 1659 cum Francia composuit, Mazarino Cardinale & Ludovico de Haro in Insula Vidosi amnis ad Regni utriusque confinia congressis. Firmari visa est ea pax nuptiis Ludovici XIV cum Maria Theresia, Philippi filia, sed nova inde (licet paternæ hæreditati juri in Hispanas ditiones renuntiavit) bellorum seges enascetur.

§. 2.

Pax Pyrenæa.

12. Post 24 annorum Hispaniam inter Galliamque atrox bellum, subventum tandem fessis Europæ rebus, revocata pace, tamdiu exule. Et primum quidem, annitentibus Moguntino & Colonien-
si Electoribus, semestres induciæ, postmodum prorogatæ, placuerant; dein vero ad ipsum pacis opus devenit.

Locus delectus est in Galliæ Hispaniæque finibus Vidosi fluminis insula, quæ *Pbasiana* dicebatur. Constructæ ibidem geminæ ædes, quas media aula comittebat, ducta per medium aulæ linea, ceu termino, quo Mazarinus & Ludovicus Mendozius Comes de Haro, plena cum potestate Regum Legati, sibi utrinque obvii, congredierentur.

Sessioibus 24 capita pacis 124 condita. Prolixum nimium foret, omnia in hoc opere *in extenso*, ut loquimur, apponere. Juvat igitur epitomen extrahere.

Amnestia

1 Inter Christianissimum & Catholicum Regem, avunculum & nepotem, eorumque successores pax esto perpetua, atque sincera amicitia, cum plena amnestia, dissidiorum radicibus stirpitus evulsis: ac proin etiam commercia gentem inter utramque libera sunt.

2 Lusitania hac pace non comprehendatur, nisi ad Hispanum redierit: neque Gallus ulla arma aut apparatus bellicum ad eam devehat.

Nuptiæ.

3 Hispaniarum Regis primogenita Maria Theresia Ludovico
XIV

XIV nubat, iis pactis dotalibus, quæ speciali libello sunt contenta: inter quæ est renunciatio successionis Hispanicæ.

4 Regi Galliæ relinquitur in *Artesia* Attrebatum, Gallus retinet. Lillerium, Lentium, Hesdinum, Tereona, Fanum Pauli: in *Flandria* Gravelinga, muniti aggeres, Allovinum, Burburgum: in *Hannonia* Landrecium, Quercetum: in *Luxemburgicis* Theonis villa, Mommedium, Damvillerium, Ivodium, Chavantium, Marvilla: in *Gallia* Rocrojum seu Rupes Regia, Castelletum, Lincampium: ad *Pyrenæos Montes* Ruscinonensis, & Confluentinus Comitatus: In *Germania* Superior & Inferior Alsatia, cum Sultgovia, Comitatu Ferretensi, & Brisaco, prout per pacem Monasteriensis sunt cessa.

5 Contra vero Gallus Hispano restituit in *Belgio* Ipras, Alde-nardam, Duxmudam, Furnam, Menenium, Cominæum: In *Italia* Valentiam, & Mortaram: In *Sequanis*, Juxum, Bleteranas, S. Amoris oppidum, & quidquid in Burgundiæ Comitatu occupaverat. In *Hispaniæ* finibus portus maritimos, Rosas, Urgellas, Comitatum Cerdanum, cum Puicerda, Belvero &c.

6 Carolus *Lotharingiæ* Dux, nuper e captivitate dimissus, ab Hispano recipitur in gratiam, & in Ducatum suum restituitur, sed ea lege, ut Nancei munimenta diruat, litterisque publicis contestetur, se Ducatum Claromontanum & Barrensem, Stenæam, Jarmetium, Marvillam, & Mojenvicum, Galliæ Regi ultro ac merito permisisse, ut in ejusdem ditionem concedant.

7 Volebat omnino Hispanus, ut Ludovicus Borbonius, Princeps *Condæus*, a Gallo in gratiam receptus, ex integro restitueretur. Sed petiit Gallus, ut prius humiliter veniam roget, & se suaque clementiæ Regis permittat. Significandum igitur Mazari-no (quem summopere oderat) curavit, dolere se, quod contra Regem suum arma gesserit: non malevolo in Regem animo, sed temporum iniquitati, & perturbationi id essetribuendum: victurum se deinceps in fideli obsequio Regis, modo delictorum veniam sibi concedere dignetur.

Sancitum igitur hoc tractatu, ut in gratiam recipiendus arma ponat, milites suos Sacramento solvat, eo modo, quo Regi Christianissimo placuerit. Præstitit hoc Princeps, & misso deprecatore, se & omnia sua ejusdem clementiæ subjecit. Rex vero Hispaniæ, cautum per omnia volens Condæo, a quo in hoc bello tanta beneficia acceperat, pro plena illius indemnitate muneris aliquid obtulit. At nihil eo nomine petiit Gallus, nisi, ut Philippo

Wilhelmo , Duci Neoburgico, Juliacum restituatur, abducto inde Hispano præsidio.

Sabaudus. 8 Sabaudix Dux Carolus Emmanuel II hac pace fruatur. Hispanus ei Vercellas , & Cencium restituat, nec fraudi illi sit, quod Gallix partes fuerit amplexus. Ejus discordix cum Mantuano & Mutinæ Duce utriusque Regis opera componuntor. Alphonso Mutinæ Duci Hispanus Corregium restituat. Rogeturque summus Pontifex, ut Controversiæ circa Valles Comacenses, Castrum & Rossilionem componantur. Monæci Principi bona sua in Ducatu Mediolanensi & Regno Neapolis restituantur.

Helveti. 9 Ne ignis, sub cinere latens, Helvetos inter Catholicos & Protestantés rursus erumpat , utriusque Regis opera concordia restituatur : uti etiam in Valle Telina.

Pax Vervina. 10 Omnes captivi dimittantur liberi , solutis tamen debitis contractis. Pax *Vervina* in omnibus observetur , in quibus hic ei non est expresse derogatum ; & , si quid necdum esset impletum, adhuc impleatur.

11 Rex Christianissimus pacis hujus , si velint accedere, participes facit , summum Pontificem, S. R. I. Electores & Principes , ad pacis Westphalicæ observationem secum obligatos , nominatim Electores , Moguntinum , Coloniensem , Heidelbergensem , Ducem Neoburgicum , Regem Sueciæ , ceu Ducem Bremæ & Verdæ , Luneburgicos, Hassos , Venetos , Helvetos , omnesque Reges & Principes, qui voluerint.

Rex Catholicus vero pacis communionem & confortium offert summo Pontifici , Imperatori Romano , omnibus Archiducibus Austriis , & cunctis Regibus, Principibus, & Ordinibus, in pace Vervinenfi jam nominatis , & insuper fœderatis Belgis, atque Guastallæ Regulo. *Actum 7 Novemb. 1659.*

Observatio.

13. Ad 1. *Pax esto perpetua.* Hæc perpetuitas fuit sex annorum.

Ad 2. *Lusitania &c.* hæc anno 1640 ab Hispaniæ dominatione recesserat, electo sibi Rege Bragantina ex stirpe Duce, qui Joannes IV est dictus. Unde Hispaniæ adhuc bellum erat cum Lusitanis.

Ad 3. Dum Philippus IV primogenitam suam dedit Ludovico, Galliæ Regi, secundo genitam vero Leopoldo Cæsari reliquit, videtur

detur non admodum multam rationem habuisse Domus suæ Austriacæ. Renuntiationem autem ejusmodi & jure invalidam esse, & posteris non præjudicare, Galli dixerunt.

Ad 4. Rex Hispaniæ tam difficiles conditiones iniit; quia compulsus erat bello Gallico, Anglico, Lusitanico, & Italico.

Ad 5. Gallia in hoc & sequentibus bellis tam multa occupavit, ut semper haberet, quod restitueret, & quod retineret.

Ad 6. Carolus III Lotharingæ Dux, nec satis providus, nec satis constans, dum modo Hispanis, modo Gallis adhæsit, apud utrosque impegit: minime autem Domui suæ consuluit. Contra ea autem, quæ hic de Lotharingia erant inserta, publice est protestatus.

Ad 7. Ægre adducebatur Rex Galliæ, ut Condæum reciperet, a quo tot clades acceperat; sed Hispania nec volebat, nec honeste poterat pacem facere, eo non plene restituto: reconciliatio autem tanti, tantorumque spirituum Principis, qui inter arma ferociæ militari atque victoriis insueverat, est memorabilis. Aquis Sextiis adductus ad Regem, atque in genua provolutus, demisso corporis situ, gestu, & oratione humillime veniam est precatus, omnem fidem in futurum pollicitus. Rex prostratum elevans gratiæ securum esse jussit. Redditaque est ei Burgundiæ Præfectura cum omnibus ditionibus & bonis.

Ad 8. Cum anno 1637 obiisset Victor Amadæus I, reliquit duos pupillos sub tutela matris Christinæ, quæ erat Ludovici XIII soror. At vero tutelam sibi vendicabant armis Mauritius & Thomas, pupillorum patruus. Favet illis Hispanus, Gallus vero sorori & nepotibus: unde Sabaudia involuta est bello Hispano-Gallico.

Alphonfus quoque Mutinensis sequebatur causam Galliæ, imo in Italia bello præfuit, suorum & Gallorum adversus Hispanos Ductor.

Ad 9. Inter Catholicos & Protestantæ Helvetiæ Cantones grave bellum eruperat, cæsiq; prælio Villmergenfi anno 1656 a Catholicis quinque Cantonibus sunt Protestantes. Pax tum quidem coaluit: sed plena hujus, invictæ antehac, gentis concordia non rediit, nec redibit facile, donec avita fides reducta animos & vires vinculo antiquo colliget. Hinc illa Regum sollicitudo.

Ad 10. Post pacem *Cameracensem*, inter Philippum II & Henricum II anno 1559 conclusam, centum anni lapsi fuerant usque ad hanc *Pyrenæam*, anno 1659 initam. Interea vero anno 1598 inter Henricum IV & Philippum II ultimo vitæ anno sancita fue-

rat

rat pax *Vervina*, Vernini nempe, ignobili antea Picardiz oppido; quæ pax hic confirmatur; & cum in Vervina Cameracensis fuerit confirmata, etiam ista hic censetur confirmata.

Ad 11. Ex hoc patet, Regem Christianissimum & Catholicum pro tota quodammodo Europa pacem fecisse: & utinam ea fuisset perpetua, atque bellum in Thraciam concordibus animis & viribus conversum. Sed Christiani nominis probro, quod canit ille, bella geri placuit, nullos habitura triumphos.


Harosius legatus, postquam in Hispaniam redierat, magna ubique gratulatione Regisque adeo lætitia fuit exceptus, non, quod pinguem admodum pacem retulisset, cum tot urbes citionesque amittendæ fuerint, sed quod Hispania, exhausto prope, tam diuturno, tamque gravi bello, ærario ac milite, potentissimum hostem a cervicibus removisset, ac proin, quod contra Lusitanos Anglosque supererat belli, tanto expeditius geri posset.

Missus illico a Rege Romam ad Alexandrum VII summum Pontificem legatus Poncius, quem 150 currus extra urbem exceptum deduxerunt; exultavit gaudio sanctus Pater totaque Roma, quod duos inter potentissimos Ecclesiæ filios exoptata tamdiu amicitia sit restaurata.

Obitus Philippi IV.

Obiit Philippus IV pientissime anno 1665, regni 44, ætatis 60. Ex prima conjugē Isabella, Ludovici XIII sorore, genuit Balthasarem, (qui anno 1646 obiit, ætatis 17, Mariæ Annæ Ferdinandi III Cæsaris filiæ desponsus) item Mariam Theresiam, Ludovico XIV, quod diximus, nuptam: ex secunda vero conjugē Maria Anna, Ferdinandi III Cæsaris filia, Margaretham Theresiam, Leopoldo Imperatori junctam, & Carolum II, quem successorem habuit. Natus quoque illi est Joannes ab Austria ex impari thoro, qui Belgii postea Præfecturam gessit.





ARTICULUS III.

Status Hispaniæ sub Carolo II.

§. I.

Bellum Belgicum ob Jus Revolutionis. Pax Lusit. & Aquis- 14.
gran. Nitardi fata, & Joan. Aust. Seditio Messinensis.
Bellum Holland. Reunionum, Catalaunicum. Tristis
Hispaniæ facies.

Quatuor necdum annos impleverat Carolus, cum sub tutela ma-
 tris Mariæ Annæ, prout testamento pater Philippus caverat, Infirmitas.
 Regno potitus est, tam imbecilli atque infirma valetudine,
 ut decimo ætatis anno vixdum pedes posset incedere: tenuitque,
 quoad vixit, virium debilitas, quæ spem longioris vitæ atque fœ-
 cunditatis pene adimeret; timore perculsa Hispania, & expecta-
 tione suspensa, quo tandem vacillans Monarchia, tam debili ful-
 cro nixa, inclinaret.

Nec ab hostibus externis tam teneræ & innocuæ ætati par-
 citum. Fervebat adhuc bellum Lusitanicum, in quod tredecim Hostes ex-
 quot annis milliones ab exhausto tot bellis ærario erat expend- terni.
 dum. Sed major vis hostilis, unde minime timebatur, incubuit.
 Tot cognati sanguinis, tamque arctis affinitatis vinculis adstricta
 erat Francia, ut, siquis impetus ex adverso incurreret, in defen-
 sionem infantis pupilli accursura crederetur.

Sed aliud suavit ratio status. Jam altero post mortem Regis Bellum.
 Philippi anno (1667) grave bellum subito illatum Belgio, nec o-
 pinanti, nec parato. Interceptæ complures urbes, subactò Bur-
 gundiæ comitatu. Causam ac titulum bello dedit, quod pacem
 in ævum firmaturum eredebatur, connubium Ludovici XIV cum Ex jure de-
 Mariæ Theresiæ, ex priori Philippi IV conjugæ nata. volutionis.

Id quippe juris aut consuetudinis habent aliquot Belgii provin-
 ciæ, ut primi matrimonii liberi iis, qui ex secundo nascuntur,
 hæreditatem præripiant (quod jus *Devolutionis* Belgæ appellant.)

Pars IX.

P

Hoc

Hoc jus privatorum ad Regum quoque patrimonia extendebant Galli, Mariam Theresiam Carolo fratri, ex secundis nuptiis genito, potiozem afferentes: renuntiationem vero, qua se abdicavit, Gentium ac naturæ juribus repugnantem, inanem fuisse & vacuum: id quod Juris communis Cæsarei legibus confirmabant.

Pax Lusitana.

Gravi igitur hoc bello appetita Hispania, pacem cum Lusitania inire, eamque liberum Regnum, prout ante conjunctionem cum Hispania fuerat, recognoscere coacta est, restitutis utrinque omnibus, quæ possederant, antequam coalescerent, Septa duntaxat (*Ceuta*) in Africa Hispanis relicta.

Aquisgranensis.

Cum triplex dein fœdus, Anglos inter, Suecos, & Batavos, in defensionem Belgii cuderetur, inita fuit cum Gallis *Pax Aquisgranensis*: qua illis relicte sunt urbes, quas in Belgio occupaverant, Burgundia vero Hispanis restituta. (anno 1668.)

Eodem anno Emmanuel *Mendoza* Sardiniae Prorex, dum orta seditione Calaritanam urbem obambulat, plumbea glande percussus interiit. Evocata Neapoli classis sedato tumultu, defectionem compressit; sumpta de auctoribus pœna.

Nitardus.

Tumultuatum in ipsa quoque Hispania, & quidem a Regni Proceribus aliquot, Joanne Austriaco maxime. Causam suggessit ambitio & invidia; dum Regina, pro filio Regni Moderatrix, usæ est consiliis & opera Everardi *Nitardi*, e Societate Jesu sacerdotis, quem a sacris confessionibus habebat, atque ad summi Inquisitoris dignitatem primum, inde vero ad præcipuam Regni administrationem admovit.

Joan. Austr.

Neque propterea obscurum jam murmur serpsit, sed ad seditionem & tumultum res spectabat. Regina non statim cedendum rata, *Joannem Austriacum*, factionis caput, ut amoveret, auro & milite instructum, ad Belgii Gubernationem denuo misit. At ille accepta pecunia, provinciam recusavit, atque in exilium suum reversus est. Cum autem non desineret discordiæ semina jacere, in carcerem conjici jussus est. Verum is fuga in Arragoniam evasit, conductisque trecentis equitibus Madritum redit, atque Nitardum ejici armatus postulat.

Contin. Brietii.

Regina, eo tumultum provectum cernens, ut timendum esset Galliæ exemplum; cujus Principes, Richellii, ac Mazarini potentiam non ferentes, civile bellum movebant, in Nitardi exauctorationem tandem consensit, non ante tamen, quam ad Romanam purpuram destinatum videret, a se dimisit, Archiepiscopi Edesse- ni, & Hispani Oratoris postea dignitate auctum.

Sub-

Sublato prætextu necdum quies; dum Austriacus ponere arma detrectaret, ni collata sibi Arragonii Regni Præfectura, omnia in singulis provinciis, quæ ad coronam illam olim spectabant, Vicaria Regis autoritate pleno jure ad ministranda committerentur. Quæ postulata, quantumvis gravia & iniqua, ad fatiscientis alioquin Monarchiæ ruinam avertendam, concedi oportuit. (anno 1669.)

Præter Æthnæ & Vesuvii insolitos ructus, illataque utrique Siciliæ gravia damna, orta est eodem anno vehemens pariter ^{Seditio Messinensis.} seditio civitatis Messinensis, longiori jam tempore præparata. Senatus Urbanus detrectabat obsequium, totaque civitas, conspiratione inita, privilegiorum obventu, in plenam se libertatem asserere moliebatur, juramento se obstringente populo, nulli decreto se pariturum, nisi a civitate prius esset approbatum: eoque perduellionis eventum, ut Regios Ministros, perviciæ obistere ausos, velut ostracismo prociberent, aut carceribus manciparent.

Sequenti dein anno (1670) recrudit tumultus ob annonæ caritatem. Plures Senatorum & Nobilium domus & palatia a furente multitudine in cineres redactæ, quod crederent, avaro questu rem frumentariam alio diverti. Usus est ea occasione in rem suam Regius armorum Præfectus, atque plebem (quæ nuper cum senatu Urbano in seditionem conspiraverat) adversus Nobiles & Senatores fovit, pluresque eorum proscripsit. Finem tandem discordiis imposuit Principis Lignii, Siciliæ Proregis, Panormo Messinam adventus, qui larga frumenti copia advecta, exauthorato Præfecto, revocatisque, quos exulare jusserat, Nobilibus urbem ad obsequium reduxit. (1670)

Pax Aquisgranensis brevem ætatem tulit; namque Rex Galliæ anno 1672 fulminis instar Fœderatas Belgii provincias victoriis est emensus.

Hispani, pace licet indigerent, otiosi tamen spectare non ^{Bellum Hollandicum.} poterant vicina Batavorum incendia, suis etiam tectis metuentes.

Et quidem in Catalaunia, quo bellum pariter pervaserat, satis feliciter pugnabant Hispani, bis victi Schombergio. Et profligari omnino poterant Galli, nisi Messinensis defectio militem in Siciliam abstraxisset.

Urbs illa superioribus jam, quod diximus, annis in varias seditiones eruperat; tandem vero anno 1674 jugo Hispano omnino excusso, Franciæ Regi se subjecit. Misso is cum classe & com-

meatu Vivonio duce, Messinenses suam in tutelam recepit. Sed cum cibaria carius venirent, & Galli cum mulieribus familiariter versarentur, variis insidiis appetiti, urbem denique reliquerunt, traductis Massiliam 400 familiis, quæ veniam ab Hispanis se obtenturas desperaverant. Sed Rex Galliæ pace composita omnes in exilium misit, tota Gallia ejectas, ea vel causa vel prætextu, quod portum Massiliensem prodere molitæ essent.

In Belgio arctiores in annos singulos res Hispanorum fiebant, prædominante Gallica potentia, Burgundia, Limburgo, Cameraco, Valencenis, Gandavo, Ipris, Lovania, aliisque urbibus potita.

Et sane dignus miseratione tunc erat status Hispaniæ, jam non amplius, uti olim, potentis, opulentæ, formidandæ, & velut orbis utriusque dominæ, sed infirmæ, accisæ, & cum morbis suis luctantis.

Rex puer erat semivivus, aut potius simulacrum Regis; Aula factionibus mixta; Regina mater Regis & tutrix clavo dejecta, Toletum secessit: Joannes Austriacus gubernaculo fluctuantis hiantisque naviculæ admotus: Regis patrimonium bellis exhaustum, & creditoribus magnam partem oppignoratam. Quæ restabant vectigalia, quinquennio etiam anticipare necessum erat: Neapolis redditus, Messinæ rebellio absumebat: Mediolanum, duos olim miliones ducibus pendere solitum, totidem nunc ex Hispania repetebat, ad paucula præsidia, Togatorum & Sagatorum greges alendos. Ruscinonense & Catalaunicum bellum ex propinquo incumbebat gravius: neque ex Hispania, tot regna complectente, tantum virium colligi poterat, ut duodecim Gallorum millia Puerda abigerentur.

Wagn.

Status
Hisp.

Porro Belgium, tot hostibus expositum, nervos ipsos Monarchiæ incidebat: nec semel in senatu actum de eo deferendo, aut cum Ruscinone commutando. Visum tamen, Europæ & ipsius etiam Hispaniæ bono, immensis licet sumptibus, conservandum; prorupto etenim hoc aggere exundaturam Galliam in omnium perniciem.

Insanabilem autem tunc Hispaniæ morbum fecit, quod corpus, grande adhuc, spiritu languido animabatur. Inde tam inconstans regimen, perniciofa aulæ bella, Procerum collisiones, privatæque magis rei quam publicæ studium.

His

His causis Hispani, quantumvis duram, necessariam tamen pacem ducebant, palam contestati, a Batavorum rationibus, qui mercaturæ desiderio in pacem ultro rapiebantur, suas se non divisuros.

Cumque Hollandi pacem jam præcipitassent, secuti sunt Hispani: amissa Burgundia, Cameracum, Valencenæ, Ipræ, Tornacum, Aria, Audomarum.

Pace Neomagensi composita, Carolus II Rex duxit in conjugem Mariam Aloysiam, Philippi Ducis Aurelianensis filiam.

Sed neque hoc vinculum colligatam diu tenuit amicitiam; siquidem Ludovicus Rex, proculo Reunionum systemate, alios inter, Carolum Hispaniæ Regem citavit, ut ratione Chinienfis comitatus homagium præstet; secus fore, ut a Camera Metensi privatus illo pronuntietur. Cumque citatio negligeretur, Chiniacum a Bissio est interceptum. (1681.)

Bellum Reunionum.

Actum tum quidem Cortracensi in congressu de prætensis Ludovici iuribus, sed cum conveniri non posset, per Humerium Cortracum & Düxmudam Gallus occupavit, (1683) sequenti vero anno Luxemburgum. Gerunda autem in Hispania, depulsis Gallis, obsidione est liberata.

Successere induciæ, quæ *Vicennales* esse debuerant; sed tantum erant quinquennes; nam anno 1689 Rex Ludovicus bellum Hispanis per feciale indixit, quod polliceri nollent, se nulli fore Cæsari auxilio. Infremuit Mars illico in Belgio, Insubria, Catalaunia: & in hac quidem Camredonum a Gallis expugnatum, sed a Villermosio mox receptum. Compressa quoque Catalaunorum seditio. Barcino, quod non modo sceleris immunis, sed Regiis Ministris esset auxilio, privilegiis aucta. (1690)

Briet. cont.

Anno proximo Urgella periit, cum Barcinone & Alonaglobis ignivomis vehementer conquassatis. Cumque tot ruinæ iis vicio ferrentur, qui ad clayum rerum sedebant, suadente Lobkovitio, Cæsaris ad Carolum Oratore, Dux *Oropesa*, præcipuus Regni Administer, ex aula dimissus est.

Oropesa.

Nec tamen meliori cursu ferebantur res Hispaniæ, sed armis Gallicis prævalentibus, foederati anno 1697 ad pacem compulsi sunt. Restituta Hispanis Barcino cum reliqua Catalaunia, & Belgii urbibus.

Cæterum mortua anno 1689 in flore ætatis Maria Aloysia Aurelianensi, Carolus II 1690 sibi despondit Mariam Annam, Philip-

pi Wilhelmi Palatini Electoris filiam. Quod matrimonium, nisi fuisset sterile, gravissimis bellis & orbis revolutioni prævertisset.

§. 2.

Consilia de successore. Princeps Bavarix destinatur hæres: sed moritur. Frigus inter Austr. & Hisp. partitionis tractatus. Cæsaris mens. Altera partitio.

15. Sed cum infirmitas Caroli Regis in dies magis ingravesceret, expectatione suspensus erat orbis, quem tandem Hispania hæredem esset acceptura.

Susceperat Maximilianus Emmanuel Elector Bavarix anno 1692 filium Josephum Ferdinandum ex Maria Antonia, filia Leopoldi Cæsaris, & Margarethæ, Caroli II sororis. Hunc hæredem futurum passim ominabantur. Et inclinabant eo Angliæ, Bataviæ, & ipsius etiam Hispaniæ studia: neque alienam se ostendit Francia, modo ne succedat Austria; adversus cujus potentiam rationes regni sui omni ope obfirmandas putabat.

Portocarre-
ro.

Wagn.

Carolus Rex summam rerum primum matri, dein uxori permiserat. Erant illæ nominis Austriaci studiosissimæ, verum ex Senatu Regio, quem *status consilium* appellant, plerique Proceres Bavaro Principi favebant, Ferdinandus *Portocarrerus* maxime, Cardinalis atque Toletanus Archiepiscopus, Senatus princeps, magnæ vir autoritatis, perpetuis a Regina similitudinibus dissidens. Ejus cliens Aquilarius Arragoniæ Præfes auditus proterve dicere, neminem probum Hispanum, salva religione, hæreditatem Archiduci adjudicare posse.

Frigus inter
Hisp. &
Austr.

Et invaluerat a longiori jam tempore frigus aliquod Austriam inter Germanam & Hispanam, quæ rationes suas antea ex integro conjunctas habuerant. Primæ offensionis ansa data, cum Ferdinandus III Monasteriensem cum Gallo pacem, necessitate compulsus, iniit, destituta Hispania, cum Gallis diu adhuc colluctante. Reddidit offensæ vices Philippus IV, dum Theresiam, primo loco natam, Ludovico XIV despondit. Nec omisit Gallia, aulam inter utramque similitudinis & dissensionis semina jacere, ut fructus suos inde metat.

Consilia de
succ. flore.

Mansfeldius equidem Cæsareus orator morum venustate & nativa quadam facundiæ elegantia eam in aula gratiam collegerat,

ut frigescientia studia aliquantum calefaceret. Sed hæc ipsa res Procerum æmulationem ita accendit, ut Cæsar eum Viennam revocandum existimarit. Substitutus Lobkovitius, veterana vir prudentia, sed acriore ingenio, quam ut aulæ delicatæ, & in alias partes nimium averse, placeret.

Harrachio igitur ardua legationis provincia commissa, qui pro sua prudentia & agendi usu in id incumberet, ut Carolus Archidux scriberetur hæres, de eo in Hispaniam trajiciendo Rex decerneret, atque ut militaris res & ærarium, penitus ferme collapsa, restituerentur. Deliberaturum se Rex respondit. nec ante deliberandi, quam vivendi finem fecit, Proceribus nimium quantum obnoxius.

Conatu igitur illo de trajectu Archiducis aulicis Procerum artibus everso, Mediolani interim Præfecturam Cæsar eidem petit, iisdem conditionibus, quibus Alberto & Isabellæ Belgium olim commissum fuerat, proprietatis jure possidendam, donec mutatis rebus in Hispaniam solvat. Responsum a Senatu: Belgium quidem, cum spes adhuc esset, reducendi ad obsequium Batavos, in gratiam Alberti fuisse abdicatum; quod tamen nuper Bavaro, perpetuam gubernationem petenti, sit negatum. Aliam etiam esse Mediolani rationem. Hoc uno commeatu Hispanas inter se provincias jungi.

Venit interea Madritum Harcurius, orator Franciæ, qui spes Austriæ, alioquin vehementer jactatas, pene evertit. Denunciat præcise status consilio, seu Archidux seu copiæ Cæsareæ Hispaniæ fines attingerent, belli declarationem videri, quo ariete ad expugnandam gentem, belli apparatu vacuam, nihil validius. Auditus etiam interrogare; quid tandem monstri foret, si e Francia Regem peteret Hispania, qualem e Germania duobus ante sæculis petierat? Pro Francia jus militare, quique jus exequantur, centum præ foribus armatorum millia præsto fore. *Wagn.*

Harrachius, cum negotium totimplexum difficultatibus, & Reginam Harcurii artibus a se averfam cerneret, Cæsaris venia Madrito discessit, vaticinatus id, quod postea evenit; dormituram tandiu Hispaniam, donec se Gallicam videat.

In Anglo-Batavos Europæ oculi erant defixi; nec dubitatum, minime commissuros, ut Francia, tam formidandæ jam potentiæ, tantis incrementis augeatur.

At contra expectationem alia erat gentis utriusque facies. Batavi, mercaturæ suæ incubantes, tetraque belli imagine percussi,

culsi, nec foedere, nec beneficiorum recordatione, nec propriis periculis tangebantur, nec pensi habebant, Austriam dejici; quin Bavarum Regem, minus potentem, rationibus suis opportunior rem ducebant: a Galliæ incurfu interjectu Belgii Hispanici satis se tutos rati.

Guilielmus vero, Rex Angliæ, commutatus est adeo, ut, postquam diutina spe amicum Cæsarem suspenderat, Bavaricas primum, Gallicas postremo partes sit amplexus. Unde factum, ut secretum foederis articulum, de evincenda Cæsaris in Hispania successione, instaurare detrectaret, pace Risvicensi præcipitata, & legionibus mox missione donatis.

Accessit Tallardi in Angliam legatio, viri ad miraculum facundi, qui aulicis artibus totum se in animum Regis infudit. Londini nullus erat Orator Hispanus, nec Madriti Anglus, utroque ob offensionem revocato. Aurspergius vero penitus ferme negligebatur.

Partitionis
consilia.

Anno 1699 Rege Guilielmo in Hollandiam digresso, in ejus arce Loënsi a Gallis, Anglis, & Batavis concepta est tripartita Hispanæ Monarchiæ divisio, Delphino assignata Neapolis, Sicilia, Sardinia, Hetrusci portus, Finarium, cum Cantabria seu Biscaya: Archiduci Mediolanum, Bavaro Principi Hispania, cum reliquis provinciis, Regni administratione interim, dum adulesceret, Electori attributa.

Summo silentio partitionis hujusce tractatus tegebatur initio. At ubi Madritensi aulæ innotuit, graves in Hispanorum animis, qui omnem divisionem horrebant, motus excitavit: moxque urgentibus Proceribus, Portocarrero maxime, qui Regem possidebat, & Oropesa, ab exilio revocato. Rex testamento Josephum Baviaræ Principem totius Monarchiæ hæredem scripsit, reclamante non solummodo Juniore Harrachio, qui patri in Legatione Hispanica successerat, sed etiam Harcurio, bellum comminante, si omnia Bavaro, nihil Franciæ tribueretur. Re ipsa ridebat Gallia, quod hac ratione Cæsarem ab hæreditate exclusum cerneret, & Europæ vires adversum se ipsas committendas speraret.

Mors Bavar-
iæ Princ.

Omnia nihilominus ad trajiciendum in Hispaniam Principem Bavarum jam parabantur, personante gratulationibus aula Bruxellensi, cum tristi morte extinguitur; (1699) septennium necdum egressus. Translatio Principis Bruxellas in tam tenera ætate valetudinem vitamque præcipitasse creditum.

Inopi-

Inopinatum hoc fatum vario per Europam affectu exceptum. Anglo-Batavi cum Hispanis telam suam intercisam dolebant. Summa autem luctus pars ad Electorem Parentem spectabat, qui & filio suavissimo se privatum, & Domum suam tantis accessionibus dejectam videbat.

Austria magno discrimine se defunctam credidit, nec dubitavit, omnium, præter Galliam, nationum oculos in Archiducem convertendos. Verum Guilielmus Angliæ Rex palam denunciavit Cæsari, Anglos Batavosque Hispaniæ ergo nolle bellum gerere, Franciam contra jus suum haud dubie armis prosecuturam: ac proin fore, ut Galli Hispaniam, cui Cæsar nec classe nec milite possit succurrere, unius æstatis expeditione subigant. Id ne fiat, parendum necessitati, & hæreditatem amice dividendam.

Wagn.

Graviter omnino Cæsar eam denuntiationem accepit, necdum Cæsaris con-
eo desperationis deventum asserens, ut Galliæ armis consentien-
tis Europæ viribus obsisti non possit: sibi quidem constitutum, con-
fecta nunc pace Turcica, legiones veteranas omnes in Italiam &
ad Rhenum deducere; Imperii Flectores plerosque & circulos in
fœdus secum ituros. Idem facturos alios Principes & Respublicas,
si securitati suæ & Europæ æquilibrium consultum velint; neminem
quippe latere, omne incrementum Galliæ cum omnium periculo
esse conjunctum. Invisum præterea tantopere Hispanis divisionis
nomen, ut totam potius Monarchiam in sinum Galliæ sint conje-
cturi. Id si contingeret, quid deinceps ad universalem dominatum
defuturum?

At incautam hæc omnia. Famosi illi duumviri, Portlandus,
Guilielmi Regis Minister primus, & Heinsius, *Pensionarius*, uti
appellant, Hollandiæ, seu primus Minister provinciæ, & Procura-
tor publicæ rei, ut bellum in præsens devitent, aliam longe ro-
tam versabant. Denuntiant palam Cæsari, Franciæ Regem Navar-
ram, Cantabriam, Neapolin, Siciliam, Sardiniam, Mediolanum,
Belgium, Finariensem. & Hetrusco portus depolcere: Hispaniæ
Regnum cum America Carolo Archiduci cesserum: curaturos ta-
men, ut de Belgio, Mediolano, & Navarra alia ineatur conven-
tio. Duram quidem hanc esse partitionem, sed in præsens ne-
cessariam. Plus bello pretioso amissuram Austriam, quam
amicis pactionibus. Esse Ludovico classem prævalidam, exercitus
florentissimos, præstantes Duces, summam belli velut e Sphæræ
centro opportunitatem. Lassatos bello, nuper primum finito, Eu-
ropæ Principes, e quo superior omnibus Ludovicus excesserit.

*Altera par-
titio.*

Pars IX.

Q

Quid

quid ergo Cæsar seorsim speraret, sine classe, sine sociis navalibus, bello tam diffuso per orbem terrarum, ut ab uno extremo ad alterum trajiciendæ forent legiones?

§. 3.

Cæsar Italiam & Belgium respicit. Cur Hispania debilis. Galliæ propositio: tertia partitio. Cæsaris indignatio. Hispaniæ consternatio.

16.

Wagn.

Tristis erat oratio, & deliberatio implexa, de re post homines natos maxima. Frustra opponebantur Domus Austriacæ jura, post obitum Principis Bavari, ut ferebant, non controversa. Frustra jurata fœdera, cum Anglo-Batavis inita, frustra ingestus Articululus secretus de conservanda Austriacis Monarchia Hispanica.

Igitur Cæsar, a sociis vix non in Gallica castra transgressis, desertus, statuit, Italia & propioribus Germaniæ provinciis retentis, Hispaniam cum Balearibus Insulis & America minimo Delphini filio, Duci Bituricensi, cedere.

Visum nempe consultius, veteres Austriæ ditiones, quoad fieri posset, cum novis Hispanicis ad mutui auxilii opportunitatem connectere, quam Archiducem in remotas Hispaniæ, miserrime afflictæ, bellis undique obnoxia, atque a Germanæ Austriæ auxiliis penitus abscissæ, oras transmittere.

Hispaniæ
status.

Neque opulentam admodum esse, nec populis frequentem Hispaniam. Americam equidem auri domicilium vulgo existimari. Sed a Philippi II obitu graviolem ferme, quam utiliolem Regibus fuisse, magna hominum multitudine, militum, nautarum, præfectorum, classium, immani sumptu, e vacua alioquin Hispania eo traducta. Emolumentum præcipuum negotiatione, merciumque permutatione constare. Hos autem fructus, jacente in Hispania pannificio & mechanicis artibus, omnes propemodum negotiosis Europæ nationibus obvenire: ut adeo auri argentique Peruviani pars maxima ad Anglos, Batavos, aliasque quæstuosas gentes deferatur.

Ex tot millionibus, annuatim in Europam advehi solitis, non ultra sexcenta Imperialium millia Regio ærario inferri: duos præterea, quos ex hydrargiro Prorex industrius conficere possit, miliones, ex elocato vero gemmarum piscatu quadringenta imperia-

lium

lium millia, universas esse, quæ Regi obveniant, Americæ opes. De cætero id unum Regi relinqui, quod ejus auspiciis merces importentur alienæ, domesticæ pecuniæ evehantur: eam vero prærogativam millionibus aliquot in classem constare.

Postremis bellis haud arduum fuisse Batavis, Anglis, & Francis inermium provinciarum portus præsidis occupare, sed quæstuosius duxisse, mercatura sua medullam succumque exfugere, quam Hispanis vacuos ferme titulos eripere.

Contra vero utiliore multo Austriæ fore Italiam, idque non Austriæ de- modo propter telluris felicitatem & opulentiam, sed etiam pro- liberatio. pter situm atque viciniam: neque committendum, ut ea unquam, præsertim Infubria, potiatur Gallia: sic enim omnes Austriacas provincias irruptioni fore expositas.

Belgium, bellis perpetuis obnoxium, ab Archiducibus Lotharingo conferri posse, beneficiario jure possidendum. Batavorum dein fore, ut provideant, ne nimis vicini Gallum nanciscantur. Tentandum denique, ut Burgundiæ comitatus ad Imperium pactio- ne reduci possit.

Et hæc quidem erat Cæsarei senatus designatio. Per gradus autem ascendendum, & primum Peruvia vel Mexicum offerendum: secundo loco Philippinas adjiciendas: si necdum acquiescant Galli, Americam potius totam, quam Italiam cedendam. Neque timendum, duorum capitum unum fore ex Hispania & Gallia conflatum Regnum; nam reges non tam sanguine & affinitatibus quam rationibus, status, regnique, respectus suos metiri.

Hanc ubi propositionem Heinſius accepit, concitato animo opposuit, quanta inde damna Batavorum Respublica esset passura: quamque pronum inde esset Galliæ, omnes nationes Americanis commerciis evertere. Nec minus Portlandus exarsit ad eam de America cedenda mentionem.

Post aliquot dies Rex Guilielmus Aurspergio per Heinſium Gallia præ- renuntiat, Ludovicum Regem eo denique descendisse, ut præter positio. Hispaniam & Americam, ante oblatam, Navarram quoque & Belgium Archiduci, Mediolanum vero Lotharingo attribueret, si is Lotharingiam Franciæ cederet. Hos esse ultimos gradus, ultra quos Gallus nec passum progredi, nisi bello victus, certum habeat. Eam esse Regis moderationem, ut ex tanto patrimonio nihil sibi præter Neapolin, Siciliam & Hetruscos portus deponat; cum, si vellet, armis omnia posset subigere.

Duo insuper Cæsari indigniora visa sunt, quam ut ferri possint : primum, quod Ludovici optioni sit permittum, an portionem suam regno unire velit, an in nepotem transferre ; at Archiducis partem Germanicis Austriæ provinciis uniri veruissent : alterum, quod sancirent, ni Cæsar certum intra tempus partitionis modulum acciperet, destinatam Archiduci portionem tertio cuiuspiam tribuendam, se vero (Anglo-Batavos nempe) Gallis ad suam obtinendam arma juncturos.

Cæsar, quamvis graviter ferens, se a sociis, quos ab interitu anno 1672 vindicaverat, non modo destitutum, sed comminationibus etiam laceffitum, dolorem nihilominus premens, Siciliam & Neapolim obtulit.

Tertia partitio.

Sed necdum acquiescentes Europæ divisores, 3 Maji 1700 Semestri ante mortem Caroli II partitionis modum absolverunt : præfati, ne post mortem Hispani, atroci bello Europa concutiat, Guilielmum Angliæ Regem ac foederatos Belgii Ordines cum Rege Christianissimo ita convenisse, ut Delphinus ejusque posterum Neapolim, Siciliam, cum aditis Insulis, Hetruriæ portus, Herculeum, S. Stephani, Orbitellum, Plumbinum, Portumlongum, Telamonium, Marchionatum Portumque Finariensem, ex Hispaniæ vero Regno, ac Cantabriæ provincia, Fontarabiam, & S. Sebastiani Fanum obtineret : Lotharingiæ Dux Mediolanum possideat, Delphino vero Lotharingiæ ac Barri Ducatus obtingat, dempto Bituracensi comitatu, qui Vaudemontio cedat. Delphinus cæteræ hæreditati renuntiet, eamque Archiduci relinquat. Hos tractatus ni Cæsar ratos habeat, Archiducis portio in tertium quempiam transferatur. Si Cæsar aliquam ex provinciis invadat, Angli Hollandique junctis cum Francia armis vim repellant. Archiduci non liceat, vivo Rege Carolo vel Mediolanum vel in Hispaniam abire. Nulla unquam ætate idem sit Imperator & Rex Hispaniæ : Delphini vicissim portio nunquam cum Galliæ regno coalescat. Harum pactioum vindices omnes Europæ Principes vocentur.

Wagn.

Fulminis instar Cæsareos perculit hæc partitio, indignissimum ratos, de fundo alieno decretoria sententia statui, illud vero multo indignissimum, Guilielmum cum suis Anglis & Hollandis, tot officiis ac beneficiis cultis, adeo sui fuisse immemorem, ut Galliam, omnibus alioquin formidandam, tantis accessionibus auxerit, atque arma etiam minaretur Cæsari, socio, amico, foederibus juncto, cui, ut coronam Angliæ consequeretur, non parum debuit. At constitutum erat Cæsari, quocunque demum res vergeret, in pacta

pacta, suæ Domui adeo pernitiola, nunquam consentire, & potius totam Hispaniæ Monarchiam, quam Mediolanum & Insubriam amittere.

Expectatione suspensus hærebat orbis, quem demum hæc res eventum sortiretur. Verum altiori ex specula prospiciebat Gallus. Non ille partitione ista sua finiebat consilia. Ad totam Monarchiam respexit, satis gnarus, Hispanos, ab omni divisione velut monstro abhorrere, ac proin, ut eam evitent, Regium ex Gallia Principem petituos.

Ita enim vero re ipsa evenit. Æstuantis maris fluctibus agitata naviculæ Hispania faciem induit. Regina Archiduci Carolo, suo ex sorore nepoti, quantum poterat, favebat: sed poterat parum, Rege in omnem partem versatili, prout Ministrorum turbo impulerat. Ipsos inter Ministros fatales regno factiones. Qui Reginæ addicti magis videbantur, Almirantes, Oropesa, Perlipsia, variis artibus aula puli: conjecta in eos culpa seditionis ob annonæ caritatem.

Hispania ipsa misere erat comparata. Spectabantur Pyrenæis ex montibus magni Gallorum exercitus, neque tamen regno toro locus ullus munitus: universus tantæ Monarchiæ exercitus sex milibus hominum constabat, seminudis, famelicis, inermibus: bellica nulla rite armata: plebis egestas ultima, ærarium largitionibus in Proceres exhaustum, miserabilis undique rerum facies, in desperationem trahebant omnia.

Ubi vero partitio illa Hispaniæ innotuit, tanto omnes motu sunt concitati, ut dicerent, Marochii se potius Regem evocatuos, quam ut eas regni sui sectiones paterentur. Magnates summopere urebat, quæstiosa illa ac grandia Proregum, Gubernatorum, & Præfectorum nomina, quibus ambitionem & avaritiam saginabant, extingui: opulentas illas Siciliæ, Neapolis, Mediolani, Belgii Præturas penitus eripi, aliasque venas, quibus privatum suum ærarium, in publici boni dispendium, impleverant, exsiccare.

*Hispaniæ
contemnat*

Quapropter, pristinæ suæ amplitudinis, ad utrumque orbis cardinem protensæ, cum alto gemitu memores, communi velut in naufragio, ita animo erant comparati, dicebantque palam, evocandum Galliæ Regis nepotem, ut Monarchiam integram servant; facem his in motibus strenue ventilante Harcurio.

Harrachius equidem legatus percussos erigere, atque ab ea cogitatione avertere omni ope satagebat. At illi: Cæsarem ni claussem habeat, Hispaniæ nil profuturum: Germaniam variis respectibus dissectam, septentrionem flammis ardere, Italiam cum Pontifice Gallis favere, Hispaniam ipsam ut fateri necesse sit, infirmiore esse, quam ut armatæ Gallorum potentiæ possit resistere.

§. 4.

Decernitur, advocandum Delphini filium: obluſtante Harrachio. Testamentum Regis Caroli. Obitus. Austria & Gallia jura.

17.

Petitur Delphini filius.

Igitur Senatu frequentissimo, Rege ipso præſente, communibus omnium suffragiis decretum, rogandum Regem Galliæ, alterutrum ex Delphini filiis, Regis Caroli nepotibus, submittat; dandum potius beneficium, quam perniciem a potente accipiendam. Perſtituram hoc pacto Monarchiam, atque reductis membris, quæ per tot infelicia bella fuerant abscissa, ad veterem Majestatem, orbi adoratam, haud dubie reducendam, invictam hoc glutine deinceps, formidandam, florentemque: novum Principem sine mora advocandum, ut recenti adhuc ætate Hispaniæ moribus imbuatur, nec regnum tamen ante Regis mortem contrectet. Rex Carolus tacitus assedit, cum hac ratione de regno suo disponeretur.

Harrachius apud Reginam instat, conjugem Regem permoveat, ut generis sui memor Archiducem heredem scribat. Illa armatos ad fores Gallos in excusationem obtendit: & licet Rex induci ad id se pateretur, testamento nunquam subscripturos Proceres. Ad hos igitur conversus legatus gravi oratione ostendit, falli omnino eos, qui sibi persuadeant, iis de Gallo Principe advocando consiliis Monarchiæ divisionem vitatum iri: nunquam id permissurum Cæsarem; & si is permittat, totam Europam obſtituram, quæ omnis in unam Borboniorum Dômum brevi esset abitura, si Francia univerſa Hispaniæ Monarchia, tam late per utrumque orbem protensa, foret potitura.

Dum ita configitur, Rex Carolus in supremum morbum delabitur. Conclave Regium obseptum adeo custodiant Proceres, sub

sub Portocarreri imperio, ut Harrachius ultimis mensibus nunquam sit nactus Regis alloquendi copiam.

Tertia octobris conficitur testamentum, quo Philippus Dux Andegavensis, alter Delphini filius, eoque sine liberis decedente Carolus Dux Bituricensis, tertius Delphini filius, & si etiam hunc sine liberis mori contingeret, Carolus Archidux universæ Monarchiæ hæres scribitur. Testes subscribere Portocarrerus & Borgias Cardinales, Castiliæ & Arragoniæ Præsides, Medinacælius, Beneventius, & e Grandium Ordine Infantadæ & Sestæ Duces. Testamentum Caroli.

Prima dein Novembris (1700) Carolus II Rex obiit, æta- Obitus.
tis 39 Regni 35. Aperitur testamentum, publicatur, magnoque populi applausu excipitur: persuasum omnibus, declinata hoc pacto corporis sectione, unius capitis mutatione negotium absolvi, Galius sit Rex, an Germanus, haud multum interesse. Bellum quidem in Italia & Belgio futurum a Cæsare, sed Hispania intacta, Gallorum armis brevi difflandum.

Certatum acriter inter Procures, quis legationis Gallicæ honorem alteri præriperet. Missis per Interreges mandatis, provinciales Andegavensi fidem jurarunt. Elector Baviaræ Belgium, Vaudemontius, Mediolanum, Medinacælius Neapolim tradidit; itaque factum, ut mensis spatio universa Monarchia sub potestatem Galliarum sit redacta. Harrachius ob rem feliciter gestam Dux & Par Franciæ dictus. Harrachius, quod unum supererat, contra testamentum Cæsaris nomine solenni forma excipiens, ne legationis dignitas violaretur, domi se continuit, ac brevi post cum Aurspergio, qui in illo æstu subrogatus illi fuerat, rus abiit, dum reditum Viennam instruerent, dolore, pro jacturæ magnitudine, acerbissimo tacti, quod tot provinciæ, per gradus veluti successive Domui Austriacæ acquisitæ, uno velut ictu concidant: legatione sua Hispana & Anglica, tanta solertia gesta, effectu omni destituta. Executio.

Varii dein commentarii de causa tam grandi sunt editi: Galli pro sua successione afferebant: Extincta Caroli V stirpe masculina Hispanicæ Monarchiæ hæreditatem, licet nullum Caroli II testamentum haberetur, ad eum jure sanguinis devolvi, qui eidem Carolo, ultimo possessori, gradu consanguinitatis proximo est conjunctus. Atqui hunc esse Delphinum, ejusdem Caroli ex sorore Theresia Nepotem, ejusque cessione Philipum Andegavensem Ducem, Delphini filium, Caroli II pronepotem. Leopoldum vero Cæsarem, Amitinum Caroli, gradu uno ab hoc esse remotiorem, siquidem (computando gradus ad normam Juris Civilis,

in

Galliæ jus.

in ſucceſſionibus hæreditariis uſitatam) Carolum Delphino in tertio gradu eſſe conjunctum , Leopoldo vero in quarto.

Si etiam lineam aſcendentem ſpectare libeat , Leopoldum Cæſarem & Ludovicum XIV æquali gradu diſtare a Philippo III Hiſpaniæ Rege utriusque Avo materno , ea tamen diſpari ratione , quod Ludovicus ex Anna , primogenita ejusdem Philippi filia ſit genitus , Leopoldus vero ex Maria , ſecundo genita. Quacunque igitur parte res conſideretur , quoad ſucceſſionem ab inteſtato Gallos Auſtriaciſ jure potiores fore.

Neque obſtare , quod Anna & Thereſia , dum Franciæ Regibus nuberent , juri ſuo in Hiſpaniam renuntiarent ; nam , præterquam , quod ſcæminarum renuntiationes hæreditariæ jure civili ſint irritæ , & eatenus tantum factæ , ne Regnum Franciæ & Hiſpaniæ in uno capite coaleſcant , Reginas illas præjudicii nihil potuiſſe atterre filiis ſuis aut nepotibus circa jus , a Majoribus & ſanguinis cum Hiſpaniæ Regibus propinquitate , acquiſitum. Neque enim Ludovicum Regem matri ſuæ Annæ in Regno Hiſpaniæ ſuccedere , nec Delphinum matri ſuæ Thereſiæ , ſed cum ea jamdudum ſint mortuæ , proprio ac proximo ſanguinis jure Philippo III aut Carolo II.

Hoc jus ſuccedendi ab inteſtato ut eo certius ſuum conſequeretur effectum , Carolum II etiam teſtamento , libere & legitime conſecto , atque a Proceribus Hiſpaniæ teſtibus præſentibus ſubſcripto , Philippum , Andium Ducem , ſuum ex ſore primogenita pronepotem , totius Monarchiæ hæredem inſtituiſſe : neque obligatum ullo ex capite fuiſſe , alios cognatos ex linea collateralis inſtituere. Atque hæc quidem a Gallis tunc paſſim dicebantur ac ſcribebantur.

Jus Auſtriacerum.

Contra vero opponebant Auſtriaci , eam eſſe Familiæ Auſtriacæ rationem , ut Auſtriacus Auſtriaco ſuccedat , qui nomen , ſtemma , familiam eandem propaget : neque ad ſcæminas , aut ex iis deſcendentes hæreditatem devolvî , dum ſuperſunt mares.

Extincta Caroli V ſtirpe mascula , ſuper-eſſe e Ferdinando I Caroli Fratre , lineam alteram Auſtriacam , eamque masculam. Si Carolus V abſque liberis masculis deceſſiſſet , ſucceſſurum haud dubie fuiſſe Ferdinandum fratrem , ex eodem Patre , Philippo Auſtriaco , Burgundiæ ac Belgii Principe , & eadem matre Joanna , Hiſpaniæ hærede , progenitum : hoc jus Ferdinandi in poſteros mares præ ſcæminis fuiſſe propagatum : Leopoldo proin Cæſari primum,

mun, dein Josepho, horumque cessione Carolo Archiduci hæreditatem deberi. Deficientibus vero totius Familiæ maribus, ad fœminas demum, & eos, qui ex eis descendunt, jus devolvi. Hanc esse normam, legem, ordinem, rationem domesticam succedendi in Familia Austriaca; Philippi etiam III & IV testamentis confirmatam.

Si proin testamentum aliquod a Carolo, sui compote, libere profectum sit, vacuum irritumque esse: neque enim a Carolo ordinem succedendi, a Majoribus constitutum, contra supremam patris avique voluntatem, potuisse convelli. Neque causam finemque Borbonicæ institutionis, in eo allegatum, ne regna coalescant, subsistere.

Non enim Annam, Ludovici XIV matrem, & Theresiam Conjugem, solennib' s tabulis juri in Hispaniam renuntiassè eo duntaxat sine, quem Carolus in testamento assignat, ne Franciæ Hispaniæque regnum in unum coalescant, verum ut Hispanas inter fœminas Francicasque juris æqualitas foret, atque, ut hæ Salica, ita illæ celeberrima abdicationis lege cum suis posteris abstinerent regno. Si igitur jus succedendi post mortem Caroli ad descendentes ex fœminis Hispanicis fuisset devolutum, eo etiam ex capite Leopoldum Cæsarem hæredem fore, utpote Maria, Philippi III filia, quæ sola nunquam renuntiavit, progenitum. Theresiæ vero solennem renuntiationem etiam per publicas Pacis Pyrenææ tabulas fuisse confirmatam, atque per testamentum Philippi IV ita stabilitam, ut nullum superesse possit dubium.

Quod autem speciatim ad Belgicas Burgundici circuli provincias, & Insubres spectat, eeu feuda Imperii ab Austriacis Archiducibus fuisse possessas: ad feudorum autem rationem pertinere, ut extincta seniore linea mascula, ad juniorem transeat, prout omnium Imperii feudorum exempla demonstrent. Atque idcirco nullatenus fuisse in potestate Caroli II contrariam dispositionem facere.

Eandem Neapolitani Regni esse conditionem, quod a Pontificibus, Dominis directis, ab omni memoria maribus præ fœminis collatum sit. Hæc pro utraque certantium parte dicta scriptaque recensere duntaxat pro Historica eruditione visum est. Neque enim meum est, de Magnorum Principum juribus quidquam decernere.

Wagn.



CAPUT III.

DE STATU LUSITANIÆ

SÆCULO XVII

SUMMARIUM.

Personatus Sebastianus ab Hispanis captus. Postquam Lusitania ab anno 1580 usque 1640 Hispaniæ fuerat conjuncta, Regem sibi proprium assumpsit Ducem Bragantinum Joannem IV, inito foedere cum Gallia & Hollandia. Bellum. Joanni successit Alphonsus filius. Sed hoc dejecto, successus ejus frater Petrus, ad regendum aptior. Pax cum Hispania.

18. **A**nno 1601 plus rumoris, quam veri periculi excitavit personatus quidam & phantasticus Sebastianus, qui Sebastianum Regem Lusitaniæ, in bello, anno 1578 adversus Afros suscepto, amissum se mentiebatur. Fabulam ita adornavit, ut non pauci verum Sebastianum crederent, viris quibusdam Religiosis ore & calamo illum defendentibus.

Personatus
Sebastianus.

Fata is sua & itinera, imo & arcana quædam coram Senatu Veneto ita concinne narrabat, ut de veritate dubitaretur: inventu tamen Oratoris Hispani carceri traditus, ac postea ex terris Reipublicæ proscriptus, Florentiæ ab Hispanis interceptus, indeque Neapolim ductus, per sententiam ad triremes condemnatus est. Creditum quibusdam, fuisse Calabrum, a natione quadam fabornatum.

Hispanis
ejectis.

Historia Lusitana cum Hispana 60 annorum spatio, ab anno videlicet 1580 ad 1640, quibus utrumque regnum fuit conjunctum.

ctum, est connexa. At vero anno 1640 ingens facta est mutatio, dum Lusitania, abdicata Hispania, novum sibi Regem ex Bragantina Regia Familia sibi delegit.

Quidam Proceres Lusitani Olyssipone, occupato Regio palatio, occiderunt *Vasconcellum*, Lusitanum quidem genere, sed quem affectu nimis Hispanum esse crediderant, & cum eo alios quosdam Ministros Regis Catholici, Regemque proclamarunt Bragantinum Ducem, sub nomine *Joannis IV*, simulque adegerunt Pro-reginam Principem Mantuanam, ut subscriberet Decreto, quo arcis Præfectus jubebatur eum tradere. Missi illico cursores in omnes provincias, qui novum Regem promulgarent, cum mandato, ut omnes Hispani comprehenderentur.

Dux Bragantinus Rex.

Nunquam revolutio aliqua fuit tam prompta & expedita. Omnes civitates, non minus novi quam antiqui orbis, sub obedientiam novi Regis concesserunt, sola Septa seu Ceuta excepta, quæ Hispanum habebat Gubernatorem.

Comes Olivarius, veritus, ne Rex Hispaniæ Philippus IV pro magnitudine damni contristaretur, eidem gratulatus dicitur, quod justam causam habeat, omnia bona Domus Bragantiniæ, quæ tertiam ferme Lusitaniæ partem complecterentur, Camerae suæ uniendi. Sed artes hæc fuere Ministri, qui nihil magis metuebat, quam ne sinistri quidpiam ad Regem optimum, sed placidæ & quietæ vitæ acquiescentem, deferretur.

Quidam scribunt, Richelium hujus immensæ machinæ primum fuisse motorem: quod Galli tamen scriptores negant. Hoc certum, Galliam, cum Hispania tunc bello implicitam, illico, foedere cum novo Rege inito, consiliis & armis eidem succurrisse, nihilque magis optasse, quam ut vasta Domus Austriacæ potentia minueretur.

Fœdus cum Gallia.

Fœdere autem illo conventum, ut pars utraque terra marique contra Hispanos bellum gerat: Gallia 20 naves conjungat 20 Lusitanis, bene armatis: Hollandi associantur, qui pariter 20 bellicas addant, ad invadendas naves Hispanas ex India venientes, & terras Regis Castellaniæ Gallus præsit combinatæ classi. Si Gallia pacem cum Hispano sit initura, reservabit sibi jus assistendi Portugalliæ, si idem reliqui foederati sint facturi.

Hollandi, qui adhuc bello cum Hispania erant impliciti, non dubitarunt, huic foederi accedere, ea conditione, ut manerent in possessione eorum, quæ in utraque India occupassent. Occuparunt autem durante bello cum Hispanis loca plurima, quæ ad Lu-

Et Hollandia.

litaniam spectaverant. Et hæc inter alias Lusitanorum erat querela, sibi propter conjunctionem cum Hispania tam multa esse amittenda.

Detecta, interceptis litteris, conspiratio adversus novum Regem, Archiepiscopus Bragenfis, & Inquisitionis Præses ad perpetuos carceres sunt condemnati, reliqui complices ad mortem.

Interea autem Lusitania libertatem suam fortiter defendit, & anno 1644 cum Francia fœdus renovavit, vehementer instans, ne pax cum Hispanis fieret, cui Rex Lusitaniæ non esset inclusus. At Mazzarinus, Richelii insistens principiis, ne omnis paci via occludatur, id promittere noluit, id unum spondens, curaturam Galliam, quantum posset, ut, si paci futuræ Lusitania includi non posset, libertatem sibi reservet eidem assistendi. Cui sponcioni adquiescere tunc debuit Portugallia.

Passorellus
de bello Lusit.

Sub idem tempus Albuquerqueius, Lusitanorum Ductor, Hispanos acie vicit, cæsis eorum 3000. Quidam scriptor Lusitanos cæsos narrat plures.

Anno 1656 obiit Joannes IV primus ex linea Bragantina Rex Lusitaniæ, æt. 52, regni 16. Successit filius *Alphonfus VI*, qui, Hispanorum armis alio distractis, Hollandos Brasilia expulit, belli denuntiationem passus propterea, naviumque direptionem in facie Olyssiponis, civitatis Regiæ.

Bellum.

Anno 1658 Lusitani Pacem Augustam obsederunt, sed imminente Hispano obsidionem solverunt. Anno vero sequente Hispani ab obsidione Elvæ depulsi sunt.

Pax cum
Holl.

Ut autem Hispanis validius resisterent, anno 1661 pacem cum Batavis Hagæ inierunt. Brasilia potissimum fuerat belli causa, in qua, sicut in India Orientali, dum Hispanis adhuc parerent, varia loca Hollandi occupaverant, quæ Lusitani, Regem e Bragantina Familia nacti, repetebant. Cessere Batavi Brasiliam ea lege, ut negotiari & commercari sibi liceat in omnibus, quæ ad Portugalliam spectant, provinciis.

Joanni Regi, quod dixi, successit filius primo loco natus Alphonfus, sub tutela matris de Medina Sidonia. At ille vita degeneri, matre fidelibusque Ministris aula motis, sibi similes assumpsit. Bellum nihilominus cum Hispanis per Villaflorem strenue gestum. Amissa Ebora, receptaque, acie victo Joanne Austriaco (anno 1663) anno vero sequenti Valentiam & Alcantaram expugnaverunt Lusitani. Anno 1665 Victoria plena ad Villamvitiosam firmavit coronam Lusitaniæ. Galli, non obstante pace Pyrenæa,

renæa , non parum ad eam contulerunt , nescii videlicet , quid post 40 annos futurum esset. Mortuo eodem anno Philippo IV Hispaniæ Rege , ex omni parte jam mutilatæ , infirmitas Caroli II Lusitaniæ Regem securum reddidit.

Tantæ victoriæ nequaquam tribuebantur Alphonso Regi , & sui , & regni , & thori impotenti , sed ejus Ducibus , subsidiiis Gallicis adjutis.

Anno 1667 magnam mutationem subiit aula Lusitana. Alphonfus propter regnandi imperitiam throno privatus , in Camera sua comprehensus , & in Insulam Terceram abductus est , regnumque delatum fratri ejus juniore *Petro* , præstanti virtute Principi , qui tamen ad annum usque 1683 , quo Alphonfus obiit , *Regentis* tantummodo titulo regnum administravit. Maria Nemosia , Sabaudicæ stirpis Princeps , in Gallia educata , quo Majores ejus jam tempore Francisci I concesserunt , superiore anno Alphonso desponsata , matrimonio ob impotentiam Alphonfi declarato irritum , nupsit Petro ejus fratri , Pontifice in impedimento publicæ honestatis dispensante.

Alphonfus
dejectus.

Petrus Rex.

Anno 1668 Hispania coacta est cum Lusitania pacem componere , atque coronam Portugalliæ ab Hispana independentem agnoscere ; Pax cum ablatis utrinque restitutis , solaque Septa in Africa , quæ ad Regnum Hispaniæ pertinerat , apud Hispanos remanente.

Anno 1683 obiit Alphonfus , ætatis 40 , postquam throno fuerat dejectus , in Insulam Terceram fuit deportatus , sed anno 1675 , cum suspicio esset orta , eo in loco consilia cudi reducendi illum ad regnum , inde retractus , reliquum ætatis in Cintrensi castrò captivus egit. Tanta autem fuerat ejus , dum regnaret , vitæ dissolutio , ut vix esset , qui fatum ejus lugeret. Petrus autem post mortem fratris , posito Regentis nomine , se Regem dixit , toti Nationi acceptissimus.





CAPUT IV.

DE

STATU BELGII

SÆCULO XVII.

ARTICULUS I.

*Status Belgii sub Alberto & Isabella: atque Mauri-
tio Auriaco.*

*Obsidio ostendana. Spinola fortitudo. Inducia. Mauritiū Arau-
sici obitus: & Alberti Archiducis. Batavorum societas
Indica. Mutuæ clades. Obitus Isabellæ.*

129.

Postquam Albertus, Rudolphi II Cæsaris frater, Isabellam, Philippi II Hispaniarum Regis filiam, connubiali fœdere sibi conjunxerat, Belgium communi opera gubernandum acceperunt. Et primam quidem expeditionem cum ad expugnandam *Ostendam* convertissent, anno 1601 exercitus eidem fuit ad-
motus.

Offendana
obsidio.

Cum Batavis ex parte alluentis Oceani accessus prohiberi non posset, atque recentibus identidem subsidiiis præsidium augeretur, pertinax omnino & sanguinolenta fuit oppugnatio, ad triennium omnino producta. Et primo quidem anno Albertus, assultu tentato, cum strage 800 militum fuit rejectus. Alter annus variis operibus, ad includendam arctius urbem, faciendamque opportunius impressionem fuit consumptus.

Tertius demum annus maxime cruentus, & Batavis tandem fatalis fuit. Et primo quidem gemina irruptio incassum fuit tenta-
cata.

tata. Commissum etiam navale prælium, quo Fridericus Spinola Archithalassus Hispanorum (Ambrosii frater) interijt; obiecti vero, eruptione facta, gravi cum suorum jactura sunt rejecti.

Advenit interea in castra Ambrosius Spinola, qui tandem anno 1604 urbem expugnavit: præsidio, quod adhuc 4300 armatis constabat, libere abire permissio. Dicuntur in ea obsidione quinquaginta Hispanorum millia occubuisse, & vel uno mense totidem globorum millia majoribus ex tormentis fuisse explosa: plures ~~milliones~~ expensi. O! quanto facilius minorique impendio cœlestis Jerosolyma expugnaretur!

Inter hæc autem, dum Hispani tota vi Ostendæ incubuerant, Batavi Gravia, Slusa, & Rhinberga erepta damnum compensarunt. Spinola vero Grollam & Rhinbergam anno 1606 Mauritio eripuit. Pactus dein Albertus anno 1607 octo mensum inducias cum Batavis, sed in pacem conveniri non poterat, quod isti ab Indiis, in quibus profundas jam radices egerant, nollent decedere.

Anno tamen 1609 ad 12 annos prorogatæ sunt induciæ, quibus Batavi quæstuosis navigationibus, muniendis urbibus, comparando apparatu, alacrius quam Hispani usi sunt, ad id, quod supererat belli, strenue gerendum. Sed neque induciæ tam sancte servabantur, ut non Hispani Duci Neoburgico, Batavi Brandenburgico Electori in causa Juliacensi auxilia ferentes, inter se colliderentur. Quantæ vero hoc iudiciarum tempore in Hollandia inter Calvinistas religionis dissidia ac turbæ sint exortæ, postea, ubi de statu Ecclesiastico, referetur.

Anno 1621 elapso iudiciarum tempore, Hispani, Slusa frustra tentata, Juliacum Batavis extorquent, frustra Mauritio Arausico jam Principe ad solvendam obsidionem accurrente. Idem fatum subire coactus est ad Bredam, dum præpollente Spinolæ virtute & arte militari, bis obsidionem solvere nequicquam conatus est.

Unde etiam creditur tædio obiisse, dum videret Spinolam se assequi non posse, & fortunam suam in deterius labi. Natus fuit Dillenburgi, Nassaviæ gentis suæ Domus, ex Wilhelmo Nassovio, Principe Arausico, Batavicæ defectionis auctore. Post mortem fratris Philippi, qui Catholicam Religionem fuerat amplexus, anno 1618 factus est Princeps Arausicus. Cum autem nullos legitimos liberos relinqueret, Henricus frater in Principatu & Præfectura Belgii foederati illi successit, anno 1625.

Mauritius
Nass. obiit.

Fuit Mauritius 40 annis supremus Batavæ militiæ præfectus, inter clarissimos belli Duces numerandus : major fortasse futurus, nisi in Spinolam incidisset, a quo sibi discendum non diffitebatur. Bellum etiam gessit cum propriis suis Prædicantibus, a quibus vitæ ejus insidias fuisse structas, sparsum scriptumque fuit. Certe Adolphus Brachelius in *Hist. univers. lib. 2 ad ann. 1623* testatur, ab Arminianis concionatoribus gravem in Mauritium & Ordines conjunctionem factam fuisse atque detectam, comprehensis quibusdam, atque supremo supplicio affectis, qui noxæ participes habebantur, sed de hoc infra.

Et Albertus
Archidux.

Mauritium Antagonistam suum in alteram vitam antecessit *Albertus* Archidux, Maximiliani II Cæsaris quintus filius: anno 1559 natus ex Maria Caroli V filia. Sub disciplina Busbequii educatus, anno 1570 ad avunculum Philippum II in Hispaniam missus Cardinalis, Archiepiscopus Toletanus, Lusitaniæ Prorex, ac demum 1595 Belgii Gubernator renunciatus, anno 1598 abdicatis Ecclesiasticis Dignitatibus, nuptias contraxit cum Isabella, Philippi II filia, accepto in dotem Belgio, non tantum a Batavis sed etiam Hispanis militibus, ob defectum stipendiorum tumultuantibus, afflicto. Anno 1621 ætatis 62 defunctus magnum apud Belgas sui desiderium reliquit.

Constituta hoc tempore a Batavis mercatorum societas, in Indias negotiantium, quæ, magnis fulta ab Ordinibus privilegiis, ingentibus opibus est aucta. Proscripta tunc, hac mercatorum societate stabilita, Societas Jesu ex omnibus Batavorum ditionibus. Idem aliis Religioforum Familiis contigit.

Batavorum
Societas Indica.

At non solus Ordo Ecclesiasticus ab juratis his Religionis avitæ hostibus petebatur, sed societas illa Batavorum Indica, cum totum Oceanum oberraret, gravissima mercatoribus Lusitanis damna intulit. Quare Philippus IV (defuncto nuper parente) collectis, quot poterat, Dunkerca, Ostenda, Neoporto, & Hispania navibus, classem opponere coactus, terrestres expeditiones in maritimas convertit.

Et primo quidem 32 naves Batavæ, ex Adriatico redeuntes, aut captæ sunt aut depressæ. Mansfoldii collectitia prædonum manus, in Belgium irrumpens, a Gonzale Corduba concisa aut dissipata.

Contra vero Batavi classem Hispanam ad Limam Peruviae urbem vicerunt : & in Brasilia urbem S. Salvatoris expilarunt, capto Prorege cum filio, Episcopo, aliisque primoribus, ceu spo-

lis in Trophæum erigendis, in Hollandiam missis. At mox Fridericus Toletanus, cum classe superveniens, ostantibus urbem eripuit.

Sub idem tempus Ferdinandus Cæsar, misso ad Hollandos legato, ab iis petiit, ut præsidia ex Imperii urbibus ad Rhenum Inferiorem deducerent; Mathiæ Archiduci promissam pecuniam solverent, atque adversus Turcam, communem Christiani nominis hostem, aliquid contribuerent. Quod si facerent, intercessurum se apud Regem Hispaniæ, ut pax fanciatur. Responsum satis superbe, urbes Imperii ad fines tuendos a se detineri: Mathiam non esse amplius Belgii Gubernatorem: quo minus contra Turcam conferant, propriis se impensis impediri: nullum se jus Regis Hispaniæ in suas provincias, ac libertatem, iusto bello partam, agnoscere, eamque contra quemcunque defensuros.

Superba
responsio.

Quin imo per legatum suum pacem nuper conclusam turbare conati sunt inter Ferdinandum Cæsarem & Sultanum. Quod, cum non obtinerent, Jesuitis, Græcia expellendis, omnibus viribus incumbabant; sed prævaluit Christianissimi Regis gratia, qua malignos conatus evertit.

Anno 1629 reversum rursus a maritimis expeditionibus ad terrestres. Favit autem fortuna Batavis; nam Dulcoducum (*Sylvam Ducis*) in Brabantiæ finibus, & Vesaliam in Clivienfi Ducatu obtinuerunt: anno sequenti vero Pernambucum, Brasiliæ munitissimum propugnaculum; non multo post Rhenobergam, Colonienfis ad Rhenum munimentum, Venloam, Ruremundam, Trajectum. Et, quod miserrimum, cum captis urbibus capta etiam Religio: Sueco vires Hispanas distrahente, & Henrico Arausicano occasione magis strenue quam pie utente.

Liberata est anno 1633 ex procellosis mundi fluctibus & ad portum quietis transit Isabella Clara Eugenia, Philippi II Hispaniarum Regis potentissimi filia, Archiducis Alberti conjux lætissima, per 30 & ultra annos Belgii Gubernatrix pietissima: mulier vere fortis, quæ inter mundi lujus, semper variantis, inquieti semper, dextrum oculum semper sursum elevavit, virtutum omnium idea absolutissima. Mirum, quod tanta Principum clementia rebellionem non flexerit. Sed illa erat generis calviniani. Nata fuit Isabella anno 1566, mundo præluxit 67 annis. Belgium & Burgundia ad Regem Hispaniæ sunt revoluta, thoro Alberti & Isbellæ sterili.

Obit Isabella.

ARTICULUS II.

Status Belgii sub Ferdinando Cardinale, & Henrico Auriaco.

20. Galli in Belgium. Reserunt ab Hispanis victoriam Aveniaticam. Junguntur Batavis. Alternant victoriæ & clades. Obitus Ferdinandi Cardinalis. Succedit Melo felici quidem initio, sed non constanti. Domus Auriaca. Consilia de pace.

Ferd.
Gub.

Mortua Isabella missus in Belgium Gubernator *Ferdinandus*, Philippi IV frater, S. R. E. Cardinalis & Archiepiscopus Tolentanus, 26 tunc annorum juvenis, sed animi magnitudine ætatem supplente. Is cum novo exercitu iter per Germaniam instituens, anno 1634 pars magna fuit victoriæ Nordlinganæ. Tum vero abstracto secum Trevirensi in Belgium, Præfecturam est auspiciatus. (anno 1635)

In difficillima autem incidit tempora, quibus non tantum cum Batavis, sed Gallo etiam, novo hoste, eoque potentissimo, erat dimicandum. Unde mirum non est, plures urbes ab unitis istis viribus fuisse occupatas, cum Hispanum robur distractum non ubique præsens esse posset. Mirum potius, quod Ferdinandus Gubernator, qui copias tantis terrarum spatiis ex Hispania & Italia accersire debebat, & quidem, maribus infestis, terrestri itinere, non plus amiserit. Inspiciamus obiter ephemerides.

Hollandis
accedunt
Galli.

Anno 1635 Gallus abducto Trevirensi irritatus, bellum intulit Belgio, Castillionæo & Brezæo Ducibus: cum autem Thomas Princeps Sabaudia conjunctionem Gallorum cum Batavis impedire niteretur, in Brabantia prælio *Aveinensi* victus est, 4000 Hispanorum cæsis, 500 captis, apparatu bellico & impedimentis amissis. Præmium victoriæ fuit Tillemontium, optandum Hispanis; nam conflatus ex Gallis & Batavis exercitus ingens, licentia ita diffluxit, ut nemini amplius esset terrori.

Pugna Ave-
niaca.

Schenckianam arcem munitissimam (quam videlicet Schenckius, nobilis Gelder, superiori sæculo ad Rheni divortium construxerat) Hispani Geldria præsidarii noctu clam, applicatis scallis, interceperunt, cæsis Batavis, qui se opponere audebant.

Doluit

Doluit vehementer confœderatis tanti repaguli jactura; unde anno sequenti multo illud sanguine redemerunt. Hispani vero in Galliam irruentes, totam propemodum Picardiam occuparunt, terrore Lutetiam usque sparso: Henrico Condæo autem a Dolæ, permunitæ ad Dubim urbis, oppugnatione ab ipsis Burgundis depulso.

Infelicior Hispanis fuit annus 1637; nam Batavi *Bredam* in ^{Breda} Brabantia expugnarunt, Spinolæ trophæum. Cautum Religioni. ^{capta.} Sed aliud est promittere, aliud promissum implere. Quid expectes ob iis, qui fidem DEO negarunt? Hispani quidem interea, cum obsidionem solvere non possent, Venlonam & Ruremundam in Geldria occuparunt. Sed unum plus erat, quam duo. Adhæc, ut Batavi commercium (animam suam) per omnes mundi partes propagarent, Minam in Africa, insigne Guineæ munimentum, Hispanis eripuerunt.

Nec minor pernicies a Gallis, qui Ivodium & Damvillerium ad Lotharingæ fines, & Landresium, fortissimum in Hannonia munimentum, ductoribus Valeta Cardinale, & Candala, Esperonij Ducis filiis, decerpserunt.

Felicior Hispanis fuit annus 1638; nam & Geldriæ obsidium cum memorabili Batavorum clade solverunt, & Colloum, reportata insigni a Batavis prope Antverpiam victoria, receperunt. Gallosque ab Audomaro, non exigua, nobilium maxime, clade, a Principe Thoma, & Piccolomineo illata.

Annus 1639 inter victorias cladesque divisus. *Milleræus* Gal- ^{Milleræus.} lus, ille sæculi hujus Poliorcetus, machinarum magister incomparabilis, Hesdinum, firmissimum in Attrebatis locum, subjugavit. Contra vero Galli a Thionvillæ obsidione non exigua cum strage sunt repulsi. De Batavis nihil lego, quod hoc anno in Europa præstiterint, nisi præparaciones ad futura incrementa. In India autem geminam per Trompium Archithalassum de Hispana classe reulerunt victoriam.

Anno 1640 Galli obtinuerunt Atrebatum, Artesiæ caput, urbem inter præcipua Belgii munimenta numerandam. Non ita feliciter Batavis cecidit alea; nam iterato in Geldriam urbem impetu fracto inglorii recesserunt. Ingens autem hoc anno non tantum Hispaniæ, sed Belgio quoque vulnus inflictum def. ctione Lusitaniæ & Cataloniæ, quia minora propter istos novos hostes subsidia in Belgium mitui poterant. Cum Joanne IV Lusitaniæ Rege a Gallis & Batavis mox in fœdus itum decennale.

Obit Ferd.
Archid.

Annus 1641 geminam Belgio intulit jacturam, & Arisæ, urbis in Artesia fortissimæ, a Gallis abstractæ, & Ferdinandi Cardinalis, Belgii Gubernatoris. Obiit florenti ætate, septimo Belgicæ administrationis anno, vitæ 32, Princeps Aultriaca pietate, non in morte duntaxat, sed & in vita sæpius experientia edoctus, quod non habeamus hic manentem civitatem.

Succedit
Melo.

Sucessorem in Belgica Præfectura nactus est Franciscum Melo, Lusitanum ex Domo Bragantina, Pereyræ Marchionem, qui antea Prorex erat utriusque Siciliæ, & Mediolani Gubernator. Auspicatus adversus tantos hostes feliciter militare imperium anno 1662, redactis in potestatem Lendio & Bassæ, in Picardiam irrupit, atque ad Castelletum prope fontes Scaldis insignem de Gallis victoriam reportavit, captis duobus eorum millibus, & totidem ferme in acie cæsis. Ne victoriæ fructus carperet, obstitit ex altera parte Batavi, quibus obviandum erat, ne, dum profundius in alienam se regionem immitteret, propriam perderet. Imminebant insuper ad Mosam Venarienses. Arduum proin opus, exercitum non magnum tribus exercitibus in tribus locis opponere.

Belgii
ruinæ.

Unde anno sequenti 1643 adversam Melo fortunam habuit; quippe, dum Rocroyum seu Regiam Rupem, Campaniæ in finibus Belgii urbem, obsidet, Condæus cum copiis fessis irruens non modicam passus est cladem. At refectis cibo somnoque militibus, altera die aggressionem repetens, plena potitus est victoria, cujus præmium fuere Rocroyi liberatio, & Thionvillæ, munimenti in agro Luxemburgico fortissimi, expugnatio.

Nec Batavis fortuna defuit, dum Cantelmum Ducem Hispanum haud præcul Antverpia acie vicerunt. Fructus utrinque in annos etiam sequentes se exporrexerunt, quibus Batavi Aggeres Gandavenfes & Hulstum, prævalidas Flandriæ urbes, Galli vero Gravelingam ceperunt.

Hanc urbem inter & Dunkercam in eadem Flandria situm est Mardicum, munita olim ad mare civitas. Hoc anno 1646 velut alea lusum, Gallis primus favit jactus, alter Hispanis, tertius iterum Gallis; quibus insuper accessit Cortracum, Vinoxberga, & quæ est plurium instar, Dunkerca, Condæi trophæum. Portum obsidebant navibus Batavi, ne subsidia intromitti possent. Sed felicior eis fuit hæc expeditio aliena quam propria, quam adversus Venlonam in Geldria susceperunt; nam irritò conatu ab oppugnatione recedere coacti sunt.

Anno

Anno 1647 utrumque Belgium, Hispanicum & Foederatum acceperunt novos Gubernatores; illud quidem *Leopoldum Wil-* Leop. Oub.
helmum Archiducem, Ferdinandi III Cæsaris fratrem, plurium
Ecclesiarum Præsulem, adversus Suecos antea copiarum supremum
Ductorem, hoc vero Wilhelmum II Nassovium, Principem *Arau-*
sicanum, (alii *Auriacum* aut *Orangium*, vel *Oraniensem* appellant, Et Wilh.
ab Arausicano nempe in Gallia Principatu, quem Gens Nassovia Nass.
hæreditario jure possidebat.) Successit autem Wilhelmus Henri-
co patri, anno isto defuncto. Fuit is Wilhelmi I Reipublicæ fœ-
deratæ velut fundatoris filius, frater Mauritiï, post cujus mor-
tem administrationem nimis stenuè contra Hispanos gessit.

Liberos. præter Wilhelmum II, reliquit 1 Ludovicam, quam Auriaca De-
Electori Brandenburgico despondit. Unde postea magna cum Nas- mus.
siovis de hæreditate Arausicana contentio: 2 Albertina nupta fuit
Principi Nassovio - Dietio. Unde liberi ex hoc matrimonio descen-
dentes ab Ordinibus Batavis ad tantam potestatem evecti.

Porro Wilhelmus II non ultra tres annos Gubernatoris munus
gessit, ab anno videlicet 1647 ad 1650, quo obiit. Reliquit autem
filium posthumum ex Maria, Caroli I Angliæ Regis filia, Wilhel-
mum III, qui ducta Maria, Jacobi II Regis Angliæ pariter filia, ad
thronum magnæ Britanniæ fuit vocatus.

Respiciebant autem tam Hispani quam Batavi ad pacem; illi
quidem, quia infirmiores se videbant, quam ut Gallis simul Bata-
visque resisterent; ne igitur porro quot annis alias aliasque urbes amit-
terent, pacem cum Batavis, quamvis duram, ineundam potius
ducebant, quam omnia perdere, fatis hostium in Gallis & Lusita-
nis sibi superfuturum sapienter existimantes. Nec Batavis, 70 an-
norum bello fessis, pax displicebat, maxime, cum potentem Rem-
publicam jam constituissent, & Gallum nollent ultra in Belgio
progredi, socium jam tunc magis timentes, quam hostem; hinc
fœdere, cum eo inito, deserto, anno 1648 Monasterii in West-
phalia in sequentes articulos convenerunt.

ARTICULUS III.

*Pax Monasteriensis Hispano - Belgica
anni 1648.*

21.

Rex Hispaniarum Præpotentes Ordines Generales unitarum provinciarum cum earum ditionibus liberos, ac Dominos supremos, cum abdicatione omnis in eos juris agnoscit.

2 Pax sit firma, fidelis; cessetque omnis hostilitas terra marique.

3 Relinquuntur utrique parti, quæ actu possidet.

4 Subditi & incolæ utrinque fruuntur amnestia, colantque amicitiam & inter se libera commercia.

5 Navigatio & commercia in utraque India conserventur conformiter privilegiis, utrinque datis, uti etiam in oris maritimiis Asiæ, Africæ & Americæ Hispani continent suas navigationes in India Orientali, tali modo, quo adhuc habent & utuntur, ita, ut ulterius eas non extendant: sicut vice versa incolæ unitarum provinciarum abstineant a frequentatione locorum Castilianorum in India Orientali.

6 In India Occidentali alter alterius portus navigatione & commerciis non subeat.

7 Pax in India Orientali incipiat post annum tenere: in Occidentali vero primum post medium annum, secundum limites, Societati Orientali & Occidentali præscriptos.

8 Subditi, in alterutrius terris commercia exercentes, non teneantur plus impositionis solvere, quam proprii respective subditi.

9 Extra limites suos pro mercibus transeuntibus nihil exigant.

10 Pars utraque in terris alterius fruatur a teloniis libertate antiqua, cujus in possessione pacata fuit ante belli initium.

11 Neutra pars alterius commercia aut negotiationes in terris suis impediat.

12 Rex tolli curret telonia ad Rhenum & Mosam, quæ ante bellum fuerant in provinciis Batavicis: uti etiam telonium zelandicum.

13 Pro sale, in alterius terras illato, non plus exigatur, quam a propriis subditis.

14 Scaldis, Canales Sassiæ, Swynder, aliique cum mari communicantes, ex parte Ordinum clausi teneantur.

15 Naves & bona omnia e Flandria venientia æqualibus respectu omnium exactionibus onerentur.

16 Civitates Hanſeaticæ quoad navigationes & commercia in terris Hispanicis fruantur omnibus juribus, in hoc tractatu contentis, atque Unitis Provinciis concessis. Et vicissim istæ fruantur privilegiis illarum.

17 Subditi Ordinum in terris Regis gaudeant iisdem juribus, quæ sunt concessa Angliæ incolis.

18 Rex honesta designet loca, in quibus sepeliantur Batavi, in ipsius terris mortui.

19 Intuitu exercitii Religionis utrinque subditi modeste se gerant in terris alterius.

20 Naves, merces &c. non arrestentur, nisi via justitiæ exigat.

21 Instituat^r *Camera bipartita* Judicum ex utraque parte, qui per vices alternas modo in unius, modo alterius terra resideant, & utriusque gentis inter se lites summarie & de plano cognoscant.

22 Sententiæ, contra personas, non defensas latæ, non dentur executioni.

23 Non sit licitum, cum bellicis navibus & militibus tanto numero, qui suspicionem movere posset, in alterius portus aut stationes intrare, nisi tempestas, vel alia necessitas ad evitanda pericula maris ad id cogat.

24 Bona, belli causa arrestata, aut fisco addicta, restituantur dominis suis aut eorum hæredibus, habeantque isti jus, propria auctoritate possessionem eorum adeundi, non obstantibus quibuscunque transactionibus & renuntiationibus.

25 Quod etiam locum habeat ad commodum hæredum defuncti Principis Wilhelmi Auriaci, etiam quoad jura in Salinis comitatus Burgundici.

26 Comprehendantur insuper bona & jura, in comitatu Burgundico & Charolesio sita: & quidquid juxta tractatum anni 1609 necdum est restitutum, id omne proprietariis, aut eorum hæredibus, vel actionem habentibus restituatur.

27 Item bona & jura, quæ post exitum treugæ duodecennalis per sententiam magni consilii Mechliniensis in præjudicium fisci Comiti Joanni Nassovio sunt adjudicata.

28 Princeps Auriacus adeat possessionem castelli Bellini, non obstante lite, dudum pendente, sublati omnibus actionibus.

29 Si alicubi ratione restitutionis difficultas moveretur, iudex loci ocus curabit, ut sortiatur effectum, brevissimam viam amplectendo.

30 Batavis in ditionibus Regis licitum sit, uti advocatis, procuratoribus, notariis, sollicitatoribus, & executoribus, quibus visum fuerit: & vicissim.

31 Si bona aliqua confiscata fuerint vendita, illis, ad quos pertinuerant, restituatur pretium

32 Si vero creditoribus proprietarii sint data in solutum, retrahere illa liceat proprietario & ejus hæredibus, reddito pretio.

33 Non tamen sit locus retractui, si domus sic sint venditæ.

34 Meliorationes bonorum, si a prioribus proprietariis retrahantur, sunt compensandæ.

35 Omnia bona, quæ a Fisco non sunt annotata, proprietariis restituantur.

36 Uti etiam arbores amputatæ, si in fundo adhuc jaceant.

37 Item fructus, locationum pretia, census, bonorum proventus, post conclusam pacem percepti.

38 Venditio post hunc tractatum facta, sit nulla.

39 Domus restitutæ vel restituendæ ne onerentur plus præsidio militari quam aliæ.

40 Nemo a mutando domicilio impediatur, modo solvat jura solita.

41 Si quæ fortificationes aut opera publica in locis restituendis sint facta, proprietarii æstimatione bonorum, qualis prius fuerat, contenti sunt.

43 Bona Ecclesiastica, si non sint vendita, restituantur, & pertineant ad Collegia, Regi subjecta. Si autem sint vendita, aut in solutum data, census annuus solvatur ad rationem unius denarii ad sedecim. Similiter fiat a parte Regis.

44 Bona, quæ Auriacus, ab Ordinibus accepta, possidet, ea firma ipsi maneat. Circa alias prætensionones congrue satisfiat.

45 Puncta, privatis ductus instrumentis, anni 1647 pro Auriaco conventa, salva sunt.

46 & 47 Tractant pariter de bonis privatis restituendis.

48 Legitimæ sententiæ, quibus partibus jus dictum, teneant.

49 Rex renuntiet omnibus prætensionibus, quas habet in urbem Graviam, & terram Cuickiam, quæ prius Domui Auriacæ oppignorata, dein vero tanquam propria concessa ab Ordinibus.

50 Cedat item juribus in urbem & comitatum Lingæ, Bevergeerdæ, & Clopenburgi, ut maneant penes Auriacos.

51 Constituantur ab utraque parte Judices & executores in locis, proprietariis restituendis.

52 Superior tractus Geldriæ permutetur cum aliquo æquivalenti. Si autem conveniri non posset, remittatur causa ad cameram dispartitam, ut intra sex menses decidatur.

53 Rex & Ordines se obligant ad conservandam bonam amicitiam cum Cæsare & Imperio; curabitque Rex, ut Imperator illam confirmet.

54 Mobilia confiscata non sunt restituenda.

55 Actiones circa mobilia, ab Ordinibus remissæ, extinctæ sunt.

56 Tempus belli ab anno 1567 non computetur in alicujus præjudiciū.

57 Qui durante bello alio migrarunt, fruuntur effectu pacis, & habitent, ubicunque placuerit.

58 Nova fortalitia, canales, aut fossæ in Belgio in alterius præjudiciū ne fiant.

59 Domus Nassovia ne afficiatur molestia, nec Comes Solmenis Gubernator Trajecti.

60 Privatus contraveniens paci puniatur in loco delicti aut domicilii. In casu tamen manifesto denegatæ justitiæ licitum sit per litteras Repressaliarum procedere.

61 Omnes exhæredationes & dispositiones, in odium belli factæ, sublatae sunt.

62 Subditi utrinque successionis, tam ex testamento quam ab intestato capaces sunt, secundum consuetudinem locorum.

63 Omnes bello capti utrinque sine lytro liberi dimittuntur.

64 Solutio contributionum, quæ restant, ab officialibus dirigitor.

65 Maneant omnes in suis juribus.

66 Fruantur etiam effectibus treugæ duodecennalis.

67 Limites in Flandria & alibi determinentur.

68 Nominantur fortalitia, utrinque demolienda.

69 Registra, chartæ, & instrumenta utrinque extradantur.

70 Jus aquæ penes Blusam maneat, prout ei competit.

71 Agger injectus prope S. Donatum auferatur.

72 Includantur huic paci, qui intra tres menses utrinque nominabuntur. Interim ab Ordinibus nominantur Landgravius Hass-

so. Cassellanus cum suis terris, Comes Ostfrisiæ cum ditionibus & urbe Emda, Hanseaticæ civitates, specialiter Lubeca, Brema, Hamburgum.

73 Comiti Flodrovensi restituantur ablata.

74 Quæ a Legatis de Rutgero Hygenli tractata sunt, rata habeantur.

75 Conferant operam, ut viæ ac maria a prædonibus & pyratibus purgentur.

76 Nihil committatur contra hunc tractatum; &, si quid commissum fuerit, illico resarciatur, abrogatis omnibus legibus & statutis adversis.

77 Hic tractatus a Rege & Ordinibus General. confirmabitur & ratihabebitur. Litteræ autem ratihabitionis debite subscriptæ, intra duos menses utrinque tradentur. Et tum primum hostilitas cesset.

78 Quando nempe fuerit commutatio ratihabitionum facta.

79 Tum vero pax publice promulgetur & omnis hostilitas cesset.

ARTICULUS IV.

Observationes in Pacem Hispano-Belgicam.

22.
Crisis de
Batavis.

Ad 1. Articulum. Hic tandem fuit exitus 70 annorum belli, in quod Hispania multas classes, aureas & argenteas, frustra consumpsit. Mirum sane, potuisse gentem piscatoriam, ad sterilem Europæ angulum retrusam, in tantam magnitudinem excrecere, ut in omnes quatuor mundi partes dominationem exporrigeret, atque ad ultimum leges adeo pacis potentissimo Hispaniarum Indiarumque Monarchæ dictaret. Reinauticæ, commerciorum, impigræ solertiæ, constantiæ hi fructus sunt. Industria mercaturam, mercatura pecuniam, pecunia militem, miles victoriam, victoria optimam pacem, pax septem provincias, cum magna Flandriæ & Brabantiae parte, atque liberam ac præpotentem Rempublicam peperit, in paludoso ac sterili solo rebus omnibus abundantem.

Ad 2. Et fuit firma, adeo quidem, ut Batavus ex hoste in custodem gentium Hispanici Belgii sit mutatus, non propter Hispaniam, sed propter se; quia sibi timebat, si proximus Ucalegon arderet. Hinc etiam munitarum urbium repagula postea depopulit, suis præsidiis, alieno ære insidenda.

Ad 3.

Ad 3. Fœcundus hic Batavis Articulus attulit Hollandiam, Zeelandiam, Ultrajectum, Frisiam, Geldriam Inferiorem cum Zutphania, Gröningam Transsylvaniam, septem opimas provincias, Sylvæducentem Marchionatum & Bergarum ad Zomam, Baronatum Bredanum, Trajectum ad Mosam cum comitatu Uronhovio, Graviam cum ditione Cuykia, Hultstam, Ambrachtam, Axeliam, Slufas, Cadfandiam, aliasque urbes, arces, & castella in Brabantia & Flandria; quæ omnia ad Hispaniarum Monarcham spectaverant.

Ad 4. Cum hoc sæculo coeptæ fuissent Ostendanae in Indias navigationes commercandi causa, totis viribus se opposuerunt Batavi, quintum hunc articulum allegantes, quo reliquis Belgis jus ejusmodi navigationis & commerciorum volebant interdictum.

Verum hic articulus nec verbum habet de Belgio Hispanico, quo ei navigationis libertas adimatur: sed id duntaxat prohibet, ne pars alterutra navigationem suam extendat ad loca & portus alterius partis in India Orientali: prout manifeste patet ex adjecta clausula: *Sicut viceversa incolæ unitavæ provinciarum abstineant a frequentatione locorum Castilianorum in India Orientali.* Crisis de libertate navigationis.

Poterant ergo Hispani salvo hoc tractatu navigare libere in Indiam Orientalem, modo abstinerent a locis, quæ ad Batavos spectabant. Multo magis id poterant Belgæ, quibus nulli sunt limites positi; quidquid igitur prohibitum fuisset Hispanis, non esset prohibitum Belgis; cum utique Belgæ non sint Hispani, quam parum Batavi sunt Hispani. Si aliquid prohibitum est Bohemis, an hoc ipso prohibitum est Hungaris? Multo autem maxime navigationes suscipere potest hodie Belgium Austriacum; cui nihil commune est cum Hispania.

Neque enim maris dominium arrogare sibi possunt Batavi, aut alias nationes a navigatione, aut maritimo commercio excludere. Mira profecto hic facta est rerum conversio. Cum Rex Hispaniæ prohibere volebat a navigatione in Indias Batavos, ad jura naturæ & gentium isti provocabant. Ediderat tunc ex eorum voluntate Hugo Grotius eruditum tractatum *de Mari libero*, in quo demonstravit, licere cuivis genti alteram adire, atque cum ea negotiari; tolli sic, jure naturæ & gentium assertam, humani generis societatem: neque etiam ipsum mare aut jus navigandi ulli genti proprium esse, utpote extra commercium humanum positum, ac proin neque titulo inventionis, vel occupationis, aut libero. Et m. i.

præscriptionis in alicujus dominium transire posse: nisi quis & aëris spirandi proprietatem sibi velit vindicare.

Hæc tunc Batavi, cum mercatus suos necdum ita firmatos haberent. At mutatis postea rebus, cum Ostendana inciperent florere commercia, alius Batavis factus est almæ naturæ genius, quia alium privatæ eorum rationes videbantur requirere. Iniquissimum ante erat Batavis, interdicta cæteris navigatione, Oceanum unius nationis mancipari obsequio. At postea visum æquissimum, privato monopolio Europam premere, ipsique adeo omnibus communi Oceano jugum injicere. Scripsit in hanc rem pro Batavis Seldenus de *Mari Clauso*, & vindicias *Maris Clausi*: sed strenue eum confutavit Pattinus Belga in tractatu suo de *Mari libero*, atque ex Batavorum principiis, ex ore Grotii olim loquentium, thesin suam comprobavit.

Ad 6. & seq. Usque ad articulum vigesimum tractatur de libertate navigationum (quæ antea Batavis a Rege Hispaniarum erant inhibita) de commerciis, tollendis teloniis, & aliis exactio- nibus. Batavi nempe, quorum anima sunt navigationes, negotiationes & commercia, omni ope adlaborabant, ut hæc ipsis firma, secuta, & oneribus sublevata manerent.

Scaldis
ostia
clausa.

Memorabilis est Articulus 14, quo decernitur, ut Scaldis ostia occlusa teneantur. Timebant nempe Batavi, ne commerciorum alveus rursus *Antverpiam* derivaretur. Erat quippe hæc urbs Brabantia, ad Scaldin sita, tot tantisque commerciis olim frequens, ut parem vix in orbe habuerit. Sed Hollandi omnes vires impenderant, ut mercatores atque negotiationem Amstelodamum transferrent; quo sane Brabantia, & Belgium Hispanicum universim, dimidium velut sui amisit.

Ubi notandum, Batavos Scaldin, Sassiæ & Swindæ canales voluisse clausos; de Ostenda, Neoporto, aliisque urbibus maritimis, earumque portibus nullam fieri mentionem. Si voluissent Batavi, inhibitas esse Belgio Hispanico navigationes per Oceanum, ante omnia exprimi debuisset portus Ostendanus, præcipuus, quem tunc Rex Hispaniæ possidebat.

Sequentes articuli usque ad 50 tractant de restituendis bonis immobilibus, nominibus, & juribus, intuitu belli ablati aut confiscatis. Et quia Domus Auriaca in Belgio & Burgundia ab antiquo bona aliqua possidebat, & alia Wilhelmus a Carolo VI, ejus vero filii, Mauritius & Henricus ab Ordinibus plura sunt consecuti,

ti, jubentur ista restitui, etiam ea, quæ Joanni Nassovio, Comiti Catholico, a Rege sunt assignata

Ad 53. Quæ hic dicuntur de conservanda amicitia cum Cæsare & Imperio, a Ferdinando III eodem anno 1648 edito Diplomate sunt confirmata.

Ad 56. Decernitur hic, ut præscriptio tempore belli censeatur non currere.

Ad 72. Post pacem initam a Batavis adhuc inclusi eidem fuerunt Comes Solmenfis & Bentheimensis: Comes Oldenburgicus vero obtinere non potuit, ut includeretur, ob odium telonii, Vifurgi imposti.

Ex parte Regis vero fuerunt inclusi, Imperator, Rex Bohemiæ & Hungariæ, omnes Archiduces Austriæ, S. R. J. Electores, Principes, & Civitates, nominatim Joannes Princeps Anhaltinus, Comes Oldenburgicus, Schwarzenburgicus, & Civitates Hanseatice.

Ad 77. Confirmarunt eodem adhuc anno Rex & Ordines hanc pacem, per Gasparem de Braccamontio & Gusmania Comitem Penderandæ, Josephum Burganium Archiepiscopum Cameracensem, & Antonium Brun, supremi Consilii Flandrici assessorem: ex parte Batavorum vero per D. a Gent, & septem alios legatos.

ARTICULUS V.

Tractatus Commerciorum

23.

Inter Regem Hispaniæ & Fœderatum Belgium Synopsis.

Post pacem conclusam separatus contractus, ad navigationes & commercia spectans, fuit initus eodem anno & loco, 18 capitibus constans.

1 Batavi omni libertate & securitate ad omnia regna & regiones, cum quibus pace aut neutralitate gaudent, navigationes instituent, & in iis commercia exercebunt.

2 Neque libertas hæc commercandi turbetur, licet Rex cum illis bellum gereret.

3 Etiam respectu Gallorum, cum quibus Rex est bello implicitus.

4 Sic tamen, ut Batavi merces e regionibus Hispaniis ad hos-

Hostes Regis non deferant, quæ hosti adversus Regem servire possent.

5 Neque ad alios Regis hostes Batavi merces interdictas vehant.

6 Interdicta autem censentur omnis generis arma, & apparatus bellici.

7 Non autem frumentum, vinum, oleum, sal, aliaque ad sustentandam vitam necessaria. Quæ proin ad hostes Regis deferre possunt, non tamen ad urbes, ad eodem obsessas.

8 Hinc naves Batavæ, ad hostes Regis iter facientes, saluum conductum, & testimonium, quod nullas interdictas merces vehant, Hispanis exhibeant: quo facto, non explorentur naves, neque ulla molestia afficiantur: sed liber illis cursus relinquatur.

9 Hic salvus conductus cum expressione mercium, quæ vehuntur, exhiberi debet, cum iusta est suspicio, interdictas merces vehi ad hostes Regis.

10 Tunc enim exhiberi debet.

11 Et Hispanæ naves Batavis in mari occurrentes scapham mittant, & litteras salvi conductus exigere possunt, quibus fides habenda, nullas interdictas merces vehi.

12 Si merces prohibitæ in Batavorum navibus reperirentur, fisco addicantur, non tamen navis, aut aliæ merces, non prohibitæ.

13 Si autem Batavi merces aliquas Regis hostium navibus imponerent, omnes fisco addicantur, licet alias non sint ex genere prohibitarum.

14 Si autem Batavorum navibus aliquæ merces, quæ Regis hostibus sunt propriæ, essent impositæ, liberæ sunt, exceptis interdictis.

15 Vice versa subditi Regis iisdem privilegiis in navigationibus & commerciis suis respectu Batavorum gaudebunt, ita, ut per omnia sit utrinque æqualitas.

16 Isti commerciales articuli explicandæ paci Monasteriensi inserviant, si aliquid dubium aut contrarium in illa occurreret.

17 Hic tractatus non minorem vim habeat, ac si originali tractatus foret insertus. Possuntque partis utriusque consensu aliæ insuper cautelæ adijci, si orituris forte controversiis per istas non satis esset præcautum.

18 Hic tractatus intra quatuor menses ab utraque parte ratificabitur & confirmabitur.

Nota

Nota.

Neque in isto commerciorum Tractatu vel apex exstat, quo Belgio Catholico interdictum esset navigatione in Indias ad exercenda commercia; quin imo statuitur plena in omnibus æqualitas sine ulla exceptione. Profecto, si Batavi reliquos Belgas a commerciis & navigationibus voluissent exclusos, debuissent vel in pacis vel in hujus tractatus commercialis articulis aliquam eorum mentionem facere.

ARTICULUS VI.

Tractatus Commerciorum

*Inter Hispanos & Urbes Hanseaticas anno 1647 conclusus
Monasterii.*

Antequam turbæ Belgicæ fuerant exortæ, neque Hollandis aut aliis nationibus licitum erat, merces ex Hispanorum aut Lusitanorum ditionibus Indicis exportare, sed ab istis in Europam devectas emebant. At vero cum bellorum motus exurgerent, non amplius Gadibus aut Olyssipone eas devehebant, sed cum ingenti Hispaniæ & Lusitaniæ detrimento in Indias navigarunt, ut a prima manu eas reciperent. 24.

Indulgere hæc denique debuit Hispanus; & cum Hanseaticis civitatibus jam anno 1607 tractatum commerciorum iniit. Cum autem variæ adhuc litēs orirentur, civitates illæ per legatos suos, in Westphalia cum aliis congregatos, Comitem de Penderanda rogarunt, ut renovationem tractatus a Rege impetraret. Assensit ille: conventumque in quatuor articulos, iis ferme similes, qui anno dein sequenti cum Batavis sunt constituti.

1 Confirmantur privilegia & immunitates, Hanseaticis civitatibus antehac concessæ, ut libere iis uti possint: sic tamen, ut, quæ Batavis, ipsis etiam sint interdicta, &, quæ istis concessa aut concedenda, ipsis etiam permessa intelligantur, præsertim, cum præcipuè Batavorum civitates societatis Hanseaticæ sint membra.

2 Nautæ unam tantum specificationem navium & mercium exhibere teneantur. Si autem pax vel induciæ cum Batavis fuerint initæ, nihil amplius fore testandum, quam quod merces ad Han-

sea-

featicas civitates pertineant, aut ad illas, quibus similia privilegia a Rege fuerunt concessa.

3 Possint Hanseatici cum hostibus Regis commercia exercere, mercesque terra inarique apportare vel exportare, iis duntaxat exceptis, quæ bellico usui inserviunt, & ex Regis ditionibus evectæ fuerint.

4 Hanseatici fœderis civitates gaudeant commoditatibus, quas Rex cuicumque alteri Principi aut Statui, neutrali atque amico, quocunque tempore aut loco sit concessurus.

Subscripserunt nomine Regis Comes Penderanda, Archiep. Cameracensis & Brunus: nomine civitatum, Lubecensis, Bremensis, & Hamburgensis, Legati.

ARTICULUS VII.

Causa belli Anglo - Batavici.

Trompius ter victus a Blacko Anglo. Plus damni a tempestate patiuntur Batavi. Pacem a Cromwelo impetrant.

Batavi, bello Hispanico liberi, dum navigationibus & commerciis suis intenti, ex orbe universo opes collectas accumulantes, brevi cum Anglis, negotiosa pariter gente, & eorum Protectore Cromwelo gravi bello collisi sunt. Causæ, æmulatio, maris imperium, quæstus.

Diffimulabant hæcenus Angli, vel turbis domesticis præpediti, vel odio Hispanorum cohibiti, quos optabant minui, crescentem in dies, & in omnes orbis partes Batavorum diffusam potentiam maritimam; at, ubi pax Monasteriensis, & fœdus etiam commerciorum coaluit, invidia urente, limites Batavis figendos existimabant, ne Anglico Neptuno Tridentem eripiant.

Querebantur inter alia non exigua in Indiis damna, atque a Scaldis in Belgio usu se prohiberi. Causa tamen proxima erat hæc cum piscatio ad Angliæ littora, quam Batavi sine vectigali magno cum lucro exercebant.

Paratur utrinque animosè bellum. Sexcentas naves, quarum quælibet 30 tormenta caperet, a Batavis instructas narrat Fulde-
nius ad annum 1652. Favebant eisdem Hamburgum & aliæ civitates Hanseaticæ, non modico allato auxilio. Rei summæ præfectus

Trom-

Bellum Anglo -
Hollandicum.

Trompius, uti audax, ita belli maritimi gnarus, qui Hispanas classes sæpius fuderat.

Nihilo tamen secius *Blackus* Anglicæ classis Præfectus trino navali prælio eundem ita devicit, ut amissis plurimis navibus & milite exanimis caderet. Substituit tum quidem Respublica Trompio Wassenarium Obdamum; sed cum ad quartam pugnam essent accincti, procellosus turbo ita mare bis concitavit, ut utrique parti multo plus damni afferret, quam triplex prælium. (*anno 1653.*)

Trompius
a Blacko
ter victus.

Inclamarunt tum quidem Batavi Galliæ, Sueciæ, & Daniæ auxilia, & missis Oratoribus Regis Lusitanæ, quem in Brasilia sibi bellum moturum timebant. Sed cum hæc subsidia incerta essent, & longinqua, ad pacem animum inclinarunt; eamque anno sequenti 1654 Londini a Cromwelo impetrarunt, adjecto fœdere.

Pax.

ARTICULUS VIII.

Capita Pacis & Fœderis

Inter Cromwelum Angliæ Protectorem & Belgas Fœderatos.

Synopsis.

1 **S**it sincerior amicitia, unio, & fœdus inter utramque Rempublicam.

25.

2 Cesset omnis hostilitas.

3 Sit amnestia & oblivio omnium præteritorum.

4 Omnes capti sint liberi.

5 Alter status alterius libertatem defendat contra quoscunque.

6 Neuter aliquid agat in præjudicium alterius; nec aliis auxilium præstet, sed contradicet & resistet.

7 Neuter alterius rebelles foveat, aut juvet, sed utriusque Reipl. hostes judicentur, & perduellionis pœnam in loco delicti luant.

8 Utraque Resp. sibi mutuo terra marique opem feret, prope opus fuerit, contra alterius hostes & rebelles, sumptibus tamen rogantis auxilium.

9 Neutra alterius hostes aut rebelles recipiet, neque in mari, portu, aut terra.

10 Sed monita Resp. quod sint rebelles, illos expellet.

Pars IX.

U

11 *Quam-*

11 Quamvis propria ibi bona haberent: nec ulla illos ope juvabit.

12 Utriusque Reip. incolis liceat omnes ditiones portusque in Europa intrare, mercesque importare aut exportare, sic tamen, ut consueta portoria, vectigalia, aut census solvant; quos alii extranei solvunt.

13 Si naves Batavæ in maribus Britannicis navi bellicæ Anglicanæ obviabunt, vexillum suum e mali vertice detrahent, & supremum velum demittent.

14 Neutra pars piratas aut prædones in suos portus recipiat, aut commeatum eis præbeat; sed capiantur & puniantur, navesque eorum in alterutrius portum in ecclæ dominis suis restituantur.

15 Si alterutra fœdus aut amicitiam cum aliis Principibus aut Statibus ineat, alteram certiore reddat, &, si voluerit, in eo fœdere comprehendat.

16 Fœdus hoc permaneat, licet aliqui contra illud delinquant. Sed delinquentes soli puniantur, & ad satisfactionem adigantur. Quodsi iustitiæ se non submiserint, hostes utriusque partis judicentur. Bona illorum publicentur, & inde fiat læsis satisfactio: &, si in alterutrius potestatem venerint, pro ratione criminis plestantur.

17 Possunt utriusque partis incolæ libere & secure alterius urbes, & etiam munimenta intrare, mercimonia exercere (armati tamen non plus quam 40 simul) dummodo secundum statuta loci se gerant.

18 Si naves mercatoriæ alterutrius portum intrent, a piratis vel tempestate compulsi, sine molestia & vectigalis solutione, atque sine visitatione recedent: modo ibi nihil distrahant, aut agant contra leges loci.

19 Alterius naves non capiantur, aut arresto subjiciantur, nisi summa necessitas cogat; salvis tamen legibus Reip.

20 Mercatores, eorumque institores & famuli possunt cum armis intrare alterius portus & terras: ubi tamen in diversorium suum devenerint, oportet ea deponere, donec ad navem redeant.

21 Si navis prædatoria seu bellica in naves mercatorias alterius Reip. incidat, eas defendat, quamdiu eundem cursum tenuerint.

22 Si navis alterutrius in portu alterutrius ab exteris capiatur, communi opera raptam navim insequantur & raptori ablatam domino restituant; hujus tamen sumptibus.

23 Scrutatores & alii officiales non plus exigant, quam leges & potestas, sibi commissa, permittunt.

24 Non licet propter injuriam uti Repressaliis: sed justitia est postulanda; hæc si ubique denegetur, litteræ Repressaliæ concedi poterunt.

25 Antequam quis speciale diploma accipiat, per idoneos fidejussores caveat, se nullum damnum aut injuriam alterutri populo illaturum.

26 Portus alterius intrare liceat non tantum cum navibus mercatoriis & onerariis, sed etiam cum bellicis ad eas reparandas, vel alimenta emenda: non tamen pluribus quam octonis. Pluribus simul intrare non licet sine venia ejus vel eorum, ad quos portus pertinet, nisi tempestas aut vis alia cogat. Quo casu illico Præfectum loci de adventus sui causa edoceant: nec diutius hærebunt, quam ille indulerit.

27 Curabunt Batavi, ut justitia fiat, qui in Amboina (*Hollandorum in India Orientali insula*) Anglos occiderunt.

28 Se obligant ad restituendas naves & bona Anglorum, a Rege Daniæ durante hoc bello intercepta, ut mercatorum, naucleorum, & proprietariorum damna resarciantur.

29 Hæc ubi Batavi præstiterint, cessabit omnis hostilitas, inter Anglos & Danos, ratione dictæ detentionis exorta, ita, ut Rex tanquam amicus in hoc tractatu comprehendatur.

30 Constituendi utrinque commissarii quatuor, qui examinent injurias & damna, quæ utraque pars ab anno 1611 ad 1652 in India Orientali, Brasilia, Moscovia, Groenlandia, se passam esse causatur. Si commissarii isti convenire nequeant, prædictæ differentiæ submittantur Protestantibus Helvetiæ Cantonibus, tanquam arbitris: & quidquid a commissariis, ab iis deputatis fuerit pronuntiatum, obligabit, & rite perficietur.

31 Hunc tractatum pars utraque firmiter observabit, & executioni dabit.

32 Batavi se obligant, quod Ordines fœderati, eorumque Præsides, Gubernatores, Præfecti militiae, præsentis & futuri, juramento se sint adstricturi, ad hunc tractatum in omnibus servandum.

33 Intra 15 dies hic tractatus utrinque ratificabitur, confirmabitur, mutua instrumenta extradentur, & publicabuntur: atque a tempore publicationis omnis hostilitas cassabit.

Subscripserunt & signarunt commissarii Protectoris & Batavorum, Westmonasterii 5 April. 1654.

Not. Batavi in hoc tractatu Cromvelo Protectoris & celsitudinis serenissimæ titulum tribuerunt. Confirmavit autem tractatum sua auctoritate de assensu sui consilii.

Post hanc pacem conclusam adjecti adhuc sunt duo articuli separati. Primus in tractatu comprehensus continet, his verbis: *Conventum est, quod in tractatu pacis, unionis, & confederationis inter Serenissimum Celsissimumque Dominum Protectorem Reipublicæ Angliæ, Scotiæ, & Hiberniæ &c. ab una parte, & Celsos ac Potentes Dominos Ordines Generales unitarum Provinciarum ab altera, includantur Cantones Helvetici Evangelici, Dux Holsatiæ, Comes Oldenburgicus, Civitates Hanseaticæ Lubeca, Brema, Hamburgum.*

Alter concernit Domum Auriacam; cum enim Wilhelmus III ultimus Oranienſis stirpis furculus, quatuor tunc annorum puer, natus esset ex Maria Stuarta, Caroli I Angliæ Regis, a Cromvelo & aliis Calvinistis crudeliter interempti filia, Cromwelus, qui totam Stuartorum Familiam excisam volebat, vehementer instat, ut Batavi promitterent, se neque, quem diximus, Wilhelmum, neque ullum ex ejus posteris, in supremum, ut vocabant, Capitaneum militiæ, aut classium Præfectum, electuros, eam causam prætexens, alias facile posse contingere, ut hoc fœdus rumpatur, & bellum recrudescat cum magno religionis reformatæ periculo.

Negabant initio Batavi, se eam conditionem inire posse adversus Domum, erga se tam bene meritam. Tandem vero in vota Cromveli concesserunt, ac declararunt, *se nullo unquam tempore electuros prædictum Arausionensem Principem, ullumve ejus lineæ in Locum-tenentem vel Admiralem suæ provinciæ, nec assensuros quoad suæ provinciæ suffragium, ut unquam ei summum in militiam Generalatus imperium conferatur.*

Quantopere hæc, versis in Anglia rebus, sint mutata, experita est posterior ætas, quæ non tantum vidit hunc Wilhelmum Locum-tenentem, & supremum Gubernatorem terra marique, anno 1672 a Batavis electum, sed etiam Regem Magnæ Britanniæ. Adeo versatiles sunt res humanæ & incerta consilia.

Exclusio
Domus
Auriacæ.

ARTICULUS IX.

*Observatio de Domo Auriaca & Gubernatoribus Belgii
Fœderati.*

Arausionensis liber in Provincia Principatus (sic dictus ab urbe 26.
Arausione, in qua tria celebrata fuerant Concilia Arausicana)
ab antiquissimis temporibus proprios Dominos habuit: per
fœminas postea devolutus, primum ad Domum Chabilionensem in
Ducatu Burgundico, dein vero ad Nossoviam in Germania. Ex
ea primus successit Renatus, dein Wilhelmus I Fœderati Belgii
Fundator & Gubernator, tum ejus filii Mauritius & Henricus, qui
magna auctoritate Rempublicam regebant. Henrici filius Wilhel-
mus II electus quidem pariter fuerat a Batavis Gubernator, seu su-
premus Locum-tenens, sed minus erat gratus; & cum Amstelo-
damum noctu cum armatis vellet obruere, paulo post inventus est
exanimis, non sine suspicione, anno 1650. Reliquit filium posthu-
mum Wilhelmum III, quem factio Löwensteinia nonebat Guber-
natorem usque ad anno 1672, quo Gallus irrupit; tunc enim Wit-
tiis occisis, ab omnibus provinciis fuit electus (excepta Frisia &
Gröninga, quæ Gubernatorem ex Familia Nassovio - Diecensi sibi
elegerant). Post mortem Wilhelmi III (qui Rex etiam Angliæ
fuerat) ab anno 1702 quinque provinciæ nullum Gubernatorem
substituerunt, donec anno 1728 Geldria & Transsalaria, Frisiæ
Gubernatorem Wilhelmum Frisonem pariter asciscerent, & anno
1747 reliquæ quoque provinciæ, & quidem ita, ut hæc dignitas
sit hæreditaria, deficientibus masculis ad fœminas etiam devol-
venda. Factum id in gratiam Georgii II Angliæ Regis,
cujus filiam Friso conjugem habebat. Natus est ex eo matrimonio
1748 Wilhelmus, qui 1751 patri in munere Gubernatoris, Archi-
thlassi & Capitanei Generalis hæreditario successit sub tutela ma-
tris, & quia, si Wilhelmus improlis decederet, devolveretur
hæc dignitas ad sororem ejus Caroli; nam obstabant initio Bata-
vi, ne Carolo Principi Nassavio Weilburgensi nuberet ob diver-
sitatem religionis, cum hic sit Lutheranus. Porro Wilhelmus III
1702 Diecensem Frisonem Principatus Arausionensis & aliorum bo-
norum hæredem testamento instituit. Sed opposuit se Branden-
burgicus, ad antiquius testamentum Henrici Auriaci avi sui materi-
ni, se referens, quo, velut fideicommissio, mater sua sit substituta

maſculis ex Henrico deſcendentibus.

Tenuit hæc lis ad annum 1732, quo hæreditas illa transactione diviſa eſt: & quidem Brandenburgo ceſſus eſt comitatus Moërfiæ, in Principatum dein converſus, Comitatus Lingentis in Weſtphalia, Herſtalli ditio, poſtea Eccleſiæ Leodiënſi vendita, Wateringa cum multis aliis in Belgio poſſeſſionibus: Friſoni vero obven-
runt Breda, Gravia, Flisſinga, cum multis aliis urbibus & ditio-
nibus in eodem Belgio. Arauſionenſis vero Principatus in pace Ultrajeſtenſi a Brandenburgo, ut Geldriam urbem reciperet, ceſſus eſt Regi Galliæ, qui extirpatis Calviniftis, eum anno 1732 in Principem Contium tranſtulit.

ARTICULUS X.

Continuatio belli Hiſpano - Gallici. Fœdus Galliæ cum Cromvelo.

27.

Hiſp.
Victoriæ.

Inter hæc, dum Angli Batavique de maris uſu certabant, Galli Hiſpanique de terræ poſſeſſione dimicabant. Belgium Hiſpanicum, Gallis opportunum, erat theatrum belli præcipuum; ſed cum ab anno 1649 turbæ civiles Franciam miſcerent, & a Batavis eſſet quies, Hiſpani magnas res geſſerunt; quippe, præter Barcelлонam & Caſalin, prima Cataloniæ & Pedemontii munimenta, Gravelingam & Dunkercam cum pluribus aliis urbibus in Belgio receperunt; &, quod eſt plurium inſtar urbium, Ludovicum Condæum Principem, quem cum pluribus Gallorum millibus, quos ſecum adduxerat, Mazarini odio Hiſpania debuit, futurum deinceps ad pacem uſque Pyrenæam momentum ingens adverſus patriam.

Clades.

At poſt compoſitos in Gallia belli civilis motus, aliam Belgium faciem induit; quippe Rex, Rhemis ſacro inunctus chrismate, expeditionem in Belgium, ut animos & alacritatem ſuis adderet, ipſe ſuſcepit, & primo quidem Stenæum ſubigit; dein verò ad ſolvendam obſidionem *Atrebatenſem* accurrit.

Quidquid Hiſpani roboris erat in Belgio, ad obſidendum Atrebatum, præcipuam Arteſiæ urbem, fuerat collectum. Aderant in caſtris præſentes quinque Principes, Leopoldus Wilhelmus Archidux Gubernator Belgii, Ludovicus Condæus, Franciſcus Nico-
laus

laus pro fratre suo Carolo, carcere detento, Dux Lotharingæ, Ulricus Dux Wirtembergiæ, Princeps Lignius, cum suis quisque copiis, multique alii Duces ac Proceres Hispani nominis.

In tertium jam mensem tenuerat obsidio, ingenti apparatu instructa, cum Rex atque Turenus Hispanorum castra, bina quantumvis fossa protecta, tanta ferocia aggrediuntur, ut relata insigni victoria urbem liberarent, universo hoste aut caeso. aut capto, aut in fugam acto. Celebratur maxime Hocquincurtii, in castra irrumpentis fortitudo: aliis partibus Turenus, Seneteræus, Aumontius irruperunt. Hispanorum 19000 a Condæo servata fuisse a clade, refert Tuldenius, scriptor illius temporis, Germanus, ad annum 1654, quo hæc gesta sunt.

Attrebatum
obsidione
liberatum.

Victoriæ complementum fuit ad Mosam *Carolomontii* expugnatio, urbis in Hannonia monti impositæ, quam Carolus V Imperator operibus etiam communiverat.

Acceperunt anno sequenti Gallis, sub Turenio militantibus *Landresium*, *Condatum*, *Fanum S. Gisleini*, permunita in Hannonia loca. Boviniacum captum a Gallis, receptumque ab Hispanis. Ad Bochanium, a Gallis tentatum, fortiter pro more dimicans Condæus vulneratus est, & circumseptus a Gallis, ense viam fugæ aperuit, vel ultro concessa est, ne caperetur cum periculo capitis. Quamvis enim tunc hostis esset (patriæ an Mazarini?) amabatur tamen, & summe æstimabatur a Gallis, præsertim militibus, tum a sanguine Regio, tum maxime a virtute militari.

Urbes captæ.

Anno 1656 *Leopoldus Wilbelmus*, post gestam per decennium gravissima inter bella Belgii Præfecturam, missionem tandem, dum optatam, a Rege Hispaniarum obtinuit, valetudine Imperatoris fratris inclinante, & ætate Leopoldi nepotis adhuc tenera, Austriæ rebus necessarius. Successorem, Belgii Governatorem, Philippus IV misit filium suum *Joannem Austriacum*, 27 tunc annorum florentem ætate, Cataloniae antea Proregem.

Leop. abdi-
cat Præfectu-
ram.

Succedit
Joan. Austr.

Et præclara sane fuerunt imperii auspicia, quibus cladem superioris anni insigniter reparavit. Valencenas (*Valentinianam* veteres dixerunt) fortissimam in Hannonia ad Scaldin urbem, omnibus viribus oppugnabant Galli, Turenio, Seneteræo, & Fabero Ductoribus. Ad hanc maximi momenti civitatem obsidione liberandam, ut Gallis innotesceret, omnes nervos novus Governator intendit. Sed a superiobus cladibus paucæ restabant copiarum reliquæ. Unde omni cura ad eas augendas incumbens, decem ar-

mate.

matorum millia, prius a Cæsare exauctorata accepit, duo millia Franciscus Lotharingus, a Gallo, ad quem defecerat, redux, adducebat, alia Wirtembergius, alia ex Belgis & Hispanis collegit; quorum ipse Ductor supremus, comitantibus Condæo, Wirtembergio, Lignio, Caracena, præstantibus bello viris.

His ergo Ducibus & copiis fretus Austrius Gallorum castra adortus, tertio insultu illa perrupit, ingenti hostium strage, direptis tormentis, & impedimentis. (*anno 1656.*) Receptum mox Condatum, & Fanum S. Gislæni, priore anno amissa. Supplicatione publica solenniter instituta, dictæ DEO Evcharistico, & propitiæ ejus Matri laudes.

Hac clade affecti cum essent Galli, ut majori vi Belgio incumberent, Mazarinus, præter tractatum commerciorum (jam anno 1655 conclusum) similem ferme illi, quem Batavos inter & Anglos sancitum retulimus, novum fœdus anno 1657 cum Cromwelo iniit, contra Hispanos potissimum.

Conventum quippe in eo, ut utriusque opera bellum in Belgio impigre continuetur, cureturque, ut potissimum Flandriæ maritima oppida occupentur.

Ostendam, Dunkercam, Neoportum, & Gravelingam Anglorum fore, reliqua expugnanda Gallorum. Illis mari, his terra agendum. Nec desistendum bello, nisi utrisque fuerit satisfactum. Assistendum Sueco contra Danum, ejusque fœderatos in Balthico, Anglo classem, Gallo nummum suppeditante. Promovendum quoque communi studio bellum in Catalonia & Italia.

Hoc grandi fœdere, simulque aliquot millibus equitum, quos Ulricus Wirtembergius, ab Hispano deficiens, adduxerat, Francus auctus, *Cameracum*, primæ magnitudinis in Belgio urbem, quæ ad Imperium olim pertinerat, obsedit. Modicum inerat præsidium; sed ubi Condæus & Lignius, perruptis hostium castris, cum selecta manu in urbem evaserant, obsidio soluta est, atque ad *Mommedium* in Luxemburgicis meliori fortuna est conversa; nam tertio oppugnationis mense dedere se Gallis urbs coacta est, vel potius pro tanto sanguinis pretio vendita, ut emptores pœniteret.

Minori impendio Fanum S. Venantii in Artesia, a Gallis, Borburgum & Mardicum in Flandria ab Anglis Gallisque fuit expugnatum. Ab Ardresii vero obsidione non levi cum clade a Turenio repulsi sunt Hispani. Atque hæc fuit expeditio anni 1657 minus felix Hispanis, Condæo post liberatum Cameracum Gandavi ex febris decumbente.

At

At multo infelicior illis fuit annus 1658; quamvis enim Condæus, Gallico *Hesdini* præsidio cum Marefcallo Hocquincurtio ad se attracto, urbem Hispano subjiceret, & Ostenda Spinteleti dolo (prout supra in Gallicis fuit narratum) fuerit servata, cum non exigua Anglorum Gallorumque clade; Joannes tamen Austriacus Gubernator, bis prælio victus a Turrenio, florem exercitus, tormenta, *Dunkercam*, *Gravelingam*, *Aldenardam*, *Menenium*, *Ipras*, insignes Flandriæ civitates amisit: Turrenio, Fertæo-Sene-terræo, Joan. Aust. & Faberto, Gallorum Ductoribus, victorias suas strenue prosequentibus.

Protritus jam satis erat per continuum 24 annorum bellum Belgicus Martis campus. Pax Hispanis, rebus suis retro labentibus, & aliunde gravi adhuc bello Lusitanico distractis, erat necessaria, ni, Gallo & Anglo incumbente, totum suum Belgium vellent amittere, & fortassis etiam Cataloniam. Rex Galliæ Sponsam Hispanam, Philippi IV filiam (proh! quanta adhuc bella parituram!) prenabat. Mazarinus propter foedus Anglicum, & relictam Cromwelo Dunkercam, alias apud Catholicos male audiebat. Alexander VII summus Pontifex, cum Electoribus Moguntino & Colonienfi, pacem impensissime commendabat.

Unde primum in inducias, postea in Pacem *Pyrenæam* fuit conventum, anno 1659. Tractatus hujus epitomen infra dabimus, ubi de statu Hispaniæ agendi erit occasio; neque enim de solo Belgio, sed & de Catalonia & Italia, in quantum ad Hispanos spectat, fuerat transactum.

De Belgio conventum, ut Galliæ relinquatur in *Artesia* Atrebatum, Lillerium, Lentium, Hesdinum, Tereona: in *Flandria* Gravelinga, Muniti Aggeres, Burburgum: in *Hannonia* Landresium, Quercetum: in *Luxemburgicis* Thionvilla, Mommedium, Damvillerium, Ivodium, Chavantium, Marvilla: in *Gallia* Rocroyum, Castelletum. Limcampium.

Contra vero Hispano restituitur Aldenarda, Duxmida, Furna, Menenium, Cominaum, Ipræ. Dunkerca vero interim in manibus Anglorum relictæ fuit.



ARTICULUS XI.

Alterum bellum Anglo - Batavum. Pax & fœdus. Bellum Gallo - Belgicum, ob prætentum Jus Devolutionis. Angli, Batavi, imo & Austriaci negant Hispanis auxilium: & cur?

28.

Belgio Hispanico ad quietem aliquam composito, Fœderatum rursus arma cepit, altero cum Anglis navali bello implicitum. Causa eadem, quæ primi, gentis utriusque nauticæ æmulatio. Et primum quidem inter jurgia mercatorum itetit. Secuta navium direptiones, ac denique anno 1664 apertum bellum. Britannam classem ducebat Jacobus Dux Eboracensis, Caroli II Regis Frater, Batavam Obdamus; cui, primo jam prælio cæso, substituti Trompius & Ruiterus; quorum tanta erat audacia, ut in ipsa ad Londinum Thamesis ostia se immitterent, ad cremandas Anglorum naves.

Bellum Anglo - Batavum.

Alterum prælium multo fuit pertinacius, in quartum usque diem acerrime continuatum, donec tempestas illud diremit, parte utraque sibi canente Victoriam. Bellum hoc nutritivit Francus, atque ad speciem accessit Batavis, qui tamen querebantur, spectatorem illum egisse.

Pax Bredana.

Anno 1667 *Pax Bredæ* inita, in plerisque articulis haud dispar illi, quæ paucos ante annos cum Cromwelo fuerat conclusa; adjectumque fœdus *Defensivum*, quo in casum invasionis sibi mutuo promittunt 40 naves bellicas, hominibus & tormentis probe instructas, atque insuper 6000 pedites, cum 400 equitibus.

Bellum Gallo - Belgicum.

Bellum istud Anglo - Batavicum aliud mox excepit Belgio - Gallicum, & quidem ex ea radice enatum, unde perpetuæ pacis nexum pullulare oporteret, ex matrimoniali videlicet fœdere Ludovici Regis cum Hispana Principe.

Ea quippe in Belgicis quibusdam provinciis, uti Brabantia, Arctesia, Geldria, viget consuetudo, municipalibus etiam statutis confirmata, ut liberi primi matrimonii præferantur in capiendâ hæreditate liberis etiam masculis secundi conjugii: *Jus Devolutionis* Belgæ appellant.

Jam

Jam vero Philippus IV Rex Hispaniæ duas uxores habuit. Ex Ob Jus De-
prima suscepit Theresiam, Ludovici Regis conjugem, ex altera ^{volutionis}
Carolus II sex tunc annorum puerum. Gallus igitur jus in Bel-
gium per mortem Philippi IV, quam anno 1664 oppetiit, ad ux-
orem suam, aut Delphinum, ex ea natum, devolutum existimans,
centum millibus armatus Belgium invasit anno 1667.

Miserandus erat Belgii status, milite, ære, apparatu bellifer-
me vacuus. Hispania morbis suis laborabat, in puero vagiens sub
matre tutelam gerente. Accessit perpetua Gubernatorum muta- ^{Belgii Status.}
tio, quorum modico tempore quatuor erant, Joannes Austrius,
Ludovicus Caracena, & Castello-Rodrigius, Marchiones, Mon-
tereyus; ab Anglis Batavisque, Ludovici Regis artibus jam captat-
is, spes nulla.

Quippe Carolus II Angliæ Rex, qui apud volubilem gentem
res suas necdum satis firmaverat, nec illi ob venditam Gallis Dun-
kerkam, motum nuper in Hollandos bellum, & Religionis Catho-
licæ suspicionem, admodum gratus, Galliam cum materno lacte
imbibisse visus est, totumque se Ludovico, amitino suo, ceu la-
bantis regni fulcro, applicuit.

Unde Oratores Domus Austriacæ, subsidia petentes, frigido
responso dimisit; gravi bello vix defunctum non posse se in gra- ^{Angli re-}
tiam alienæ Domus novo immergere: Cæsarem quoque atque Hi- ^{sponsum.}
spanum nihil opis attulisse patri suo, magis indigo, sibi que ad
comparandum avitum regnum: timores, quos spargerent, pro-
cul esse ab Angliæ, fossa illam sat magna esse obvallatam: Bel-
gium prius omne Hispaniam, Germaniamque adeo fore perrum-
pendam. Interea sat temporis lapsurum capiendo consilio.

Batavi, quibus periculum propius, domesticis dissidiis scissi, ^{Batavorum}
in duas abibant partes. Altera erat *Aurausica*, quæ Wilhelmum ^{dissidia.}
III juvenem Gubernatoris dignitati restitutum volebat. Huic An-
glus avunculus, & Brandenburgus affinis, favebant. Altera *Lö-
wensteinia* (ab arce hujus nominis sic dicta, in quam ultimus Gu-
bernator factionis hujus capita conjecerat) *Wittiorum* fratrum
auctoritate suffulta, Præfecturam illam suppressere satagebat; huic
addixit se Gallia. Principes Imperii a capite erant divisi: atque
in foedus suum Rhenanum, quo transitum militi in Belgium nega-
bant, abstracti, Gravello & Grammonvillio, Franciæ Oratoribus
facundia & largitionibus Ratisbonæ & in aulis dominantibus.

Austria.

Ipsa adeo aula Cæsarea, Aurspergii maxime auctoritate, cunctabatur, quod, Hispanæ infirmitatis gnara, sibi uni bellum gravissimum incubiturum metuens: pauciores esse Cæsaris copias, quam ut tantæ moli sufficiant: in novos autem delectus nec pecuniam, in Bella Turcica & Hungarica expensam, nec tempus suppetere: fœderibus opus fore: sed unde illa petenda, tota Europa largitionibus Gallicis in lethargum data? Et quantumvis Cæsari sat copiarum præsto foret, qui obstantibus Imperii Principibus in Belgium trajicerentur, nullam rationem apparere, nisi Rhenanum ipsorum fœdus, Brandenburgii nupera accessione tam validum, prius rumpatur, aut vi aperiatur via, quod imprudentiæ foret, Crequio præsertim cum iusto exercitu in Lotharingia excubante. Consultius facturam Hispaniam, si urbium aliquot impendio pacem redimat, ne totum amittat, aut cum Lusitano utcunque transigat, & militem ac 13 milliones, quot annis in bellum illud conjici solitos, in Belgium transferat.

ARTICULUS XII.

De Jure Devolutionis.

Libellis quoque Gallum inter & Hispanum certatum. Ille jus Devolutionis, in Belgio vicens, adstruebat: abdicationem Theresiæ fuisse irritam, atque juribus omnibus repugnantem. Neque dotem, Theresiæ integre fuisse solutam, sub cuius conditione abdicatio sit facta. Cæterum Regem moderatione usurum, & parte contentum, jus in reliqua abdicaturum. Hic vero reposuit, aliam multo esse Regiarum personarum rationem, atque privatorum de plebe hominum: supremorum Principum hæreditates non esse definiendas ad Romani Juris aut Provincialium legum formulam. Abdicationem luculente esse factam, & quidem absolute, nulla adjecta conditione; hanc non modo, recepto apud fœminas Principes more, ubique gentium haberi pro valida, sed etiam ex consuetudine apud Nobiles fœminas in Belgio vigente; earum enim renuntiationes, in favorem fratrum, qui soli stemma nomenque Gentilitium propagant, factas, a nemine vocari in dubium.

Cæterum renuntiationem Theresiæ non esse factam in eum casum, quo masculus hæres superesset; nam tunc illum proprio suo jure, se-

xus

xus prærogativa, recepto in omnibus regnis more successurum; sed abdicationem Theresiæ respicere casum, quo nullus masculus superesset.

Antiquissima in hanc rem esse documenta. Jam anno 1204 Rom. Regem Philippum in Principum apud Confluentiam conventu succedendi in Brabantia leges statuisse his verbis: *Insuper regia nostra auctoritate statuimus, & memorato Duci concedimus, ut filia suæ, si masculum heredem non habuerit, in feudis suis libere ei tanquam masculi succedant.* Idem sancitum anno 1549 a Carolo V ratione Geldriæ & Zutphanæ.

Nullum proferri posse exemplum, quo fœmina in regimine publico ejusdem gradus masculo fuerit prælata. Contra vero non deesse exempla illustria, quibus id genus jus devolutionis prætensum fuerit neglectum. Carolum V & Philippum II mortua prima uxore de provinciis Belgii libere disposuisse; quod facere non potuissent, si ad liberos primi matrimonii per mortem matris jam fuissent devolutæ.

Si jus devolutionis in Belgii Principum successione viguisset, Philippum III non fuisse successurum, utpote ex quarto Philippi II matrimonio genitum, cum adessent sorores ex tertio ejusdem conubio natæ. Igitur successuram fuisse primo Isabellam, atque post hujus mortem Catharinam, Carolo Emmanueli Sabaudicæ Duci nuptam, Domumque Sabaudicam, ex ea in hodiernum diem propagatam: & tamen neminem successionem Philippi III, ex posterioribus nuptiis geniti, ex hoc capite impugnasse. Hunc autem casum prorsus eundem esse cum nostro; nam sicut in hoc Carolus II ex posteriore matrimonio erat prognatus, sic in illo Philippus III.

Carolus V anno 1549 legem, assentientibus Ordinibus, tulisse, ut omnes Belgii provinciæ sub uno Principe unitæ maneant; hoc autem fieri non potuisset, si in aliquibus jus viguisset, & sic diversa in diversis provinciis fuisset succedendi ratio.

Quapropter a populari consuetudine aliquarum provinciarum (ut inquirunt) nulla est illatio ad Principum successionem; præterquam enim, quod, prout ex dictis elucescit, alia de ista sit dispositio, alius usus, diversa etiam est ratio; privata etenim bona facilius ad fœminas devolvuntur, quam Principum populorumque publicum regimen. Unde jure quodammodo gentium receptum est, ut in regnis & principatibus fœminæ non succedant, extantibus masculis, idque sine discrimine, an ex primo, an vero ex secundo matrimonio sint

geniti: imo in multis incapaces omnino successionis sunt fœminæ; nisi speciali privilegio sint habilitatæ; ut constat ex successio-
nibus in Principatibus Romani Imperii. Et in ipsa Gallia quam
longe dispar est ratio. Quare privatorum illam specialemque con-
suetudinem, a communi usu abhorrentem, nullatenus ad princi-
patus extendendam esse contendunt.

Neque etiam propter solutam necdum dotem renuntiationem
rescindi; nam promissorem posse purgare moram. *L. 27 ff. de*
Verb. obl. Et, si rigidissime procedatur, non esse cum moræ effe-
ctum, ut contractum rescindat, sed ut damnum, quod inde eve-
nerit, sarcitur: ita, si emptor in solvendo pretio moram tēcerit,
usurarum, seu ejus, quod interest, præstatione defungatur, illa-
so manente contractu: prout ipsi etiam Galliæ Jurisconsulti passim
doceant, renuntiationes regiarum filiarum ratam agnoscentes, nec
juris privati legibus, interprete etiam consuetudine, subjectas.

Progreſſus
Lud. Regis.

Sed facilius erat Hispanis, pennis quam gladiis dimicare. Ro-
driguez Gubernator tricena, quæ habebat, millia, urbibus præ-
sidio imposuit. Sed quia nullus erat campestris exercitus, Gallus
trimestri spatio Carolo-Regium, Furnam, Athum, Insulas, Tor-
nacum, Duacum, Montes, Aldenardam, Cortracum, Armenta-
riam, venatione quodammodo cepit, anno 1667 & anno sequenti,
rigente hyeme, totum Burgundiæ Comitatum per Condæum,
unius ferme hebdomadæ spatio.

Cur pacem
inierit.

Facile tunc Ludovico fuisset, reliquum etiam Belgium victo-
riis percurrere; sed videbat grandem coire tempestatem, quæ tan-
dem exoneratura se esset in Galliam. Regina Hispaniæ pacem,
quamvis duram, inire compulsa cum Lusitania: atque inde Joannes
Austriacus 20000 propediem adducturus nuntiabatur. Tota
Europa videbat, quo tanti Franciæ progressus essent evasuri, nisi
ad commune velut incendium restringendum accurreretur. Anglia,
Suecia, Batavia ad *Triplex Fœdus* percutiendum se accin-
gunt; plures alii Principes eidem accessuri videbantur. Cæsar, qui
desertæ Hispaniæ, sororis adeo suæ Reginæ, & nepotis Caroli in-
vidia flagrabat, exauthorato Auerſpergio, quem Grammonvil-
lius, Gallicus Viennæ Orator, ab Hispaniæ rebus alienaverat, mis-
surus haud dubie erat auxilia. Legationibus etiam frequentibus
apud Ludovicum agebatur.

Quapropter Gallia incunte æstate inducias pacta, Hispanis
optionem fecit, an mallent occupatas urbes in manibus Franciæ
relinquere, an vero pro iis restituendis Luxemburgum, Camera-
cum

cum, Ariam, Audomarim tradere. Sparsus quoque (Henrico Brewero, Tuldenii continuatore attestante) per Europam rumor, deliberare Hispaniam, an non expediret, potius Ludovico totum Belgium tradere, utpote immensam atque nunquam explendam auri voraginem, in quam vel solus Philippus IV ultra centum milliones coniecisset, ea tamen conditione, ut Rex Galliarum omni præensione in Navarram, reliquamque Hispaniarum Monarchiam, etiam in casum, quo Carolus Rex (qui ob imbecillitatem virum non diu victurus videbatur) improlis obiret, penitus cederet, Ruscinonensem Comitatum, Pignerolium, Philippoburgum, Brisacum, totamque Alsatiam ac Lotharingiam restitueret.

Relatio Breweri de abdicando Belgio.

Credebatur, ab ipsis Hispanis hic rumor sparsus, ut Batavos Anglosque imminentis sibi periculi metu a torpore tanquam ad communem causam excitaret.

Ut ut hæc se habeant, de quibus neutra, credo, pars serio cogitavit, commovente se tandem omni Europa, pars utraque ad pacem, Aquisgrani ineundam consilia sua inclinavit. Reddita per illam Hispanis Burgundia; urbes, in Flandria occupatas Ludovicus retinuit. Placet, hujus tractatus summa capita breviter perstringere.

ARTICULUS XIII.

Pax Aquisgranensis

Inter Regem Galliarum & Hispaniarum inita anno 1668.

In exordio præmittitur, autoritate, paternaque sollicitudine S. D. N. Clementis IX Papæ, ejusdemque postulationibus & instantiis; tum pluribus litteris scriptis, & per nepotem etiam ejusdem Cardinalem Rospigliosum officiis interpositis, accedente complurium Regum, Potestatum, S. R. I. Electorum, & Principum, diligenti studio, per Colbertum & Baronem de Bergeyck, Regum Commissarios Plenipotentiariorum, in sequentes articulos Pacis fuisse conventum.

29.

I Inter utrumque Regem, eorumque hæredes, regna, provincias, subditos &c. sit perpetua pax, confœderatio, & concordia, prout fraterno sanguine junctos decet, cum oblivione omnium offen-

offensarum: alterque alterius commoda sincera mente procuret, & promoveat.

2 Post confirmationem & promulgationem hujus pacis statim omnis hostilitas ubique cesset. Omnesque captivi sine litro liberi dimittuntur.

3 Rex Gallix retinebit Carolo-regium, Binckam, Athum, Aldenardam, Insulas, Tornacum, Armentieram, Furnas, Duacum, Montes, Cortracum, Elcarpii propugnaculum, aliasque urbes, munimenta, locaque omnia, quæ anno elapso in Belgio occupavit, cum omni jurisdictione, juribus, appertinentiis.

4 Rex Catholicus pro se suisque hæredibus abdicat omnia jura, quæ in prædictas urbes, & loca habuit, eaque in plenum regis Christianissimi, ejusque hæredum dominium in perpetuum absque ulla reservatione transfert.

5 Rex Christianissimus mox a publicatione hujus pacis comitatum Burgundicum, cum omnibus urbibus & locis occupatis, integre & absque omni reservatione Regi Catholico restituet.

6 Quæ ultra hic expressa usque ad promulgationem pacis fuerint erepta, utrinque fideliter restituentur.

7 Liberum sit utrique Regi sponsores hujus tractatus assumere Principes ac Status alios, qui voluerint eidem accedere.

8 Pax Pyrenæa in omnibus observetur, exceptis iis, quæ hic coronæ Gallix cessa sunt, & iis, quæ Lusitaniam respiciunt, cum qua Rex Catholicus particularem pacis tractatum iniit.

9 Ut autem certior securiorque sit ista transactio, in Curiis & Parliamentis, Parisiensi aliisque promulgetur, verificetur & innotuletur, uti etiam in Curiis Hispanicis & Belgicis; omniumque ratihabitio, obsignatio, commutatione intra trimestre facienda, absolvatur; atque Rex uterque solenni jurejurando, in præsentia alterius partis emittendo, omnia, in hoc tractatu contenta, se sancte servaturum confirmet.

Præter Carolum Colbertum & Baronem Bergeyckium subdelegatum Castrolodrigii subscripserunt Legati summi Pontificis, Electoris Moguntini & Colonienfis, atque Episcopi Monasteriensis.

ARTICULUS XIV.

Fœdus Triplex: ejus causæ. A Lud. Rege disruptum. Consilia Galliæ de invadendis Hollandis. Ejus ad Anglum, Hispanum, Cæsarem oratio pro fœdere contra Batavos. Cæsar bellum contra Lud. Comitibus juadet. Solus Borussus annuit. Colonienfis & Monast. Oratio. Certamen de Borussis.

30.

Post conclusam hanc pacem ad exitum perductum fuit *Fœdus Triplex*, jam ante cœptum, inter Anglos, Suecos, & Batavos. Fœdus Triplex.
Causas illius altius aliquantum repetamus. Ad hæc ferme usque tempora formidanda Europæ, quin orbi videbatur vasta Domus Austriacæ potentia, quæ præter immensos in utraque India terrarum tractus, dimidium Europæ possideret. Hinc Gallia, Anglia, Batavia, Suecia, & Protestantes universim omnes in id consilia sua & studia contulerant, ut Austriacam magnitudinem deprimerent.

At vero, postquam Septem Belgii Provinciæ, cum omni ferme Orientali India, & Lusitania a corpore se separaverant; postquam commercia & opes alio fuerant derivata, atque Austriaca Familia utraque, Germanica & Hispana, continuis tot gravissimisque bellis exhausta; & maxime, postquam Gallia sub Ludovico XIV exporrectis in omnem partem incrementis, caput extulit, alia visa est status ratio, & adversus Franciam vertenda consilia, pangenda fœdera, ut Europæ conservetur æquilibrium. Hinc videas, posthac omnium ferme nationum arma in Ludovicum conversa.

Præcipue vero Batavos Anglosque terruit novissima in Belgium Burgundiamque irruptio, & armorum progressus ingens. Hinc initum fœdus inter Anglos & Batavos primum, tum accedente Suecia *Triplex* appellatum, magno Europæ plausu exceptum. Finis illi obtensus orbis Christiani tranquillitas, & pax Aquisgranensis, contra quemcunque perturbatorem defendenda.

Causa.

Cæsarem non invitarunt, ne suspicionem præberent Galliæ, aut ab eo, Hispaniæ addicto, in bella raperentur, non necessaria. Sed neque ipse hoc fœdus appetiit, ne casus forte contingeret, quo in Hispanum, si Aquisgranensi paci non adquiesceret, stringere arma cogeretur.

Ruptum. Eo fœdere se peti, Rex Ludovicus perspiciciens, facili manu illud disruptit, inito novo in perniciem Batavorum cum Anglo commerciorum fœdere, & Sueco alio abstracto.

Confilia de invadendis Batavis. In Batavos deinceps, præcipuos trini fœderis auctores, Rex sua vertit consilia. Impensum triennium apparando in illos bello. A Suecia nihil erat, quod timeret, pensionibus ac fœderum nexu sibi alligata. Danum irritant Batavi, menturam portiorum & telonii in Sundico præscribentes. Principes Imperii bello propter Hollandos implicari nolle sperabat, eosque aut neutras, aut suas partes amplexuros. Hispaniam, alias satis languentem, acceptarum a Batavis cladium memorem fore credidit. Lusitanum ob partum auxilio regnum, suum censebat. Colonienfis & Monasterienfis, qui jam ante cum Batavis bellum gesserat, anno 1656 pace finitum, cum Gallo in fœdus ibant.

Colberti ad Anglum oratio contra Batavos. Sed summum momentum erat in Anglia, quo illa se verteret. Misso igitur ad Carolum II Regem, patruelem suum, Colberto, intimæ admissionis Ministro, callido ac facundo, fœdus adversum Belgas Fœderatos obtulit. Diligenter ille legatione sua perfunctus, quanta ex eo Regi totique Britannia emolumenta forent nascitura ostendit.

Non esse ferendum ultra gentis, e piscatoriis nuper tuguriis emergentis fastum, coronatis etiam capitibus insultantis. Pelagi dominium, Magnæ Britannia proprium, ab ea invadi: omnia inquietari maria: surripi aliis Nationibus & Angliæ præsertim commercia: orbis monopolium Amstelodami figi: immensas accumulari opes: ea per Europam esse rerum pretia, quæ Hollandorum statera defigat, quin omnem Europam ei vectigalem esse. Transmarinas merces atque thesauros Indiarum omnes propemodum huc deportari, tantasque in divitias excrevisse mercatorum societatem utramque Indicam, præsertim orientalem, quibus regna emerentur. Ab hac, anno 1602 cœpta, intra sex annos tantas comparatas, ut ultra sortem collatam 36 Imperialium milliones lucrarentur. Incredibilem ab illis in Indiis Orientalibus ereptum Lusitanis aliisque gentibus terrarum tractum, quem 11500 armatis, 160 navibus defendant, laborantibus in eorum usuras ultra 80000 hominum. Similes ferme opes initio collectas ex America, dum Brasiliæ thesauros asportarent.

Ipsam Angliam commerciis suis privari. Licet enim cætera prætereantur silentio, ex solo piscatu halecum in mari Britanno, eos quot annis sex milliones florenorum lucrum capere, eamque

pisca-

piscationem sibi propriam vindicare in alieno pelago, quin ullum solvere velint portorium.

Ex his aliisque quæstuosis per omnem orbem nundinationibus tantas collectas opes tantumque potentiæ conflatum, ut centum armatorum millia suis stipendiis possint alere, conflante ex omni Germania & Septentrione ad auri Hollandici fulgorem milite.

Nec minores vires esse maritimas; anno 1666 centum majores bellicas ad Texelam stetisse in anchoris armatas, cum 25000 magnis onerariis mariæ, & 300000 lembis, lintribus & phafelis lacus & canales oberrare.

Viderent Britones, viderent nationes cæteræ, quo tanta opulentia, magnitudo tanta, ni frænum injiciatur, sit evasura: quantis jam nunc terra marique viribus polleant. Eundem profecto obviam crescenti in dies potentiæ. Singulos fore impares: juncta opera dejiciendas portentoso Colosso superbas cristas.

Meminisset Angliæ, quanta jam in Indiis, in mari, in Europa a nova hac in orbe gente sit damna passa, quam immanes sumptus impensi, quanta derivati alio lucri detrimenta. Angliæ & Galliæ auxilio Batavos non modo in libertatem assertos, sed in eam etiam amplitudinem fuisse evectos. Jam eam beneficio gratiam rependi, ut in utrumque regnum insurgant.

Habere, quod timeant, coronatos vertices, etiam a suis subditis, si aspiciant, liberas Respublicas tanta florere rerum abundantia & felicitate. Salivam jam motam Britannis: experiri id Regem, expertum tristi fato parentem, dubio relicto, quid eventurum fuisset, si Cromwelus potestate sua non fuisset abusus: gliscere adhuc igniculos sub cinere. Parricidas contra fidem pacis Batavico sinu foveri, facileque conjicii posse, quid Hollandi, Regum ofores, essent acturi, si qui in eorum ire vellent exemplum. Curandum, ut facere non possint, quod essent facturi.

Totam Galliam fore promptam tuendo Stuartorum Regio, sibi que cognato, sanguini, si quid vis inimica auderet. Totam Franciam patere Britannæ commerciis; quin igitur caperent emolumenta, quæ in Hollandos hætenus redundarunt? Quin fœdus fraternum æternumque conjungeret, quos idem sanguis fructusque fœderis tam arcte conjungant?

Bataviam inter Angliæ Regem ejusque nepotem Wilhelmum Principem Auriacum, interque Hispanos, Gallos, eosque, qui auxilia conferrent, posse dividi, ut omnes inde augeantur, & emolumentum capiant.

Audiit haud illubenter legati orationem Rex Carolus, & cum alias jam esset in Galliam pronus, quam respiciebat velut certum in omnem casum coronæ suæ vindicem, in foedus condixit, bellumque, Regio suo, si subsidia negaret Parlamentum, sumptu gerendum: dicitur tamen sibi pactus Zeelandiam, nepoti vero Auriaco Hollandiam.

Ad aulam
Hispanam
oratio.

Minus faciles aures Madriti apud Reginam Tutricem filii Regis Villarius Legatus invenit. Omnes ille nervos intendit, ut persuaderet foedus in Batavos, vel ut Hispaniam illis subtraheret: cogitarent, aiebat, quam foeda fuerit, quamque perniciofa Hispaniæ Batavorum defectio: quot probris & contumeliis affecta ac publice prostituta: quanta damna per 70 annorum bellum illata, centum auri millionibus non satis æstimanda, eo tandem exitu, ut gratiæ rebellis plebis debuerit, prout ei lubebat, in miseram pacem posse descendere, illique omnia, quæ optabat, relinquere.

Nunc tandem illuxisse diem, tot injuriarum obstinatæque rebellionis vindicem, quæ pertinaciam frangat, & coronata capita veteresque dominos suos revereri doceat. Non diuturna opus expeditione fore. Jam istum Galliam inter ac Magnam Britanniam in hanc rem arctum foedus: accessisse Coloniensem & Monasteriensem Præsules, provinciarum suarum situ opportunos, multis gravibusque in perniciem rei Catholicæ injuriis a Batavis affectos.

Philipum II, olim Hispaniarum Monarcham, quamvis gravibus bellis distentum, non committendum putasse, ut Hollandi in Truchsessiana illa procella urbes, Ecclesiæ Colonienfi ereptas, retinerent, sed per Farnesium illas occupatas, sacro Principatui pro sua pietate restituisse: captam denuo a Batavis Rhenobergam, aliaque ad Rhenum castella, & usque in hanc diem inique detineri: Sacerdotes Dei in carceres rapi, tota Batavia Religionem sanctam exulare. Agi profecto Divinum cultum, Religionemque Catholicam, a Rege Catholico non deferendam: in totum Belgium illius libertatem facile reduci posse. Erigendum denuo impie dejectum vexillum crucis, Christianæ trophæum victoriæ.

Sed neque permittendum, ut gens palustris heri per rebellionem tenuibus e principiis nata, in Reges dominationem impotentem exporrigat. Proci sum nuper a nundinatoribus istis fastuosum numisma, in quo ex una parte visatur Thetys cum Leone, velut Bataviæ insigne, ex altera parte privata singularum septem provinciarum insignia, cum fastuosa hac inscriptione, omnibus Regi-

Regibus, Hispano præsertim summopere injuria: *Afferitis legibus, emendatis Regibus, vindicata marium libertate, pace egregia virtute armorum parta, stabilita orbis Europæi quiete.* Quid hoc aliud, quam Hispaniæ velut protritæ, insultare?

Et qui ferenda nundinatio avara in orbem terrarum extensa? Possideri quidem ab Hispanis in America utraque ingentes regionum tractus, sed Hollandos iisdem frui: ad illos fundum pertinere, ab istis succum exugiri. Esse & aliis populis maria, flumina, portus, naves: ex commerciis cum Gallia & Anglia plus emolumenti ab Hispanis, quam a Batavis posse percipi. Quam autem nulla in his spes Hispaniæ, ex nupero bello colligi, quo nec pedem moverint. Facile tunc per eos fuisse, totum Belgium Hispanicum occupare, nisi Regis sui moderatio pro jure suo *Devolutionis*, quod certum credidisset, paucis fuisset contenta: sed & hæc, per pacem Aquisgranensem cessa, restitutum, adjecturum & alia, si regina induceret in animum ad commune fœdus in rem suam accedere.

Neque eam esse Regi suo mentem, ut Bataviam sibi vendicet, sed ut æquis portionibus dividantur; vel, si hoc non placeat, ut fœderati singuli diversis locis aggrediantur, & quod quisque occupasset retineret. Sin autem Hispania Regis sui justis armis se vellet opponere, cogitaret, Burgundiam & Belgium Hispanicum Gallici fore belli pretium.

Minus grata erat legati oratio. Unde verbis dubiis dimissus est. Hispaniaque ad bellum se paravit. Batavi vero ex Belgio Hispanico a Montereyo Governatore militem receperunt, ad augendum Trajecti, Buscoduci & Bredæ præsidium. Initum paulo post Cæsarem inter, Hispanum & Batavos fœdus, quo Belgium Hispanicum in statum, quem per pacem Pyrenæam est consecutum, reponatur, Fœderatum vero in præsentem conservetur.

Nec felicior in aula cæsarea fuit Grammonvillius, eadem ferme, qua Villarius in Hispania, oratione usus. Meminisset ^{Ad Cæsarem.} Domus Austriaca, quanta a rebellibus Batavis pertulisset. Adesse tempus justæ ultioni; vindicaret antiquum Burgundiæ patrimonium: Regem suum, Lusitaniam, Angliam, Sueciam, Daniam, Italiam, pluresque Imperii Principes adjutores fore.

Hostem Imperii continuum esse Batavum, qui Rhenobergam, sacrum Ecclesiæ Colonienfis patrimonium, aliaque ad Rhenum Germaniæ claustra tanto jam tempore pertinaciter insideret, atque

Monasteriensis Præfulis jurisdictionem sacram & politicam inique circumscriberet, non sine gravi Religionis detrimento.

Fuisse eam semper laudem Augustissimæ Domus Austriacæ, ut gloriari posset, non modo orthodoxæ Religionis incremento se opposuisse nunquam, sed præsidium etiam & tutelam exhibuisse. Objectum propterea non raro Gallis, quod cum alienis a vera fide populis fœdera ineant, & perversum dogma in suo quidem regno oppugnent, in alienis vero terris foveant. Non esse credendum, quod Austriaca pietas nunc primum a tanta laude & Religionis sanctæ studio sit deflexura.

Esse autem hoc tempus opportunum, quo genuinus Numinis cultus, atque Catholicæ Religionis decus in totam, a qua tamdiu exulavit, Bataviam reduci queat.

Deprimendum etiam factum superbæ gentis, quæ Regibus quoque se æquare attentet; neque ferendum, ut auctis in immensum rerum, quas Germaniæ infert, pretiis, populos emungat, & tributarios velut sibi faciat.

Neque timendum, ut Gallia propterea multum increseat. Nam eo Regem suum animo arma correpturum, ut gens impotens factum ponat, ut coerceatur, & circumscribatur, ut in coronata Regum capita reverentiam discat, Catholicæ Religionis sit patiens, bona Ecclesiastica restituat; aut, si contumax persistat, dominatione privetur, terra inter foederatos distribuatur, Ullsinga cum Zelandia Anglis, Hollandia Wilhelmo Nassoviæ Auriaco Principi, Ultrajectum Colonienti, Transisalaniam Monasterienti, Geldria & Zutphania Brandenburg, Gröninga Neoburgico Duci Juliacensi, Frisia Luneburgicis obtingat, ac proin tota prope Batavia Imperii Principibus: Regem vero suum, præter armorum gloriam, non aliud sibi reservare, quam eas lacinias, quas Batavi ex Brabantiae Ducatu adhuc possident. Si autem Domus Austriaca communi fœderi accedat, aliam fore distributionem, & Bataviæ provincias inter illam & Angliam dividendas, sic tamen, ut reliqui fœderati indemnes evadant, & aliquod navatæ operæ præmium referant.

Si autem Cæsari non placeret, accedere fœderi, Regem suum sperare, neutram saltem partem amplexurum, prout nupero factum bello; non enim ejus nomini sacratissimo gloriosum fore, si dicat Roma & orbis Catholicus: Regem Catholicum, Domus suæ sanguinem, opis indigum, destituit: hæresi autem auxilium tulit, & per eum stetit, quo minus excinderetur.

Non

Non sine indignatione aula Viennensis legatum audit, quamvis enim Lobkovitius, Aurspergio exauctorato suffectus, Grammonvillii partibus non obscure faveret, Ministri reliqui tamen ceu vanam dicacitatem exploserunt; decretoque Batavis auxilio, Lobkovitius gratia & loco motus est, legatus vero Gallicus Vienna amandatus.

Bello igitur in Gallos decreto, Imperium etiam in illud pertrahere fuit conatus Cæsar. Agitata fervide in Comitibus Ra-
tisbonensibus causa. Cæsar bellum communi Imperii nomine Gal-
lo indicendum suadebat: quantamque Ludovici Regis molitiones Imperio labem aspergere soleant commemorabat: ut dissidiis inter se commissi Principes, Aftatiæ civitatum libertas turbata: Lotharingia occupata: nuper Hispanicum, nunc Fœderatum Belgium armis petatum: rerum arbitria ad Gallum velut Imperatorem deferri: totius Europæ controversiis se miscere: Cæsari præter inanem ceremoniarum pompam vix aliquid relictum: perpendere apud animum suum Ordines, quo demum Imperium, quo infatiabilis Ludovici ambitio sit evasura. Se, quam jurasset, Imperii curæ ac saluti non defuturum, nec commissurum, ut Gallus tantis accessionibus Bataviæ augeatur.

Cæsar bellum contra Lud. suadet.

Wagn.

Sed alius omnino comitiis erat animus. Bellum quippe omnes perhorrescebant. Suecus, Bavarus, Colonienfis, Monasterienfis, etiam aperte se opponebant, negantes Cæsareis copiis per terras suas transitum; cumque Austriaci Præsules istos reprehenderent, objicerentque, eos contra boni civis officium bellum cœpisse: vi ab eo abstrahendos, vetandumque lege, ne Principi ulli absque Cæsaris aut Circuli consensu, nisi propriæ defensionis causa, bellum gerere liceat. Quod tamen postulatum, tanquam paci Westphalicæ adversum, & Statuum libertati noxium, communi consensu rejectum est.

At comitia bellum detra-
hant.

Episcopi vero responderunt, Batavorum causam nihil cum Imperio habere commune: imo articulo III. Pacis Monasterienfis expresse fuisse cautum de mutuis Imperii aut Gallicæ hostibus non
Colon. & Monasterien-
sis oratio.
juvandis. Idem in capitulatione Cæsarea, & fœdere, anno primum superiore 1671 inter Imperatorem Leopoldum & Ludovicum XIV Viennæ conclusum, conceptis verbis fuisse promissum, expressis etiam Batavis.

Per Imperii constitutiones permissum sibi esse, injurias, a Batavis illatas, persequi. Illos multo jam tempore Rhenobergam, aliasque Imperii urbes & arces inique detinere, quin a Cæsare sit
alla-

allatum remedium: jure igitur suo egisse, dum ad alia fœdera respicerent: Austriaca consilia magnas pro more Germaniæ calamitates portendere, bellum omne in patriæ perniciem attractura. Ita Ratisbonæ verbis certatum, nullo nisi ad asperanda odia emolumento.

Catholici plerique Episcopis velut de bello sacro applaudebant. Summus vero Pontifex petitas e Ducatu Mediolanensi & Regno Neapolitano sacerdotiorum decimas negavit, gratulatus Præsulibus fœdus, bellumque, pro causa Dei susceptum. Quamvis postea, evolutis magis rebus, mutatus dicatur.

Borussus
recedit Cæ-
sari.

Ex Ordinibus Imperii solus Fridericus Wilhelmus Elector Brandenburgicus (Friderici moderni Borussiæ Regis proavus) Clivensis haud dubie Ducatus, cum Gallia in Neoburgicum videretur prœior, periculo motus, adhæsit Cæsari, jam ante Batavis fœdere defensivo, quo 20000. partim suo, partim Hollandorum stipendio alenda, conjunctus. In hoc Principe, qui per pacem Westphalicam multis accessionibus auctus, provinciarum amplitudine omnes anteibat, momenti plurimum, in quam ille partem se verteret. Certe Batavi magnam in eo collocabant fiduciam, quod apud se educatus, Wilhelmi III. Auriaci amitam habuisset conjugem.

Quamvis
Galli cona-
rentur, eum
abstrahere.

Omnem Galli movebant lapidem, ut hunc Principem Batavis eriperent. Repræsentabant, quam maligno in illum Batavi fuerint animo, quam contemptim a factione Löwensteinia, dominantibus Wittiiis, cum Wilhelmo affine fuerit habitus, quam ignominiose, eorum potissimum opera, a Triplici Fœdere exclusus: quam inique Vesaliam, Embricum, Orsojam, præsidii suis occupatas detineant. Has ei restituendas adpromittunt, si neutras partes sequeretur, adjecturos Geldriam & Zutphaniam, si focus expeditionis esse vellet. Quid ipse solus a mente Ordinum Imperii recederet? Morem hunc esse Austriacis, Germaniam bellis involvere, ut ad privatos suos fines pertingant. Ostentabant Cliviæ & Westphaliæ pericula, atque in ipsum potissimum incubiturum bellum, si magni Regis indignationem provocaret. Accessit, a Colonienſi missus, Fürstenbergius, ut novos admoveret arietes: sed incassum omnia. Ambigue respondet omnibus.

Interim vero fœdere se jungit Cæsari in hæc capita: paci Clivensi, Olivenſi, Aquisgranensi standum. Fœderato Belgio consulendum. Bremam adversus Succum defendendam. In Religione nihil innovandum. Fœdus in decennium teneat. Icto etiam cum

cum Batavis Fœdere viginti millium exercitum partim suis, partim Reipublicæ sumptibus armavit. Et ita legem de non mittendis in Belgium subsidii, in *Capitulatione* Leopoldi Imperatoris propositam, Brandenburgus primus omnium antiquavit. (*Wagner ad Ann. 1672.*) Post annum deficiet a Cæsare, post biennium, pace cum Gallis violata, ad illum redibit, prout nempe rationes privatae requirent.

ARTICULUS XV.

Exeditio Gallorum & Præsulum in Bataviam. Causæ belli. 31.
*Quod inchoant Angli contra Hollandos trino prælio navali. Iter Regis per terras Imperii. Clivæ urbes expugnat. Trajecto Rhe-
 no subactæ provinciæ. Restituta sacra. Præsulum progressus. Crisis famosi scriptoris. Liberati per pilam sacerdotes. Condi-
 tiones pacis. Rerum conversio. Causæ. Disceptatio in
 Comitii Imp. Ludovicus Bataviam deserit, &
 theatrum belli in Belgio Hisp. &
 Germania figit.*

Europa sic comparata Ludovicus Rex Batavis bellum indicit, publicatque ejusdem causas, fastum & superbiam gentis intolerabilem, coronatis etiam capitibus inambulantibus, Europam his mercatoribus vectigalem & tributariam, cusa adversus Galliam Fœdera, aliasque, summa ingratitude, molitiones in illius perniciem, infames picturas in ludibrium Regis affixas, sparsasque satyras, summopere injurias: has justo ferro & necessario vindicandas. *Causæ belli.*

Et vindicavit sane. Centum armatorum millia sub signis habebat, alacrem & probe exercitatum militem; cumque Petrus Grotius, Batavorum legatus, qui præsens tunc adhuc aderat, interrogasset, quorsum tanta multitudo? Rex respondisse fertur, cogitare se, mures istos caseo Hollandico nutrire, legatus vero re-
 poluisse, in Hollandia multos esse catos. Et certe mures isti, ordine verso, devorassent feles Hollandicas, nisi alienæ sorores tulissent suppetias, & ab interitu illas vindicassent.

Angli in
Holl. tria
prælia nava-
lia.

Primi hostilem in Batavos vim exerunt Angli, dum illarum onerarias, Smirna cum mercibus redeuntibus invadunt, Architalasso Duce Eboracensi; pugnatum dein ter navali prælio, æquo ferme Marte, Hollandis denique ad tutandos Zeelandiæ portus & littora, quo Angli respiciebant, se se recipientibus.

Iter secun-
dum Rhe-
num.

Rex Galliæ exercitum suum in quatuor partes distribuit, quarum primam ipse ducebat, assumpto legato Turrenio, alteram Condæus cum filio Principe Enguiennio, tertiam Creguius, quartam Luxenburgus: atque ineunte vere anni 1672. diversis itineribus e Piccardia, Campania, Lotharingia, per Leodiensem, Juliacensem, & Coloniensem agrum, in Clivensem Ducatum movit. Transeunti obviam veniebant Leodium, Colonia, Dux Juliacensis Philippus Wilhelmus cum filio Joanne Wilhelmo, atque Maximilianus Henricus Elector Colonienfis Dux Baviaræ, cum Egonne Fürstenbergio, Episcopo Argentinenfi, Gallicis partibus cum Fratribus Hermanno Bavaricæ aulæ Præfecto, & Wilhelmo, impense addicto. Omnes magna amicitiae significatione a Rege sunt excepti, & cum is viridi in cespite sub fronde pranderet, innumera multitudo Bonna, Colonia, Dusseldorpio, aliisque locis affluxit ad visendum tantum Regem.

Rex urbes
Cliviæ expu-
gnat.

Postquam Colonienfis & Monasterienfis ultra viginti armorum millia ad eum adduxerant, primus labor fuit expugnare urbes arcesque complures, quas in Germano solo ad Rhenum Batavi inique insidebant. Ereptæ illis in Clivensi provincia Orsoja, Burichium, Embrica sive Emericum, Lippiomunda, Reefa, & quod caput est, Vefalia. Rhenoberga expugnata Colonienfi Domino suo tradita, & ut cum suis copiis libere in Batavos movere possit, Bavaro præsidio custodita. Mirum, brevissimi temporis spatio tot valida munimenta fuisse subacta, quæ annuam obsidionem latura crederentur. Applausum Regi Chronostico: LVDOVICVS TRIUMPHANS. Cardinalis Bullionius, castra secutus, occupata ista loca expurgat, & Catholicam Religionem reducit. Ravenssteinium quoque cum ditione, eo pertinente, Juliacensi fuit restitutum a Batavis.

Brew.

Rheno iis ex partibus jam asserto, suscepta fuit expeditio Batavica. Primum obicem posuit arx *Schenckia*, validissimum & situ & opere munimentum, a Martino Schenckio priore seculo constructum in angulo, quem Vahalis a Rheno divortium efformat. Sed præsentē Rege intra triduum fuit expugnatum, dicente, ut fertur, Helvetorum quodam, nongentos suæ Nationis homines

mines tale castrum per annum contra centum virorum millia defensores. (*Brewerus ad Ann. 1672.*)

Majoris erat molis transitus Rheni, quem Batavi ex altera ripa vehementer infestabant; evictus tamen est, vel emptus potius sanguine non modico, vulnerato etiam Condæo & occiso Longavillæo. Tum vero fugato Batavo, terrore perculso, in Zutphaniam, Velaviam, Betaviam, Geldriam Inferiorem, Transisalaniam, Utrajectum expugnataque Nardena & Muda in Hollandia, ad Amstelodami usque conspectum iter signatum victoriis: percursum turbinis instar amplæ provinciæ. Captæ per diversos Duces Arnhemium Velaviæ caput, Zutphania & Utrajectum cum cognomine provinciæ; urbs hæc ad Episcopum olim pertinuerat. Renovatum templum Metropolitanum a Bullionio Cardinale Catholicis usibus. Accesserunt Bommelia, Tiela, Teutiburgum, Amersfordia, Knottenburgum, Rhena, Vageringa, Wika, Duisterta, Genepa, Crevicordium, Gravia, Noviomagum, libera olim Imperii civitas, postea vero ad Burgundiæ Duces ac Belgii Principes, ad Batavos denique translata. In omnibus his Provinciis, urbibus, oppidis, Religionis libertas promulgata. Quo loco duo erant templa, jussu unum Catholicis reddi; sacerdotiorum quoque olim patrimonia & Ecclesiarum bona jure postliminii imperata restitui.

Trajecto Rheno subactæ provinciæ.

Restituta sacra.

Interea autem Elector Colonienfis & Christophorus Bernardus de *Gablen*, ex antiquissima Westphaliæ Familia oriundus, Episcopus Monasterienfis, magnorum spirituum Princeps, assumpto Præfulum progressus.

In Zutphaniam provinciam quippe & Transisalaniam irruentes, Grollam, Borekeloam, Lochemium, Lingiam, Brevortum, Zwollam, Covordiam, Daventriam, Transisalaniam Metropolim, munitissimas urbes expugnarunt, indeque coniectis in fugam Batavis, in Frisiam usque & Gröningam effusi, palmas & lauros metebant. Et hæc omnia a Gallis Præfulibusque præsentibus unius mensis, Junii nimirum, spatio sunt gesta.

Reducta ubique Catholicæ Religionis libertas, templa pro illius exercitio publico a victoribus postulata: bona Ecclesiastica ad pristinos suos Dominos redire jussa.

Brewerus.

Certe nisi aliunde sufflaminata fuissent arma Catholica, spes optima affulgebat, intra illam adhuc ætatem totam subigendi Bataviam, miseramque æternum pereundi voluntatem eripiendi de-

Crisis de hoc bello.

cepto per insanos Præcones populo: ut adeo mirum sit, recentiorum quendam famosum scriptorem, in quo nihil nisi stylus nitet, nativa sua affectione (qua nulla major Historici labes) eo fuisse abreptum, ut non modo in rationem status profunde se immergens, magnorum Principum Catholicorum censorem mordacem ageret, sed in hanc etiam expeditionem Batavicam, in qua causa Dei & animarum agebatur, qua poterat, exæstuantis bilis vehementia audacissime inveheretur. Sit, quod non religionis sed regionis fuerit intentio (quod tamen præsumere non deberet) solitus tamen non raro Deus est, ex intentione, non semper optima, bonis omnibus optatos eventus elicere. Et nunquid? eadem audacia & carpendi libidine hoc omnibus Principibus posset obijci? Profecto, qui diceret, Ferdinandum II Imperatorem sanctissimum, non religionis, sed regionis amore, ad Balthicum usque mare Protestantium terras invalisse, impudens omnino foret, & temerarii homo iudicii.

Gnome alias bonæ mentis est, si factum non possis, intentionem excuses. Hic factum bonum est, & ex primis jam initiis effectus optimi sunt consecuti. Habita cultus Divini & animarum salutis cura, non attenta ratione politica, quod Anglia confœderata aliique Protestantes alienari possent. Quid ergo intentionem accusas? Accusabis etiam, quod Rex Ludovicus haud multo post, dum Protestantes exegit, Regnum suum tot millibus subditorum, artificum, militum, cum grandi ærarii detrimento, evacuarit? sed redeamus ad institutum.

Sacerdotes liberati.

Illud memorabile, quod, cum Præsules *Coverdam* oppugnant, prima pila in urbem injecta ceciderit in carcerem, in quo plures sacerdotes, ex *Westphalia* abstracti, detinebantur captivi, omnesque, igne viam faciente, evaserint incolumes.

Nulla erat provincia, quæ non fuerit vel ex integro occupata, vel ex parte saltem, nisi *Seelandica*, quæ Anglorum invasioni fuerat destinata; unde non tantum in iis, ad quas belli procella devenerat, sed etiam *Amstelodami* & *Roterodami* adeo fuit trepidatum, ut de cedenda certis legibus *Repubblica* jam deliberarent Ordines.

Quibus conditionibus pax promissa.

Missus in hanc rem ad Regem, in castris ad *Dœsburgum* versantem, *Petrus Grotius*, qui nihil jam amplius de multitudine *Catorum* in *Hollandia* loquebatur, sed supplici oratione pacem rogabat, ut mures cessent & feles & caseum rodere.

Rex

Rex istas condiciones proposuisse dicitur. Omnes extra septem provincias urbes Regi tradant, cum Bomella, Crevicordio, & Löwensteinio: Coloniensi comitatum & civitatem Moersensem, Auriaco vero, ad quem spectat, alio modo jacturam compensent: Monasteriensi Grollam, Brevordam, Lichtevordam, Burcloviam in Zutphania, Schenckii & Neomagi munimenta diruuntor. Gallicis navibus in portus Batavicos sine portorii sumptu intrare, licitum esto. Catholica Religio publice admittatur, & pro libero ac publico ejus exercitio in singulis Bataviæ civitatibus, ubi sunt plures Ecclesiæ, una Catholicis tradatur. Si autem una tantum fuerit, liceat Catholicis alteram pro se construere. Bona Ecclesiastica Melitenfibus, & Clero Catholico restituantur, non tamen fructus jam percepti. Catholici sine discrimine in senatum admittantur, neque ab aliis publicis muneribus arceantur. Omnia, Romano Imperio ablata, eidem redduntor, nominatim Principi Ostfrisiæ Emda, & alia erepta. Galliæ sumptus belli refundant, & quot annis oratorem Lutetiam mittant, gratias acturum pro hujus pacis beneficio. Ita Henricus Brewerus, scriptor Germanus ad annum 1672, cum quo finit decennalem suam Historiæ Brachelianæ & Tuldenianæ continuationem.

Verum subito facta est magna rerum conversio. Siscebatur ulterior armorum progressus, erecti Batavorum animi. Causæ hujus tantæ mutationis variæ: in pluvias & imbres solutus Julius, *Rerum con-* aggerum cataractis laxatis tellurem, alioquin paludibus plenam, *versio.* inundabant Batavi: *Wittii* fratres, in quos culpa conjiciebatur, a furente populo atrociter discerpti, *Wilhelmus* Auriacus dictus Gubernator: Gröningana, Ardenburgi, & Sylvæducis soluta obsidio: Coverda recepta a Batavis: imminentes cum exercitu Cæsar & Brandenburgus: quibus cum copiis selectis obviam missi *Condæus* & *Turrenius*, anima expeditionis Gallicæ, per tot etiam *Causæ,* urbium præsidia plurimum imminutus campestris exercitus, aliunde secundis quoque rebus accisus: ad proprios lares tuendos revocati Præfules.

Hac rerum facie sisti in medio cursu debuit victoria: Rexque in Galliam rediit; ubi triumphantis instar fuit exceptus. Exhibitus Hercules, leonis Batavici tectus exuviis, septicipitem Hydram ducens captivam, illamque, uno ictu decisis capitibus, conficiens.

Non multum recreabat Regem hæc imago, qui satis nosset, quam brevi exuviæ illæ sint detrahendæ, & Hydræ, si fas ita lo-

qui, capita sua sint renascitura. Nutabat foedus Anglicum, Parlamento bellum improbane, Cæsar, Hispanus, & Brandenburgus incumbabant humeris, periculumque aderat, ne & Danus, ac totum Imperium in se confurgerent.

Disceptatio
in Comitibus.

Quippe Ratisbonæ Cæsarei id non frigide urgebant: communem Imperio esse causam: Gallum per Leodiensem, Coloniensem, Juliacensem, Clivensem, Germaniæ terras, cum exercitu transisse. Exceperunt Colonienfes & Monasterienfes, permittentibus harum provinciarum dominis id esse factum: Brandenburgicum vero se jam tunc Galliæ hostem fuisse professum. Batavos non transitum duntaxat aliquem copiarum innoxium fecisse, sed vi armata irruisse; invafas terras Imperii, captas urbes arcesque, & ultra sæculum inique detentas. Si tanta cura terrarum Imperii, cur tanto tempore tolerati essent violenti incubatores Germaniæ, hodiedum incubituros, nisi per Gallos fuissent depulsi, & sua Rhenanis Principibus restituta. Coleret pacem Imperium, aut, si tantus bellandi ardor, peregrinarentur arma, in Hollandos diuturnos Germaniæ hostes verterentur: sponfores se fore, nullum in terris Imperii hostem futurum: magnas jam res gestas in Batavia, venirent in partem optimæ victoriæ: Bataviæ provincias in foedere Anglo-Gallico alioquin jam Principibus potissimum Imperii esse destinatas: magnam enimvero rem in Germaniæ bonum præstiturum Cæsarem, si bellum & vastitatem e Batavia, aliena terra, in patriæ viscera & Belgium Hispanicum atrahat.

Eadem ferme Bavari, Juliacensis, Hannoverani erat sententia, imo & Brandenburgi, post transactionem, cum Rege initam, ut urbes Clivenfes, prius a Batavis, postea a Gallis detentas, reciperet. Contra vero Danus, Cellensis, Guelferbytanus, Hasso-Cassellanus in partes Cæsaris abeunt, Hispano jam pridem foedere eidem adstricto; Anglo vero, armis positis, quiescente, Parlamento vero in Galliam armato.

Lud. Batavi-
am deserit.

Gallus, cum tanta in se foedera pangi cerneret, Cæsaremque priori jam anno ad Rhenum usque cum exercitu progressum, ut regni sui securitati consuleret. Bataviam, remotam nimis, abdicandam censuit, eductisque ex quadraginta & ultra, quas ceperat, munitis urbibusque, prædiis, solam Graviam retinuit, cui Trajectum ad Mosam, anno 1673; expugnatam, adjecit, theatrum belli deinceps in Belgio Hispanico & Germania fixurus: ridentibus in sinum Batavis, mures Gallicos aliena ope
tam

tam cito a caeseo suo devorando abstractos. Gallos vacuis manibus Batavia decessisse, utique non est credibile; quod autem crudelitate tam immani sævitum sit, qualem inter Christianos populos in nulla Historia sit legere, prout laudatus supra auctor scribit, alii scriptores non memorant.

ARTICULUS XVI.

Treviri Capti. Pugna ad Seneffam, ad Moncaffelium, ad Montes.

Progressus Gallorum. Batavi pacis avidi, quam primi ineunt 32.

Neamagi. Acceptant Hispani, &

Cæsar.

Cum autem Galli cernerent, a Cæsare, & pluribus Imperii Principibus ad Rhenum bellum sibi moveri, limitaneas Germaniæ urbes, *Trevirim*, Alsatia civitates, aliasque occuparunt; exercitu sub Turrenio in Palatinatum & Franconiam infuso; ut Rhenum, Mænum, Mosellam & Mosam in potestate habeant. Unde irritati Imperii Ordines Cæsari plerique se addixerunt, prout in relatione Historica de statu Germaniæ prolixius differuimus. Jam res Belgicas breviter persequamur.

Anno belli primo (1672.) Galli Bataviæ magnam partem occuparunt. Altero, ut milite præsidario adversus tot hostes uti possint, ex illa abscefferunt, *Gravia* duntaxat retenta & *Trajectum* multi sanguinis impendio expugnarunt. Tertio a Ludovico tota subacta Burgundia, confertaque, *Condæo Ductore*, cum Cæsa-
reis, Hispanis & Batavis, quos Auriacus regebat, ad *Seneffam* in
Brabantia tam atrox pugna, ut multa millia utrinque ceciderint. *pugna ad Seneffam.*
Non sanguinolentum prælium deremit, quo Galli, multis capti-
vis & spoliis onusti, in castra recesserunt, fœderatis adhuc in
acie stantibus: pars utraque victoriam celebravit. Alterum fœ-
derati erant inituri prælium, nisi Souchius, natione Gallus, qui
Cæsareos ducebat, se subduxisset. Exauthoratus propterea a Cæ-
sare & in exilium missus, suffecto in ejus locum *Sporckio*. Auriacus
vero post trimestrem obsidionem Graviæ cum multis, quæ
Galli Batavia extulerant, spoliis recepit.

Quarto Gallis cecidit Dinantum, Hujum, Limburgum, arx Gallia pro-
Leodienfis, Thænæ. Quinto Condatum & Buchainum Condæus gressus.
cepit:

cepit: eoque Turrenio, ad prosequendum in Germania bellum, suffecto, Humerius Mareſchallus Ariam, Crequius arcem Bullioniam & S. Gilanum: Auriaco Trajectum frustra obsidente, damno maximo.

Sexto in potestatem Gallorum venerunt Valencenæ, Cameracum, Audomarum: ad hujus obsidionem solvendam cum accurreret Auriacus, infelix bello Princeps, ab Aurelianensi Duce acie victus est, a Carolo regii etiam obsidione repulsus. Pugna illa, qua *Aurelianensis* Regis frater, foederatos cecidit, omnibusque impedimentis exiit, *Moncaffelensis* appellatur. Cæsi in acie 4000, capti 3000.

Pugna Mon
caffelensis.

Pugna ad
Montes.

Nec foederatis felicior Annus septimus belli (1678.) nam Galli jam initio Martii campum Martium ingressi Gandavum & Ipras, præstantes Flandriæ urbes, dum Batavi adhuc in hybernis sterterent, occuparunt. Dum autem Galli Luxemburgio Duce Montes Hannoniæ obsidione cingunt, Auriacus, bellum, infelicitè gestum, magno facinore coronaturus, illos aggreditur. Pugnatum acriter dubio Marte in noctem: & recrudiſſet die altero prælium, nisi de pace, cum Batavis confecta, fuisset nuntiatum.

Dissoluto, propter interceptum maxime Fürstenbergium, Colonienſi legatorum conventu, jam anno 1675. *Neomagum*, sive Noviomagum, celebris Geldriæ provinciæ civitas, delectus fuit paci ſanciendæ locus. Cum Suecus in partes Galli seceſſiſſet, delatum conciliatoris munus Carolo, Angliæ Regi, qui neutras tunc partes ſequebatur. Nec cunctanter, pacatæ Europæ gloriam appetens, commiſſam ſibi provinciam ſuſcepit, miſſo Templo, viro acri & rerum agendarum experto, cujus industria pax etiam Breddana & Aquisgranenſis coaluerat. Subſequitur Templo adjutor Arlintonus, non minus Gallo quam Regi ſuo gratus.

Batavi pa-
cem quæ-
runt.

Batavi, belli, ruinarum atque jacentis commercii pertæſi, cum cernerent, per immenſos ſumptus non aliud lucrum capi, quam ut quot annis Belgium magis magisque accideret, Gallusque creſcat, omni opera pacem ſibi comparandam putabant. Obſtitit Auriacus Gubernator, cui Rempubliacam gerendam commiſerant, ſive quod nullam, ſibi decoram, pacem iniri poſſe cerneret, ſive quod gloriæ ſuæ vulneribus cicatricem obducendam ſperaret.

Ne tamen, aut apud Britannia Regem aut Batavos, in quorum animis propter tot clades jam viluerat, offenſionem incurreret, tales pacis conditiones propoſuit, quas a Gallo non ad-
mittendas

mittendas, videbat. Hispaniæ Rex Ducis Aurelianensis filiam conubio sibi jungeret, cui Ludovicus Rex omnia, quæ a Pyrenæa pace de Belgio abstraxerat, in dotem traderet. Anglorum Regi, si talem pacem procuraret, ducenta librarum Sterlingarum millia præmium fore.

Sed non ea erat rerum facies, ut Gallus aliquid amittendi animum induceret. Ad causam insuper Fürstenbergii capti & Lotharingi, cui Gallia Ducis titulum negabat, negotium adhæsit.

Annus 1676 Neomagi in determinandis ceremoniis fuit consumptus. Electores Imperii contendebant, legatos suos eadem soleanitate, obviam procedendi, salutandi, sedendi, ac Venetæ Reip. Regumque adeo legatos, excipi, & *excellentiæ* titulo honorari; ut adeo Cæsari nulla honoris prærogativa relinqueretur. Disceprationes Neomagenses.

Similibus contentionibus annus sequens absumptus Neomagi. Angliæ legati, tanquam conciliatores primum, etiam ante Cæsareos, locum postulabant. Brandenburgico legato titulum Excellentiæ negabant. Hinc evitatus congressus, & per solos ferme Batavos internuntios omnia agebantur. Aderat etiam legatus Pontificis, quem Conciliatorem Anglis addi Cæsar volebat, prout in pace Monasteriensi factum: nec abnuerunt Gallus & Hispanus, ejusque opera sunt usi, quamvis, reliquis Protestantibus non admodum invitis, vehementer se opponerent Batavi.

Ventum tandem, suspensis contentionum parergis, ad rei summam. Damnorum compensationem pars utraque petiit. Galli Cæsari ac Brandenburgo pacem Westphalicam offerunt, Dano Hasiensem, Batavis Trajectum, cum Hispanis ex Interdicto *uti possidetis*, agere volebant.

Displicuere vehementer hæ conditiones reliquis fœderatis: solis Batavis placuerunt, Trajecto, maximi momenti ad Mosam urbe sic potituris, quam, si armis eripienda esset Gallis, ex fœdere Hispanis tradi oporteret. Tegebant tamen adhuc silentio sua pacis consilia. Et sic dum Cæsar Lotharingiam, Alsatiam, Brisacum, Friburgum, restitui peteret, Hispanus nihil amittere vellet, Gallus omnia retinere, Suecus recipere omnia, Brandenburgus nihil reddere, actum est nihil.

Tandem anno 1678. quod dudum meditabantur Batavi, in privatam cum Gallis pacem consenserunt, melioris conditionis fore rati, qui primus paciscatur, quam qui ultimus. Quia vero magnam se apud confœderatos suos offensionem incurfuros facile

Batavorum
querelæ.

videbant, acerbe conquesti sunt, Cæsarem, Danum, Brandenburgum, Imperii Principes privatis suis rationibus consulere: Hispaniam inertem torpere, ab Anglia in illis Regem inter & Parlamentum motibus, nihil sperandum: totam ferme belli molem humeris suis incumbere: nonaginta armatorum millia Batavo stipendio ali: septenne hoc bellum pluris sibi, quam septuaginta annorum cum Hispanis bellum constitisse, nec alio operæ pretio, quam ut singulis annis propiorem finibus suis hostem haberent. Res ita esse comparatas, ut æstas imminens Flandriæ atque Brabantia fatalis, perruptis jam aggeribus, merito timeatur: Brugas, Bruxellam, Lovanium, Mechliniam, Antverpiam, complementum Gallicæ victoriæ fore: præstare partem servare, quam totum amittere.

Primi pacem
ineunt, ut
Trajectum
recipiant.

Igitur Batavi ultima Julii, abrupto fœdere primi, ut *Trajectum* reciperent, subscripserunt paci, quam fœderati ut injustam, pactis juratis, Divinis humanisque juribus pugnantem, sunt execrati: fœderatos, ac maxime Cæsarem unice propter Batavos gravissimum hoc bellum suscepisse, suæque omnia discrimini obtulisse, ut ab extremo exitio servarentur; jam vero hanc gratiam rependi, ut in locios soteres telum retorqueatur, ab eorum cervicibus aversum. Ecqua hæc gratitudo? quæ fides? quæ sanctimonia fœderis? quæ sacramenti religio? documento id memori fore posteritati, quid spei reponendum in iis, qui fidem juratam tam turpiter infregerunt: si annus 1672 rediret, quem amicis habituros?

Querelæ fœ-
deratorum.

Sed quam justæ, tam inutiles erant hæ querelæ. Dicuntur legati Batavici, instigantibus Hollandicæ provinciæ statibus, & maxime Amstelodamensibus, Löwensteinia factionis, adhucdum gliscentis, consulibus, insciis statibus Generalibus, Hagæ Comitibus congregatis, hanc pacem præcipitasse. Sed hoc videtur incredibile. Si enim displicuisset, cur eam habuissent ratam? Cur acceptassent & confirmassent?

Amstelodami
descriptio,

Quamvis enim Hollandiæ provincia tantum dicatur ad onera publica contribuere, quantum omnes reliquæ sex provinciæ, & Amstelodamum, mundi compendium, omniumque Nationum commercantium emporium, 50000 ædificiis, 200000 incolis, 4000. lapideis pontibus, interfluenti Amstelæ & canalibus impositis frequens, curia, qualem orbis non vidit, collybistarum mensis, portu, mille navium capace, immensisque opibus superbum, quantum omnes reliquæ civitates ad Rempublicam conferre, eam tamen

tamen ipsis esse auctoritatem, ut invitis reliquis provinciis, quæ etiam suas formant Respublicas liberas, & insciis statibus Generalibus, qui ex singulis provinciis sunt delecti, atque Hagæ suos conventus habere solent, invito quoque Gubernatore, cui tantam ^{Et Hollandicæ.} supremo terra marique Præfecto rerum agendarum clavum committunt, magni momenti negotia, quæ universam Rempubicam concernunt, qualia sunt belli pacisque arbitria, sua auctoritate possint tantam potestatem exercere, nemo est, qui crediderit. Sic enim reliquæ provinciæ non amplius essent liberæ, sed Hollandicæ subiectæ, aut isti duntaxat a consiliis, si penes solam essent rerum arbitria.

Imo, tametsi omnes Batavi vulgo *Hollandi* appellentur, tamen in Comitibus Generalibus provincia Hollandica ne quidem primum locum occupat, sed sedent hoc ordine: Geldria, Hollandia, Zeelandia, Ultrajectum, Frisia, Transiselandia, Græninga. Ubi illud adhuc notari potest, tres esse Frisias, quæ confundi inter se nullatenus debent, *Occidentalis* nempe, quæ ad septentrionem projecta, est appendix Hollandiæ, eique situ adhærens unam cum illa provinciam constituit, sicut Zutphania cum Geldria. Altera est Frisia *Orientalis*, Principatus videlicet in Germania, ad Rom. Imperium spectans. Inter has media Frisia est una ex septem Batavorum provinciis, quæ longo tempore peculiarem Gubernatorem ex Domo Nassovio-Diecenſi habuit, qui propterea *Friso* cognominabatur, & Leovardiæ, provinciæ metropoli, sedem fixerat. ^{Tres Frisicæ.}

Sic neque cum memorata Geldria, Batavorum provincia, Duæ Geldiæ *inferior* dicitur, confundi debet Geldria *superior*, cujus diversâ omnino est ratio. Etsi enim olim ad unum Geldriæ Ducatum utraque spectabat, superior tamen remansit in Hispanorum potestate usque ad hoc sæculum XVIII. quo inter Austriacos, Borussos & Batavos fuit divisa; primis cessit Ruremonda, secundis Geldria, tertiis Venlona, principes provinciæ urbes.

Confectam Gallos inter & Batavos pacem acceptare coacti sunt Hispani, in ea rerum suarum infirmitate tanto hosti sine Hollandis impares. Relinquere igitur in Galliæ manibus debebant totum comitatum *Burgundiæ*, & in Belgio nobilissimas urbes ac munimenta, *Cameracum*, *Valencenas*, *Ariam*, *Tornacum*, *Ipras*, *Audomarum*. Gandavum vero, Limburgum, Condatum, Buchainum cum reliquis hoc bello captis, exceptis memoratis urbibus, ^{acceptare, quamvis miseram,}

bibus, restituta sunt a Gallis, optimo consilio multa occupantibus, ut pauca restituant.

Et Cæsar, desertus a sociis.

Sequenti anno 1579. etiam Cæsar, desertus a sociis, pacem Neomagensensem iniit; cujus epitomen supra, ubi de statu Germaniæ, dedi.

ARTICULUS XVII.

Monumenta quadam, bella ista Belgica & Burgundica concernentia, ex actis publicis deprompta.

33.

§. I.

QUÆSTIO:

An Cæsari & Imperio fas sit, Circulo Burgundico contra Gallos succurrere?

Cum Galliæ Rex gemino bello post pacem Pyrenæam Burgundiam Belgiumque fuisset aggressus, quæstio in Comitibus Ratisbonensibus fuit agitata, an Cæsari & Imperio circulo Burgundico liceat succurrere? Affirmabant Cæsarei, negabant Galli. Pars ab utrisque in hanc rem libelli.

Galli ad Instrumentum pacis Monasteriensis, ejusque Art. III. appellarunt, ubi dicitur: *Circulus Burgundicus sit maneatque membrum Imperii, post controversias inter Galliam Hispaniamque sopitas in hac pacificatione comprehensus; bellis tamen in eo jam vertentibus nec Imperator, nec ullus Imperii status se immisceat. In futurum vero, si inter ea regna controversia oriantur, firma semper maneat inter universum Imperium & Reges, regnumque Galliæ de mutuis hostibus non juvandis supra dictæ reciproca obligationis necessitas.*

Supra dicta autem obligatio habetur Art. II, ubi sancitur, ut alter alterius hostes, præsentis & futuros, nullo unquam titulo, vel prætextu quocunque modo juvet, aut ullis copiis, quas contra aliquem hujus pacis consortem duci contigerit, transitum indulgeat.

Ex his, dicebant Galli, manifeste patere, Cæsari aut Ordinibus Imperii fas non esse, Hispanos aut Batavos adversus Galliæ

liæ Regem, pacis consortem, juvare. Cum clare statutum sit, ut neutra pars alterius hostes, præsentēs aut *futuros*, quocunque titulo juvet: ut hoc locum etiam habeat, si *in futurum* inter ea Regna (Galliæ & Hispaniæ) controversiæ oriantur: ut bellis, in circulo Burgundico vertentibus, nec Imperator, nec ullus Imperii status se immisceat.

Perpectum id satis fuisse Hispanis, qui propterea sint protestati contra II & III Articulum, conquestique, sic Burgundiam & Belgium solummodo nomine tenus haberi pro circulo Imperii. Ea tamen protestatione non obstante, paciscentes ad conservandam pacem inter Imperium & Galliam, eam cautelam esse necessariam judicasse, ac proin Instrumento insertam.

Ad hæc Austriaci respondebant, clarum esse sensum Instrumenti Monasteriensis: in eo transactum id tantummodo, ut in præsentī bello, hoc est, quod pacificationis tempore, & postea etiam cum Hispanis continuabatur, Cæsar aut Imperii status Hispanum non juvent. Perspicue hoc significari per verba: Bellis *jam* vertentibus: sensum ergo dilucidum esse: durante quidem bello tunc Galliam inter & Hispaniam vertente (quod per pacem Pyrenæam finitum fuit) non esse assistendum Hispanis: at vero bello illo finito, sicut alios Imperii circulos consortem hujus pacificationis fore circulum Burgundicum, adeoque sicut alios circulos a consortibus defendendum, & ad quid esset Imperii membrum & circulus, si nullus unquam esset effectus?

Verba autem illa: *in futurum vero, si inter ea regna &c.* interpretationem a prioribus, ne illis sint contraria, accipere, ita, ut verus eorum intellectus sit: si in futurum inter regna Galliæ & Hispaniæ, tanquam externos, bellum oriat, e g. si Gallus Cataloniam aggrederetur, quæ cum Imperio nihil commune habet, neutra paciscentium pars alterius hostibus opituletur: Burgundiæ vero circulum non esse exterum, sed membrum Imperii; ac proin, si ille invadatur, non inter regna, sed inter Imperium & Regnum Galliæ rem agi.

Hunc sensum aperte declarari per capitulationem Cæsaream, in qua Leopoldus Imperator Art. XIII promittit, in quantum circulum Burgundicum, & bellum, in eo *tunc, tempore initæ pacis existens & adhuc durans*, concernit, Westphalicæ paci conformiter se gesturum, nec coronæ Gallicæ præsentibus ac futuris hostibus *externis* auxiliaturum. Et Art. XIV nullatenus nos miscebitur in bella, quæ in Italia & circulo Burgundico *nunc* geruntur.

Duo hic dilucide contineri: primum, Cæsarem nunquam Galliæ hostes *exteros* adjuturum: secundum, neque Burgundiæ circulum (qui respectu Imperii non est Galliæ hostis exterus, sed ejus membrum) quamdiu hoc bellum, anno 1635 cœptum, durabit.

Et sane recta ratione suaderi, eum, qui promittit alterius hostes non juvare, non promittere, quod se ipsum, aut sua membra nolit defendere. Tale autem membrum esse Imperii circulum Burgundicum, jam a Maximiliano I. anno 1512. inter circulos comprehensum, & a Carolo V in Recessu Imperii 1522, maxime vero in *Transactione Burgundica*, anno 1548 Augustæ inita, atque in Recessum Imperii relata, per quam Imperator & Imperii ordines se obligarunt, ad Belgicas & Burgundicas circuli Burgundici provincias, tanquam membra ejusdem Imperii, non minus ac alios circulos, *defendendas, conservandas, fovendas, ac fideliter juvandas.*

Per Pacem dein Monasteriensem, centum post annis cum corona Galliæ confectam, hanc defensionem tantisper, quamdiu nempe bellum illud cum Hispania, tunc vigens, duraret, fuisse suspensam, sed nequaquam ultra finem illius belli, quod anno 1659. per pacem Pyrenæam fuit terminatum; tum vero, secundum expressum Instrumenti Monasteriensis tenorem, in pace comprehendendum, hoc est, sicut alios consortes pacis & Imperii circulos defendendum, & contra hostes quoscunque adjuvandum; prout in eodem Instrumento Art. III. sancitur: ut neutra pars alterius hostes juvet, *salvo assècurationis Articulo infra (num. 117.) descripto.*

Eundem Instrumenti intellectum adhuc magis declarari, dum sexennio post (1654.) dum ipsi paciscentes adhuc vivebant, quibus mens instrumenti in recenti erat memoria, Cæsaris totiusque Imperii consensu civitas Bisontina Regi Hispaniæ pro Franckenthalio fuit tradida, ea conditione, *ut inter circuli Burgundici provincias pari protectionis ab Imperio jure, vigore antiquorum patrum, possidenda existat, & comprehendatur.*

Quod autem ab adversa parte dicatur, Burgundicum circulum esse aridum & inutile membrum Imperii, id a veritate omnino alienum videri, cum non raro Rex Catholicus inde eduxerit exercitus, quibus res Imperii dubiæ sint stabilitæ, urbes, provinciæ, circuli integri aut servati Imperio aut restituti, nummi vero longe ultra Matriculam collati.

§. 2.

Fœdus inter Cæsarem & Brandenburgum anno 1672 initum. 34.

Post irruptionem Gallorum in Hollandiam, primi fœdus inter se pepigerunt pro hac atque Imperio defendendis Cæsar & Elector Brandenburgicus, Fridericus Wilhelmus, cujus hæc erant capita.

1. Maneat constans amicitia (*ad annum duratura.*)
2. Confirmatur fœdus decennale, jam antea initum.
3. Pax Osnabrugensis fervetur illæsa.
4. Paciscentes Osnabrugenses & Hispanus possunt accedere huic fœderi.
5. Pax Pyrenæa, Clivenfis, Aquenfis conserventur illæsa, ad defendendum Belgium Hispanicum.
6. Uti etiam transactio Electoris Colonienfis, cum Colonia civitate inita.
7. Sociabit in casum necessitatis pars utraque arma.
8. Pars utraque in hunc finem paratum exercitum habeat, pro tranquillitate conservanda.
9. Cum Cæsar cum aliquibus Principibus jam fœdus inierit, dabit operam, ut huic accedant.
10. Pars neutra possit facere pacem aut inducias sine alterius consensu.
11. Durabit hoc fœdus minimum per decennium.

Articulus secretus 1. Provideatur civitati Colonienfi. Congreget Cæsar 12000 armatorum, & totidem Brandenburgus.

2. Nihil ad rei summam pars una faciat sine altera.
3. Quoad religionem omnia relinquuntur in statu præsentis secundum pacem Westph.
4. Civitati quoque Bremensi servetur libertas &c.
5. Cæsareæ dignitati nullum præjudicium inferatur. Circa transitum & hospitationem exterorum serventur Imperii constitutiones.
6. Pax Westph. discernens, quomodo statibus bellum liceat, servetur.
7. Hispanus pro conservanda pace Pyrenæa & Aquenfi congruum subsidium Electori conferat.
8. Curet Elector, ut Danus, Domus Brunsvicensis, & Cassellensis huic fœderi accedant.

§. 3.

35. *Fœdus Hagense inter Cæsarem & Batavos Anno 1672.*

Batavi, a Gallo invasi, rogarunt a Cæsare auxilium pro pace Clivenſi & Weſtph. conſervandis. Unde hoc fœdus iſtum.

- 1 & 2. Promittit Cæſar, ſe ultra 12000, cum Brandeburgicis conjungenda, totidem additurum, ſed ſub ſtipendiis Batavorum, in quæ conferent in ſingulos meſes 45 Imperialium millia.
3. Batavi exercitui Cæſareo Brandeburgico addent oſto peditum millia: nec pacem facient ſine Cæſaris & Electoris conſenſu (*quod vidimus, quam ſanctè obſervaverint.*)
4. Etiam finito hoc bello, maneat fœdus inter Cæſarem & Batavos, atque pars qualibet 12000 habebit parata ad mutuam deſenſionem, impenſis petentis auxilium alenda.
5. Parti utrique liberum ſit, pauciores copias petere. Comuni conſilio omnia agantur.
6. Neutra pars poterit aliud fœdus inire, quod huic deroget.
7. Hoc fœdus ad decennium duret. Acceſſit iisdem cum Batavis conditionibus Elector Brandeburgicus.

Eodem anno paulo poſt initum eſt *fœdus Brunſuicenſe* in triennium, inter Cæſarem, Danum, Brandeburgicum, Luneburgenſes, & Caſſellenſem, pro deſenſione pacis Weſtph. & quietis in Imperio, determinato copiarum numero, a ſingulis confeſcendo ad mutuum auxilium.

ARTICULUS XVIII.

36. *Unionum Systema Belgium quoque infeſtat. Inducia vicennales. Bellum ob cauſam Palatinam. Lud. Rex in Belgium. Montes & Namurcum capit. Luxemburgi victoria. Namurcum redit ad Hiſp. Bellum incendiarium. Pax Rijiſuicenſis, Hiſpanis favorabilis.*

Unionum Gallicarum ſyſtema, mox poſt pacem Neomagenſem erumpens, Belgium quoque, Luxemburgenſem maxime Ducatum, afflixit, pati coactis provincialibus, quidquid Tornaſenſe tribunal decreviſſet. Multum proin terrarum ſine interceſſione ereptum, Luxemburgum oppugnatum, Auriaci bona occupa-

tata;

pata; sed Batavis factionibus scissis, Brandenburg Gallis favente, & ne bellum illis propterea fieret, obistente, Principibus Germaniæ inter se divisis, belloque Turcico flagrante, *Inducias Vicennales* inire necesse fuit. (*vid. Germanica.*)

Exorto ob causam Palatinam & Coloniensem anno 1688 bello gravissimo, Belgium pro more pars illius non parva fuit, Gallo haud alibi lubentius, quam in illa munimentorum catena theatrum belli aperiente.

Causam & occasionem Hollandis bellum indicendi dedit Wil- Belli cause.
helmus Nassovius Princeps Auriacus, Belgii Fœderati Gubernator, qui auxiliantibus Batavis cum classe 65. navium bellicarum, alioque apparatu in Angliam trajecit, ductis secum 30000 hominibus, adversus Jacobum II Regem legitimum suumque focerum.

Batavi, ut inexpectati hujus consilii rationem orbi probarent, Principum legatis Hagæ significant, assistere se oportere Gubernatori suo, qui in Angliam navigaret, nequaquam ut regnum invaderet, aut Regem throno suo dejiceret, sed ut Nationi, legibus, libertati, religioni reformatæ, quam Jacobus eversum iret, succurrat. Verum Rex Jacobus non eversum ibat religionem reformatam, sed libertatem conscientiæ, quam Protestantes olim toties appellabant, permissam voluit. Neque Wilhelmum religionem in Angliam egit, sed corona, obtentu religionis quæsitam.

Anno 1689. Humierus Franciæ Mareſchallus ad Walcurium a Waldeccio Principe, Hollandorum Ductore, clade affectus est, Rex Lud. in Belg.
1200 Gallorum cæsis. Humiero surrogatus *Luxemburgus* belli Imperator in Flandria, qui anno 1690. Waldeccio vices reddit, prope Carolo Regium 6000 Hollandorum acie cæsis, 7000 captis.

A. 1691. Rex cum Principibus Regii sanguinis, Carnutensi, Borbonio, Contio, Mainio, Tholosano, Vendomio & Mareſchallis, Luxemburgo, Duras, Fevillada, in Belgium progressus, *Montes* Hannoniæ expugnavit, antequam Auriacus (Rex Angliæ proclamatus) suos Anglos & Hollandos ex hybernis educeret. Leodium, quia receperat fœderatorum copias, ignibus missilibus a Gallis impetitur.

A. 1692. Gallis cessit *Namurcum*, præsentem iterum Rege, Luxemburgo vero oppugnationem cum exercitu protegente, ne Elector Baviaræ & Auriacus eam possent solvere. Secutum est prælium *Stenkecanum*, quo cæsi fœderati ad septem suorum millia amiserunt.

A. 1693. *Bufflerius* Furnas capit, captis 4000 Anglorum: Land. pugna. Hujum Villaregius. *Luxemburgus Landensem* reportat victoriam, cæsis fœderatis, & opima præda reportata. Carolo Regium Villaregio se dedit: Hollandis vero Ponticherium in India Orientali, præcipuum Gallorum munimentum.

A. 1694. Variis itineribus & mutatione castrorum finita propemodum fuit in Belgio expeditio. *Wilhelmus* tamen *Auriacus*, raro exemplo, Hujum & *Dixmudam* recepit. *Diepam* vero & *Portum Gratiae* Classis fœderata ignibus infestavit, magno privatorum damno, nullo ad rei summam emolumento; nisi quod animi ferme magis, quam ædificia inhumano hoc belli genere accendantur. In *Dunkercam* quoque & *Morclavium* igniarius hic imber defæviit.

A. 1695. Mortuo *Luxemburgo*, heroi eximio, successit in supremo exercitus Belgici Præfectura *Villaregius*, minus felix quam artium bellicarum peritus. Elector *Bavariæ* & *Auriacus* *Namurcum* expugnarunt, Galli decem millia, fœderati dimidio plures amisisse scribuntur. Postquam residui de præsidio liberi fuerant dimissi, detentus est *Bufflerius* *Mareschallus*, quod Galli præsidium *Dixmudæ* contra deditiois pacta retinuisent. Memorabile etiam videtur, quod, dum Galli anno 1692 *Namurcum* expugnant, portæ urbis inscripserint hoc lemma: *reddi potest, vinci non potest*: nunc vero, cum Fœderati idem munimentum oppugnatione cruenta recuperaverant, substituerint hanc epigraphen: *& vinci, & reddi potest*. Galli dicunt, quod expugnatio *Namurci* sit præcipuum opus, quod *Wilhelmus Auriacus* tota vita sua patrarat. Verum in eo perficiendo socium habuit *Maximilianum Emmanuelem* Electorem *Bavariæ*, Heroem toto orbe notissimum.

Obit hoc anno *Maria*, *Jacobi II* filia, Principis *Auriaci* conjux; qui tamen perrexit, se Regem *Magnæ Britanniae* gerere: sed quo jure in regno hæreditario?

Bellum incendiarium.

Villaregius *Bruxellas* ignibus infestavit, quibus tria domorum millia conflagrarunt. *Larreyus*, *Wilhelmi Auriaci* panegyrista, in sua *Historia Angliæ* propterea scripsit, nullam amplius esse *Galliæ* politicen. Sed responderent Galli, se secutos Anglorum politicam, qui *Dunkercam*, *Diepam*, *Maclovium*, *Portum Gratiae*, aliaque *Franciæ* littora, quantum in se erat, in cineres redegisent.

A. 1696. Angli & *Hollandi* eandem politicam exercuerunt in *Caletum*, centum domibus combustis, in *Insulam Rheam*, im-

missis

missis 4000 ollis igniariis, totidemque in Olonnam. His gestis expeditio maritima anni istius stetit. Terrestris in Belgio adhuc fuit sterilior, aspectibus mutuis absoluta.

Anno 1697. postquam Catinatus, confecta cum Sabauda pace, in Belgium translatus Athum expugnavit, Rivoici Gallus etiam cum Hispano, Anglo, & Hollando in pacem convenit, interlocutore Sueco.

Hispanis Rex Christianissimus restituit Montes, Caroloregium, Cortracum, Athum, cum locis, post pacem Neomagensis reunitis. Hollandis impositum, ut Marchionatum Bergensem ad Zomam Comiti Arvernæ, quem hoc bello possessione deiecerant, restituerent, prout etiam Ponticherium in India societati Gallicæ Orientali. In favorem Angliæ Wilhelmus Auriacus agnitus Rex Angliæ, destituto Jacobo II Rege. Loca, utrinque ablata, reddita.

Mirati sunt multi, Ludovicum victorem tot urbes terrasque restituisse. At ille altiori e specula prospiciebat; ea Caroli II infirmitate nodum magni fœderis scissum volebat, Hispaniam Domui suæ conciliatam, maris potentes amicos, ut consiliis suis de Hispania viam complanaret.

Quamvis autem magnum Protestantibus gaudium afferret, quod, dejecto Jacobo catholico, suo de gremio Princeps in throno Britannico esset firmatus, lætitiâ tamen temperavit dolor geminus, & quod Edictum Nannetense non fuerit, prout petierant & speraverant, restitutum, & quod Articulo pacis IV fuerit inserta, invisâ sibi, de qua alias, clausula. Anni sequentes impensi sunt partitionibus Monarchiæ Hispanicæ. Et prima quidem Hagæ facta, tribuitur Carolo Archiduci Mediolanum, Delphino Neapolis & Sicilia cum portibus Hetruscis & Guipiscoa, reliqua Monarchia Principi Electorali Baviaræ: hoc vero mortuo altera divisione, suscepta Londini, Delphino adjecta est Lotharingia, Duci vero Lotharingiæ Mediolanum assignatum, reliquum Monarchiæ Carolo

Archiduci. Quantum in omnem partem fuisset

auctum regnum Galliæ, si partitione

stetisset!



CAPUT V.

DE

STATU HELVETIÆ

SÆCULO XVII.

SUMMARIUM.

37. *Instituta Congregatio Benedictino-Helvetica. Fœdus cum Henrico IV. Sabaudus Genevam tentat. Bellum in Valle Telina. Turbæ Religionariæ. Bellum intestinum. Vilmergensis Catholicorum victoria. Pax. Lites Episcopi Basileensis cum urbe. Lites Glaronensium compositæ. Calumnia Hottingeri in Card. Sfondratum. Supplicatio processionis a Sangallensibus turbata. Calendarii correctio. Turbæ Grisonicæ. Abbas Murensis creatus S. R. J. Princeps.*

Congreg. Bened. Helvet.

Anno 1601 erecta est congregatio Benedictino-Helvetica, consilio & opera Joachimi Beroldingeri, Decani Einsidlenfis, primum inter Abbates St. Gallensem, Einsidlensem, Muranum, & Fischingensem. His accefferunt Falerianus, Disertinus, Rheinavienfis, Engelbergenfis, Steinenfis. Hæc congregatio a Clemente VIII. aliisque Pontificibus approbata, multisque privilegiis fuit ornata. Certe ab eo tempore Regularis disciplina & doctrina eximie floruit. Et vero zelo explicando vel ipsi A catholici campum amplum aperuerunt, contra quos tot invicti deinceps heroes prodierunt

Fœdus cum Henr. IV.

Anno 1602. Helveti fœdus cum Henrico IV. Galliæ Rege renovarunt Parisiis in Ecclesia B. V. super sacris Evangeliiis jramento præstito. Rex eis confirmavit privilegia, quibus fruebantur in Francia. Cantones Protestantes eam adjecere conditionem, ne arma ferre cogantur adversus homines suæ religionis, Catholici vero, ut continuare sibi liceat fœdus cum Mediolano & Sabaudia, si illud non vergat in præjudicium Franciæ.

Sabaudus Genevam tentat.

Anno 1603. Carolus Emmanuel Dux Sabaudiæ missis tribus armatorum millibus Genevam, cum Helvetis fœderatam, & sub Galliæ

Galliæ protectione stantem, noctu intercipere conabatur. Jamque plures superato vallo mœnia conscenderant, atque in urbem evaserant, cum cives strepitu exciti, armis correptis, hostem repulerunt, pluribus interfectis captisque, aliis in fossam desilientibus, & vitam sibi ipsis adimentibus. Genevenses in sabaudicum agrum effusi, incendia & populationem propagabant; jamque ad bellum res videbatur vergere, cum a Rege Galliæ feroces animi sunt conciliati. Dux factum per suum apud Bernates legatum excusabat, non fuisse intentionis suæ urbem retinere, sed Gallos prævertere, qui eandem per Lediguerium fuissent occupaturi. Cæterum eam civitatem Episcopus Genevensis dicebat suam, Sabaudus eam sibi vindicabat, Genevenses liberam asserebant.

Anno 1605. Genevæ interiit Theodorus Beza, dignus Calvino Discipulus & in cathedra pestilentiae successor. Plures sunt scriptores, qui mortem ejus plenam desperatione referunt.

Anno 1610. Episcopus Basileensis cum septem Cantonibus catholicis fœdus renovavit, ad tuitionem maxime Religionis, a Zwinglianis undique impetitæ, quam etiam ex Vallesia extrudere omni ope collaborabant, prout ex Grisonia, Turgovia, Valle Rheni &c. Münsterthalensibus jus civitatis Bernates dabant, ut hoc eos titulo contra Episc. Basileensem, Dominum suum, possent protegere.

In Vallesia anno 1614 in Episcopatum suæ factionis hominem intrudere conati sunt. Anno 1618 etiam ex 4 Zwinglianis Helvetiæ civitatibus Prædicantes in Dordracena synodo comparuerunt. 1619 Plurimum oppidum cum Schilono a collabente monte *Conto* in Grisonia penitus oppressum est, lacu inde emergente.

Anno 1620. Catholici in Valle Telina, a Grisonibus severe habiti, Wormium occuparunt, omnesque Calvinistas occiderunt. Miserunt illico Grifones Judices, qui in fontes animadvertant; & sectæ suæ Ecclesias erigant. Dux de Fera novus Mediolani Gubernator, a Catholicis imploratus, misit illico copias. Gallia, Veneti, Helveti causam communem fecere, non passuri, ut Hispania cum provinciis hæreditariis Austriacis, quæ sunt in Germania, tam facilem communicationem nanciscatur, miscbant se huic negotio; unde ortum novum bellum, interveniente summo Pontifice sopitum, sæpius rursus exarsit. Convenit denique, ut Hispani & Grifones ex Valle Telina suas reducerent copias, nova propugnacula solo æquarent, & quidquid in detrimentum Religionis Catholicæ esset introductum, tollatur.

Bellum. Val-
Telinum.

Anno 1623 cum turbæ Vallis Telinæ necdum essent compositæ, Hispanis adhuc ibidem morantibus, provincia illa tanquam sacrum depositum Pontifici a Gallis & Hispanis fuit commissæ. Sed cum neque hoc consilium haberet constantiam, unio inter Franciam, Sabaudiam, & Venetias in eum finem fuit concepta, ut Hispani cogerentur Valle Telina decedere; & munimenta, quæ erexerant, diruere.

Anno 1624. Cantones Solodori coram Galliæ oratore congregati, copiam fecerunt Gallis conductoribus, per omnes provincias habendi delectus, eum in finem, ut Hispani ex Valle Telina depellantur. Datus etiam a fœderatis, Gallo, Subaudo, Venetis, Mansfeldio nervus belli, ut vires Austriacas distrahat.

Cævrens igitur Marchio cum copiis Vallem Telinam ingressus, plura munimenta expugnavit. Tandem vero post tot annorum turbas & bella, quæ minima hæc Europæ portiuncula Europæos inter summos Principes excitavit, confecta est pax, anno 1626. a Regibus Galliæ & Hispaniæ.

In ea confirmatur Jurisdictio suprema Grisonum in Vallem Telinam, Religio item Catholica cum exclusione omnium sectarum, tam in Valle, quam Comitatus adjacentibus, Bormiensi & Clavennensi. Valtellini ipsi magistratus sibi eligant, & Gubernatores. In signum tamen subjectionis Grisonibus pendant annuatim 25000 Scutorum.

Quia autem occasione belli Valtelini contra Genuenses etiam, Hispanorum socios, fœderati, (Galli, Sabaudi & Veneti) bellum gesserunt, delatus est Carolo Emmanueli Sabaudia Ducis titulus Regis Cypri. Catholici Helvetiæ Cantones pacem approbaverunt, Protestantibus vero articulus de Religione displicuit. Grisonibus summa annua iusto minor visa est, sed cum pax a summis Principibus esset confecta, acquiescere oportuit. Anno eodem (1626.) Heterodoxis Valtellia excedendum fuit, adnitente potissimum Hildebrando Jost Episcopo, formato in comitiis Sedunensibus Ostracismo.

Anno 1629, cum bellum ob successionem Mantuanam arderet, Imperator, capta Mayensfelda & Curia, per Grisoniam, Colalto Duce, traduxit exercitum, Venetis alteram per Tyrolin in Italiam viam præpeditentibus. Translatus in Mantuanum agrum Germanus miles, urbem ipsam principem, non minus munitam quam opulentam, intercipit, paludibus glacie concretis, expilatque,

que, Nivernensi & Estræo legato Gallico in Romanæ Ecclesiæ terras se recipientibus, anno 1630

Verum eodem adhuc anno conclusa est in Insubria suspensio armorum, & Ratisbonæ pax.

Tempore belli Suecici Helveti neutras partes sunt amplexi; quamvis Zwingliani non una occasione desideria sua prodiderint. Rottwilam Wirtembergicus Administrator anno 1631 occupavit, & a fœdere Helvetico, cui anno 1519. se adjunxerat, abstraxit.

Episcopus Constantiensis & Abbas S. Galli causas matrimoniales suorum subditorum, eorum quoque, qui a Religione desce-
verant, ad forum suum Ecclesiasticum pertinere, omni jure con-
tendebant; sed ii sub Tigurinorum alas se abdiderunt, in gradi-
bus prohibitis Tiguri copulati, competenti foro se subtraxere, usur-
pationibus hujusmodi longævam consuetudinem prætexentes. In
communibus præsertim Præfecturis tales, aliæque lites quam plu-
rimæ agitabantur; unde perpetuæ in comitiis Badensibus & Fran-
confeldensibus querelæ, & Catholicos inter & Protestantes Ordines
contentiones. O quam alia fœderatæ & intime unitæ Reipublicæ
fortissimæ facies, dum esset unius labii!

Turbæ Reli-
gionariæ,

Anno 1633. Lucernæ, (ubi, cum quidam incaute in voluminum nidum scloporum solveret, Augusta ad S. Leodegarii Basilica ad muros usque conflagraverat) Catholici Cantones cum Victore Amadeo, Sabaudix Duce, fœdus renovarunt, cum patre ejus & avo initum, ad defensionem mutuam.

Tigurinis multiplex frequensque contentio cum Anabaptistis. Profelytos illos efficere laborabant; sed cum disputando nihil cum illis proficerent, quavis parte Scripturas ad suos errores absque judice detorquebant. Quare ad vim, ad carceres, mortemque ipsam ventum: Anabaptistis ad libertatem conscientix, more Zwingliani & Lutheranis ante hac usitato, frustra appellantibus.

Anno 1638. Glaronenses Acatholici circa scholas, causas matrimoniales, Præfecturas, peregrinationes sacras varia in præjudicium Catholicæ partis innovarunt. Novatores hæc licita sibi esse prætendunt, non autem Catholicis antiquas consuetudines retinere. Eodem jure Patres Capucini ex catholicis etiam in Grisonia locis, prævalente Calvinistarum potentia, per summum nefas expulsi sunt. In Turgoia Frauenfeldæ Zwingliani novum sibi templum construxere. Querulabantur nihilominus perpetuo, sibi ab
agno

agno aquam turbari; quod etiam anno 1655. factum, cum Dux Sabaudia Waldenses, pervicaces suos subditos, castigaret.

Bellum Reli- Tandem Religionis dissidia adeo exarlerant, ut anno 1666. in apertam belli flammam erumperent. Quippe, dum Arthi, oppido ad lacum Tugiensem sito, quidam a fide deficerent, & Tigurum profugissent, Suicenses, ad quorum cantonem Arthum pertinet, reliquos de defectione suspectos Suicium perduxerunt, contumacesque aliquos, pro suprema sua & independente potestate, capite multarunt, subditos etiam suos, Tigurum profugos, repositos, ni venirent, bona eorum fisco addicturi.

Tigurini vero, quibus se Bernates adjunxere, hæc Suicensium acta injuriam suam interpretantes, atque jus emigrandi, quod probare non poterant, prætendentes, bona profugorum deposcebant: &, cum Suicenses, Tigurinibus nihil in ditiones suas juris esse rati, leges nollent accipere, Tigurini aggressores ad arma versi, Rappersvilam, rupta pace, oppugnarunt.

Vilmergensis Lucernates, Uranienfes, Suicenses, Subsylvani, Tugienfes, injuriam non ferendam existimantes, vim vi retundere statuunt, atque ad *Vilmergam*, oppidum in libera provincia, 24. Jan. cum hoste congressi, insignem ab eo victoriam reportant; in cujus memoriam & debitam gratiarum actionem 23 Januarii quot annis Lucernæ solennis per urbem supplicatio sub vesperum instituitur.

Difficile tunc non fuisset Catholicis tantæ victoriæ, quæ 2000 Bernatum in acie cæsa, 500 capti referuntur, fructus legere, nisi pacis & Reipublicæ universæ amor manum cohibuisset. Annitentibus igitur Cantonibus Friburgo, Solodoro, Basilea, Scaphusia, Glarona, Abbatiscela, quæ neutras partes fuerant secutæ, pax confecta est, ex qua victores victosque non dignosceres; neque enim Catholici quidquam aut terrarum, aut novi juris sibi vindicabant, sed pacem & quietem, toties ab A catholicis turbatam, respiciebant: digni profecto, qui versa deinceps armorum fortuna eandem animorum æquitatem experirentur.

Pax. Sanctum, ut quilibet Canto in sua provincia & ditione suæ religioni & supremæ Jurisdictioni atque dominio, absque turbatione, quietus relinquitur. In communibus provinciis (uti Turgoia, Valle Rhenana, Comitatu Badensi & Sargantino) Religio *antiqua* & *vera* integra & illasa conservetur. Si qui vellent in alium Cantonem, præsertim si ibi diversa est Religio, emigrare, integrum sit loci dominis, contra tales subditos discessuros pro arbitrio procedere.

Verum

Verum ea pax, Badengæ inita, impedire non potuit, quin
 annis Tiguriis, in Turgavia Catholicis, & Abbatibus
 S. Galli molestias facerent, civi quoque Fraustentensi, ad avia
 sacra reverso, liberos abstractos in suæ ditionis terram abducent;
 quos tamen, intervenientibus Catholicis Cantonibus, restitui oportuit.

Major cum Basilea erat controversia; nam post Edictum
 Restitutionis a Ferd. II Imperatore anno 1629 promulgatum,
 Episcopus Basileensis Ecclesiam Cathedralem, a civitate injuste ereptam,
 repetiit; Cæsar vero Electori Bavarie, & Archiduci Leopoldo executionem commisit. At mutata dein armorum fortuna
 negotium Edicti urgeri non satis poterat. Episcopi nihilominus
 justæ suæ petitioni porro insistere; nam Joannes Conradus aliique
 anno 1663. rursusque anno 1672. tum Ratisbonæ apud Cæsares &
 Gallicos legatos, tum etiam in ipsa urbe Basilea jura sua sunt persecuti.
 Verum urbs obtentu Pacis Westph. & possessionis vindicationem elusit;
 quamvis annus normalis, in pace West. fixus, ad sola membra Imperii,
 a cujus nexu Basileenses jam anno 1501 se absciderant, pertineret,
 possessio autem absque justo titulo mala fide cœpta continuataque,
 nunquam fuerit quieta.

Lis Basl.

Anno 1679 Chavignius, Gallicus Genevæ legatus, in suo
 facello Missam celebrari curavit, ad quam etiam exteris aditum
 concessit. Ingens mox in urbe fremitus: cingitur a furiosa plebucula
 Domus legati: exploduntur sclopi. Sed legati constantia se
 minime a sanctis & generosis cœptis absterri passus est.

Nec minus animose Catholici Glaronenses eodem tempore, Glaronensis
 ringentibus heterodoxis, Patres Capucinos introduxerunt. Cum compositio.
 autem varia etiam alia dissidia orirentur, Cantones sex sequentes
 articulos proposuerunt, anno 1683. 1. Pars quælibet in civilibus
 & criminalibus suæ Religionis subditos privative judicet. 2. Si lis
 vertatur inter Catholicum & Acatholicum, pari numero ex utraque
 parte sint Judices. 3. Glarona unus indivisus Canto permaneat,
 atque pro negotiis exteris, & communibus, cum locis confederatis,
 atque pro communibus dominiis curiam communem habeat,
 ibique votum commune concipiat. 4. In expeditionibus provincialibus
 pars utraque suos ducat. 5. Dies Dominicos & Festos pars
 utraque observet.

Quando Rex Gallie & Dux Sabaudie Calvinistas ditionibus
 suis expulerunt, dici non potest, quantos conatus Tigurum & Berna,
 ut id impedirent, opposuerint: quot legationibus & interces-

tionibus actum! quanta devotione hos, ut dicebant, pro Evangelio exules exceperint, foverint, atque Brandeburgo, Hollandis, Hassiæ Principi commendarint, armis & argento instruxerint, ut per stratas Domini sui copias vias ad reditum rimari possent. Nempe filii tenebrarum prudentiores &c.

Anno 1593. Bernæ Anabaptistæ invaluerant, prout ab uno errore ad alterum facilis est transitus. Verum senatus exilium, triremes, necem in eos decrevit, præsertim si sint prædicantes; nec proderat eis, quod ex Bibliis se vellent defendere.

Anno sequenti prope erat, ut ad arma veniretur; nam cum Wartavii, in Sargantino comitatu, qui ad septem antiquiores Cantones spectat, jam plures essent Catholici, Gubernatori dedit illis sacerdotem Catholicam, jure vetustissimæ possessionis, & pacis tractatibus nixus; sed tota vi se opponebant Acatolici, donec tandem, Ameloto Gallico legato interveniente, lis fuit composita, reservato Catholicis suo jure.

Calumnia in
Card. Sfondrati.

Cum exeunte sæculo XVII. Cardinalis Sfondrati, viri doctissimi, qui Abbas & Princeps S. Galli ante fuerat, *Nodus Prædestinationis Dissolutus* in lucem prodiiisset, Præcones etiam Tigurini, fatali necessitate prædestinationis effectus definientes, nodum adhuc in scirpo quærebant. Hos inter Joannes Jacobus Hottinger, in Helvetica sua Historia, vel potius insulsa fabula, & calumniosa in Catholicos satyra, quam Tomis quatuor est complexus, ad annum 1695. scribere non veretur, duos Archiepiscopos & tres Episcopos librum Cardinalis Sfondrati *ut gravibus scaturientem erroribus* apud Pontificem accusasse.

Honesti scriptoris fuisset, Archiepiscopos istos & Episcopos in tam gravi accusatione nominare saltem, ut aliquid probaret; sed de probatione hic homo non est sollicitus; sufficit illi, ut in plurimis aliis, calumniari, ut aliquid hæreat. Dos insignis profecto Historici! vel citat Hospinianum aliquem mendacem, aut Henricum Hottinger venerabilem suum parentem, aut alium Prædicantem Tigurinum, cacabus ollam. Catholicos ubique ceu homines inquietos & pacis perturbatores exagitat, Patres præsertim Capucinos, quia in Helvetia & Grisonia fidem orthodoxam strenue propugnant; ipsum S. Franciscum Salesium ceu virum levissimum traducit. De Catholicorum Vilmergensî victoria vix mentionem facit. Militibus ante invasionem Genevæ extremam unctionem impertitam, promissumque, eos per eandem scalam, quam mœnibus applicarant, in cælum ascensuros nugatur.

Car-

Cardinalem Sfondrati in suo Nodo Dissoluto docere ait, instantes in utero materno mortuos, majori frui beatitudine, quam si in cælum essent recepti: eos cælo excludi propter peccata parentum. Falsissimum autem est, tales doctrinas in Sfondrati libro reperiri. Aliud est, quod propter culpam parentum non perveniant ad baptismum, aliud, quod propter illam cælo excludantur, cum propter peccatum originale excludantur; quæ certa Sfondrati & omnium Catholicorum doctrina est.

Postquam Cœlestinus Sfondrati anno 1695 ad Purpuram Romanam avocatus, Principatum St. Gallensem deposuit, 10 Jan. 1696. in Abbatem electus est Leodegarius Bürgefer Lucernensis, Decanus antea Monasterii, cui mox urbs St. Gallensis, quæ minime debuit, molestiam intulit: & injuriam publicam, persimilem illi, quam olim Abbas ad S. Crucem a Lutheranis Donawerda est perpeffus.

Cum enim anno 1697. Festo Inventionis S. Crucis Monasterium piam supplicationem pro veteri more per urbem S. Gallensem educeret, Zwingliani crucem deponi imperant, cumque Catholici nihilominus illam, aliquantum elevatam, præferrent, cives correptis armis processionem & Monasterium infestarunt.

Supplicatio
S. Gall. tur-
bata.

Graviter, ut par est, Abbas Princeps eam violentiam tulit, nihilque a vetustissima consuetudine alienum, nihil contra conventiones actum asserens, satisfieri sibi pro injuria petiit. At Zwingliani ad vim reversi, occluserunt civitatis portas, ac erectis novis operibus, mœnia machinis tormentariis armarunt, donec quatuor Cantonum Protectorum Legati arma poni jussérunt, atque deinceps crucem ante pectus erectam per urbem portari. Condemnata etiam est urbs in expensas.

Postquam Protestantés in Germania ultra centum annos adhuc errare maluerant in computo Ecclesiastico, quam correctionem Calendarii Juliani admittere, religioni sibi ducentes, aliquid, quod a Papa provenit, quamvis sapientissime esset constitutum, & necessitas publica exproceret, admittere; anno tamen 1699 30 Dec. vel invitæ a Papa didicerunt, qua ratione quoad substantiam emendandum sit Calendarium, atque, ut exemplum suum sequerentur, hortati sunt A catholicas quatuor Helvetiæ civitates.

Calendarii
acceptatio.

At illæ, cum adhuc tenerioris essent conscientiæ, per annum salubre negotium distulerunt, donec omiſſis 11 diebus, annum 1701 a 12 Januarii sunt auspiciatæ. Glarona vero, Abbatis-cella (quoad partem A catholicam) urbs San- Gallensis, & Grief-

nes, Juliano aberrante uti perrexerunt, cum non modica rerum confusione.

Turbæ Rhœ-
ticæ.

In Grifonia Calvinistæ sub initium seculi XVIII. in apertam rursus vim adversus Catholicos eruperunt. Sagenæ, pagus, horæ spatio distante Ilancio, plerique erant Catholici; sed Calvinistæ paulatim irrepentes, privato sectæ suæ exercitio non contenti, templum sibi construere moliebantur. Catholici, eam novitatem conventionibus patriis ac juribus suis pugnare, contestantes, se opposebant. Quare ad tria Novatorum millia, ex vicinis locis concursantium, armata manu Catholicos Sagenæ adorti ac direptione & cædibus sævientes, Catholicos incolas sedibus suis expulerunt.

Intervenere tamen Deputati ex utraque Religione, qui statuerunt, ut Acatolici intra privatum in domibus suis exercitium, sicut hætenus, se continentes, a templi molitione desisterent, infantes, non baptizatos, in communi cœmeterio sepeliendi jus habeant, Parochus vero loci, cujus zelum Heterodoxi maxime accusabant, cum alio commutetur. Catholici Sagenæ hac transactione, in quam obtorto velut collo essent rapti, enormiter se gravatos querebantur; multisque in aliis etiam locis erumpentibus discordiarum incendiis, in Comitibus popularibus, procellosi instar maris æstuantibus, non raro ventum ad verbera, manu, quam ad suffragium attollere debuerant, in cædes pruriente.

Muren-
sis
Princeps.

Anno 1702 Placidus, ex Illustri Tugienfi Familia Zurlauben prognatus, Monasterii Murenfis Abbas, ab Imperatore creatus est S. R. J. Princeps. Displicuit initio hæc res Cantonibus Helvetiæ, maxime Acatolicis, quemcunque Catholicorum splendorem sibi umbram facere autumantibus. Respondit Placidus, hanc dignitatem a se nullatenus quæsitam, sed a comite Trautmansdorffo, Cæsareo ad Helvetos legato, Imperatoris nomine inopinato sibi fuisse oblatam. Monasterium Murense esse foundationem Domus Habsburgo-Austriacæ, repudiationem gratiæ, ultro oblatae, ingratitude & contemptus speciem præferre.

Cæsar Leopoldus amplum Diploma impertivit, in quo memorat, hanc Domum Dei, a suis Progenitoribus fuisse fundatam, dotatamque, atque ab ea insignia Familiæ suæ totique Romano Imperio obsequia fuisse præstita; dignum proin esse Placidum ejusque successores, ut Principum Imperii Dignitate ornentur, cum omnibus prærogativis & honoribus, huic Dignitati annexis, utque hæreditaria officia, Mareschalli, Camerarii, Pincernæ, Dapiferi possit erigere, & quidem Mareschalli munere semper senior Famil-
liæ

liæ Zurlaubianæ, Baronum ad Turrim & Gastellenburgum infeudetur. Assumit denique Cæsar Placidum ejusque Monasterium & bona sub specialem protectionem Romani Imperii.



CAPUT VI.

STATUS ANGLIÆ

Ecclesiasticus & Politicus

SÆCULO XVII.

39.

ARTICULUS I.

Status Angliæ sub Jacobo I.

§. I.

Jacobi Regis initia. Conciliabulum. Ejus Decreta. Persecutio Catholicorum.

Postquam anno 1603 mors sustulit Elisabetham Reginam Angliæ, Parlamentum Jacobum VI Scotiæ Regem, Mariæ Stuartæ filium, Henrici VIII Angliæ Regis ex sorore Abnepotem, Regem dixit, sub nomine *Jacobi I magnæ Britanniæ Regis.*

Catholici spem optimam de hoc Principe, e Catholicis parentibus nato, & a matre pie educato, conceperant; unde porrecta libello supplici libertatem Religionis rogarunt.

At licet initio clementiam præfulerit, libertatem sacrorum pollicitus; quia tamen hæreticum virus jam imbiberat, qualis esset, brevi demonstravit.

Quia autem Episcopaliū potissimum sectæ se addicebat, Conciliabulum eorum instituit, illique præsedit. 141 Articuli in eo sunt conditi, Presbyterianis & Puritanis in Anglia, Calvinistis in Gallia & Hollandia maximam partem contrarii. Quippe in illis statuabatur, Regem esse caput Ecclesiæ Anglicanæ, Episcopos, Pres-

Presbyteros, Diaconos solenni ritu esse consecrandos, certos dies festos colendos, statuta jejunia servanda, Lycanias cantandas, ad nomen Jesu genua flectenda, vestitum Ministrorum in Ecclesiis retinendum, in baptismo formandam crucem, confirmationem administrandam, confessionem auricularem adhibendam.

Sequenti anno idem conventus instaurabatur, in quo Rex proposuit 1. sibi videri, Confirmationem, velut complementum Baptismi esse retinendam. Respondit Archiepiscopus Cantuariensis, Confirmationem semper ab Apostolorum ætate in Ecclesia fuisse usitatam. Consentiebant alii Episcopi.

2. Absolutionem privatam a peccatis pariter retinendam, quia & ipsa ab Apostolorum tempore descendat. Episcopi rursus consenserunt. 3. In casu necessitatis etiam a laicis extra templum conferri posse baptismum. Responderunt Episcopi, antiquissimum hunc usum esse, *Act. 2*, dum uno die 3000 baptizarentur, exercitum.

Jacob. perfe-
quitur Cath.

Murmurabant quidem contra hos articulos Calvinistæ, sed a Rege ipso confutabantur, qui addidit, ex omnibus Bibliorum versionibus nullam pejorem esse Genevensi, omnesque glossas, marginales & interlineares, plenas falsitatis & seditionis esse.

Ne autem Calvinistæ turbas cierent, gratum quid iis præstandum judicavit, gemino edito Decreto; quorum primo omnibus sacerdotibus Catholicis sub pœna capitis exilium indicitur: altero omnes Angli, qui extra regnum in Seminariis viverent, revocantur. In Jesuitas maxime inquiri jubetur, prohibeturque sub gravi pœna, ne quis eos tecto excipere audeat, cum severo mandato illos denunciandi.

§. 2.

40. *Conspiratio Pulveraria. P. Garneti mors. Novum Juramentum, a Rege exactum.*

Conspiratio
Pulveraria.

Cum Catholicis nulla superesset spes Religionis libertatem obtinendi, injuste se invasos belloque velut petros rati, defensionem sui opponere decernunt. Octo præsertim Nobiles Juvenes, quorum Caput *Robertus Catibeyus*, stirpe & corporis forma præstans, conjurant in facinus atrox, horrendum, impium, quod, eventum licet fuisset nactum, nemo sanus comprobarit.

Præ-

Præstituta erat dies frequenti in palatio Westmonasterienſi habendo regni ſenatui. Totam igitur ſubvertere ædificii molem ſtatuant. Vicinam in eam rem domum conducunt, indeque ſubterraneos ad palatium agunt cuniculos, eosque implent pulvere pyrio, quando Rex cum Parlamento collectus eſſet, incendiando, ut una omnes ruina contumulet.

At even'u intento caruit immane conſilium; nam antequam Parliamentum conveniret, quidam ex conjuratis ad Montagium, ſenatorem Catholicum, ſcripſit epiſtolam, tacito nomine ſuo locoque, ac monuit, ne eo die in Parlamento compareret. Detegitur.

Montagius hanc ſchedam Comiti Sarisburio, intimæ admiſſionis Miſiſtro, tradidit, & iſte Regi. Qui peſtem ſubodoratus inquiri juſſit, deprehenſoque opifice in cella, & in carcerem ducto, tota conjuratio fuit detecta.

Conjurati Londino diffugiunt, & Catholicos per provincias diſperſos ad arma concitant; ſed vix centum colligere poterant. Reſtiterunt tamen inſequentibus Regiis. Sed Catſbeyo cum aliis quibusdam caſo reliqui Londinum vincti abducti ſunt, atque ſenatus ſententia mortis ſupplicio affecti. (1606.)

Quamvis autem conjurati, ſevere examinati, uno ore negaſſent, ullum ſacerdotem conſpirationis fuiſſe conſcium, atque ea per duos meſes publica fuiſſet perſuaſio, Calviniſtæ tamen nihil omiſerunt, quo Jeſuitas in ſuſpicionem poſſent trahere. Tres autem ex illis, Garnetum, Grienwelum, & Odoenum, quamvis nullum ſceleris indicium appareret, reos egerunt, parricidas reſpectuque proditores proclamantes.

P. Henricus *Garnetus* e latebra extractus Londinum capti- Garnetus.
vus abducitur, ibique, quamvis nulla ratione convictus aut crimen ullum confeſſus, ad mortem condemnatus, ſuſpendio fuit enecatus: moxque per totam Europam fama diſperſa, quod tanquam complex imo auctor meditati parricidii interierit. Verum Deus etiam miraculo innocentiam ſervi ſui comprobavit; nam ſpica, ſanguine ejus tinctæ, effigiem Garneti perſpicue exhibebat; id quod multorum, ipſius etiam Hiſpanici legati oculis fuit ſubjectum, fatentibus pictoriæ peritis, nulla humana arte talem effigiem in ſeſtucca effingi poſſe.

Ad eandem mortem condemnatus fuit P. Edvardus *Olkor*. *Olkornus*, *nus*, non alia ex culpa, niſi quod Jeſuita fuerit; de cætero nullum indicium, nulla probatio delicti. Nicolaum *Odoenum*, Societatis *Odoenus*. Fratrem laicum, gravi hernia laborantem, contra juriſum placita

in

in equuleo suspenderunt, tantaque crudelitate torserunt, ut visceribus effusis exanimis concideret. Neque hic criminis alicujus fuit inventus reus.

Conspiratio illa, quæ *Pulveraria* dicebatur, sicut nefarie & insipienter fuit concepta, ita alios fructus non intulit, quam ut acerbiora in Catholicos decreta ferrentur. Ingens quippe multa iis fuit imposita, qui ad Cœnam non accederent, aut ad templa, aut preces publicas. Omnes Catholici arcentur a publicis muneribus, & ab ipso etiam Regis vel aulæ accessu. Bona illorum, qui in ultramarinis seminariis educantur, ærario Regis addicuntur.

41.¹
Juramentum
novum.

Hæc pluraque id genus alia minus adhuc gravia visa sunt, quam illa, quæ novo & inaudito juramento promittere jubebantur. Octo articulos illud complectebatur.

1. Quod Jacobus sit Rex legitimus.
2. Quod nec Papa nec ullus alius possit eum deponere, aut subditos ejus a juramento fidelitatis aut subjectionis absolvere.
3. Quod, non obstante quacunque excommunicatione, aut absolutione Papali, fideles & obedientes esse velint.
4. Quod toto corde abominentur tanquam impiam, hæreticam, & execrandam doctrinam, Principes, a Papa excommunicatos, aut depositos, posse occidi a subditis, aut juribus suis privari.
5. Quod nec Papa nec alius potestatem habeat, hoc juramentum relaxandi.
6. Quod hoc juramentum legitima auctoritate imponatur, omnisque contraria dispensatio & exceptio sit rejicienda.
7. Quod hoc juramentum emittant sincere absque ulla reservatione aut restrictione mentali.
8. Quod jurent libere, vere, fideliter, absque dolo.

Hoc Juramentum grandes difficultates, discordias, turbasque inter personas Ecclesiastici ordinis excitavit. Quidam enim cum Patribus Societatis illicitum dicebant: quidam in medio consistebant; potissima vero eorum pars licitum putavit, & duce ac hortatore Georgio Blackvelo, Archipresbytero, illud præstitit.

Improbatur.

Blackvelus.

Paulus V. ad Catholicos in Anglia rescripsit, hoc juramentum nullatenus edi posse sine læsione Divini honoris & conscientiæ. At *Blackvelus* Pontificis litteras promulgare recusavit, ceu sub- & obreptitie a Jesuitis impetratas, sed Papa alteras addidit; Bellarminus etiam & Suarez scripserunt contra Regem Angliæ, atque juramentum istud. Verum Rex ipse aliique replicarunt, non satis at-

tenden-

tendentes potestatem clavium, a Christo concessam Petro ejusque successoribus, & ipsos etiam Principes esse inter oves Christi, pastoralis baculo Petri subiectos. Atque has inter controversias annus 1607 fuit evolutus.

Juramentum, quod diximus, cum emittere detrectaret *Thomas Garnetus*, Henrici nepos, ad furcam ductus est; ubi Societatis Jesu sacerdotem se professus, atque Catholicos ad constantiam adhortatus, gloriosam mortem pro fide subiit. At non se continuit intra Angliam tyrannis atrox, in Hiberniam quoque progressa & Scotiam complures e Clero sæculari & S. Francisci Familia Martyres cœlo transmisit.

Thom. Garnetus.

§. 3.

Heroicum certamen P. Joannis Ogilbæi.

Verum illustrius nihil fuit, quam Joannis Ogilbæi fortitudo intrepida, primæ Christianæ ætatis heroem referens. Natus is erat in Scotia nobili genere, atque in patriam redux, cum aliquanto tempore conversioni animarum insudasset, proditus captusque ad Archiepiscopum Glascoviensem ductus est; a quo examinatus, varique interrogatus, tanto ingenii excitati acumine, tanta prudentia, eaque in gravissimis quoque tormentis infracta constantia respondit, ut vel ipsos hæreticos in admirationem raperet, & pudore suffunderet. Inter alia quærebant, cur in Scotiam venisset? ut illam ab hæresi revocaret, respondet. *Ille*, quæ authoritate id faceret? Divina, sedisque Apostolicæ, inquit. *Ille*: crimen esse læsæ Majestatis, asserere, quod Papa Romanus potestatem hanc habeat. *Ille*: Articulum fidei esse, quod illam habeat. *Ille*, an Papa possit Regem deponere & dignitate sua privare? *Ille*, legitimum Regem sanctæ Ecclesiæ obedientem non posse deponi respondit. *Ille*: quid autem, si fieret hæreticus? *Ille*: ad hoc se nolle respondere: Doctores consulere. *Ille*: ediceret, quid ipse sentiret. *Ille*: se non esse Judicem inter Papam & Regem, reponit.

42.

Ogilbæi extant.

Ad conspiracy deinde pulverariam delapsi, quid de ea sentiret, interrogant. Se illam detestari, respondit. At Jesuitas fuisse complices, inquirunt. *Ille*: malignarum mentium figmentum hoc esse, nullo teste probatum, ab omnibus reis negatum. *Ille*: ex Jesuitatum doctrina sequi parricidia, negavit Ogilbæus; & ex Wiclephi aliorumque hæreticorum doctrina illa sequi asse-

Pars IX.

D d

quit.

ruit: addiditque, conſpirationem Londinenſem fuiſſe paucorum Nobilium: at vero inſtinctu Miniſtrorum Regem, quod in Catholicos videretur clementior, in curia Edenburgenſi occidendum fuiſſe a populo Calviniano, niſi Prætoriani milites eum defendiſſent.

Episcopus poſt hæc ejuſque aſſectæ plura de P. Henrico Garneto ingerunt; & quid Ogilbæus de illo exiſtimet, interrogant. Reſpondit ille, inſontem ſibi videri, quia nec debuit nec potuit ea revelare, quæ non niſi ex confeſſione ſacramentali ipſi fuerant cognita.

Ductus inde ludibria inter populi Edenburgum, novis quæſtionibus fuit vexatus: uti, cur in Scotiam veniſſet? *Ille*: ſine culpa ſibi non poſſe patria interdici. *Illi*: apud quos divertiſſet? *Ille*: nunquam ſe hoc dicturum; quia in perniciem aliorum cederet.

Cum autem dein eum vehementer torquerent, ut confeſſionem exprimerent, reſpondit: tametſi ante voluiſſem vobis aliquid faceri, jam non facerem, ne videar ſenſu vinci. Expedite cataſtas, equuleos, ferrum, ignes, tormenta, & quidquid tyrannis crudelitatis invenit, experimentum dabo, an plura vos & atrociora inferre, an vero ego ſuſſerre cum gratia Dei poſſim. Corpus in veſtra eſt poteſtate, animus liber eſt.

Generoſa reſponſa.

Raptus dein rurfus eſt Edenburgo Glaſcoviam, ubi Præfeſtus urbis inter minas ad eum: ſi Rex ego forem, liquato te metallo excoquerem. Cui Ogilbæus: ſi Deus te Regem facere voluiſſet, magis te prudentem & minus barbarum feciſſet. Andreas Knoxius, cum vidiſſet, heroem iſtum nullis minis, nullis tormentis flecti poſſe, blanditiis & promiſſis agendum ratus, dignitates & divitias obtulit, dummodo animum induceret, ut patriam religionem amplecteretur.

Quænam hæc eſſet patria religio, interrogavit Ogilbæus: antiquiſſimam per multa ſæcula continuatam religionem patriæ eſſe Romano-Catholicam: novitiam, nuper inductam, eſſe verſatilem, inconstantem, in dies mutabilem, in plures ſectas diſſuſam, ut adeo ſciri nequeat, quænam hodie ſit religio patria.

Paucos ante annos vobis articulus fidei erat, Chriſtum ſolum eſſe caput Eccleſiæ; jam vero jurato aſſeritis, Regem eſſe caput Eccleſiæ. Tu ipſe, Knoxi, publice contra Episcopos & Episcopatus prædicabas, diaboli membrum eſſe, qui Episcopatum ſuſcipiat, omni contumelia afficiendum. Paulo autem poſt ipſemet plures Episcopatus aſſumpſiſti. Similiter Couperus contra ſtatutum

Episco-

Episcopalem librum edidit. Jam vero ipse Episcopatum amplexus est.

Imo Concilium Ministrorum (pergebat) statum Episcopalem abominandum & nullo modo tolerandum graviter definivit. Jam vero docetis penitus contrarium. Profundius se modo inspicere veritatem dicebant. Ita est, reposuit Ogilbæus, nam prius ceu pauperes Ministelli vix centum videbatis, nunc autem in Episcopali censu videtis millia. Prius, dum in Episcopatus investiti estis, verbum Dei vos prædicare jactabatis; nunc hoc verbum falsum esse dicitis. Quid tum? modo pinguius fumet culina, & cuticula lautius saginetur, & splendidius exornetur.

Mihi sic loqueris? quærit Episcopus; sape tandem, & consilium meum sequere: blandiri nescio, reponit ille, præsertim in hac causa. Malim lictorem ad patibulum sequi, quam tuum consilium, quod recta ad infernum ducit.

Tandem postquam multæ id genus quæstiones & responsiones, quæ diversis linguis prolixius sunt typis editæ, fuerant propositæ, mortis in eum sententia fuit pronuntiata. Cum ad patibulum educeretur, prohibitum ei fuit, ne quid ad populum loqueretur. Verum cum per Præconem publice ediceretur, Ogilbæum non propter fidem, sed propter seditionem & rebellionem adversus Regem damnatum fuisse, alto clamore id negavit. De Rege suo etiam apud exterarum nationes honorifice semper ex innato amore patrio fuisse locutum, eique optima quæque peroptasse. Id unum esse, quod dixisset, Pontifici Romano in his terris potestatem Ecclesiasticam competere, Regemque hæreticum excommunicari ab eo posse. Pro hac veritate lubenter se mortem subiturum. Atque mox subiit animo prorsus imperterritito.

Martyrium.

§. 4.

Regis Jacobi mutatio. Carolus ejus filius abijt in Hispaniam ad ducendam Philippæ III. filiam. Sed ea relicta ducit Ludovici XIII. sororem.

44.

Rex Jacobus, uti pacis amans publicæ, ita in privatos etiam, si indoli suæ relinqueretur, mansuetus, alieno potius ductu quam suo per plures annos in Catholicos sæviit; tandem ve-
 Catholici
 ro anno 1621. sive eventis quibusdam infaustis territus, sive spe carere libe-
 desponsandi Carolo filio suo Hispanam Principem, sive singulari rati.

Dei, in cujus manu sunt corda Regum, instinctu, Catholicis conciliatus, omnes carceres aperiri iussit.

Ægre hæc Regis mutatio hæreticos Angliæ habuit, qui publico etiam in senatu nuptiis cum Hispana se opponebant. Eadem erat Hollandorum machinatio, qui gubernationem uniti Belgii Carolo offerebant, si ab eo recederetur consilio. At Rex propositi tenax, nec Regi patri nec filio Regis adimendam esse libertatem asserebat, quam vel ipsa natura infimæ etiam hominum forti communem vellet.

Pacta connubialia.

Actum proin inter Reges de pactis connubialibus, videlicet 1. ut liberi, ex hoc matrimonio nascituri, Catholica Religione a matre imbuerentur ad decimum usque ætatis annum; tum vero libertati suæ relinquerentur.

2. Ut liberis istis asseratur successio hæreditaria in regno, absque discrimine Religionis.

3. Ut haud procul a Regio palatio futuræ sponsæ sacellum ædificetur pro Religionis Catholicæ exercitio, utque illud toti illius aulæ ac domesticis pateat, absque omni impedimento.

4. Sponsa Episcopum Londini habeat, cui 24 sacerdotes assistant in sacello aulico.

His conditionibus Pontifex motus dispensavit, ut Princeps Catholica cum alienæ religionis Principe matrimonio jungi possit: moxque Carolus in Hispaniam navigavit, ut sponsam suam videret, magnoque apparatu anno 1623. Madriti a Philippo III. Rege totaque aula Hispana exceptus fuit.

Verum siue sponsa non placeret, siue Buckinghamus, qui eum comitatus fuerat, animum averteret, Carolus amores suos in Henricam, Ludovici XIII. Galliarum Regis, sororem convertit, eandemque iisdem ferme conditionibus & pactis nuptialibus, assentiente Pontifice, duxit, in calamitatum abyssum ituram.

Obit Rex.

Mortuus est paulo post (1625.) *Jacobus Rex* anno ætatis 59. Regni Anglici 22. Scotici 58. quia Scotiam cum Anglia conjunxit, primus *Rex Magnæ Britanniæ* fuit appellatus. Pacis & tranquillitatis publicæ adeo erat amans, ut ad nullum bellum permoveri posset; licet Fridericus Palatinus ejus gener proscriptus Electorali Dignitate & Provinciis fuerit privatus.

ARTICULUS II.

Status Angliæ sub Carolo I.

§. I.

*Preluditur immani tragœdiæ morte Ducis Buckinghami, Prorogis
Hiberniæ & Archiepiscopi Cantuariensis. Galli expelluntur. Rex
fugit. Hiberni Catholici ei assistunt. Scoti captivum Anglis
tradunt. Judicio sistitur,
accusatur.*

45.

Turbulentum sane fuit Caroli I. Imperium, Senatu Regni, quem *Parlamentum* vocant, in Regem insurgente. Prima tempestas in Ducem Buckinghamum detonuit, accusatum in senatu, quod Regem, tunc Walliæ Principem, in Hispaniam abduxerit, Papistica fide imbuendum: quod ibidem Catholicum simularit, & Principem induxerit ut Papæ scriberet, eique propensionem suam erga Catholicam Religionem contestaretur, atque *Sanctissimum Patrem* compellaret. Quod sponsalia illa contraxerit ex privatis rationibus in præjudicium regni. Quis jam non videt, per latus Buckinghami Regem ipsum fuisse petitum, apud quem Buckinghamus singulari valebat gratia; quam ob causam etiam brevi post a milite nefarie fuit interemptus.

Apertius autem Parlamentum aversum suum a Rege & Regina animum demonstravit, dum Gallos, qui Reginæ erant ab obsequiis, ex Anglia amandarunt. Quod acerbè adeo tulit Rex Galliæ, ut Angliæ legatum ab accessu arceret, & per Bassompetrium de injuriâ quereretur. Responsum a Senatu, propter Gallorum excessus id factum: Catholicos per eos confirmatos, adolescentes in Seminaria extra regnum transmissos, ruri variis in locis conventus habitos, dictam Missam, conciones &c. palatium Reginæ commune esse Jesuitarum diversorium, ab iis persuasam Reginam, ut pedes exiret, ad locum supplicii, ut ibidem Catholicos, ob prodicionem & inobedientiam morte punitos, tanquam Martyres coleret, aliaque plura esse patrata regni legibus graviter vetita.

Recruduit discordia anno 1629. cum Rex pontibus vectigal quoddam vellet imponere; nam Parlamentum in faciem reclamavit; nec paruit, cum Rex illud vellet dissolvere; sed scriptum publicavit, in quo sancivit, pro hoste Regis regniue habendum, qui

Catholicam religionem conaretur introducere, uti etiam, qui Regi suaderet impositionem vectigalis, aut illud præstaret sine consensu Parlamenti.

Amici Regis
occiduntur.

Nec hoc contenti senatores, postquam Buckinghamum sustulerant, Thomam Wentworthum Staffordiæ Comitem, Proregem Hiberniæ, singulari amicitia nexu Regi conjunctum, quod minus in Catholicos crudelis esset, magisque, ac vellent, Regi charus, ad mortem condemnarunt. Omnia tentavit Rex, ut Ministrum fidelissimum liberaret: sed incassum omnia. Comes publico in foro carnificis manu capite plexus est. (1641.) Fulcra nimirum erant subtrahenda, ut Regem ipsum subruerent.

Quapropter in tertium quoque Regis amicum, Archiepiscopum Cantuariensem, sævitum. 14. erant accusationis capita: inter quæ præcipua, quod Pontificiam velut potestatem exerceret, in Regis Ecclesiæ Capitis præjudicium. Quod Papisticam sectam reducere tentaret, atque ad Ecclesiastica officia assumeret homines, Papistica labe infectos; quod nilus esset Anglicanam Ecclesiam cum Romana conjungere, eumque in finem consilia cum Papa & Jesuitis contulisset. Nulla valuit defensio; sed homo infelix, quod videretur velle sapere, securi ictus periit. (1645.)

Rex fugit.

Prælusum sic fuit graviori & inaudita tragoediæ; nam omnis propemodum Anglia in Regem surrexit. Quapropter sui non amplius Londini securus, Eboracum fugit, ubi portæ ipsi fuerunt præclusæ. Arrepta ab utraque parte arma. Nomine Parlamenti copias in Regem duxit Comes Essæxiæ. Sed brevi post Thomas *Fairfaxius* & sub eo Oliverius *Cromwellus* exercitus Duces sunt electi.

Rebellio.

Pugnatum sæpius, Regiis plerumque victis. Nec Rex duntaxat habebatur despectui, sed in ipsum Parlamentum irrupit discordia. Dominatum quippe invasit ex mercatoribus potissimum constans *Domus Inferior*, & Archiepiscopos, qui primas sedes obtinuerant, penitus extruxit; diramque in Catholicos persecutionem instituit, ea crudelitate, ut Elisabethæ tempora redire viderentur. Satis erat ad mortis sententiam, sacerdotem esse.

Crudelitas.

De hoc crimine accusati plures e Clero sæculari, ex S. Benedicti, S. Francisci, & Societatis Jesu Religiosis Familiis, suspendio vitam finierunt; quantumvis Catholicorum Principum Legati pro eis intercederent. Quippe Domus Parlamenti Inferior, quæ summam & independentem potestatem usurpabat, magnamque partem ex Calvinistis Puritanis constabat, invisam sibi Religionem funditus excisam volebat.

Reten-

Retentæ ad id usque tempus fuerant pleræque Catholicorum ceremoniæ, vestimenta, altaria, imagines; at nova hæc potestas, plus quam Tribunitia, omnia hæc aboleri præcepit. Intentio erat, omnia ad Calvinismi normam reducere, & detrusa Monarchia populare regimen introducere. Qua de causa præcipuus Londini Advocatus capite luit, quod ausus fuisset dicere, Regem esse supra Parlamentum.

Quantum autem Calvinistæ Regiam Majestatem oderant, tantum Catholici in Hibernia pro illa defendenda certabant. Concursum infestis armis, Catholicis strenue pro Rege (adversæ licet religionis esset) dimicantibus.

Impedire tamen non poterant, quo minus Rex a Fairfaxio obsideretur Oxfordiæ. Ne autem in manus hostium delaberetur, mutata veste ex urbe fugit, atque in Scotiam evasit, ea spe fretus, se in patria sua securum asylum, & apud populares coronæ suæ defensionem inventurum.

At spe sua vehementer falsus est; nam perfidi Calvinistæ An A Scotis tra-
glicano eum Parlamento tradiderunt, a quo ab una custodia ad al- ditur Rex.
teram traductus, demum in insula Wichta fuit conclusus.

Cum populus Regem suum captum audiret, pacem cum eo sanciri petiit. Igitur Parlamentum articulos quosdam, in odium maxime Catholicæ Religionis, atque ad stabiliendum Calvinismum conceptos, subscribendos eidem proposuit.

1. Catholicos exarmandos, exercitus utrinque abdicandos. Calvinista-
2. Potestatem & auctoritatem Parlamenti, præsertim quantum rum acroa-
ad executionem justitiæ & puniendos delinquentes (Catholicos mata.
- nempe) pertinet, illæsam conservandam. 3. Catholicorum libe-
- ros Anglicana religione imbuendos, atque in ea educandos. 4.
- Papisticam Religionem cum suis Doctoribus penitus eliminandam.
5. Fœdus ineundum cum Batavis aliisque Protestantium Principi-
- bis & Statibus.

Respondit Rex, sibi non minus ac Parlamento curæ esse, ut vera Religio conservetur, & quamvis Majestatis juribus non possit decedere, pacis tamen amore concessurum Parlamento omnia, quæ fas esset concedere. Domus superior erat ad pacem prona, sed Inferior omnia intervertit. Quippe Fairfaxius, castris ad Londinum locatis, Parlamento libellum, querelarum adversus Regem plenum obtulit.

Bellum civile a Rege concitatum, inquebat, subditos oppressos, Parlamenti jura succisa, per ejus Episcopos abusus Papi-
sticos

Fairfax. &
Cromwel.
furores.

sticos introductos, Germanos equites, & Hibernos pedites urbium præsiidiis impositos, Catholicos Hibernos conductos & sub signa vocatos, a Rege Daniæ belli apparatus petitem, Anglos Scotosque ad defectionem sollicitatos.

Rex captus.

Mox Fairfaxius & Cromwelus Londinum invadunt, expugnantque, Senatu expellunt, quos Regi faventes crediderant, & Calvinistas, juratos ejus hostes, intrudunt. Rex vero captivus Londinum perductus per quatuor dies examini Judicium fuit subiectus.

Examinatus.

Cum ad tribunal fuisset pertractus, accusator Judicii Præsidem allocutus, nomine populi Anglicani, inquit, sisto tibi & accuso Carolum Stuartum de crimine perduellionis & prodicionis patriæ, & ejusdem populi nomine peto, ut accusationis capita ipsi prælegantur. In his eum compellabant tyrannum, proditorem, latronem populi, hostem Reipublicæ. Præses vero subdebat: Carole Stuarthe! nomine Parlamenti & populi tibi præcipio, ut respondeas & rationem reddas. (anno 1649)

§. 2.

46.

Carolus Rex a Parlamento condemnatur, & occiditur. Scoti & Hiberni pro Walliæ Principe arma capiunt; sed a Cromwelo prælio victi profligantur. Tristis fuga Principis.

Parlamenti crudelitas. Prædicantium discordia.

Rex ad mortem condemnatur a subditis.

Anno 1649. vidit Anglia spectaculum, horrendum, immane, inauditum, cujus exemplum, si totam retro antiquitatem excutias, nullum invenies, & ad cujus aspectum ipsa barbaries inhorrescat. Captus coram subditis ceu reus adstat Rex, ceu reus criminis capitalis per sententiam judicalem ad mortem a subditis condemnatur Rex trium Regnorum.

Mactatur a carnifice.

Ante ipsum palatium Regale Whitehalense erigitur ferale pegma, funesta securi & atro apparatu horridum. Hunc thronum Majestas scandit Regia; verticem coronatum imponit trunco; carnificis manum expectat unctus Domini; resecatur caput Regium, quod omnibus gentibus sanctum habetur.

Sic vitam finiit Carolus I. Rex Magnæ Britanniæ anno 1649. æt. 49 Regnorum 24. defuncti Manibus immolabantur tristes reliquæ

quæ Dux Hamiltonus aliique amici trucidati Regis; Regina vero cum filiis, scepro natis, exulatum abiit.

Et hoc est æternum monumentum Calvinianæ hæresis, truculentæ, sanguinariæ, impiæ. Legite, si lubet, annales mundi. Multas ille cruentas tragœdias lussit; tam funesta Catastrophe nullam clausit. Multi Imperatores, Reges, Principes, aut insidiis, aut latrocínio, aut furore militum, vel ab hoste violenta morte sublati sunt; at per formam judicialis processus, per juris ordinem, ut illi præferebant, a propriis subditis per tam atrocem & barbaram sententiam damnatum, atque carnifici publice mactandum nullum unquam coronatum caput traditum legimus.

Calvinianæ modestiæ hoc debetur portentum, quod vel Scythæ & Brasillo terrorem incutiat. Per insignem calumniam Regicidas Calvinistæ compellant Catholicos; dum ex illorum manibus digitisque Regius cruor destillat. Injuriam faciunt, mentiunturque, dum facinus suum, in oculis orbis patratum, nobis imponunt. Propria hæc est Calvinistarum indoles, dejecta Regum Majestate ad populare n regiminis formam gubernationes reducere, prout factum in Hollandia, & Anglia.

Quippe post nefariam Regis cædem ejus interfectores sub pœna capitis vetuerunt, ne quis regium nomen usurpet, aut Monarchiæ formam reducere attentet. Carolus Walliæ Princeps & Respublica Jacobus Dux Eberocensis, Regis interempti filii, ab omni jure Calviniana, ad coronam excluduntur: Superior Parlamenti Domus exauctoratur: ex Inferiori 40 Regentes electi, quos inter primus Cromwellus, Fairfaxius vero armis fuit præfectus. Cusa moneta cum inscriptione: *Respublica Anglicana*: sigilla vero regia fuerunt confecta: bona regia sub hasta vendita. Si quis contra hæc vel mutiret, actus in exilium.

Hiberni interea, maximam partem Catholicî, in partes Caroli Walliæ Principis transferant, duce Ormondo Comite. In Scotia divisi erant animi. Missi a majori parte Bredam ad Carolum legati, qui cum eo tractarent de regno recipiendo. Carolus ipse in Scotia magna cum veneratione fuit receptus & Rex salutatus. At Parlamentum Anglicanum Cromwelum (Fairfaxio præfecturam abdicante) cum valido exercitu misit; qui & Scotos & Hibernos vicit. (1650.)

Anno sequenti Carolus iusto cum exercitu in Angliam penetravit, multique ei se jam conjunxerant, sed a Cromwelo rursus acie victus ad Worcestriam, a Catholicis subtractus, rustica-

Pars IX.

E e

que

Fugit.

Walliæ Princeps victus a Cromwelo.

que veste indutus, & in excavata quercu custoditus, per varias tandem ambages in Galliam evasit, atque Pariliis a matre sua totaque aula amicissime fuit exceptus.

Corhæus &
Morsæus tru-
cidati.

Parlamentum tantis victoriis rerumque successu ferox crudelissimam in omnes, qui regias partes fuerant secuti, aut adhuc sequi videbantur, tyrannidem exercuit, feralibus instrumentis ubique stridentibus. Vehementius nihilominus in Catholicos sæviebatur; quorum plures cum Rodulpho *Corbæo* & *Henrico Morsæo*, Societatis Jesu Sacerdotibus, ferali e trabe pendere jussi sunt.

Synodus De-
ninghenfis.

Minus crudeliter fœminæ in Ministros Prædicantes sæviebant. Res lepida est, quæ hac tempestate in Scotia contigit. Calvinianos inter Prædicantes ortum est schisma. Pars una celebravit *Synodum Deninghæ*, atque ad hanc citavit confratres sibi adversos, rationem reddituros, &, nisi comparerent, excommunicandos & officiis privandos.

Uxores Prædicantium, qui fuerant ad Synodum citati, collato inter se consilio, 120 numero, præfixâ die ad Concilium, maritorum loco, iter ineunt, fustibus armatæ, præeunte tibicine. Cum ad templum venissent, in quo Synodus celebrabatur, mulieres in cœmeterio circumstantes templum cingunt.

Exterritus pro periculi magnitudine venerabilis Patrum chorus, cum Amazones istas cerneret, quærit, quid sibi velint, & an earum mariti ad Concilium sint venturi? Fœminæ agminatim in templum irrumpunt: clamore & fustibus circumtonant; cum, ecce! Patres congregati, viri gravissimi, cursu incitato, qua data porta, quisque diffugiunt, ut fustigationem evadant, relictis in manibus mulierum 12 equis & omnibus impedimentis. Atque sic per sacrilegam imbellis sexus audaciam sacra ista Synodus dissoluta fuit, earumque mariti ab excommunicatione liberati. (*Hazart in Hist. Eccles. Angliæ part. 9. cap. 16.*)

ARTICULUS III.

Status Angliæ sub Cromwelo Protectore.

47. *Cromwelus Angliæ Protector: suprema cum potestate. Agnitus etiam ab exteris. Ejus agendi ratio cum legatis. Obit. Succedit filius & abdicatur. Quackerorum secta.*

Postquam Cromwelus Scotos & Hibernos acie victos dissipavit, Regiamque Dignitatem antiquavit, inducta est quædam Rei-publicæ

publicæ forma, quam rectius Anarchiam aut tyrannidem dixeris, a Parlamenti Inferiore Domo constitutam. Non diu populare hoc regimen vixit; quippe Cromwelus ad supremam potestatem adspirans, simulavit, velle se armorum præfecturam abdicare; nec id ingratum fuisset multis. Alii vero aut beneficiis deliniti, aut amittendi officia, quæ obtinuerant, periculo impulsæ, aut pretio, vel promissis empti, *Protectorem* illum *Angliæ, Scotiæ & Hiberniæ* proclamaverunt, porrectis regni sigillis, ense, & *Altitudinis* titulo attributo. (1653)

Itaque Regis instar palatium Witehalense ingressus legem Cromweli tulit, qua perduellionis reus denunciabatur, qui negaret, summam potestatem penes Protectorem & Parlamentum esse, aut ullum cum Domo Stuarta commercium haberet; simulque acerbissima in Catholicos edicta instauravit; tantamque potestatem exercuit, quantam vix ullus ante eum Regum.

Mirum sane, ab Europæ Principibus agnitum Protectorem, & *Altitudinis* titulo honoratum, quin imo prensatam adeo illius amicitiam, ut, quis legatorum alterum præveniret, esset contentio; quamvis vili & detricto satellitis instar vestitu indutus cum fastu & despectu illos eo majore exciperet, quo majorum Principum erant legati. Vilibus vero personis insolitos honores exhibuit.

Absona & paradoxæ hæc agendi ratio multos Nobilium offendit, qui veterem splendorem Regium, sub quo Nobilitati & Illustribus Familiis sua dignitas constabat, revocare nitebantur. Unde frequentes conspirationes, & appulsus Colonia, ubi exulaverat Carolus Walliæ Princeps, cum aliqua copiarum manu in Scotiam, curas Protectoris intendebant. At Scoticam tempestatem facile discussit per Monchium, dum Angliam & Scotiam unam esse Rempublicam declaravit, & 30 Scotos in Parlamentum assumpsit, Carolus vero successu desperato Coloniam rediit; ubi etiam Henricus frater ejus natu minimus Dux Glocestriæ degebat; aliis Statibus, ne Anglos offenderent, hospitium negantibus. (anno 1655.)

Quamvis autem multi præsentis regiminis in Anglia pertæ-
si, varias turbas & seditiones excitarent, structis etiam, Cromwe-
lo (pulvere nitrato palatio Withalensi supposito) vitæ infidiis, Regium titulum recusat.
Parlamentum tamen anno 1657. coronam illi & sceptrum cum regia dignitate offerebat. Verum Cromwelus, probe gnarus, quantam inde apud populum invidiam sibi conflaret, veritusque, ne inimici sui eum apicem in præcipitium verterent, regium nomen, ut Julius olim Cæsar, reculavit.

que provocatione potestatem sub Protectoris titulo, per omnia tria regna publicato, exercebat.

Obit. Nihil proin Cromwelo felicius. Verum dum maxime blandiebatur infida fors, ut ferunt res humanæ, subito vitam finit, & quidquid contulerat ampullata vanitas. (anno 1658. post 5. annos usurpati imperii.) Successorem & hæredem testamento scripsit Richardum, filium suum natu maximum; qui etiam mox Protector est renunciatus, tametsi nec ingenio, nec calliditate, nec belli peritia, aut rerum experientia ullo modo comparandus patri. Unde Britannia procellosum mare, turbinibus in fluctus agitatam, referebat.

Angliæ flus.

Quatuor autem potissimum, quibus æstuabat, erant factiones. Duces militiæ regimen ad Reipublicæ formam, qualis in unitis Belgii provinciis, aut apud Venetos visitur, reduci postulabant. Alii cum Lamberto, Richardo patris potestatem ex integro tribui volebant: alii maris eum Præfectum constitui, Suecisque succurri; alii denique Regiæ Stuartorum familiæ adhærebant cum Monckio, Scotici exercitus Ductore.

Richardus filius Cromw. exautoratus.

Istos inter dum disceptaretur, militares Duces *Pledwodum* sibi elegerunt supremum belli Præfectum, fractis Cromweli insignibus, coactoque Richardo ejusque fratre Henrico, quem pater Hiberniæ Protectorem constituerat, dignitatem Protectoris abdicare, palatium Witehalense cum aliis Regiis ædificiis vendiderunt in stipendium militum: Parlamentum vero exauctorare conati sunt.

Interea vero multi, dum patriam susdeque verti cernerent, fœdere inter se inito, pro *Carolo Stuarto* Rege constituendo conjurant; at isti ab exercitu, a Parlamento immisso, victi fugatique sunt. Tandem vero Superis placuit, quod amici Regiæ familiæ non poterant, felicem ad exitum perducere, Regemque exulem revocare. (anno 1660.)

Quackeri.

Dum Olivierus Cromwelus in Anglia potestate plus quam regia dominabatur, sectæ omnes impunes erant, præter Catholicam. Sub annum 1655. orti sunt *Quackeri*, qui etiam *verementes* appellabantur, novum & absurdum prorsus hæreticorum genus. Nudi propemodum per plateas cursitabant; in triviis, Angiportubus, pontibus concionabantur, & somnia sua atque phantasmata cœlestes velut revelationes palam exponebant. Interrogati de Secta sua hanc confessionem edebant.

1. Scripturas novi & antiqui testamenti non esse verbum Dei, aut lumen ad salutem. Nec refutare eos poterant ex suis principis alii hæretici.
2. Omnes homines per se ipsos jam esse illuminatos.
3. Hominem non indigere alio lumine.
4. Nec cælum esse nec infernum pro hominibus.
5. Nullam resurrectionem mortuorum fore.
6. Bona omnia debere esse communia.

Cromwelus prohibuit quidem phanaticis istis novatoribus concionari; noluit tamen molestiam ipsis faceſſi, quamdiu regimini se non opponant.

Verum tanta erat eorum insolentia, ut *Nailotum* eorum caput, sub Fairfaxio & Cromwelo militem, capi, & exciſa propter blasphemias lingua, flagris cælum, carceri mandari oportuerit. Quamvis autem ridicula prorsus sint, quæ de hac facie hominum narrantur, ita tamen in Anglia auſti sunt, ut in hanc diem extirpari nequierint. Quin imo in Hollandiam quoque, Galliam, Germaniam digreſſi, sectam suam propagare laborabant. Cum aliis hæreticis vix aliud commune habent, quam pertinaciam.

ARTICULUS IV.

Status Angliæ sub Carolo II.

48.

Monckius Scotorum Dux pro Rege feliciter laborat. Miſſa legatione revocatur ad regnum. Magno apparatu excipitur, & coronatur. Judices iniqui puniuntur. Bellum cum Hollandis. Oates persecutionem excitat in Catholicos. Seditiones & insidiæ Regi & Eboracensi structæ. Rex obit Catholicus.

Postquam per decem annos sub Parlamento primum, sub Protectore deinde fluctuavit Imperium Magnæ Britanniæ, turbas inter, cædes, seditiones, tumultus, bella civilia, fessis tandem rebus succurrit providum Numen, quod ab exilio revocandi Regem suum animum ingeſſit subditis.

Plurimum ad eam rem momenti attulit Monckius, Scoti-Rex revocarum copiarum ductor; qui tandem in partes regias transgressus, tur Monckii Lamberto & Fledwodo, Protectoris in Republica Dignitatem am- opera. bientibus, fortiter se opposuit, & primum gentis suæ animos expugnavit, tum vero in Angliam profectus Londini in Parlamento,

E e 3

quod

quod novum fuerat constitutum, expulsa fæce, quam Cromwelus intruserat, pro reducendo Rege adeo potenter peroravit, ut legatione honorifica Bredam, ubi Princeps tunc versabatur, missa, ad capeffendum regnum eundem invitaret. Inter legatos novi Parlamenti erat Fairfaxius, Dux olim exercitus contra Regem, qui tamen belli præfecturam brevi deposuit, & nunc in genua coram Principe provolutus, veniam rogavit, non ante surrecturum se professus, donec illam obtinuisset.

Hagæ Comitum Hollandiæ Ordines Carolum convivio Regali honorarunt. A dextris ipsi assidebant Elisabetha amita, Frederici V. Electoris Palatini vidua, prætenfa olim Regina Bohemiæ, & Jacobus Dux Eboracensis frater: ex parte læva Maria soror, Wilhelmi II. Auriaci vidua; Dux Glocestrensis frater, cum Wilhelmo III. Principe Auriaco nepote.

Antequam autem Carolus II. navem Regiam conscenderet, Londini Rex Angliæ, Scotiæ, Franciæ, Hiberniæ, atque Protector fidei fuit proclamatus, contractis Cromweli, Fledvodii, & Reipublicæ insignibus. Regiæ domus atque palatia, Westmonasteriense, Wittehalense, Somersetenfe, San-Jacobæum, reparata, Regio rursus splendore exornabantur, bona regia reducta, Regicidarum vero Fisco addicta. Liberati e carceribus, qui Regi adhæserant, Cromwellistæ officiis publicis privati. Reposita Statua Caroli I. cum inscriptione: *Carolus I. secundus Monarcha Magnæ Britanniæ, Rex Franciæ & Hiberniæ*. Regi viginti Sterlingiorum millia a Parlamento decreta, Jacobo vero Duci Eboracensi, ejus fratri, totidem floreni.

Regicidæ puni-
ti.

Excitabant equidem turbas, qui Cromwelo, Fledvodio aut veteri Parlamento erant addicti, sed multitudine bonorum facile comprimebantur, Judices vero & interfectores Regis Caroli I. ex Anglia fugerunt, aut publicatis bonis ad carceres & mortem sunt damnati.

Anglia sic ad excipiendum Regem suum Carolum II. undecim annorum exulem, præparata, ineunte Junio 1660. in Regnum suum venit; quanto autem apparatu, solennitate, & pompa, Londinum fuerit deductus, ibique coronatus, haud facile, quin majora & augustiora fuerint omnia, describi possunt.

Regnum auspicatus, religionem, ab avo & patre ceremoniis & ritibus externis cultam, a Calvinistis vero sub Cromwelo dejectam, instauravit, Episcopis, organis, aris, imaginibus, su
perpel

perpelliceis restitutis. Quackeris tamen etiam sectæ suæ libertatem fecit, dummodo non turbarent quietem publicam.

Monckius porro, primus Regiæ restitutionis motor, præcipuis muneribus & dignitatibus a Rege auctus est. Contra vero in eos, quos culpa cædis patrata gravabat, severa fiebat a Parlamento inquisitio. Alios inter Hugo Peterfius, Calvinianus Præco, auctor & incensor, laqueo periit. Cromwelli cadaver e sepulchro effossum, & e patibulo suspensum est. *Lambertus & Fledvodus*, quorum uterque Protectoris dignitatem prenabat, & populum in partes traxerat, capitis damnati sunt.

Dum Carolo II. serenior jam dies affulgeret, nubes aliqua plenum gaudium temperavit, dum mors illi hoc eodem anno 1660. Henricum, Glocestriæ Ducem, Principem omnibus dotibus ornatissimum, fratremque charissimum abstulit anno ætatis 20.

At solatium rursus attulit Catharina, Joannis IV. Lusit. Uxor filia
niæ Regis filia, anno 1662. eidem conjux data. Vixit illa ad an- Regis Lusit.
num 15. hujus sæculi: sed, quod dolendum, thoro sterili.

Quamvis autem Rex magna populorum gratulatione fuerit receptus, multique adversæ factionis publico supplicio fuerint sublati, frequentioribus nihilominus conspirationibus & seditionibus in Anglia & Scotia fuit tumultuatum, tum a Calvinistis, quietis impatientibus, tum a Quackeris aliisque fanaticis, qui a Deo se missos dicebant, ut Monarchicum regimen subvertant, & populare introducant. Aliqui horum audaciam capite luebant, alii exilio. Reducti in Scotiam quoque Archiepiscopi & Episcopi non sine tumultu Calvinistarum.

Anno 1665. Rex Carolus Batavis bellum denuntiavit, quod navigationes & commercia turbarent, ac gravia Britonibus damna intulissent. Prætextus hic videri poterat, re ipsa a domesticis turbis subditos avertere fuit animus. Batavorum classis a *Jacobo Du-*
ce Eboracensi Angliæ Archi- Thalasso gravi clade affecta est. Tri-
umphavit Londini victor, quamvis ob religionem multis exosus es-
set. Promota insuper in Africam & Americam temporali Anglo-
rum felicitate, Rex discordias, superiorem inter & plebejam Par-
lamenti Cameram exortas, composuit, melior Christianus quam
Politicus.

Jacob. Dux
Eboracensis
triumphat de
Batavis.

Cum anno 1672. Galliæ Rex Hollandis bellum denuntiasset, Britannix Rex in partes venit, a sorore sua Henrica, Aurelianensi Duci nupta, quæ in Angliam transmiserat, ut creditur, persuasus. Anglica classis, cui rursus Eboracensis præerat, cum Gal-

Alterum cum Gallica, quam *Estreus* ducebat, conjuncta, Hollandicam, a *Rui-*
his bellum. tero gubernatam, fuit aggressa. Aequali ferme Marte bis terve
 dimicatum; donec Rex Angliæ anno 1672. cum Batavis pacem ini-
 re a suis subditis, id bellum ægre gerentibus, fuit compellus.
 Oderat nempe Gallos Natio, quos Carolus Rex amabat. Atque
 inde turbarum semina; quarum tamen præcipua causa fuit Religio
 Catholica, cui Rex favere visus est, liberam permittendo; Eborac-
 ensis autem ejus frater etiam amplexus fuerat.

Religio invi- Hinc Parlamentum ægerrime tulit, quod hic Mariam Eleo-
sa. noram, Alphonfi IV. Mutinæ Ducis filiam duxerit conjugem, at-
 que adeo exarsit, ut a Rege importune postularet revocationem
 facultatis liberæ, quam Catholicis dederat. Imo nedum officiis
 eos privari, sed & exilio mulctari voluit, qui alienam ab Anglica-
 na religionem profiterentur. Quo factum, ut multi, præcipue
 etiam Nobilitatis viri, regno excederent. (1673.) Quin imo vix
 non coactus fuit Rex, ut Gallis bellum indiceret.

Oatis perfidi- Recruduit persecutio anno 1679. propter hominis unius vi-
dia. lissimi mendacium impudens. Erat is Titus *Oates*, a Calvinistis
 ad Catholicos transgressus, atque a Patribus Societatis Jesu in se-
 minarium Vallisoleti primum, dein sancti Audomari in Belgio ad-
 missus, sed ob perversos mores inde dimissus. Hic homo nefari-
 us, vindictæ cupiditate flagrans, Catholicos meditatæ in Regem
 Carolum præditionis reos egit, & calumnias suas atroces juramen-
 to confirmavit, atque apud plebejum Parlamenti ordinem id ef-
Cathol. per- fecit, ut septem Societatis Patres, quos inter Provincialis Angliæ
secutio. & Rector Londinensis, ad mortem fuerint condemnati, cum Staf-
 fordix Comite, & multis aliis Catholicis, partim morte affectis,
 partim in exilium ejectis. Sed brevi post fraudes Oatis & perju-
 ria detecta sunt; propter quæ publica fustigatione aliisque probro-
 sis pœnis correptus est. Crimina sua & machinationes in mortem
 Regis, quas hæretici bene multas adornaverant, Catholicis intor-
 serunt.

Vix enim unquam conquievit rebellionis in Anglia spiritus;
 sed duce Salisburienfi Comite multi, Calvinistæ præsertim, in vi-
 tam Regis & Eboracensis conspirant; sed dum a Catholicis indici-
Quare Ebo- ac profugiente, suffocata sunt machinationes parricidales. (1682.) An-
racensis su- no nihilominus sequenti instaurata a conjuratis bis fuerunt infi-
git. dia. Sed illis detectis, Regis vita provide fuit servata. Eborac-
 ensi

centi tamen Duci in Belgium discedendum fuit, ut furori se subtraheret.

Foris etiam rei Christianæ perniciem Angli attulerunt; nam Tingitanam in Africa arcem prævalidam, superioribus annis strenue defensam, munitionibus exutam barbaris reliquerunt, qui tamen munimenta mox restituerunt. (1684.)

Proprius quoque Regis filius insurrexit adversus patrem & patrum. Erat in Dux *Montmutius*, qui sequiori licet thoro progenitus, regnum tamen affectavit, confusus Calvinistarum ope, quorum sectam profitebatur. Nec spes erat inanis; nam multos ex illis sibi adhærentes habuit. Rex autem natalium vitio infectum a regno arceri professus, Eboracensem fratrem publico in Parlamento successorem promulgavit, addita Proregis Scotiæ dignitate, & Vicaria per omnes terra marique ditiones præcuratione.

Frendebat invidia, odiumque Catholici nominis, quod profiteri Jacobum non ignorabant hæretici, quæ una causa fuit, cur Montmuthium multi Regem optassent; sed Carolus Rex conspirationes, conjurationes, seditiones prudentia sua ita fregerat, ut non auderet amplius rebellio caput attollere.

Sequenti anno 1685. mortem, quam prævidisse visus est, oppetiit Londini, ætatis 55. regni vero 25. Fuit Carolus II. prudentia, mansuetudine, charitate in rebelles toties subditos, amore pacis, aliisque regiis virtutibus Princeps clarissimus. Duo tamen vitio dabantur; quod in Gallos propensior Dunkercam eis vendidisset, nec obstitisset crescenti Ludovici XIV. potentia, & quod voluptatibus deditus plures proles, nullam tamen ex legitimo thoro suscepisset. Catholicis quod esset indulgentior, multas passus est injurias, seditiones, insidias. Proscripsit quidem illos, sed a Parlamento coactus. Cæterum pro occulto Catholico ab Anglis habebatur, certumque ex documentis relictis videtur, de peccatis confessum & reliquis sacramentis perceptis Catholicum obisse.

Sed Rex eum
successorem
promulgar.

Obit Rex.



ARTICULUS V.

Status Angliæ sub Jacobo II.

SUMMARIUM.

49. *Quamvis aperte Catholicus Rex renuntiatur. Montmuthii in Regem rebellio. Querelæ Prædicantium, quod Rex Catholicis fa-
veret. A Wilhelmo Auriaco, genero suo & nepote accito, de-
turbatur throno. Desertus a suis in Galliam fugere cogitur.
Trinam in Britanniam expeditionem tentat, at conatu irrita.
Obitus.*

Jacobus Dux Eboracensis communia ferme cum fratre Carolo fa-
ta habuit. Erat uterque fortunæ pila, jactatus in altum, rur-
susque decidens. Sceptro uterque natus, ad coronam educa-
tus. At patris ruina utrumque involvit. In toto regno suo nec
Jacobi fata. mapale ipsis supererat. Fuga in exilium morti utrumque subtra-
xit. Carolo fratri in Regnum reducto ibat comes frater, fortis
prosperæ deinceps & adversæ socius. At fratre Rege fati defun-
cto majora multo utriusque fortunæ ludibria tulit.

Nam imprimis, quamvis propter fidem Catholicam, quam
etiam publice professus fuerat, vivente adhuc Carolo fratre, mul-
tas magnasque persecutiones tulerit, bis electo exilio, ut patriæ
quies redderetur; nihilominus tamen post illius mortem ab omni-
bus regni Proceribus Magnæ Britanniæ Rex fuit salutatus, in Oxo-
nienti quoque Academia, Angliæ præcipua, Doctoribus omnibus
in eam euntibus sententiam, discrimen religionis neminem, sce-
ptro natum, a regno arcere, neminemque propterea, sine per-
duellionis crimine subtrahere posse obtemperandi obsequium.

Sed aurora ista, splendore fulgens, nubilum brevi diem
trahit, in imbres denique, turbines & procellas abiturum. Prima
tempestas a Jacobo Montmuthio Duce, Caroli II. filio naturali pri-
mogenito intonuit. Is etenim vivente adhuc patre, dum Jacobus
Montmuthii rebellio. patruus successor in regno fuisset denuntiatus, tumultum concita-
vit, sed compressus sanguine luisset scelus, nisi Regem habuisset
patrem. Exilii tamen, ne porro turbaret, pœnam tulit.

At vero mortuo patre in spes pristinas assurgens, Britan-
niæ se Regem dixit; habuitque, quod hæreticus esset, non paucos
asseclas. His igitur confusus, præmisit ex Hollandia Argylium Co-
mitem

mitem in Scotiam cum copiarum manipulo. At victus a Regiis, captus, & ultimo supplicio cum aliis rebellibus affectus est Edenburgi.

Non desperavit ex iniquo eventu Montmuthius, sed collecta alia turma in Scotiam, & Angliam veniens, idem fatum expertus est, Londini carnificis manu cadens; ubi Regni Comitia Majestatis reos dixerunt, qui publicam quietem turbarent. (1685.)

Verum non diuturna fuit malacia, in horrendam brevi tempestatem, pro variabili gentis indole, exastuans. Quippe, Jacobi fervor dum Jacobus edicta, contra Catholicos lata, abrogaret, ad publica officia illos adhiberet, libertatem religionis concederet, Castellenium Romam ad Pontificem mitteret, suo & aliorum Catholicorum nomine obedientiam contestaturum, atque majori, quam tempora & hæreticorum genius ferret, ardore Religioni Orthodoxæ postliminii jure reducendæ studeret, gentis, errori suo pertinaciter inhærentis, animos a se avertit.

Episcopi & Prædicantes de pinguedine sua & uxoribus actum rati, si aviæ religionis rigor restitueretur, conferre inter se capita, murmurare, ex suggestibus contra Regem & Catholicos detonare, ferendum non esse, ut Romana superstitione dominetur: Missas vix non palam dici, erigi scholas, capellas aperiri, Jesuitarum turmas impune circumvagari, Regem ad hæc non modo connivere, sed exemplo præire, & superstitionem, legibus damnatam, civitate donare; quorsum hæc alio spectarent, quam ut eversa religione patria & Ecclesia Anglicana, invisus rursus Papatus in throno collocetur.

Hi Prædicantium, & iis incentoribus, plebis clamores, ac Quærelæ generatis, sparsis variis etiam libellis, quærelæ erant. Nobilitatem insuper disambitio, & rerum novandarum pruritus accendit. Parlamentum denique Regibus, nisi eos ad omnia obsequentes haberet, semper infestum fuit.

Quod autem mireris, Rex Jacobus nullos majores hostes experiri debuit, quam Clarendonii & Rochestriæ Comites affines suos, & quod adhuc indignius, Wilhelmum Arausicanum Principem, uniti Belgii Gubernatorem, generum suum, & ex sorore nepotem, in quem Britones, ut Catholicorum hostem, oculos suos reflexerant, quin ad regnum capeffendum invitarant. Neque is (ex Calvinî utique disciplina) veritus est, contra Jacobum, & Regem legitimum, & Avunculum, & Socerum suum, quem ut patrem colere debuerat, hostilibus armis insurgere.

Præmissio igitur in Britanniam edicto, venturum se ut religionis atque libertatis, quas Jacobus eversum iret, defensores spondebat. Nec minus male, quam promisit, implevit. Quippe anno 1688. cum classe, 13000 Hollandis militibus instructa, ex Hollandia solvit. Verum, indignantibus elementis, cum jam in altum proventus esset, ventorum turbine ad litus Batavorum reiectus est.

Feliciores illi fuit altera navigatio; nam pelago transmissio, nemine prohibente, in Angliam appulsus est, & velut Rex exceptus.

Hæc ubi ad Regem Jacobum fuerant perlata, pro periculi magnitudine territus, quo se verteret, ignorabat. Habebat quidem sub signis suis navalem & terrestrem exercitum, sed cui fidere non poterat; Londini autem ea erat rerum conditio, quæ præsentiam ejus requireret. Statuit tamen ad exercitum se conferre. Prius tamen convocatis aulae suæ Ministris, aliisque, quibus munera publica commiserat, exposuit, convocatum fuisse a se Parlamentum, quod esset omnino liberum: libertatem Anglicanam religionemque omnino tutam fore. Si quid ultra a se desideretur, paratum se esse, in vota Parlamenti populique concedere. Oblatas sibi a Rege Galliarum copias, sed, ne videretur subditis suis diffidere, eas non esse acceptatas.

Ab Arausico
genero suo
Regno pelli-
tur.

Quis non credidisset, tantam Regis optimi demissionem ferreos etiam animos expugnaturam? At Proceres, multis licet gratiis acceptis devincti, liberaliter quidem omnia promiserunt, sed fide Punica. Nam occultis tunc consiliis cum Arausicano consentiebant, & parum abfuit, quin Churchillius, grandium beneficiorum debitor, Regem in ejus manus traderet.

Dum autem Rex cum exercitu usurpatori obviam prodiret, plerique, eo deserto, ad Arausiacum defecerunt. Quare Londinum regressus, conjugem cum filio Jacobo in Galliam velut asylum misit. Obtulit dein genero suo Wilhelmo optimas condiciones pacis, sed despectus, gratiæ loco habere debuit, quod e regno suo per magna pericula fugæ locum tandem invenerit in Gallia, ubi, instructo ad S. Germanum palatio, Rex Christianissimus eum excepit, non ut fugitivum, sed Monarcham.

Sola ferme Hibernia, ex Catholicis potissimum constans, in fide Regis persistebat, atque exercitum aliquem constabat. Unde Jacobus cum Gallicis suppetiis trajiciens Dublini receptus fuit; Londonderium tamen frustra obsedit, (1689.) Schombergio urbi succurrente.

Anno sequenti Wilhelmus ipse in Hiberniam exercitum, quadraginta millibus numerosum, duxit, ut Jacobum Regem, vix ^{Victus:} viginti millibus instructum, ejiceret. Confertum prælium, quo Jacobus victus multitudini cedere, & in Galliam redire debuit. Hibernia vero tota propemodum victoriæ præmium fuit. (1690) Solum Limericum diuturnam sustinere oppugnationem est ausum.

Copias amisit Jacobus & urbes, sed non animum. Quare cum classe Gallica reversus, in Angliam, ubi apud plures adhuc causæ melioris sectatores habuit, penetrare tentavit. Verum a Rysselio Angliæ Archithalasso navali prælio victus, ad internecionem prope cæsus est. (Anno 1692.)

Ultimum conatum adhibuit anno 1696. quo Anglorum quidam pro reducendo eo clam laborabant. Instruxit iterum eum in finem Gallia classem. Ipseque Jacobus, illam conscensurus, Caletum jam pervenerat; sed detecto consilio ad S. Germanum rediit, ubi anno 1701. pientissime obiit, atque ad regnum in cœlis certius ^{Obit.} meliusque transit, cujus non erit finis. 68. ætatis annos inter ærumnas implevit. quatuor duntaxat in regno, jure Natalium sibi debito, sed iniquissime erepto. Victima religionis fuit, aut marty: regnum temporale reliquit, ut æternum consequeretur.

ARTICULUS VI.

Status Angliæ sub Wilhelmo Auriaco.

SUMMARIUM.

Articuli a Parlamento eidem propositi. Jacobi filius per calumniam dictus illegitimus. Wilhelmus in Belgio Fœderatorum Dux. Ejus gesta, & obitus.

Postquam Wilhelmus III. Princeps Auriacus (*Arausicanus, Oranienfis*) uniti Belgii Gubernator, Wilhelmi I, qui Author fuerat defectionis Batavicæ, abnepos, Jacobum II. natalium jure legitimum Britannæ Regem, focerum suum & avunculum, Regno expulerat, Thronus vacuus ab Ordinibus Angliæ declarabatur, atque ad Mariam, Jacobi spoliati filiam, Wilhelmi conjugem devolutus; Wilhelmus vero titulo uxorio Rex Magnæ Britannæ renuntiabatur.

Antequam autem inauguraretur, sequentes articuli fuerunt ^{Novæ leges.} propositi. 1. Dispensationem in legibus, aut dilationem executionis

nis esse invalidam, nisi consensus Parlamenti accedat. 2. Potestatem Ecclesiasticam Regi non competere (*sic Papam suum & Caput Ecclesiæ Anglicanæ venerabantur.*) 3. Non posse Regem sine consensu Parlamenti exercitum colligere, aut populum tributis onerare. 4. Singulis minimum trienniis Parlamentum congregandum. 5. Nullam personam regii sanguinis Catholicæ personæ matrimonio jungendam. 6. Officia non esse vendenda.

Hæc postquam Wilhelmus confirmaverat, una cum conjugē coronatus est. Nec multo post etiam Scoti eundem Regem renuntiaverunt, missa per legatos corona. Ac proin soli ferme Hi-berni Jacobo Regi suo constanti fide adhæserunt, donec a Wilhelmo armis subacti, ad indebitum obsequium adacti sunt.

Ex quibus toti orbi manifestum est, Jacobum II. unice propter Religionem regno fuisse spoliatum. Et cur alias Jacobum Edvardum, legitimum ejus filium, ex Eleonora Estensi Mutinæ Ducis filia anno 1688. susceptum, exclusissent? Cur sorores, multo inferiori matre natas, prætulerunt? Cur in extraneæ stirpis Principem hæreditarium Stuartæ Familiæ regnum devolverunt?

Fabula de
natalibus Jac.
III.

At ecce commentum, uti multo levissimum, ita Nationi honestæ turpissimum! Absque ulla causâ, contra omnem veritatem, per injuriam & calumniam atrocissimam finxerunt, Jacobum Edvardum illegitimo thoro fuisse prognatum, ac proin successionis hæreditariæ incapacem, ut hoc mendacio propaginem omnem Stuartam etiam in radice extirpent, atque a successione removeant. Dignum profecto Calvinistis inventum; quod si locum inveniat, Principibus omnibus est exitiale.

Wilhelmi
gesta in Bel-
gio.

Porro Wilhelmus III. modo, quo dictum, creatus Rex, devicto fugatoque Jacobo, rebusque suis in Britannia compositis, neminem timebat, nisi Ludovicum XIV. Igitur accedens magno contra eundem fœderi, anno 1691. in Belgium, pecunia & milite a Parlamento liberaliter instructus, abiit, ibique fœderatorum Dux Montes Hannoniæ obsidione Gallorum liberare frustra tentavit, prout etiam postea Namurcum.

Anno 1692. virtuti suæ & copiarum multitudini confusus, ut nomen suum æternitati consecraret, Luxemburgum Gallorum Ducem in castris ad Stenkirchium aggressus est; sed adveniente cum suppetiis Boufflerio, fugam arripuit.

Sequenti anno Luxemburgus vices reddidit, & meliori fortuna Wilhelmum, castris munitum invasit, atque post pertinacem pugnam victum in fugam compulit.


Anno

Anno 1695. Namurcum deditione recepit; Gallis Duxmudam aliaque oppida expugnantibus.

Denique anno 1697. a Gallis quoque in pace Risvicensi Rex Magnæ Britanniæ fuit agnitus, & Gentilitium suum Principatum Arausicanum in Gallia recepit. Jacobi vero Regis exulis in pace illa nulla est ratio habita, Gallis propria commoda alienis præhabentibus.

Ne autem per mortem Caroli II. Hispaniarum Regis, quæ magnis passibus imminere cernebatur, novum gravissimumque bellum exardesceret, Wilhelmus cum Anglis & Batavis partitionis Hispanicæ (de quo in Hispanicis) tractatum iniit anno 1700. At vero Hispaniarum Monarcha eodem anno decedente, Gallia illius testamentum, spreta divisione facta, apprehendit. Wilhelmus vero inito cum Cæsare & Batavis adversus Franciam fœdere, cum ^{Obit.} equo in venatione lapsus, accedente febris in Anglia extinctus est, anno 1702. ætatis 52. regni 13.

Creditur in Hollandiam Belgiumque reliquum sæpius ex Anglia discessisse, atque fœderati exercitus præfecturam assumpsisse, ut Britannorum effugeret insidias, quas pro mobili gentis indole, vitæ ipsius struxisse feruntur.



CAPUT VII.

STATUS TRANSYLVANIÆ SÆCULO XVII.

ARTICULUS I.

*Bethlemus, inito cum Bobemis fœdere, Hungariam discerpit. Cæsus Ragozi, Dux Bethlemi; qui a seditiosis Rex proclamatur. Tami-
pier & Buquojus cadunt. Bethlem pacem init, quam mox
frangit. Turcas evocat. Rursus pacem
obtinet.*

Compositis anno 1606. cum Turca induciis, quieta utcunque mansit Dacia atque Pannonia: donec novi tumultus orirentur a Transylvania, flagris, ut solet, sanguineis furente hæresi.

refi. Plures in ea brevi tempore Principes, aut tyranni potius dominabantur.

Transylv.
Principes.

Quippe post Sigismundum Bathorium, varium atque versatilem Principem, ditione pullum, frater ejus Andreas primo Regiminis anno a rusticis est interemptus (1599), Stephanus Botskaius altero anno Principatus occubuit (1606), Sigismundus Ragozius non ultra annum fasces tenuit. Gabriel Bathorius quinto anno a subdito suo *Gabriele Bethlemo Gabore* fuit obtruncatus (1613.)

Bethlemi per-
fidia.

Hic autem *Bethlemus Gabor* per multos nimium annos turbulentum actorem egit in mundi proscenio, dolis ac fraudibus summos quoque Principes involvens. Nam primo fœdus petiit a Mathia Cæsare, obtinuitque ea lege, ut Hungariæ rebus se non immisceat, eosdemque (Turcam exceperit) cum Cæsare hostes habeat. A Bohemis autem rebellibus, religionis fociis sollicitatus, numerosum scripsit militem, evulgato rumore, adversus Bohemos pro Cæsare Ferdinando II. (cum quo fœdus renovaverat) bellum parari.

Crudelitas.

At ille ambitione elatus, Regnoque Hungariæ inhians, percusso clam cum Bohemis fœdere, junctusque cum rebellibus Hungaris, repente in Hungariam irruit, admotisque ad Cassoviam octodecim millibus, eandem extorquet: Boczio Præfecto capto, & in Transylvania misere pereunte.

Hungariam
diripit.

Hæc irruptio ingenti terrore Catholicos perculit, sectariis vi, cædibus, rapinis sævientibus. Fit passim fuga, sacrorum maxime hominum: in quos atrocitas & fœda dictu facinora barbarorum more edebantur.

Ita Hungaria turbinis instar decursa, patentibus ubique ferme portis, quas aut metus, aut hæreticus favor referaverat. Resistens Jaurino & Comorra; partem exercitus in Moraviam, Bohemiamque Palatino misit (nam in Monte Albo octo Hungarorum millia pro eo pugnabant) parte altera Posonium expugnavit, subsidiis trium millium a Buquoio ex Bohemia missis, ferme deletis.

Jamque Bethlemus ad Viennæ usque moenia exercitum & terrorem spargebat, provinciis omnibus hæreditariis exitium minatus, cum subita Ragozii Ducis sui clades in Hungariam eundem retraxit.

Cæsus Rago-
zius Dux
Bethlemi.

Quippe *Humanajus*, Hungariæ Dynasta, sub adventum Bethlemi in Poloniam abierat, ibique collecto exercitu in patriam rediit. Occurrit illi Ragozius, quem Gabor Cassoviæ præfectum reliquerat, pellitque Humanajum, sed cum is cum validioribus copiis

copiis rediret, committitur rursus prælium, quo in biduum extracto, simulant Poloni fugam: cum autem Hungaros ordinibus solutos ad prædam discurrentes adverterent, regressi incompósitos aggređiuntur, magnaque clade afficiunt. Peditatus omnis ferme deletus: equitatus cum Ragozio in fugam coniectus.

Hac suorum clade nuntiata, Bethlemus, ex Austria redire coactus, Redejum Ferentium, rebellem Hungarum, adversus Humanajum cum parte copiarum misit, ipse vero cum altera Posonium contendit, coactisque Comitibus Hungariæ Principem se ipsum renuntiat, (1619.) eo ipso tempore, quo Ferdinandus II. legitimus Hungariæ Rex Francofurti dictus fuit Imperator.

Cum autem ea res multos, fidos adhuc Ferdinando Hungaros, graviter offenderet, timeretque, ne plures a Rege Polonia venirent copię, ad simulationem compositus, inducias init cum Cæsare, ut Polonos, sui securos, eo certius opprimeret, resque suas interea firmaret. Nam sollicitato Turca, renovatoque cum Bohemis fœdere, Neosolium comitia indixit, in quibus a rebellibus sectariis Rex Hungariæ est proclamatus, postquam Bohemi latinum Regem dixerant. (anno 1620.)

Cæsar, tot hostibus undique obsessus, *Tampierium* ex Bohemia adversus Bethlemum in Hungariam misit: ubi, dum Posonium oppugnat, glande ictus occubuit. Cæsarei autem casu Ducis perculsi, re infecta discesserunt. Fuit Henricus Comes Tampierius, seu Tempetrius, gente Lotharingus, militaribus artibus celebratus belli Imperator, Domuique Austriacę in paucis fides.

In supremum jam felicitatis apicem elatus sibi videbatur Bethlemus, folio sublimis, diademate redimitus, sceptrique potens. Sed aliam mox fortunam expertus, fatale sibi nuntium de Palatini & Bohemorum, in quibus spei summam collocaverat, clade accepit. Versis igitur alio consiliis, Turcas & Tartaros invitavit in communem adversus Austriacos societatem: opimas Hungarię Germanięque provincias patere in prædam. Litterę hæc in manus Procerum Hungarię sunt delapsę, quibus illi gravissime offensi, deserto, quem Regem paulo ante dixerant, Bethlemo, privatim cum Cæsare sunt conciliati. (1621.)

Adhęc Buquojus, Bohemia subacta, cum exercitu in Hungariam profectus, Bethlemum in Transylvaniam repulit, majoremque Hungarię partem recuperavit. At, dum Posonio recepto Neosolium oppugnat, ab hostibus est interemptus. (1621.) Natione Belga, patrem habuit Longevallium Vauxii dominum, Alexandro

andro Farnesio comprimis charum; cujus commendatione comitis dignitatem ex Bucquojo, gentilitia in Artesia ditione, a Philippo II. Hispaniarum Rege accepit. Mortuo patre, Alexander Wallo-
num turmæ Carolum præfecit, atque ad militiam ita excoluit, ut
celebres inter heroes bellicque Imperatores cenferi mereatur, vir-
tute, fide, continentia, rerumque gestarum gloria inclitus.

Datum tunc fuit mox perspicere, quantum momenti viri
unius auctoritas & secunda fama in bello possit. A morte Bucquoji
retrolapſa Cæsaris in Hungaria fortuna Bethlemum, jam ferme pro-
stratum, denuo erexit. Is quippe cum novo exercitu e Transylva-
nia progressus, cum Turriano & Jägerndorffio populationem late
per Hungariam circumtulit. Expugnata Tyrnavia, tentatoque
necquicquam Pofonio, in Moraviam effusus, truculenti instar Tar-
tari sæviit.

Sed cum audiret, viginti Tartarorum millia, auxilio sibi
ventura, a Polonis esse caſa, Jägerndorffium, maxima copiarum
parte a Cæsareis & Saxonice intercepta, tota Sileſia ejectum, ad-
hæc Esterhaſium, Wallenſteinium, Donavium, Tribunos Cæsareos
valido cum milite sibi imminere, ad pacem reſpicere coactus, le-
gatos ad Cæsarem miſit.

Gabor pa-
cem init.

Cæſar, bellis in Germania novis novisque ſuccreſcentibus,
alienus non erat a pacis conſiliis, quin pinguiorẽ etiam, quam
exſpectare debuerat, Bethlemon conceſſit. Nam *Nicolopoli* transa-
ctum in has leges: retenta Caſſovia, ſeptemque in Hungaria di-
tionibus, atque nonnullis in Sileſia, Principis Imperii titulo con-
tentus, depoſitaque corona, cæteris Hungariæ urbibus cederet.
Status vero Religionis ac Patres Societatis in eum locum reſtitue-
rentur, quo ante bellum fuiſſent. (1622.)

Quam mox
frangit.

Verum Bethlemus Gabor pro ambitione ſua & verſatili in-
genio quieſcere non diu potuit: addentibus, ut turbaret, ſtimu-
los Mansfeldio & Brunſvicenſi, aliisque Germaniæ Proteſtantibus.
Cum propriæ vires non ſufficerent, ut bellum inferret Cæsari,
grandi uſus mendacio Portam Ottomannicam pulſavit: fingit ad
ordines Hungariæ litteras, velut ab Imperatore Romano ſcriptas:
quod viſto Palatino ejuſque Ducibus, in Valachiam, Boſniam,
Græciam, & ſi cederet, Thraciam, ipſamque Sultani regiam,
bellum ſit illaturus. Has a ſe fictas, ceu interceptas mittit Sulta-
no; & crebris Ferdinandi victoriis accenſa invidia fidem fecit.

Turcas men-
dacio evocat.

Quapropter Muſtapha, quamvis alias pacis amantior, mi-
ſit in Hungariam ſexaginta Turcarum & Tartarorum millia: qui-
bus

bus Bethlemus cum sectariis se junxit, atque Hungariam rursus Moraviamque miserum in modum devastavit. Sed affuit causæ meliori Numen propitium: barbarus exercitus ter cæsus ab Esterhasio: atque Mustapha, de impostura Bethlemi certior factus per Legatum Cæsaris Curtium, suos revocavit, factasque cum Cæsare inducias in plures annos prorogavit. (1623.)

Gabor, ubi se desertum vidit, Mansfeldium insuper & Brun-Rursus pacem obtinet. vicensem socios cæsos, pacem rursus a Cæsare petiit. Et obtinuit ea conditione, ut Hungaria abscedat, captivos, & ablata restituat.

ARTICULUS II.

Ferd. II. Religioni consulit. Ejus filius Rex Hung. Bethlem tertium bellum inchoat, juvante Turca. Cæsus iterum, pacem obtinet. Moritur. Ragozi invadit Hungariam. Cæsus Principatu deponitur, Redajo suffecto.

Pacata tantisper Pannonia, ea Cæsari cura fuit, ut Ferdinandus filius Rex Hungariæ renunciaretur. Poscebat eam provisionem eo temporum statu & Religionis incolumitas, & Domus Austriacæ salus. Quippe Bethlemus Religionem Catholicam, sacrosque ejus cultores, gravissime est persecutus. Neque procul erat ab interitu, nisi pientissimus Cæsar in ejus conservationem curam omnem intendisset.

52.

Auxilio comprimis fuit Petrus Pazmannus, Cardinalis & Rex Ferd. Archiepiscopus Strigoniensis: qui erectis Viennæ, Strigonii, Tyrnaviæ, aliisque in locis Collegiis, in quibus juvenus Hungarica litterarum disciplinis erudiretur, id effecit, ne animabus amplius idonei deessent pastores.

Cum Religione rediit Hungarorum in Cæsarem, Regem suum, ejusque Domum amor, ut adeo Procere quidam mentionem de filio ejus in Regem & successorem cooptando ingererent, ut Religioni successore jam certo, nemini spes esset novandarum rerum. In dicta igitur a Cæsare regni comitia Edenburgum. Ad quæ ipse cum conjuge & liberis atque Carassa Nuntio Apostolico, qui hæc scripsit, se contulit.

In Comitibus inquisitum de fonte tumultuum, qui hæcenus regnum tantopere concusserant, atque de eorum remediis. Deinde,

de, cum plures Christiani, inductis pluribus uxoribus, Mahometanorum more matrimonii sanctitatem temerare non erubescant, quomodo hoc probum coercendum.

Tum vero a Strigoniensi, Esterhasio, aliisque paucis ad Regni successorem deflexa oratio. Acatolici palam repugnabant, maxime, qui præsentes aderant, Legati Bethlemii: rationem electionis ad modum libertatis Polonicæ reducendam contendentes. Sed cum Legati Sclavoniæ, Croatiæ, & Dalmatiæ, Catholici prope omnes, advenissent, per majora suffragia fuit decreta electio. Hoc cum cernerent reliqui, unanimi omnium ordinum voto dictus est Rex Ferdinandus, atque allata singulari prorsus cum pompa Posonio S. Stephani corona a Strigoniensi Archiepiscopo ornatus. Eodem tempore Esterhasius electus fuit Palatinus seu prorex Hungariæ. (1625)

Ferd. II. filius
electus Rex
Hung.

Ussit Bethlemi invidiam hæc coronatio, cum ipse eandem ambitione jam præcepisset. Adhæc amplissimæ nuptiæ cum Electoris Brandeburgici filia, sumptuosissimo apparatu, Orientis & Occidentis Imperatorum Legatis præsentibus, celebratæ, spiritum hominis, alias arrogantem, & quiescere nescium inflaverant. Denique incitabant Christianus IV. Daniæ Rex, qui bellum Cæsari indixerat, cæterique foederati, cum Budæ Præfecto, Cæsari infenso.

Horum singula poterant hominem levem nulliusque fidei ad tertium bellum Hungariæ inferendum permovere: præsertim cum Austriam tumultuantem, Cæsaremque gravissimis procul a Pannonicis abstractum bellis videret.

Tertium
Bethlemi bel-
lum.

Juvante Tur-
ca.

Irrupit igitur rursus valido cum exercitu in Hungariam, in qua multos amicos habebat, quos aut hæresis aut novandi cupiditas ei conjunxerat. Nec regni hujus rapinis satur, in Moraviam quoque & Silesiam, ubi conjunctionem cum Mansfeldio condixerat, populationem extendit. Ex altera parte Turca Hungariam invasit, Damaschio expugnato, & Novigrado oblesso. (anno 1626.)

At Cæsar, Dano jam fracto, Wallensteinium cum copiis in Hungariam misit, qui nominis sui terrore, & Turcas Novigrado depulit, & Bethlemum, cum Mansfeldio & Vinariensi conjunctum, in fugam conjecit.

Ad Tartaros pro more recurrens Bethlemus, 40000. millia sibi promissa expectabat, sed ii in Polonia ita sunt contriti, ut non nisi cladis nuntium acciperet. Turca, Babylonico bello involutus, suos retraxit. Mansfeldius & Vinariensis privatas prædas agebant.

agebant. Brevisque Mansfeldius, funestus Germaniæ, Bohemiæ, & Hungariæ titio, Budæ inter Turcas extinctus est.

Bethlemus undique desertus, spe abjecta, in Transylvania Cæsar pacem suam recessit, obnixque a Cæsare pacem petiit. Concessit ille homini, quamvis toties perfido & perjuro, his legibus: Hungaria cedat. Belli concitatores aperiat. Mansfeldium & Vinariensem dimittat. Tartarico aliisque fœderibus renuntiet. Restitutionem Damascii a Turca impetret. Captivos, & a Turcis in servitutem abstractos, reddat. Promisit Bethlemus prolixè omnia, quasvis condiciones bello, toties infeliciter tentato, potiores, ducens. (1627.)

Biennio post turbulentus hic actor de theatro vitæ humanæ abscessit: postquam 16. annis fraudibus, insidiis, perfidia involutam tragiœdram lussit, totique Europæ illussit. Natus est in Transylvania loco nobili anno 1580. in aula primum Gabrielis Bathorii, dein Constantinopoli aliquot annis educatus: ac inde redux, ope Turcarum dejecto atque interempto Bathorio altore suo ac domino, Principatum Transylvaniae invasit, conspiransque cum Domus Austriacæ hostibus, quas diximus, tragiœdram dedit, personam etiam Hungariæ Regis agens. Uti fidei, ita Religionis nullius fuit, nisi ea dicenda sit Religio, quod Catholicos immani odio sit persecutus. Obiit anno 1629. ætatis 50, regiminis 16, prole nulla relicta.

Successorem in Transylvania habuit *Stephanum Bethlemum* fratrem, sed eo mox dejecto, *Georgius Ragozius* electus est, cuius jam pater Principatum gesserat. Is cum Bethlemo Gabrielis fratre inimicitias primum, dein bellum gessit. Bethlemus modicis a Turca auxiliis instructus, atque bis victus, in Thraciam rejicitur. Denique amicorum opera conciliantur. (1636.)

Anno 1644. idem Ragozius, haud dubie a Suecis incitatus, cum 70000 Armatorum in Hungariam irrupit: causam præferens, Hungariæ libertatem violatam a Cæsare: multa contra priorum annorum pactiones immutata. Cassoviam itaque aliaque nonnulla loca invadit. Ejus impetum Comes Bucheimius cum Cæsareis, & Hungarorum fida manu strenue sustinuit, donec anno sequente pacem petiit, quam eo pronius Cæsar concessit, quo majore Suedici Gallicique belli pondere premebatur.

Ejus filius regni cupiditate pariter ebrius, cum Hungaricam non posset, Polonicam coronam prensavit. Accendit spem Carolonis cæsus.

lus Gustavus Rex Sueciæ, ut ad societatem belli Polonici eundem attraheret, promissis large omnibus, quæ ambitio petebat.

Dehortabatur eum non modo Cæsar cum Proceribus, sed ipse adeo Tartarorum Chamus, ne huic bello se immisceat: noratque, quam severis minis Aula Ottomannica Georgium parentem a Suecorum societate bello Germanico abstraxerit. Sed ne salubri monito aures daret, Barzajus, primæ admissionis Aulicus, effecit. Dudum homo versipellis principatum ambiebat, consiliis id agens omnibus, ut præcipitem indole Principem deturbaret.

Sueci vero missa Bizantium Legatione acriter Turcam incitabant, ut Cæsari in Hungaria bellum faciat: ferro & igne exscindendos, qui lignea ac triticea simulacra pro Numinibus colant. Sed æquior Sultanus extrema minatur Ragozio, si quid in Poloniam suscipiat, quacum ipsi amicitia intercederet. Verum obscuruit ad hæc miser, regnandique infania sui impos, sædus percussit, sibi, Cæsari, Hungariæ, reique Christianæ exitiosum. (1657.)

In collissem
Transylvani-
am fuga eva-
dit.

Nam Poloniam multo cum exercitu ingressus, ingenti clade prostratus est, amissis in acie quinque suorum millibus, pluribusque in fuga a Polono equite trucidatis. Quapropter traditis Keminio cladis reliquiis, in lucro ponere debuit, quod caput, quod coronæ insertum ibat, acinaci Sarmatico potuerit subtrahere, atque per invios calles & montium prærupta in Hungariam præcipiti fuga evadere.

Nec Keminio fortuna melior. Per Valachiæ alpes fugam rimatus, a Tartaris captus est, exercitu ejus aut trucidato, aut in servitutem abstracto. (1657.)

Quibus animis a Transylvanis exceptus sit infelix Ragozius, cogitatu pronum; cum nemo ferme esset, ad quem non pars aliqua cladis pertineret: auctusque dolor, cum immensa auri vis pro captivis redimendis a Tartaris exigeretur. Nihil certe propius erat, quam ut in ipsis comitiis a Keminii filiis trucidaretur.

Turcarum
minis a Prin-
cipatu depo-
nuntur.

Verum longe atrocior tempestas misero Principi incubuit a Mahomete IV. Sultano, quod se Suecico foederi illigare, & Poloniæ coronam ambire sit ausus: nec iram barbari placabat, quod fugitivus, rebus exutus, domi invisus, foris spretus temeritatem luisset: sed funditus illum perditum ibat. Atque e vestigio Budensi cæterisque limitum Præfectis mandat, ut ad Temeswarinum copias ad expeditionem paratas habeant. Renningerum vero Cæsareum Constantinopoli oratorem monet, nuntiaret Viennam, non alio hæc arma, quam ad castigandam perfidi hominis contuma-

tumaciam spectare. Securum Hungariæ, atque amicitiae esse jubet Cæsarem. Mittitur & ad Transylvaniae Ordines, Albæ Comitiae habentes, qui denuntiaret, Ragozium illico provincia expellerent, Turcicumque præsidium Jenæam admittant: secus extrema omnia expectarent. (1658.)

Facile advertit Ordines, quo hæc irarum in Ragozium simulatio collimaret: Principatum potius, quam Principem a Turcis petiti. Sed quid facerent terrore attoniti, milite, foederibus, opibus, amicis, fide, rebus omnibus destituti? Monent Ragozium, cederet tantisper temporis, atque, ne furens Turca libertatem adimat, patriæ dignitatem condonet.

Abdicat se haud gravate. Moxque Franciscum *Redaium* Redajus Principem renuntiant, virum primæ inter suos Nobilitatis, egregia & pacata indole, dignumque meliori tempore.

At Ragozium privatam vitam non ferens, solutis vixdum comitiis, & dimisso Bizantium Legato, egentium ac perditorum hominum delectibus habitis, brevi tempore decem hominum milia collegit. Permulti Nobiles, pro mobili Nationis genio, eos conatus clam promovebant. Redaii modestiam pro ignavia carpunt. Ea fiducia, crescente in dies adhærentium numero, datis ad Ordines litteris postulat restitui. Mittitur ad eum, quæ dissuaderet, legatio, at incassum. Vi doloque intrusum Redajum clamat. Invitis etiam Ordinibus & ringentibus Turcis se Principem fore. Nec intra minas hæsit, sed Comitibus copias admovet. Quare perterriti Proceres, in ejus verba denuo jurant: Redaio æquabili animo Magistratu abeunte. (1659.)

Ragozium armis se restituit.

ARTICULUS III.

Ragozi a se ipso restitutus; sed a Turcis Barzajus intruditur. Ragozi Cæsarem implorat. Barzajum dejicit. A Turcis occiditur. Varadinum a Turcis expugnatum.

Gravissime Turca id accepit, nullis muneribus a Ragozio se placari passus, Legato illius obtruncato. Quare Ragozium in Turcicam ditionem progressus, populationibus late omnia cas. implevit, donec Budensis Prætor, quem *Bassum* vocant, cum 15000 occurreret. Confligitur mox acri prælio; victus castrisque exutus Turca.

53.

Vincit Tur-

Sed Turcæ
aucti Barza-
jum intru-
dunt.

Sed victoriæ læticiam absterfit nuntius de adventu 45000 Turcarum. Tradita Jenæa Turcis, *Barczaji* fraude, ut ea ad Principatum sibi viam sternat. Missus idem ad Vezirium Legatus, apud quem valebat gratia, ut pacem ab eo exoret. Avocato in Orientem opportune Turcarum exercitu, ubi Aleppi Prætor gravi seditione Syriam miscebat, datæ induciæ hac lege: *Barczajus Principatum obtineat, at Caransebiam & Lugosum (duas munitas urbes limitaneas). Turcis traderet: Ragozium, vivum aut mortuum, cum Valachia & Moldavia Principibus, Sultano transmitterent. Duplum tributum annuum pendant. Nobiles quatuor obsidum loco apud Vezirium maneant.* Atque ita Barczajus Principatum, tot sceleribus quæsitum, est consecutus, execrabilis patriæ, & Religionis proditor. (1659.)

Auxilia a Cæ-
sare frustra
petit Rago-
zajus.

Ragozajus, spe necdum dejectus, a Leopoldo Imperatore rogat auxilia, Barczaji impietatem, Turcarum incrementa, & despoticum in Transylvaniam dominatum, ferendum non esse Cæsari: summum inde Hungariæ rei que Christianæ enasci periculum. Decem modo Germanorum millia sibi mitterentur, retrudendæ in Thraciam Turciæ se parem fore. Asiaticis turbis satis negotii Vezirio objectum iri. Affore Moldavos, Valachos, Cosaccos, Hungaros; neque ob missas auxiliares copias pacem a Cæsare violandam.

At Cæsar, sparsis per Daniam adversus Suecos copiis, non id esse tempus existimabat, quo cupidam belli Turciam irritaret. Ungaro militi parum tribui posse, qui multus quidem affluat, sed facile rursus diffluat, velitationibus, quam statariæ pugnæ aptior. Cæterum in ambiguo esse, an Barczajo, an Ragozio plus fidendum: parem utriusque ambitionem, utrumque imperandi vesania abreptum, quidvis admissurum.

Cum igitur nihil opis expectare juberetur Ragozajus, cum Barczajo transegit: securam in Transylvania habitationem, sessionem & votum in Comitibus, regressum ad dignitatem, cum per Turcam licuerit, pactus.

Neque his pactis Vezirium emolliit Ragozajus, neque Mayenbergii legati Cæsarei ad Sultanum oratio. Variæ tam implacabilis iræ causæ ferebantur. Verissima fuit cupiditas Turcarum, subigendi penitus Transylvaniam, atque invadendi Hungariam; unde minaces illæ Sultani ad Cæsareum Legatum voces. Ut quid Cæsar in terris suis hominem, *Fulgida Porta* adeo invisum, sustineret. Sibi eum bello persequendum, ubicunque eum morari contingerit.

Nequ

Neque latebat Leopoldum, bellum a Turcis quæri. Quare, ut Hungarorum animos pertentet, coactis Comitibus, quid ab illis expectandum foret, explorat. Magno consensu non modo annonam Germano militi, verum & regnum omne in armis fore, prolixè promittunt. Sed promissis exigua postmodum fides respondit.

Cæterum ea fuit Barczaji vācordia, avaritia, & servilis erga Turcas subiectio, ut Transylvanis jam vilis & exosus, Ragoz-
 zius contra, ceu liberalis & splendidus, in pretio esset & amoribus. Præparatis ita animis, Ragoz-
 zius cum milite in Transylvaniam profectus, magna ab omnibus voluntate jam tertium Princeps acclamatur. Barczajus vero arrepta fuga Temeswarinum ad Bassam evasit, de Ragozii & popularium injuria multa conquestus.

Ragoz-
 zius
 Barczajum
 dejicit Prin-
 cipatu.

Ea rerum conversione Constantinopolim nuntiata, Sultanus Transylvanis servitutem & ultimam vastitatem comminatur, nisi recepto protinus *Barczajo* Ragozium expellant: Cæsari vero per Legatum scribi petit, pro belli denuntiatione se habiturum, si vel tantillum opis rebelli præstaret. Temeswarini Præfectus cum 15000 reducere Barczajum jubetur, qui magna clade Ragozium affligit.

Tum vero is, sumpto a desperatione consilio, ut Princeps non inultus moriturus, cum 6000 suorum ad Claudiopolin incredibili ferocia in numerosum Tarcarum exercitum irruit, ingenti-
 que strage illorum edita, in confertum hostium globum se injicit, a
 multisque vulneribus acceptis concidit, atque spirans adhuc Va-
 radinum deportatur: ubi, ejurato Calvino, magno pietatis sensu
 Catholicus obiit: felicior morte quam vita.

Vulneratus
 a Turcis obiit
 Varadini Ca-
 tholicus.

Familia natus fuit nobilissima ac pervetusta, avo & patre Transylvaniæ Principibus. In bello fortis potius miles, quam Dux providus. Initio Principatus Basilium Moldaviæ Regulum ditione exiit. Polonica vero expeditio perniciem ei attulit. Felici esse licuisset, nisi perdidisset ambitio. Filium ex Sophia Bathorea reliquit Franciscum, in Hungariæ hæreditarios fundos cum matre se recipere coactum. (1660.)

Ragozii morte necdum quies Transylvanis reddita. Quippe dum, Jani Keminii, Principatum ambientis, machinatione, detrectant Barczajum recipere, Sultanus Halyum Bassam ad Varadini oppugnationem dimittit. Susa, Dux Cæsareus, quanta cuperent, Varadinensibus auxilia offert. At illi satis sibi propugnatorum esse respondent, Calviniano Præcone pro concione clamant.

te, ne se arcemque Papistis Germanis crederent, satis animorum viriumque ad defensionem esse Hungaris.

Responso hoc abrupto ad Susam delato, convocatis Hungariæ Ordinibus deliberatum, qua ratione occurrendum periculo. Una fuit omnium sententia, non committendum, ut tanto præsidio Turcæ potiantur: cum non Hungariæ modo sed Christiani orbis sit propugnaculum. Quippe Transylvaniæ, Valachiæ, Moldaviæ salutem unius Varadini mœnibus contineri, frænumque Turcis injici, ne in provinciæ formam eas regiones redigant. Hactenus procul, atque in ipsam adeo Asiam ad stativa deducendum fuisse Turcis militem, capto Varadino, ex provinciis istis, frumenti feracissimis, sustentandos. Rudolphum Cæsarem ad hunc locum conservandum gravissimo bello se implicuisse, eumque vindicasse. Et quamvis utriusque Imperii consensu is ad Tibiscum & Samosium tractus Transylvaniæ Principibus sit concessus, non tamen propterea a suprema Regum Hungariæ, in cujus solo est situs, fuisse subtractum. Ipsam Transylvaniam semper Hungariæ partem fuisse habitam, Principibus fidem Regi jurantibus. Quod Turcis tributum pendant, tyrannide potius quam jure fieri.

Varadinum
a Turcis ex-
pugnatum.

Verum, ut inquit ille, dum Romæ deliberatur, Saguntum perit. Varadinum, ob præsidii paucitatem, machinatorum impetritiam, proditones incolarum, magna Christianæ rei jactura, 47. oppugnationis die Turcis est traditum, Bizantio magnis plausibus excipiente victoriæ nuntium, & clavem in Christianorum terras ab Halyo inventam gratulante. Susæ autem Halyus denuntiat, nisi finibus protinus excedat, venturum se cum victore exercitu, & pauculos Germanos interneconi daturum.

ARTICULUS IV.

Barczajo deposito Keminius intrusus: hoc pulso Abaffius. Pax cum

54. *Turcis. Abaffi invadit Hungariam. Transylv. ad Cæsarem.*

Herbevill Ragozianos cædit. Hung.

vastata.

Dejecto ite-
rum Barczajo
Keminius
Princeps.

Majori interea, quam unquam, intemperie æstuabat Transylvania. Durante Varadini obsidione Barczajum, ne quid turbaret, in custodia tenebat Halyus: tum in Principatum remisit ea lege, ut Turcis cedat Claudiopolim, & 500 æris millia numeret. Cumque impotentius pecuniam exigeret Barczajus, Transyl-

Transylvani eo deserto *Keminium* Principem renūntiarunt. Barczajus vero, cum Turcam per litteras invitasset, oblatis rursus duabus, quas vellet, urbibus, Ordinum voluntate cum fratre est interfectus, belli calamitatum Princeps auctor. Ragozium herum, ut ejus dignitatem obtineret, in pernicioſa conſilia præcipitavit, ſpem Regni Polonici iniecit: Turcas in vindictam concitavit, Jenæam pollicitus, Caranſebiam, & Lugofium tradidit; Varadinum machinationibus ſuis perdidit. Ante mortem monetam cudit, cum lemmate: *ſalva nos: perimus.* Et in parte averſa: *de profundis clamaui.* Deleta ſtirps omnis. Uxor mendicato vivere coacta.

Barczajus interfectus a ſuis,

Amoto hoc probro Chriſtiani Nominis, Halyus, agni velere vulpem teſturus, *Keminium* *Temesvarinum* amice invitat, ut ſolenni inauguratione Principatus inſignia capiat. At non ita ignarus erat Turcicarum artium, quin reſtim ſibi paratam intelligeret. Viennam igitur legatos mittit, rogatum auxilia, ſe, totamque Transylvaniam Cæſaris fidei permittens.

Benevole accepti ſunt legati, atque ſpe pleni remiſſi. Ad Sultanum & Halyum directi Legati a Cæſare, tentaturi, ſi qua ratione abſque bello conſuli *Keminio* & Transylvaniae poſſit. Uterque reſponſum accepit, *Keminium* vivere amplius non poſſe: ſi ejus cauſam Cæſar ſuſcipiat, pacem violatam videri. Itaque jam ſerio bellum apparatur.

Interim vero, dum Cæſarea auxilia, & modica & lenta, conveniunt, *Keminus* Transylvania a Turcis pellitur. *Michaël Abaffius* vero, qui ruri vitam degebat, ab iisdem accitus, ad mortem ſe duci credebat, cum Princeps Transylvaniae renuntiatur. (1661.) *Keminus* collecto milite contra eum, comitantibus 2000 Cæſareorum, duxit, ſed affluentibus Turcis, & Transylvanis prodentibus, victus eſt, & trucidatus.

Keminio pulſo *Abaffius* Princeps.

Ex quibus apparet, omnes iſtos Principes Transylvaniae, ex *Calvini* diſciplina homines fuiſſe ambitioſos, turbulentos, & ſanguinarios, qui vix Principatum adepti Rempublicam tumultibus, ſeque ipſos alternis velut cædibus involverunt, aut Turcis per ſactiones ſuas maſtandos præbuerunt.

Devoluto ad *Abaffium* Principatu per interitum *Keminii*, ſolliciti erant Transylvani, qua ratione Germanos, quos enixis precibus paulo ante advocaverant, ex urbibus denuo, quas præſidiis tenebant, expellerent, prout a Sultano imperatum fuerat *Abaffio*. Et miſerunt eam in rem Legatos ad Cæſarem, qui ſe abducturum copias recepit, niſi in manus Turcarum venirent.

Transylvani Turcis mixti *Claudiopolin* obſident, a Cæſareis ſtrenue deſenſam.

Cum igitur hoc metu Cæsarei in munimentis persisterent, Transylvani Turcis mixti Claudiopolin oppugnant. At Cæsarei Redano Præfecto, civibus Calvinicis exarmatis, adeo strenue urbem defendebant, ut hostis re infecta abcedere fuerit coactus. (1662.)

Pace cum
Turcis inita
Abaffius con-
firmatus.

Grave dein bellum Cæsar cum Turcis gessit propter Transylvaniam, ne tanta provincia in eorum potestatem laberetur. Parta Cæsari *San-Gotbardana* victoria, Vezirius pacem petiit, qua conventum, ut uterque Imperator copias suas Transylvania deduceret, liberamque Ordinibus potestatem Principem sibi eligendi relinquat. Keminii & Ragozii hæredibus armatus in Transylvaniam ingressus interdictus: Abaffio sua relicta dignitas. (1664.)

Abaffius in
Hung.

Porro Abaffius & Transylvani, quacunq; ope poterant, rebellibus Hungaris succurrebant, atque asyllum præbebant. Anno 1675. Kaloum, Tokainum, Zatmarinum, tanquam veteres essent Principum Transylvaniae possessiones, repetebat, velut inique a Ragozio in Cæsarem alienatas; cum tamen ab omni ævo in Hungariae Regum ditione fuissent, atque ad tempus duntaxat fiduciario jure Ragozio concessæ.

Igitur cum 12000 Armatorum movet in Hungariam, auriferis montibus inhians, omnemque late regionem devastavit, Scepusiensem præsertim agrum.

Cum dein *Pedipolius* ad Transylvaniae Principatum aspiraret, bellumque inferret, totum se Abaffius ad rebelles Hungaros applicuit, eorumque opera victoriam retulit; cumque *Pedipolius*, instaurato e Valachis exercitu, novum prælium pararet, mandatum cum minis a Sultano accipit, ut arma ponat. Abaffius vero, ut Hungaris pro submissis subsidiis gratiam referret, totidem ad fovendam promovendamque rebellionem, Töckelio ductore, confignat milites, atque acceperat. (anno 1678)

Turcis se ad-
jungit.
Transylvania
in provinci-
am a Cæsare
redacta.

Exorto subin bello Turcico, totum se Ottomannis applicuit Abaffius, donec anno 1687. prævalentibus Cæsareis armis, a Leopoldo Cæsare in provinciæ formam redacta est Transylvania. Quippe Carolus, Dux Lotharingiæ, parta *Mohacensi* victoria, susceptaque in Transylvaniam expeditione, Claudiopolim, Cibinium, Hebam Juliam, totumque Principatum deditione accepit, his legibus; munita provinciæ loca præsidium Cæsareum reciperent, illudque alerent. Abaffio ærariæ ac civilis rei administratio, fundi, jurisdictio, comitia convocandi autoritas salva maneat. Religionum libertas ne turbetur. Magistratus suis legibus moribusque vivant.

vivant. Si Turcæ aut Tartari transitum extorqueant, gubernatoribus id mature significarent, & Christianis opem ferant.

Tentata quidem est postea sæpius a Turcis Transylvania, sed armis Cæsareis strenue vindicata, in fide perstitit ad initium usque hujus sæculi: ubi occasione belli Hispanici Hungarica seditio denuo exarsit. Nam eo ex incendio in Transylvaniam quoque flamma sparsa est; quam tamen *Rabutinius* Gubernator cura sua vigili tantisper compressam tenuit, senatoribus Cibinio conclusis. (1703)

Verum anno sequenti Ragozius, missis in Transylvaniam *Ragozius* sex Hungarorum millibus, pleraque ad defectionem prona invenit, *rebellis*, Volitabant mox per provinciam perduellionis vexilla. *Rabutinius*, a *Rabutinio* interclusis omnibus subsidiis, *Claudiopolim*, quia servari non poterat, dejecta muri parte, deseruit, atque Cibinium residuas vires collegit. Indeque prorumpens grandi clade Transylvanos Hungarosque multavit. *cæsus*.

Ragozius nihilominus sub initium anni 1705. Ductore Forgasio Hungarorum ad 40000 immittit, quibus ad 10000 Transylvanorum se adjunxere. Obsessa mox Deva, Fogarasia, Corona, Mediesinum, & ipsum denique etiam Cibinium, triginta hominum millibus urbi circumfusus.

In arcto res erant positæ; tota ferme provincia in hostium potestate; Varadinum & Giula, Transylvaniae claustra longa obsidione ad famem redacta; viæ cæsis arboribus, objectis aggeribus, ductoque perpetuo vallo præpeditæ; omnia ad exitium, quod *Rabutinius*, *Felsius*, *Beckerus* virtute, fide, constantia morabantur, inclinabant; cum *Herbevillius* longo & difficillimo itinere ducto in Transylvaniam exercitu, tutelariorum velut genius, rebus afflictis succurrit.

Vallo adhuc aggerique fruendo intentum hostem *Herbevillius* ad Siloam aggreditur. Difficilis pugna: hostis & numero *Herbevill. rebelles pro-* multo superior, & aggere valloque defensus. At enisa Germanorum virtus plenam victoriam retulit. Cæsi 4000, tormenta 28, signa 50, annonæ & impedimentorum currus omnes victori in prædam cessere. Enituit virtus *Schlickii*, *Glöcklspergii*, *Langleti*, *Drafcovicii*. *figat.*

Mox alia tum rerum facies. Peramplus & quæstuosus Principatus a præsentissimo exitio servatus, atque in fidem Cæsaris assertus. *Claudiopoli* jam stabant triumphales arcus, magnificis epigraphis, *Victori*, *Patriæ vindici*, *Germanorum Domitori*, insi-

gniti, multusque apparatus cernebatur ad solennem pompam, qua tertia post die Ragozius inaugurandus erat Transylvaniæ Princeps. Jam vero cives urbis claves obviam victoribus supplices tulerunt. Vis annonæ grandis reperta; captivi Germani signis suis redditi, rapti ad supplicium transfugæ. (1705.)

Vastata ab
Hungaris
Hungaria.

Restitutam sibi Rempublicam, coactis more veteri comitiis, sapientissime Rabutinus gubernavit: cum accipit Vienna literas, quibus cum majori legionum parte in Hungariam superiorem jussus est migrare, Stahrembergio futurus auxilio. Difficilima erat profectio; quia perduelles omnes regiones, quibus trans-eundum erat, igne ferroque vastaverant, cibariis aut avectis, aut defossis, aut corruptis, ut Cæsareis desertam solitudinem relinquerent. Debrezinum, urbs amplissima, inventa est hominibus & rebus penitus vacua: ardentes vici & tristia busta ubique viscebantur. Adeo nempe boni isti cives in patriæ suæ, veluti matris viscera, grassabantur.

Remisso cum 2000 equitibus in Transylvaniam Tigeo, qui vicario nomine provinciam regeret, post anni dimidii miseram peregrinationem Budam tandem Rabutinus attigit: sub finem vero anni 1707. in Transylvaniam, graviter laborantem rediit; postquam de ea deferenda jam plures in Senatu Aulico sententiam dixerant, de inhibendis excursionibus in Austriam & Moraviam solliciti.

Visa proin est hæc sententia privata potius spectare commoda, quam bonum publicum Josepho Cæsari, qui tam amplam pinguemque provinciam, tantis impendiis partam, licet longinqua sit, & nova supplementa exigat, nequiquam omittendam censebat, eaque perduelles aut Turcas potiri; maxime, postquam Rabutinus & Tigeus eam totam ad obsequium Imperatoris reduxissent.

Rabutino

Laborabat tamen Rabutinus, Gallicæ originis homo, post res tam præclare, tantaque fide, solertia, constantia, & bellica virtute gestas, apud Proceres Viennenses invidia. Quapropter, missione impetrata, Viennam concessit, articulari etiam morbo afflicto, nactusque est in Transylvania successorem *Kriechbaumium*, qui domitam equidem provinciam accepit, sed brevi expertus est, quam ardua gubernatio sit demandata, Karolyo irruente, supplementis, vestibus, annona deficientibus, incolis vero, qui mollissime erant habendi, parum contribuentibus. (1708.)

Subrogatur
Kriechbau-
m.

Heistero, copias Transylvanicas ad Tibiscum in Hungariam duci cupienti, mos geri non potuit, Ragozio & Carolyo, 14000 armatis circumtonantibus per provinciam, Varadino ab iis obfesso, cui annuis subsidii succurrendum. Et, si cætera abessent, in illa gentis mobilitate, Nationum ac Religionum colluvie longius a specula abesse non licuit.

Ad hæc Rascianis, partes licet Cæsaris sequerentur, confidi non potuit, utpote qui, sibi relictæ, amicos juxta hostesque spoliabant, dicente Wilsono Hyberno, Aradiæ Præfecto, Rascianum, si vel ad inferos prædam videat, adequitaturum. Nec puniri poterant, ne in seditionem agantur, essentque in illa Germanorum paucitate necessarii. (1702.)

Sequenti anno, gravi per Transylvaniam pestilentia sæviente, nihil ferme belli fuit; nisi, quod Rabutinus, paternæ legionis Pro-Tribunus, populatorium Baloghi agmen oppreslerit, captis signis 10. equis 153. Ragozianis 40.

Kriechbaumio, curis & laboribus immortuo, in Transylvaniæ Præfectura surrogatus Steinvillius Lotharingus: qui multos Nobilium, ad Cæsarem redeuntes, benigne suscepit. Illud autem suspectum atque periculi plenum videbatur, quod Protestantes Transylvaniæ Ordines viginti aureorum millia obtulerint, si Abaffius & Bethlemus Comes e Viennensi custodia domum remitterentur. Et huic Steinvillius.

Alter metus a Turcis erat, qui Russorum victoriis commoti, tam potentem vicinum crescere nolebant, Regemque Sueciæ, Benderi post Pultawanam cladem exulem, restitui postulabant. Quapropter omnia ad bellum apparabant. Timebatur proin, ne flamma in vicinam Transylvaniam & Hungariam erumperet. Nec vanus omnino metus, ne Turcæ, a Ragozianis & Legato quodam (ut fertur) interpellati, aliud simulant, aliud acturi essent. At metum abstergit Thalmannus, Cæsaris Byzantii Interpres, suspicionem de invadenda Hungaria nullam apparere. Et sane mirum est, Turcas in illis Hungariæ, sursum deorsum euntis, turbis Carlovicenses inducias servasse, nec ullis precibus a Ragozianis exorari se passos, datam ut fidem rumperent: exemplo sane, Christianis imitando. Turcæ Hungarorum turbis se non miscant.

Anno tandem 1711. Transylvania quoque Hungariæ paci inclusa est: ejuratus cum factione sua Ragozius. Magnates ac Nobiles, ejus partes secuti, atque in Moldaviam profugi, restituuntur. Leges & statuta pristino loco stare jussa. Captivis libertas asserta. Pax.

CAPUT VIII.

STATUS HUNGARIÆ

SÆCULO XVII.

ARTICULUS I.

*Seditio Calvinistarum. Bellum Turcicum. Cum Vivarino multa
loca amissa. Sant-Gottbardana victoria. Causæ prope-
ratae pacis.*

55. **T**ransylvanica bella Hungaricum cum Turcis post se traxerunt. Nam cum isti nihil æqui admitterent; Cæsari autem committendum non videretur, ut Sultanus pro arbitrio Transylvaniam, Hungariæ Regno veteri jure innexam, versaret, bello decreto, *Susam* Hungariæ rebus præfecit, Montecuculum vero supremum belli Imperatorem in Transylvaniam misit, ut Keminio novo Principi adversus Ottomannos assistat.

Susa in Transylvaniam,

Invitus omnino Dux sapiens eam expeditionem suscepit, probe gnarus, quantis cum difficultatibus per ardua tot itinera, ob annonæ defectum, Turcarum frequentiam, suorum paucitatem, Transylvanorum inconstantiam, depugnandum foret. Et revera nullo confecto negotio, cum interea Transylvani a Keminio ad Abassium, novum Principem, ab Halyo datum, defecissent, in Hungariam, cum acciso morbidoque exercitu redire coactus est. (1661.)

*Sed redire
coactus.
Calvinistas
in Hungaria
rebelles ha-
buit.*

Sed neque in Hungaria meliores successus habuit Susa. Ad decem Hungarorum millia coegerant Esterhásius, Nadaštius, Bathianus, Bucheimius Comites: sed præter inutiles excursiones, & Palankas aliquot (exigui operis munitiones) exustas, nihil admodum actum. Quid? Ne hyberna quidem Hungari concedebant Cæsareo militi, sed ex sua gente Regem deposcentes, in ejus perniciem conspirabant. Calvinistæ potissimum, *Vesselinio*, Hungariæ Palatino incentore, has turbas machinabantur, Ministellis pro concione oleum flammæ non perfunctorie infundentibus: Paristas præ Mahometanis expellendos. Quapropter Leopoldus Cæsar in superiore

riore Hungaria, majorem partem Orthodoxa, hyberna Monteculo assignavit.

In Poseniensibus quoque Comitibus, ad sanandos regni morbos, & bello Turcico apparando, a Cæsare indictis, nihil ex æquo decerni poterat, ob induratum Protestantium repugnandi voluntatem. Detrectabant illi ulla de re prius consulere, quam omnia In ipsis etiam templis, ab anno 1619. sibi ablata, restituta forent. Distinctum regni Comitum præterea a cæteris regni Ordinibus collegium postulabant. Neque Catholici omnes erant integri. Ut Germani ex Hungaria abducerentur, omnes postulabant, privilegia pro more ingeminentes.

Cæsar, qua erat facilitate, partem copiarum quamprimum in Austriam reduci jubet. At illi audaciores deposcebant, Regiis litteris testaretur Cæsar, præter jus fasque abs se actum, quod contra Comitiorum auctoritatem exercitum in Hungariam duxisset. Denique insalutato Cæsare se omnes subdixerunt. Unde Cæsar quoque, gravissime offensus Viennam rediit. Nec mitius actum cum Germano milite, aliis, quod tectis excluderentur, frigore pereuntibus, aliis a rusticis trucidatis.

Hoc animorum habitu eo sollicitius, misso Constantinopolim Perisio, de pace agebat Cæsar. Duo potissimum Turcæ opponebant: Quod Cæsar necdum Transylvania deduxisset copias: novumque Zrinus exstruxisset propugnaculum. Cæsar vero petiit, ut secundum pacta, a Solymanno cum Ferdinando I. inita, libera Transylvanis esset facultas Principem sibi deligendi.

Moram injecit mors *Chiuperlii* Vezirii: qui præcipuus fuerat belli incentor, Ragozii Keminique juratus hostis: homo adeo truculentus, ut sex eminentiorum capitum millia a se resecta gloriosi sit auditus: Sultano autem mire charus, ut, quod rarum, Vezirii dignitatem etiam in filium transferret. Qui Astrologiæ hætenus impensus, bellicæ imperitus, ratas inducias mox habuit: pacificatione ad Halyum, Temesvariensem Bassam, resecta.

Christianis pacis expectatione otio torpentibus, Turcæ bellum strenue præparabant. In exteris Principibus, bellis ubique ferme flagrantibus, spes nulla. Comitibus Ratisbonensibus more suo lente incedebant: nec deerant ex civitatum legatis, qui dicerent: Hungariam & Transylvaniam nihil pertinere ad Germaniam: suæ oportere quemque defendere; satis albere illas regiones Germanorum ossibus: nec æquum, ut unius utilitati omnes militent. Pa- Difficultatem ex parte Cæsareæ.

tur. Tandem 6000 militum decreta, sed 4000 tantum sub finem Novembris, ad hyberna videlicet, in Hungariam venire: Cæsarei vero ad variarum urbium & provinciarum defensionem adeo sunt distributi, ut Montecuculo non plures, quam 4000 equitum, & 2000 peditum superessent. Hac modica manu contra 100000 Turcarum Christianorum causa erat agenda, ut adeo Mantecuculus ad Cæsarem scriberet, se post 36. annos militiae eo redactum, ut 400 equorum cursoria acie Croatam velitemque agere necesse habeat. Id saluti fuit, quod barbari tantam debilitatem aliquamdiu ignorent.

Misera conditio Hungariae.

Neosolium amissum.

Vezirius, cum Leopoldus in tributum, a Ferdinando I. Turcis depensum, consentire nollit, pacis tractatione abrupta, grandi cum exercitu movens in Hungariam, Vivarinum (Utenbursel) oppugnare decernit. At vero Forgestius, munimenti Praefectus, cum intellexisset, tria Turcarum millia appropinquare, obviam illis egressus ad 20000 invenit, confertoque, cum evitare non amplius posset, praelio, victus est fugatusque, multis suorum in acie amissis, multis captis, & barbara crudelitate trucidatis, dicente Vezirio, sibi non esse panem pro canibus.

Partitis inde agminibus, alii Hungariam populati, alii in Moraviam effusi, cultissimam provinciam, 14000 in diram servitutem abductis, solitudinem fecerunt: alii Vivarinum oppugnabant, ortaue in urbe seditione militum, deditionem deposcentium, expugnarunt.

Graviter perculit tam muniti loci jactura, quibus Christiana res curae erat. Acerbe laceratus Aulae Viennensis tepor, Legiones velut alta pace alio mittentis: Ministrorum genius, qui grandia bella cum potentissimo hoste suscipienda suadeant, nec tamen necessaria provideant. Quasi vero cum sex millibus adversus centum & ultra millia bellum administrari queat. At facilius erat convitiari, quam opitulari.

Et aliae multae urbes.

Eodem post Vivarinum captum impetu Nitria, Leva, Novogradum, aliaeque urbes arcesque occupatae, Turcis immani barbarie populationem & provinciarum vastationem circumferentibus, ut adeo quidam ex Hungaris, jugum subire & Sultano tributum pendere cogitarent. (1663.)

Superioris anni languor intendit utcumque fervorem sequentis. In comitiis Ratisbonensibus triplum Romani mensis decretum, in subsidium belli Turcici. Octo Equitum, quadraginta peditum millia hoc juxta computum Imperii conficiebat. Sed statim multorum

torum ortæ querelæ, nimium se prægravari, temperandam prius pro ratione facultatum matriculam. Ardua magis hæc erat postulatio, quam ut ea tempestate perfici posset. Satiùs visum Cæsari connivere, ut vix tertiâ pars fuerit exhibita.

Neque tamen illa etiâ Cæsaris voluntati permissa, sed lecti Duces, qui Imperii auspiciis copias ducerent. Rhenani maxime fœderis Principes consilium hoc urgebant, Gravello Franciæ lega-^{Lud. XIV.} to annitente, ne Cæsari libera esset potestas utendi Imperii auxi-^{6000. mit-} liis. Ea tamen fuit Ludovici XIV. magnanimitas, ut Duce *Colli-*^{tit Colignio} *gnio* sex Gallorum millia, ex Italia, quo adversus Pontificem mis-^{Duce.} sa fuerant, ob violatum, ut credebat, Legatum, in Hungariam adversus Turcas melioribus auspiciis dimitteret.

Decem millia Pontifex coegerat, illaque, cum Franciæ Rege conciliatus, in sacri belli subsidium destinaverat. Sed cum tem-^{Subsidia Pon-} pore convento nemo Cæsareorum Romæ aut Anconæ esset, qui ^{tificia.} eas suppetias exciperet, Itali omnes missione donati sunt. Grandi tamen ære Pontifex rei Christianæ subvenit, data etiâ potestate, ex Ecclesiarum fundis amplam pecuniam colligendi. Eo liberalitatis exemplo excitati Italiæ Reguli varia subsidia contulere.

Media hyeme Zrinii expeditionem suscepit in Turcas, quam Zrini ^{expe-} summis alii laudibus; vituperiis alii, præsertim Monte-^{ditio.} cuculus, Gonzaga, Susa, & peritiores belli Duces exceperunt. Obscuriora non pauca oppida interceptit, aut flammis delevit, Essekium pontem exussit. Quinque Ecclesiis primum, dein ipsi etiâ Canissæ oppugnationem admovit. Sed grandibus sumptibus impensis, terris vastatis, ad rei summam vix aliquid effecit.

Susa vero majori cum emolumento suscepta expeditione, Nitriam primo expugnat; victis dein ad Csernicium acie Turcis, duo eorum millia cecidit. Victoriæ fructus Léva fuit, deditione accepta. Mox tamen rursus ventum ad manus. Susa Ordines obequitans hortabatur, quam nuper pauci & debiles inchoassent victoriam, nunc aucti firmatique absolverent: framearum fulgore, & incondito barbarorum clamore ne percellantur: hostium quidem ^{Pugna ad Lé-} plures esse, sed Tartaros, Moldavos, Valachos, coactum militem, ^{vam felix.} numerum duntaxat facere. Perferrent fortiter primum impetum: tum vero confertis ordinibus strenue signa inferrent.

Septem solummodo nostrorum millia erant, Turcarum viginti. Dextrum cornu Valachis & Spahiis attributum, Moldavis & Tartaris sinistrum: Janitari in medio stabant. Anceps diu erat prælium, nostri que victis propiores, cum Ducum virtute restituta

acies barbaros in fugam conjecit, cæsis eorum, ut fertur, octo millibus.

Strozzius quoque ad Muram tria Turcarum millia interne-
cione delevit. Sed parta victoria subita glande petitus victor oc-
cubuit, tristi silentio castrorum communis velut omnium pater de-
ploratus.

Expugnato dein Neozrinio *Vezirius*, multitudini suæ con-
fusus, decretoriæ pugnae fortunam committere statuit. Nec abnu-
it *Montecuculus*. Quapropter ad San - Gothardum congressus est
uterque exercitus.

Turcarum copias, 60000 æstimatas, ducebant, præter *Ve-
zirium* Imperatorem, *Damasci*, *Aleppi*, *Armenia*, *Bosniæ*, Præ-
tores. Nostorum haud plures 30000 erant, ex variis nationibus
collecti. Universo exercitui præerat *Montecuculus*: equitatui *Adol-
phus Sulzbacensis*: peditatui Cæsareo *Sabaudus Marchio Pio*: Im-
perialibus copiis *Leopoldus Marchio Badensis*, cui Legatus Comes
Waldeccius, &c.

Initio Imperiales Tyrones, qui ad eam diem Turcicum aci-
nacem non viderant, terrore percussî, solvere ordines, fugam
circumspicere, arma abjicere, in genua procumbere, supplicum
gestu manibus elevatis vitam deprecari. Plerisque, quo erant ha-
bitu, in genua provolutis, demessa capita. Submissis mox a *Mon-
tecuculo* veteranis subsidiis, repressoque hostium impetu, restituta
acies.

Sex horis acerrime dimicatum: cum pactis velut induciis
utrinque respiratum tantisper. Tum vero *Montecuculus* animato
milite copias simul omnes in hostem duxit, tanta fortitudine irru-
entes, ut prima statim impressione loco mota hostium acies, at-
que missilium pilarumque grandine in effusam fugam sit conjecta.
2000 Turcarum aquis hausta: in ipso campo 6000 interfecta. Alii
16000 occisa tradunt. Signa 140 capta, cum ingenti præda.

Montecuculus Generalis locum tenentis dignitate ornatus.
Badensis, *Waldeccius*, *Holachius*, *Colygnius* cum suis Gallis,
summîs laudibus celebrati, atque a Cæsare aurato torque donati.
Quo minus fugientibus insisteretur, grandes imbres, inundationes,
defectus pulveris bellici, & annonæ obstiterunt.

His aliquantum provisi, cum de novo prælio cum Turcis
conferendo, ageretur, stupentibus nuntiatur, pacem per *Rennin-
gerum* cum *Vezirio*, illam petente, in pago *Vasvarino* esse com-
positam: & quidem in has leges: In 20 annos induciæ tenento.

Transyl-

Wagn.

Sant - Got-
hardana vi-
toria.

Articuli pa-
cis

Transylvania uterque miles deducitor. Antiquum Principis eligendi jus penes Ordines esto. Zeckelhyda diruitur. Keminii atque Ragozii hæredibus, proprio vel alieno milite armatis, Transylvaniam ingredi nunquam fas esto. Zatmariensis, & Zabolciensis, comitatus sit penes Cæsarem. Loco Vivarini novum munimentum extruere Cæsari liceat. Nullus ad fines exercitus consistat. Solenni legatione robur pactis & celebritas addatur. Dona utrinque, tantis Principibus digna, afferrentur. (1664.)

Cur pacem Vezirius festinaret, nemo mirabatur. Nam Germanorum virtutem expertus, totque præliis victus, verebatur, ne sinistra ulteriori belli alea Sultani gratia excidat, amplum belli præmium ratus, quod Varadinum & Vivarinum retinere queat.

Causæ pro-
peratæ pacis.

At vero, cur Cæsar victor inopinatam adeo pacem concesserit, magnæ vulgo admirationi erat. Vivarinum certe, quod e Viennæ mœnibus prospicere propemodum liceat, in Turcarum manibus relinquere non debuisset. Verum illi, quibus notum erat, quot difficultatibus obnoxium hoc bellum fuerit, quot tædia Cæsari absorbenda, quot querelæ ad eum delatæ, quanta Ratisbonæ tergiversatio, quantæ exceptiones & oblocutiones, quæ spes in Tyro-ne milite, aut Gallicis copiis, quis Hungarorum in Cæsarem animus, quantæ tot inter Duces, pro arbitrio bellum gerere volentes, discordiæ & contentiones, quantæ comiteatuum difficultates, quamque immania ærarii exhausti onera, quibus, inquam, hæc erant perspecta, non admodum videbatur mirum, quod Cæsar tot difficultatibus per honestam pacem se expediret.

Missus dein a Cæsare Constantinopolim Legatus Comes Leslæus *Leslæus*, nobilissima in Scotia familia natus, sed Religionis causa *Copolim*. exul, comparatis in Styria amplissimis fundis, domicilium fixerat: toga sagoque clarus, per 30 jam annos trium Imperatorum fidissimus Minister. Complures e prima Nobilitate ibant comites. Strigonii, Budæ, Belgradi, Adrianopoli, Constantinopoli magnis honoribus exceptus. Multi ab eo servitute redempti: commerciorum ratio inita: Jesuitis, ne Præfectorum injuriis exagitentur, publicis litteris cautum: Franciscanis sacrorum Jerosolymis locorum possessio, unde a 30 annis exacti fuerant, in integrum restituta. Turcici legati Viennæ multo alia erat vivendi ratio, cruda, avara, sordida. Cæterum Sultanus Cæsarem *Imperatorem Germanorum* compellabat; nam *Romanum Imperatorem* se ipsum esse prætendit.

ARTICULUS II.

SUMMARIUM.

Hungariæ fertilitas, genius, querelæ. Hæresis fax turbarum. Protest. Intercessionēs. Perfidia. Vesselenii artes seditiosæ. Ragozium & Nobilitatem ad rebellionem concitat. Zrinii, Nadasli, Frangipani, Tattenbachii in Leop. Cæsarem conjuratio. Detecta. Capti. Ultimo supplicio affecti.

56.
Hung. ferti-
litas.

Quod de Gallis dicitur, aut foris bella quærentibus, aut domi habentibus, id de Hungaris militari & acrioris indolis natione, spiritu armorum, cholérico sanguine, & generosa quadam ferocia ad inquieta & turbulenta quandoque consilia impellente, dici posset; præsertim cum incredibilis soli fecunditas, in vine præstantissima, armenta bouum, piscium abundantiam, altitium, ferarum, fructiferarum arborum luxuriam multo fertilissima, & quod consequi inde necesse est, victus levissimo parabilis, ingentem otiosorum hominum multitudinem, paratam semper miscendis regnis materiam, nutriet.

Indoles.

Quippe miranda patriæ glebæ clementia quam abundantes earum rerum, quas natura profert, tam earum, quæ labore & artificiiis parantur, inopes facit. Raræ artificum officinæ: præter vini, tritici, salis, pecorum nativa commercia, vix aliud negotiationis genus: nec egrediuntur, ut vendant, sed expectant, donec veniant, qui emant. Agriculturam ipsam ignave, & per solos ferme Sclaves, quos servorum instar habent, exercere solent. In tanto autem desidiorum hominum numero nihil pronius, quam ciendo turbas, rapinarum occasionem & impunitatem quærere.

Querelæ.

Nec defuerunt Nobiles, qui spiritu elati, tumultuum auctores multitudini se præberent, aut officio se præteritos indignati, aut aversione & odio in Domum Austriacam turgentes: ferendum non esse jugum dominationis extræ, nec extra Regnum Regem quærendum. Barbaros velut & Scythas haberi Hungaros, quod in molles & voluptuosos aliorum mores immigrare nolint. Austriæ consiliis de capite & fortunis suis decerni: opulentissimas Præfecturas a Germanis occupari: præter leviora quædam munia nihil administrationis sibi concedi, nec præter obsequii & cæcæ servitutis gloriam quidquam esse reliquum: ferenda Reipublicæ onera, nec sentiri ejus commoda: exedi sibi medullam, ut exteri pinguescant.

Info-

Insolens id genus murmur ambitiosorum & turbulentorum hominum calidioris sanguinis nationem facile in iras & conspirationes movere poterat: maxime, cum cuilibet comitatu fas sit, privatum in concilium coire, in quo tributorum, litium, Regiorum mandatorum ratio ineatur. Sit, qui in tanta loquendi libertate querelas ejusmodi publice proponat, aut injuria quapiam, seu vera seu ficta, se affectum lamentetur, jam ad vindictam accenduntur omnes, privatam etiam causam suam faciunt: velut in copiosa, & accendi facili materia, serpit flamma, conferuntur capita, jaciuntur conjurationum & seditionum fomites, exterorum etiam Austriæ hostium flabellis non raro in apertum incendium eventilati. Quibus si accedat insita pectoribus a Germanis, lingua, habitu, moribus tantopere discrepantibus, animorum aversio (cum alias usavenire soleat, ut limitanei populi ac finibus proximi, animis longissime distent, atque convitiis se mutua dicacitate insectentur) cogitatu pronum est, in populo facile irritabili facile cieri turbas.

Sed inter tot seditionum incentiva, nullum tamen hæresis, Hæresis fax
turbarum. face illa Regnorum, & formidanda imperantibus furia, potentius. Hæreses quippe omnes alieno natæ sunt sanguine: nec ullum Principem in solio suo securum relinquunt. Cum enim sacra magnam Reipublicæ partem constituent, nunquam illa sola convelluntur, sed in coronata etiam capita furor grassatur, ex ipsa hæresis indole, rebelli, turbulenta, sanguinaria, sua.

Ludovico jam Rege in Hungaria gliscere cœpit exitiale hoc malum. Primus Franciscus Perenius hospitium illi præbuisse fertur. Ingentibus deinceps sub Austriacis Regibus incrementis diffusum, in Transylvania maxime, quod alias memoravimus, sedem fixit, sectarum colluvie ad omnem fœditatem contaminata: Tibisci quoque in Hungaria tractu præ reliquis infecto, eo majori contagii pertinacia, quo major accolarum ruditas, morumque distortio.

Hac usi Ministrelli, ab stiva ferme & aratro ad Regnum illud animorum emergentes, feram illam ac prope barbaram Tibiscanam gentem fraudibus suis aptam nacti, turbulentis suis concionibus, magicis velut incantationibus adeo dementarunt, ut pro oraculis haberentur. Calvinī asseclæ hi erant potissimum, cujus secta dominationis ferme impatientes facit, & nescio, quam majorem impietatem, audaciamque sanguinariam suis cultoribus inspirat. Anabaptistæ pauciores, & opificiis intenti, sunt quietiores.

Allaboratum equidem a Ferdinando I, ut Catholicissimum olim Regnum pristino Religionis nitore reddatur, sed, prout est
in

Protest. Prin-
cipum inter-
cessionibus.

in perniciem suam ingeniosa improbitas, imploratis Principum Protestantium intercessionibus, elusa prope sunt pientissima Cæsarum consilia; cum ea tunc essent tempora, quibus tribui haud parum oportebat iis, sine quorum auxilio ægre stetisset res Austriaca. Certe vix ad bellum Turcicum aliquid contulerant, cum graviter instarent, ut Hungaris credendi libertas concedatur. Qua in re plus sibi, quam Cæsari, potestatis esse volebant.

Ferro denique, quo prece aut pretio pervadere non poterant, extortis variis permissionibus, penetrarunt, templis occupatis, constitutis scholis, petere etiam ausi, ut separatum a Catholicis statum ipsi constituerent. Turcarum dein auxilium implorare, imperia continere, vicinos populos ad pervicacia societatem invitare: opprimi libertatem, retento post bella in Hungaria Germano milite vociferantes.

Præsidia hæ-
rent.

Indignissime siquidem A catholicis ferebant, iis excubiis licentiae suæ effusæ frenum injici, neque tantum a se fieri posse, quantum hæreticus spiritus ausus fuerat. Verum hi ipsi conatus impii id effecerant, ne Cæsares faciles aures refractariis darent: præsertim ubi Leopoldus per Leslaum ex Budensi Prætorē, Christianis parentibus olim nato, intellexit, infidos omnino Christiano Cæsari esse Hungaros, ut a quorum nonnullis arces aliquot & præsidia Sultano sint oblata, si in clientelam reciperentur. Promisisse insuper filios obsides missuros Budam: consilium ab iis sibi suggestum, ut montibus auriferis & tractu Neosoliensi potiretur. In hac autem prodigionum atrocitate privilegia nihilominus sua jactabant, in perfidiæ videlicet instrumenta ea vertentes, quæ olim ob fidem erant concessa.

Vesselenii
artes.

Propius jam ad ipsas conjurationes adversus Cæsarem Domumque Austriacam, quæ ex obtentis his causis descenderunt, accedendum. Turbarum præcipuus author fuit *Vesselenius*, Hungariæ Palatinus, seu Prorex, homo simulandi & dissimulandi artibus, calliditate, popularitate, omnibus acceptus, sed clam Domui Austriacæ infensissimus. Ejus instinctu oblatae velut Ordinum nomine querelæ, quod infciis Hungaris pax cum Turca esset inita. Sine Regni consensu tantum negotium confici non debuisset. Quæ autem hæc pax esset, per quam tanta spolia in hostium manibus essent relicta? Germanum militem ex Hungaria deducendum, sibi-que regni custodiam permittendam: nisi forte contra suam libertatem ea comparata essent militum præsidia.

Respon-

Responsum per Lobkovicium, supremum post Portiam Augusti Cæsareæ Præfectum, mansuete. Non tamen acquievit Vesselenius, cujus prima erat cura, Principes Regni familias in conspirationem attrahere. *Ragoziani* nominis magna ex opum amplitudine apud Hungaros erat Authoritas. Surculus supererat unicus, *Ragozium & alios Nobiles ad rebellionem concitabat.* *Franciscus* sub matris tutela: huic unicam Nicolai Zrinii filiam jungit, eumque ad seditionem concitat, ingerens, quo patre, quibus avis natus esset: num pateretur, a Germanis se velut captivum teneri? Hungariæ oculos in eum, velut liberatorem verti: esse opes novasque cum sponsa amplissimas clientelas, quibus magna ad posteritatis omnis memoriam possit agere. Aggressus dein Zrinium, Nicolai in venatione occisi fratrem: utrumque verborum lenicinio in casses egit: adjectis Tibiscanis Calvinii asseclis, ad omnia audenda projectis. (1665.) *Zrinius.*

Zrinius igitur, Banni Croatiae dignitate negata æger, cœptis insistens, socios conquisivit, quos ad rebellionem proniores existimabat. Hos inter erat Comes *Nadastrus*, pollens opibus & audacia, iratus Cæsari, quod, mortuus nuper Vesselenio, quem primum conjurationis incentorem diximus, Palatini dignitatem, efficitur ambitam, non sit consecutus. Statuerat quippe Cæsar, eum Magistratum, nomine tuendi leges, Regibus gravem, antiquare. *57. Infidias in Cæsarem præparatæ. Nadastrus.*

Collatis consiliis, statuunt, Cæsari insidias struere, eumque, cum comitantibus paucis Nobilibus Schottviennam ad salutandam sponsam, ex Hispaniis adventantem, dissimulata persona, alieno habitu esset excursurus, per locatos in insidiis Pottendorfensi ex arce milites intercipere.

Saluti Leopoldo fuit, quod ante Schottvienna discesserit, quam 500 sclopetaarii, quos inter arbusta abdere constituerant, essent collecti. Latuit hoc scelus, donec conjurati postea, antequam de iis supplicium sumptum, confessione sua illud vulgassent: prout etiam, quod fontem aulicum, unde aqua in cibaria petebatur, veneno infecissent. (1666.)

Frustrato hoc ictu, non tamen finiit conjuratio, sed machinatore Zrinio majora multa incrementa sumpsit, adeo quidem, ut de bello Cæsari inferendo grandes apparatus fierent. Tentata Ragozii mater, quæ in arce Mongatiensi se tenebat, quo mariti, Transylvaniæ olim Principis, amplissimas opes, vel iusto exercitui pares, congefserat. Dudum huc oculos verterant conjurati, unicuique velut factionis nervum: stimulabantque Ragozium, quem jam

ante in partes suas pertraxerant, ut hæreditatem paternam matri extorqueret. Jamque vi armata arcu imminerebant; cum mulier, fida Cæsari, disponi tormenta in subeuntes jubet. Filio vero cordate denuntiat, spem omnem potiundæ hæreditatis ponat, donec conspirationi nuntium mittat: nolle se esse proditoris matrem. Non tamen ille a turbulentis consiliis pedem retraxit, sed Tokainum, Germanorum præsidio occupatum, expugnare est conatus.

Ejus molimina.
Frangipani.

Crescebat in dies factio, Ministrorum seditiosis concionibus ad arma excita. Sed multo maximum incrementum ex *Frangipani* Comitis accessione accepit. Opes juveni nobilissimis natalibus orto, fundique in Croatia ad Dalmatiæ fines amplissimi. Nulla is injuria accepta, a Zrinio in eundem vorticem abreptus, Monachum Constantinopolim ablegat, quanta maxima posset auxilia a Turcis petiturum: atque, ubicunque poterat, rebellionis semina spargebat. (1667.)

Cæsar, allaturus publico jam malo remedium, comitia cogit. Sed irrita fuit oblata clementia, vanus labor: Ordinibus aperte clamantibus, nisi creato Palatino haberi non posse comitia: neque admittendos Germanos Præsides. Protestantes restitutionem fanorum, & libertatem religionis regerebant: moxque domum redierunt. Effectum proin nihil, nisi quod in plures sit propagata rebellio, atque totum denique regnum pervaserit.

Quia de industria Turcicis finibus cum Ragozio populationem intulerunt, ut irritati arma in Hungariam Turcæ convertant. Ut autem argentum pro milite parent, opulentissimos ex Catholicis diripiunt.

Tattenbach.

Neque Germania immunis fuit a contagio. Erasmus Comes *Tattenbachius*, amplis in Styria opibus fundisque locuples, atque in sacratori ibidem consilio locum obtinens, Ravesteinii item comitatus in Franconia potens, eo vāsaniæ devenit, ut, Cillejæ provinciæ spe ostentata, in rebellionis societatem a Zrinio se trahi sit passus, sacramento etiam fidem obligans.

Progressus
conjuratio-
nis.

Fastione sic roborata, missa rursus legatio ad Turcas, promissum tributum annuum. Consultatum in Divano. Petita a Vezirio Rakotianæ arces: promittunt. Sed cum illæ Germano defenderentur præsidio, sicque promissis stare non possent, Vezirius rem totam Casanovæ, Cæsareo legato aperuit, qui illico Viennam nuntiavit.

Nec tamen omissa a Cæsare leniora remedia, oblata ad obsequium reducturis præteritorum venia. At incassum omnia. Conjuratio-

jurationis capitibus & Ministrellis faces subdentibus, in omne nefas laxata audacia. Jamque 8000 equitum, & 4000 peditum, e Valachia, Moldavia, Transylvania, & Ragozii fundis collecta conveniant, pluresque in dies prædandi licentia aggregabat, cum Proceres propria autoritate Cassoviæ comitia agunt, de belli ratione consulturi. Missus Rothaldus ad disjiciendum hoc comitium: fas non esse absque Regis consensu comitia cogere. Quid eæ copiarum sibi vellent? Responsum ferociter, patriæ causa se convenisse: nec pro pecudibus haberi se passuros. Copias ad limitum custodiam ductum iri. (1668.)

Cum rebellio jam undique in apertum prorumperet, Divini factum providentia Numinis, Austriacam Familiam in Leopoldo Cæsare (præter bimum infirmumque in Hispania infantem) unico superstitite conservantis, ut periculosissima conjuratio in tempore detegeretur.

Primus Tattenbachius, qui ultimus accesserat, in casses Detecta. incidit. Habebat domi hominem rei conscium. Hunc furti insinulatum carceri dedit. Is aut vindictæ aut pœnæ vitandæ causa, seriem conjurationis aperit, productis binis commentariis, Tattenbachii manu scriptis. Willius, Urbanus Græcii Judex, re Vienne delata, & accepto inde mandato, consilium ingressuro, ut gladium ponat, & custodiam subeat, Cæsaris nomine mandat. Captivus in arcem ductus: excussa domus, arma pro 6000 hominum inventa. Rogatus, cui fini sint destinata, sine ambagibus cum gemitu execranda consilia fatetur.

Non minus liquida in Zrinium indicia in scriniis Tattenbachii exstabant. Præterquam, quod palam in armis esset: frequens ejus palatium Turcis. Frangipanium quoque propriæ litteræ prodiderunt, ad Csolnitium centurionem scriptæ, quas iste, sceleris immanitate cohorrescens, protulit. Inter alia hæc verba erant inserta: *multis Zrinius me evocat, statuendo tempori, quo auspiciemur expeditionem. Ego sane milite accinctus, jam nunc pileum Cydari Turcica mutare exspecto impatiens. Volitabunt Germanorum capita, pœnasque diuturnæ tyrannidis dabunt. Hodie jaciendæ aleæ dies constituetur. Si vacaverit, Bosniæ Bissam coram invisam, digesturus, quæ adhuc ambigua.* (1669)

Cæsar iterum iterumque, litteris toto regno sparxis, veniam Cæsar venit am offert. offert omnibus, qui uti velint. At superbe responsum, ab armis neminem discessurum, nisi Germani tota Hungaria æternum arceantur: Calvinistis cederentur templa: Hussaris solvantur stipendia.

Sed bellum
reponunt.

Desperata igitur saniore mente Spankavius cum sex Germanorum millibus veteranæ militiæ adversus octo Zriniana millia in Croatiam progreditur. Sed non opus erat multo certamine. Zriniasi viribus diffisi, ad Herbersteinium, Carlostadii Gubernatorem plerique transeunt. Turcarum nemo comparuit, neque Croatarum, qui semper Austriacis Regibus fidi manserant. Rakotianis satis negotii Sporckius cum altera exercitus parte faciebat.

Vincuntur.

Profligatus igitur, pene antequam in acie consisteret, Zrinius, arci invalidæ se inclussit cum Frangipane: sed Spankavio arcem acriter verberante, desperata defensione noctu per aversam portam in fugam erumpunt, atque rerum omnium nudi per sylvas errantes, quo se verterent, ignorabant. Viennam tandem recta petere, & rogata suppliciter venia se totos gratiæ clementissimi Cæsaris permittere decernunt. Sed male providi ad Kerium comitem ex via declinant, qui eos captos inter armatos Viennam deducit, superum hominumque fidem nequidquam inclamantes.

Ragozio da-
tur venia.

Eadem velocitate in superiore Hungaria debellatum est a Sporckio, veteri ac multarum palmarum Duce contra Ragozium, qui, matre bene merita apud Cæsarem intercedente, in gratiam fuit receptus, traditis tamen omnibus suis arcibus, Mongatfino quoque ipso, Cæsari, veniam vitamque solam precatus. Capitibus rebellionis fractis sequebatur vulgus. Recepta passim in urbes & munimenta Germanorum præsidia: iis, quos male conscius animus in desperationem egerat, primo in Transylvaniam ad Abasium, non obscurum rebellium Patronum, dein vero, prohibente Turca, ne rebellibus asylum præberet, in Moldaviam & Poloniam exulatum euntibus.

Muranum supererāt, arx Vesseleniæ gentis, situ inexpugnabilis, totius conjurationis officina, in qua & consilia cudebantur, & litteraria monumenta asservabantur. Datum ejus expugnandæ negotium Carolo Lotharingo, rudimento hoc grandibus heroum facinoribus prælusuro. Inerat Vesselenia, Palatini vidua, omnium mariti scelerum complex. Territa illa arcem, se omni bellica multo instructissimam Lotharingo tradit, seque Cæsaris clementiæ permittit. Reliquos rebellium nidos Heisterus excussit.

58.
4. Comites
capti.

Inventæ in arce Murana litteræ, totius conspirationis indices, quibus maxime convictus *Nadastrus*: exarata ejus manu epistolæ ad Ragozium, quibus Hungariæ coronam pollicebatur: ad Vezirium item, quibus auxilia urgebat. Cum Pottendorffii securus sui dormiret, ab Ursembeccio subito cum militibus irrumpente captus,

captus, Viennam in custodiam abductus est: Zrinius vero & Frangipanes Neostadium, proditi iisdem litteris alii quoque rebellionis complices, Töckelius, Petrocius, &c.

Indicta componendæ Hungariæ alia rursus comitia: sed agi Comitibus turpacate nil poterat. Audiebantur effusæ Protestantium voces: Re-bida, ligionis & regionis libertatem everti: iudicium captorum comitum ad Ordines regni pertinere, bona eorundem arbitrio distribuenda. Quietam non fore Hungariam, dum Germanica præsidia superessent. In id videlicet Acatolici collaborabant, ut, subtracto fræno, pro libidine grassari, omniaque miscere queant. (1670)

Causam interea suam agebant capti comites. Sed difficilis erat defensio criminum, quæ propriis eorum litteris, confessione sociorum, & moto aperte bello erant manifesta. Annus tamen pene integer concessus. Consultæ Academiæ, Ingolstadiensis, Turingensis, Lipsiensis, Spirensis tribunal. Concessi reis Jureconsulti, quos vellent, causæ suæ patronos, non quod res esset dubia, sed ut obstruantur obtrectantium voces, opes captivorum præcipuum eorum crimen esse.

Zrinius, conjurationes ignorari ratus, prolixum commentarium Cæsari obtulit. Hungaros indigna multa perpeßos. Occupata regni præsidia Germano milite. Tributis exhaustam plebem, conculcatam nobilitatem. Negatos ad regem accessus. A ministris Viennensibus, odio nationis flagrantibus, alto supercilio contemptos rejectosque. Sumpta tandem, consumpta patientia, arma, non adversus Majestatem Regiam, sed regni legumque necessariam defensionem. Præterquam quod lege publica, jam inde ab Andrea illo Hierosolymitano lata, Hungaris concessum sit, etiam adversus ipsum Regem arma capeßere, si leges aut privilegia nationis violatum eat. Turcas a se accitos pluraque alia negavit.

At ubi Frangipanis confessione, productisque ab eo litteris, aliisque instrumentis, ac testibus se convictum vidit, longe alios vultus induere, confiteri, quæ inficiatus fuerat, ad solam clementiam appellare, Ministros aulæ, quos acerbe antea perstrinxerat, in commiserationem afflictæ fortunæ vocare. Tattenbachius quoque, non unam se mortem commeritum dicere, a Deo, Cæsare, Græcensi urbe, quam prodere decrevisset, veniam precari.

Nadaßius contra negare omnia, imo jus sibi dici postulare. Verum, postquam suas ad Turcas & Ragozium litteras in manibus Judicum vidit, in gemitus effusus, non jam justitiam, sed

miseriçordiam imploravit: quæque in vitam Cæsaris & Imperium designasset, distincte fatetur. Nec desistebant captorum uxores precibus ac lachrymis Cæsareum thronum pulsare. Pontifex ipse intercessit, pro Zrinio maxime & Nadaſtio, de re Christiana in Turcas æque ac sectarios optime meritis.

Et certe vix a Clementia sua obtinere poterat mitissimus Cæsar, ut mori eos juberet, qui Imperium vitamque ipsi eripere attentaverant. Sed urgebant cunctantem Imperii Principes, legatus Hispaniæ, Ministrorum fidissimi. Præposteram hanc clementiam Austriacæ ac Christianæ rei exitialem fore, tam atrocium scelerum impunitate audaciam armatum iri: feras magnas nec claustris mitescere, nec concludendas, ut emittantur. Quem Principum securum fore, si Majestatis crimina non vindicentur. Hæsurum captivitatis sensum, in exulceratis pectoribus, perenne irarum molitionumque irritamentum.

Sententia
mortis.

Lata tandem mortis sententia, ut capite manuque dextra truncarentur. Bona fisco addicta. Atrociores multo sententiæ ab Academiis conceptæ. Nadaſtius ferale nuntium fortiter excepit: ex Nobilium albo deletus, senatu & provinciæ curia motus: contracta gentis insignia, erasi tituli: filiis, quos undecim numerabat, Dominorum de Cruce nomen inditum. Tum vero in lachrymas effusus, eripite, inquit, honores, famam, vitam: at liberis innocuis parcite. Facta supremum filios alloquendi copia uti noluit, ne sibi illisque dolorem intenderet. Nocte dein tota tractandis cum Deo animæ rebus insumpta, ad ferale pægma deductus, summa pietatis in Deum ejusque matrem atque fortitudinis laude securum excepit.

Idem supplicium eadem die Neostadii Zrinus & Frangipanes subierunt. Tristior huic nuntius mortis accidit, quod veniam adhuc speraret: ætati quid & judicii infirmitati condonandum ratus. Quas ad Cæsarium dedisset litteras, juvenilis potius levitatis quam perduellionis reas. Fortior Zrinus fatalem sententiam excepit, postaque rerum humanarum cogitatione, totum se expiandis confessione peccatis, Deoque placando dedit. Idem factum a Frangipanio. Facta pridie mortis mutuo salutandi copia, neque enim se hætenus viderant, in genua provoluti, veniam mutuo rogarunt, Zrinio se authorem tantæ calamitatis profitente. Remissa dein dextræ abscissione, tristibus ceremoniis nobilitate exuti, in urbis armamentario carnificis manu capite plexi sunt, magna animi, in Deum erecti, constantia. Corpora in principe templo condita.

Suppe-

Supererat Tattenbachius, cujus supplicium per semestre adhuc fuit dilatum, donec lis de Reinsteinenſi comitatu Brandenburgum inter & Brunſvicenſem finiretur. Mortis nuntium adeo molliter accepit, ut incondita vociferatione & informi geſtu mente motus videretur: quare humi ſe volutans laniatus potius eſt, quam obtruncatus. (1671.)

Atque hunc tandem vitæ exitum ſortiti ſunt quatuor viri, nobilitate, & opibus ampliffimis primos inter ſpectandi, turbulentis conſiliis in eam calamitatum abyſſum præcipitati. Paternas opes pleraſque Cæſaris liberalitas Zrinii & Nadaſtii liberis conceſſit. Hujus vero arx Portendorffiana Montecuculo donata. Zrinii filius in parentis prope miſeriam poſtea ſucceſſit.

ARTICULUS III.

SUMMARIUM.

Antiquata Palatini Dignitas. Prædicantium calumniæ & rebellio incentore Witniedio. Conviſti. Majestatis damnati. Cæſaris Clementia. Eorum furor. Principum Proteſtantium querelæ. Cæſarea reſponſio. In apertum bellum prorumpunt Calviniſtæ. Inſurgit Töckelius. Electus rurfus Palatinus.

59.

Refectis licet Principum capitibus, non tamen triftis hæc ſcena Necdum quiſeditionum tragœdiæ finem impoſuit, ſed, uti ex Egmontii^{es}. quondam Hornique cæde auctum Hiſpani nominis odium, firmatumque fœdus Batavicum, ita per Hungariam diſfuſa rebellio: haud paucis triftem telam pertexere laborantibus, grandi Chriſtianæ rei detrimento, quod civiles Hungariæ turbines in Turcica bella deſinere conſuerint.

Publicata a Cæſare condonatio omnium, quæ in eam diem fuerant patrata. Rediere ad obſequium multi: aliis, quibus in turbido piſcari volupe, veniam periculoſam dicentibus, quod a Palatino, Magiſtratu ordinario non eſſet ſubſcripta.

Viennæ deliberatum, qua tandem ratione Hungariæ firma Antiquatum reddi poſſet quies. Decretum, penitus antiquandum Palatini officium: quis enim eſſet, qui non abuteretur, juſtisque Regum de-^{nus}. cretis, tribunitiæ inſtar illius poteſtatis, non intercederet, ejus loco nominandum Regni Gubernatorem, cui adjungendum e viris primariis conſilium, abſque tamen poteſtate quid gravius decernendi

nendi absque Regia autoritate. Novo muneri delectus Ambrigenius Teutonici ordinis Magister. Sancita Regni sumptibus stata ac perpetua militia, quæ hyemem in præsiidiis, æstatem sub tentoriis ageret, in omnem partem, qua scintilla erumperet, occurrere. Sapiens consilium, Austriæ salutare, si constanter fuisset servatum. Quoties enim amota hæc armorum repagula, in priorem ferociam rediisse experientia docuit.

Sic, ubi Cæsar anno 1672. bello Batavico fuit implicitus, copiasque ex Hungaria abduxit, tumultuari mox rursus indigenæ, conjurare, accire Turcas, cum Abaffio & Transylvanis societatem pangere, Cæsarem ac Germanos diris omnibus devovere.

Prædicanti-
um Calvin.
rebellio.

Ad sectarios potissimum continuata hæc rebellio pertinuit: fax & instrumentum furoris Ministelli, maxime Calviniani, inquit semper & turbulenta natio: quæ non cessabat populum, præsertim Tibiscanum, erroribus suis involutum, ad seditiones & arma concitare. Id quod tum palam seditionis concionibus faciebant, tum ex geminis epistolis *Witniedii*, nobili loco nati, & Catholicorum osoris acerrimi, constat.

Duce Wit-
niedio.

Multum ejus vassritie usus est Nadaastius, quod autoritate apud sectarios valeret. Post illius necem totum Regnum oberravit: Pastoribus, jam alias currentibus, addit calcaria: consilia cum Gallis & Turcis miscet, rebellionem ubique accendit.

Scripterat, quod dixi, geminam epistolam, alteram ad Nicolaum Bethlemum in Transylvaniam, qua significat, certum esse Hungaris, communes cum Transylvanis rationes habere, Turcis tributum pendere: Franciam subsidiorum spem facere: admonendos Transylvaniæ Ministros, ut ad corripienda arma plebem excitent: Evangelicum statum rite esse dispositum, Sopronienses & Kösegienses Ministros Trans-Danubiam Hungariam in procinctu tenere: Eperiesinum, Leutsoviam, Trenschinum, Arvam, Liptoviam, Turoczium, a locorum Superintendentibus mire obsequentes haberi: Papistas canes facile ad officium redigendos.

Continuata
Ministello-
rum rebellio.

Altera, ad Kezerum Eperiesinum consulem data, scribit, cum Pastoribus rem ad amicum esse ordinatam: a Superintendentibus Ecclesias secreto armatas: fratres in Moravia, Silesia, Bohemia, Austria, cum Zolnensi Pastore consilia communicare: a Turaluckiensi tractu, Ministri opera, egregium peditatum submitti: Posonium cum liberis civitatibus optime esse comparatum animis, armisque: Pappæ, Jaurini, Vesprinii, Sopronii, opus a Pastoribus strenue urgeri. Eadem ex superiori Hungaria ab Evangelicis per-
scribi:

scribi: a Pastoribus, ut in obsequio retineant plebem, rem verbo egregie geri: animandum pro concione populum, sed circumspicte, idque Religionis & Reipublicæ specie.

Ex his interceptis a Cæsareis litteris sane videas, seditionum faces ubique a sectariorum Ministrellis fuisse prælatas, ut videlicet more Apostolico Religionem propagarent. Et consentiebant facta verborum petulantia. Vocatus in subsidium harum machinationum Turca: Budensi Bassæ 50000 aureorum promissa, ut sacerdotum Catholicos quam plurimos interciperet. Cum autem pecunia barbaro non repræsentaretur, litteras, ut erant Ministrorum nominibus ac sigillis signatæ, ad Comonæ Gubernatorem misit. Detegitur.

Cæsar, seditione tot indiciiis manifestisque documentis comperta, sectariorum Ministrellos in quæstionem vocari voluit. Illi inficiati omnia: nil de Witniedo, nil de Turcis scire. At suismet Rebellionis litteris, sociorum fassione, factique evidentia convicti, a Protestantibus etiam Judicibus variorum criminum sunt condemnati, rebellionis fovendæ auxilia a Turcis petiisse: Levam, Jaurinum, Vesprinum prodere iisdem meditados: traditis in perfidiæ pignus sacrosanctis hostiis, e Catholicorum templis furto subductis. Juramento in Catholicorum & Germanorum cædem se mutuo obstrinxisse: ad externos Cæsaris hostes velut legatos commeasse: plebem fidei sacramento solutam seditionis concionibus ad perduellionem incitasse: clandestina conventicula cum rebellibus de cædendis toto regno Germanis habita: infames libellos in Cæsarem sparsos: pluribus in locis Magistratus abrogatos: carceribus effractis captivos liberatos. Milites ac Præfectos Regios ex insidiis trucidatos: novem Catholicos sacerdotes interfectos, alios Turcis venditos. Templum plurima per vim Catholicis erepta: alia sacris vasis confectis, disceptis imaginibus fœde vastata. Atque his tot criminibus perduellionis ac læsæ Majestatis reos, mortemque commertos videri. Et horrendorum criminum.

Æquissimam hanc Judicum sententiam multum lenivit Cæsar: nempe, Ministrorum, Pastorumque nomine se abdicarent, nec scholas publicas aperirent, neque de Religione clam aut palam verba facerent: manu propria delicta fateantur, quod conspirationis in Cæsarem convicti, veniam ab eodem petierint, & intrarint, ut in Hungaria tuto vivere sibi liceat. Huic clementissimæ sententiæ 236 Ministrelli nomina sua subscripserunt: uti in Majestatis damnati. Cæsaris in reos confessionis clementia.

**Refractario-
rum furor.** Refractarii vero, alii proscripti, alii in carcerem coniecti, alii triremibus additi. Horum 29 Tergestum missi. Tempia, Catholicis erepta restitui iussa. Usurpata hæc esse, non ulcapta, cum toties a Catholicis sint in Judicio repetita, & per vim mala fide retenta. (1674.)

Posonientes sectarii templum ac Gymnasium ædificabant. Nuntiavit novum opus Episcopus: inhibita a Cæsare fabrica: illa nihilominus absolvitur. Cæsar Catholicos in possessionem mittit. Sectarii, campanæ sonitu conglomerati, arma corripunt, mandata Cæsaris discerpunt, omnia tumultibus implent. Verum a superveniente Cæsareo milite exarmatus furor. Templum ac Gymnasium Jesuitis datum, pietatis & bonarum artium futura sedes. Habito Tyrnaviæ judicio 30 Authores turbarum Majestatis rei, capitis damnati. Quam pœnam Cæsar mitigavit, injuncta multa pecuniaria. Similem armatam seditionem sectariorum Spankavii Cassoviæ compefcuit.

**Principum
Protestanti-
um querelæ.**

Tot scelerum rebellionumque sectarii luce palam cum essent rei, mirum profecto, Principes Regesque Protestantes eorum suscepisse patrociniū: quos inter Suecus Aulæ Viennensis crudelitatem, illatasque injurias acerbo scripto accusavit adversus Osnabrugensem pacem actum videri.

**Cæsarea re-
sponsio.**

Responsum Oxenstirnæ Legato, Cæsarem neque, quid in Suecia fiat, sollicitum, neque res Hungariæ ad alium pertinere, neque de illis in pace Osnabrugensi quidquam actum, cum nihil commune habeant cum Germaniæ negotiis. Propter Religionem nemini vim illatam: in perduelles legibus actum: nemini tamen propterea rationem redditurum, quam parum Rex Sueciæ, Angliæ, aut Batavorum Respublica Cæsaris referre arbitrentur, quid in ditionibus suis cum Catholicis agant.

Paradoxum.

Et sane mirum, quod Protestantes in Suecia, Anglia, aliisque suis terris Catholicos sacerdotes gravissime sint persecuti, nemine Catholicorum se contra movente: quamprimum vero Cæsar aut alius Catholicus Princeps in rebelles sectarios Regni sui agit, mox capita & consilia conferant, precibusque, etiam armatis, intercedant.

Nova Cæsaris indulgentia.

Saxonis, Brandeburgi, Luneburgicorum interventioni datum, ut abducti nuper Tergestum ad Triremes Ministelli libertati ac patriæ redderentur. Ut autem Protestantium legatis locus esset, quo sacrorum causa Vienna excurrerent, data est temporaria facul-

facultas, ut Sopronii seu Oedenburgi in ædibus privatis duo Ministri ritus suos obirent.

Edito subin de restituendis, quæ a Protestantibus ablata fuerant, templis decreto, 20000 eorum e Tibiscano tractu coorta, Eperiesinum, Sendream, Castoam, civium Acatholicorum prodicione ceperunt. Sed Coppus, collectis 14000 armatorum, cæsis 800, reliquos in fugam coniecit. Receptoque Eperiesino, iterata clade eos affligit ad Cassoviam. Animadversum in rebelles & proditores, alii adacto per medium corpus palo hamato sublatis, ferreo alii unco suspensi. Nec tamen posuit ferocia. Conglobati rursus ter mille, direptis pagis atque dirum in modum afflictis Catholicis, in Turcicam ditionem, cum multis Calvinianorum familiis se receperunt. Atque ex eo asylo perpetuis latrociniis regionem infestam habuerunt. Oppressa 4000, cæsis 800. e Töckelii cohorte. Plura alia commissa a Cæsareis secunda prælia: sed, velut Lernæa illa hydra, resectis capitibus alia succrescebant.

Cæsar, bello Gallico abstractus, imposito munitis locis præsidio, paucos in campum poterat educere. Rebelles vero, Parthorum more pugnantes, atque equorum velocitati, insidiis, subitis procurSIONibus confisi, cum vis ingrueret, in Turcicum agrum, aut Transylvaniae latibula refugi, nullo loco consistebant. Atque hac ratione bellum volatile ad decimum usque annum produrxerunt.

Anno 1676. viribus aucta crevit rebellio, & sopita alicubi flamma, erumpebat alibi. Strasoldus, qui Spankavio, forti ac felici duci, curarum mole oppresso, successerat, cladem a rebellibus accepit. Reddita illis a Bargoizio, & Coppo, Ducibus Cæsareis. Vidisses pernicious equis undique stricto acinace circumvolitare rebelles, atque cædibus, populatione, incendiis omnia complere: *Labanzios* ubique immani rabie persequentes. *Labanzii* & autem vocabantur, qui in civilibus bellis Regias partes sunt secuti, cum contra rebelles *Curuzii* dicerentur.

Anno 1677 sex millia Polonorum, a Bethunio conductæ, Bohamo comite ductore, cum Tartaris & Transylvanis, rebellibus Hungaris venerunt auxilio, ut adeo 20000 sub signis haberent. Schmidius Tribunus octo homines, fide accepta, in eorum castra ablegat, veniam & præmia Cæsaris nomine oblatores. Accepti humaniter convivio omnes obruncantur.

Schmidius, temere cum Bohamo prælio congressus, ex medico, quem habebat exercitu, plus 1500 amisit. Quibus sane

calamitatibus factum, ut promptius Cæsar Neomagensem pacem iniret.

Töckelius
insurgit.

Töckelius interea, qui nova e Transylvania supplementa recens adduxerat, totius exercitus Dux & Imperator a rebellibus proclamatur. Fuit Emericus Töckelius, de quo plura nobis deinceps memoranda veniunt, Nobilis Hungarus, animo vivaci & prompto ingenio. Parens ejus Nadaftianæ conjurationi adhæserat, eique continuandæ reliquum postea ætatis exegit. Emericus filius fuga in Poloniam se subduxit; indeque in Transylvaniam delatus, atque in Abaffi amicitiam receptus, copias ab eo ad perdendam patriam accepit.

Dux totius exercitus creatus, viginti facile millium exercitum circumducebat, atque arces complures expugnavit, tentato nequidquam Mongatfio. Eperiesinum cum Neofolio civium Catholicorum conspiratione traditum recepit: adjunctoque sibi, quem Bohamus ducebat, Polono milite, mira celeritate Hungariam percurrit: incolis lapsum velut cælo genium, & patriæ liberatorem salutantibus.

Auxit fiduciam hominis, armorumque secundos progressus, Cæsarei militis paucitas, & imperii militaris a Coppo, experto ac forti Duce, in Würmium primum, dein Lefslæum, felices minus Ductores, translatio. Cum igitur, abducto necdum a Rheno milite, tantæ multitudini se objicere non auderent Cæsarei, legatione ad Töckelium missa inducias offerunt.

Arrogans e-
jus responsio.

Respondit ille, se suosque in Cæsaris fore potestate, sed ferri non posse, ut novi Magistratus legesque, abrogatis antiquis, patriæ obtrudantur; nisi Palatinus crearetur, libertas religionis & templa restituantur Protestantibus; & certum sacerdotum genus (Jesuitæ) regno pellantur, Rempublicam constitui non posse. Simul tamen eodem tempore cum Budensi Bassa consilia contulere. Victi autem mox prælio a Würmio, inducias admiserunt. Quas tamen Lefslæus successor rescidit. (1678.)

Ambringe-
nius Guber-
nator Hung.
obit.

Anno sequenti gravis pestilentia Hungariam afflixit, quæ tacitas velut inducias imperabat, & *Ambringenium Gubernatorem*, (invisum Hungaris nomen) discedere coegit. Is, translato in Ludovicum, Ducem Neoburgicum, supremo Ordinis Teutonici Magisterio, rebus præclare gestis, haud multo post obiit, vaticinari auditus, fore, ut Cæsar, domita rebellione, totam Hungariam, alioquin suam, novo belli jure sibi assereret.

Cum

Cum Turcæ magnos belli apparatus facerent, & palam etiam Hungarorum rebellionem foverent, Cæsar Comitia Sopronium indixit, ibique ad Ordines latina lingua facundam orationem habuit; atque, ut gentem placaret, Esterhasum regni Palatinum Palatinus eligi indulxit. Duo maxime capita movebantur, alterum de Religionem a Protestantibus, alterum de educendis ex Hungaria Germanicis copiis, ab omnibus. rursus electus.

Ministros suos indigne habitos proscriptosque querebantur sectarii. Respondebant Catholici: Judicium, quorum dimidia pars ex Protestantibus delecta, æquissima sententia fuisse condemnatos, Furor Prædicantium. non propter Religionem, sed flagitia. Conjuratorem nullam fuisse, nullas domi forisque turbas, quarum non auctores aut participes fuissent. Nullum crudelitatis, sacrilegii, perfidiæ genus nimium ipsis videri, modo Catholica sacra eversum eant.

Tandem Cæsar liberum A. C. exercitum permisit, atque ut Posonii, singulisque comitatibus fanum pro eo ædificetur. Reliqua vero templa ea conditione, qua anno 1670 fuissent, relinqui voluit.

Reprehendebant Catholici hanc inexpectatam Cæsaris indulgentiam, velut ea in re a Majorum suorum, Religione nihil antiquius habentium, instituto recessisset Leopoldus. Querebantur, hoc pacto plus 70 fana, publico ære construenda, sectariis concedi: ægreque adduci poterant, ut subscriberent.

Reducta per Cæsaris clementiam, varia indulgentis, ad concordiam videbatur Hungaria, cum Töckelius, ad Regnum aspirans, omnia rursus turbavit. Misit ad eum Cæsar Legatum, ut amplis promissis pertinaciam frangeret. Simulat obsequium. Sed imbibita penitus Turcia, cum Budensi Bassa in Cæsaris perniciem conspirat: ductaque juniore Ragozia, Montgatsum, sedem suam veluti regiam, ingreditur, eamque multo belli apparatu implet. Auget exercitum, Hungaris ad eum, præsertim Calvinistis, magno numero confluentibus.

(1681.)



ARTICULUS IV.

S U M M A R I U M.

Töckelii grassatio. Velut Rex comitia celebrat. Hungariam Turcis prodit. Bellum Turcicum. Viennam obsidet Turca. Vincitur. Vezirius strangulatus. Turcæ sæpius cæsi. Amnestia in Hungaria. Buda frustra obsidetur. Töckelius a Turcis in carcerem. Seraskierus relegatus. Buda tandem expugnata. Victoria ad Mohazium. Expeditio in Transylvaniam, & Sclavoniam. Hungaria Regnum hæreditarium: quod præstat Electivo.

60.

Ejus progressus.

Coharii virtus.

Töckelius velut Rex Comitum celebrat. Turcis Hungarum tradit.

Anno 1682. dum Caprara, legatus Cæsaris, Constantinopolim missus, de induciis, in vicennium producendis, tractat, Töckelius cum Turcis, Transylvanis, Valachis, Moldavis, & rebellibus Hungaris, Zattmarinum, Cassoviam, Onodium, Tokainum, Scepulium, Leutsoviam, Zendream, aliasque urbes & arces occupat, ut adeo Cæsari in Hungaria parum admodum maneret reliquum, Germanis induciarum spe suspensis, & Reunionum causa, captaque Argentina attonitis. Enituit tamen *Coharii* virtus excellens & fides infracta. Is quippe, defenso fortiter Fillekino, Bassæ traditus, & ab hoc Töckelio donatus, nullis promissis, minis, ærumnis, carcerumque squaloribus ad defectionem permoveri poterat. Quin Töckelium proditorem patriæ, & Mahometanorum mancipium in os compellavit. Duobus post annis, capto a Cæsareis Pattakino, e profunda turri effossus, ad novam veluti vitam est renatus.

Töckelius interea, velut Hungariæ Rex Cassoviæ Comitatus habuit, Transylvano & Turcico legato ad utrumque latus assidentibus. Orationem ad Proceres rebelles habuit, de Religionum, legum, privilegiorum, libertatis excidio, de Germanorum crudelitate, Turcici Imperii suavitate. Applauditur; Sultano se regnumque dedunt: & adduntur deditionis pacta. Töckelius, e Bethlemiorum stirpe oriundus, sit Princeps Hungariæ, Sultani tamen tributarius: ejus legati more Regio habendi: mortuo sine hæredibus Töckelio, integrum sit Hungaris, alium Principem sibi deligere, talem tamen, qui Turcis non displiceat. De cætero ex captis Hungariæ locis Turca nihil retineat: & Hungaros suis legibus & moribus vivere permittat. Pax San-Gothardiana suo loco relinquatur.

Cum.

Cum igitur bellum evitari non posset, & Turcæ immanem copiarum multitudinem ex toto Imperio Ottomannico cogerent, Cæsar ad Cæsar quoque, conquistis undique fœderibus atque auxiliis, ad bellum se paratum se comparavit. Elector Baviaræ cum 12000, & cum totiorum Saxo se affuturum promisit. Suevicus, Franconicus & Rhœnani circuli magnos delectus habuerunt. Pontifex, Hispanus, Italiæ Reguli haud parum contulere. Summi insuper momenti erat novum fœdus, cum Joanne Sobieskio Rege Poloniæ iſtum, vi cuius Cæsar 80000, Rex 40000. educeret.

Mahometes IV. Sultanus pacis equidem quam belli erat amantior, quia tamen, a Janitſaris maxime (ſelecto peditatu Prætoriano) & Effendiis (ſic Jureconſultos & litteratos appellant) inſimulabatur, quod voluptates inter obtorpeſceret, & *Lara Muſſapha*, qui in Vezirii dignitate Chiuperlio ſucceſſerat, bellum vehementer ſuadebat, in Divano illud, licet finitæ necdum eſſent induciæ, fuit decretum, Muſſio licet, ob violatas juratas inducias, Divinas iras intentante.

Equi proin cauda ad palatii fores pro more appenſa, ultra 230000 Belgradum, indeque per Hungariam Viennam uſque mo-Viennam ob-verunt, non aliud tanta populorum mole dignum præmium rati ſident.

14 Julii 1683 univerſus hoſtium exercitus Viennæ ſe circumſudit. Ad 12 uſque Septembris tenuit obſidio, cruenta ſane ac vehemens. Sed *Rudigerus Starembergius* cum valido præſidio ſtrenue ac fortiter urbem defendit: Cæſare cum familia jam ante digreſſo.

Jamque haud procul ab expugnatione urbs aberat, cum opportune Rex Poloniæ, adductis 15000 armatorum cum Lotharin-Vincuntur. go & Electoribus, Bavaro & Saxone, ſe conjunxit, atque Turcas aggreſſus, celeberrimam victoriam reportavit. (1683.)

Turcarum tum in obſidione Viennæ, tum in pugna 70000 occubuiſſe feruntur. Caſtra, omni opulentiâ plena, direpta. Quod Turcarum reliquum erat, pleno impetu in Hungariam fuga elapſum eſt. Victores inſequi veriti, in iſſis hoſtium caſtris noctem ovantes exegerunt.

Capta 30000 Papilionum: Vezirii tentorium Regi Poloniæ Præda: obtigit, cum grandi Mahometis vexillo, & aureorum nummorum duobus millionibus. Præterea victoribus ceſſerunt 3000 tormenta bellica, Camelorum 5000, boum 10000, equi innumeri, ſupelleſtilis & annonæ vis ingens.

Sultanus Belgradi triſtem cladis nuntium accepit: majori iterum ad terrore percuſus, cum intelligeret, ſuos iterum 9 Octobr. ad Bar Barcanum caſi.

canum ingenti cæde prostratos, multosque Danubio haustos: ut adeo ex 14000 Spahiis, & 12000 peditibus, non nisi 3000 evaserint. Et hac ratione affatim vindicata est clades, quam pridie Poloni ad idem Barcanum acceperant.

Præmium victoriæ fuit *Strigonium*, ab exercitu Cæsareo-Polonico expugnatum. Tum vero in hybernâ concessum, quæ, variis locis interceptis, ampliora sibi fecerunt Dünewaldus & Heisterus. Rex Poloniæ vero, postquam irrito conatu perduelles Hungaros conciliare cum Cæsare satagebat, in Poloniam gloriosus cum suis rediit, relicto in Germania perenni fortitudinis & beneficii monumento.

Vezirius
strangulatus.

Kara Mustapha Vezirius autem, qui plurimos crudeliter occiderat, & totum Occidentem sub jugum mittendum credebat, Belgradi zonam e serico, a Sultano sibi missam, collo inseruit, & fervorum opera se suffocavit. (1683.)

Anno sequenti Veneti ad fœdus accesserunt, ea lege, ne bello ante abisteretur, quam Cæsar Hungariam, Poloni Caminiecum, Veneti Moream receperissent: nec pax fiat, nisi communi consilio.

Amnestia
Hung.

Nec parum res nostras adjuvabat perduellium Hungarorum ad obsequium reductio; quippe Cæsar, indictis Posonium comitiis, universalem amnestiam, fundos, honores addixit omnibus, qui veniam peterent. Amplexi sunt gratiam plerique, licet Töckelius, Turcarum & Tartarorum turbam secum trahens, vehementer obliteret.

Turcæ bis
cæsi.

Turcæ, magnopere licet fracti, impigre tamen bellum reparabant. 50000 in Poloniam, 20000 in Peloponesum, 70000 in Hungariam destinantes. Sed a Cæsareis gemino prælio, altero ad Strigonium, ad Vaciâ altero cæduntur.

Ad Budam
impegit. for-
tuna.

Tum vero, ut tot tantisque victoriis dignum præmium referrent, Budam oppugnare decreverunt. Verum, prout expeditio prioris anni tristissimum initium, jucundissimum autem finem habuit, ita posterioris principia secundissima in calamitatem magnam, pro variante belli fortuna, desiere. Ad Viennam conquassata Otomannica ferocia: ad Budam Christiani exercitus gloria impegit, dum eandem incassum oppugnavit, amissis viginti ferme hominum millibus.

Felicius bellum in Slavonia administravit Leslaus contra Bassam Bosnia, & Schulzius in superiori Hungaria adversus Töckelium & perduelles. (1684.)

Anno

Anno 1685 prospera magis fortuna usus est Christianus miles. Nam reportata insigni ad Strigonium victoria, capta sunt 11000 Papilionum, majores machinæ 25, signa militaria 50, omnisque generis ingens præda. Cæsa Turcarum 12000, partim in obsidione Strigoniensi, quam tentaverant, partim in prælio.

Fructus victoriæ fuerunt, liberatum Strigonium, expugnatum *Vivarinum*, in quo præter alium bellicum apparatus ingentem inventæ sunt 98 machinæ. Maximilianus II validissimum hoc munimentum anno 1573 intra ambientes paludes construxerat, adversus Turcarum incursiones, quibus superiori bello cum Varadino relinqui debuit.

Seraskierus (sic appellatur Turcici exercitus Imperator, qui in absentia Vezirii copias ducit) ad Budam sparsi exercitus reliquias collegit: multis, qui primi in fugam se dederant, pro more trucidatis: & sibi rebusque suis diffusus pacem petiit, Töckelium captum tradere pollicitus. At Cæsarei illam in medio victoriarum cursu denegandam existimabant.

Turcæ vero Töckelium, ceu belli infelicis facem, in vineula conjectum, Adrianopolim abduxerunt. Qua re commoti plures ex rebellibus Hungaris, ad obsequium reduces, *Cassoviam* Capraræ dederunt: expugnato jam antea per Schulzium *Eperiesino*: pluribus aliis munitis locis cum Onodino & Zolnokino aut vi aut deditione occupatis: adacto pariter *Abassio*, Transylvaniæ Principe, qui cum Turcis hætenus colluserat, ad tributum servitutem.

Nec hyberna quæta erant. Nam Heislerus, Varadinensi & Temesvariensi Bassis, qui Christianos imparatos opprimere tentaverant, certamine victis, *Aradinum*, grandi præda locuples, intercepit.

Nec minus felices erant Herbersteinus, qui cum Croatis, fida Cæsari gente, complura oppida cepit, & Leslæus, qui Essekinio ponte exusto, Turcisque certamine victis, magna præda Essekini potitus est. Seraskierus vero ob rem male ad Strigonium gestam, capitis primum damnatus est; tum autem, quia biennio ante Budam strenue defenderat, vita donata, ad insulam deportatus.

Anno 1686 Lotharingus Oeniponto, quo, tradito Capraræ imperio, excurrerat, redux, de futura expeditione cum Cæsare contulit. Visum, expugnationem Budæ, ante biennium frustra tentatam, esse suscipiendam. Conquisita igitur a Germaniæ Principibus auxilia. Venerunt cum lectissimo milite Elector Ba-

variæ, Brandenburgici sub Schöningio, Luneburgici, Hassi, Svevi, Francones. Lustrato exercitu censa sunt Cæsareorum & sociorum octoginta ferme milia, non numeratis Hungarorum & Croatarum viginti millibus. Scherffenbergio, Piccolomineo, & Veterano decreta 12000 ad redigendam in ordinem Transylvaniam: Caraffæ & Heislero 10000 ad præsidium superioris Hungariæ: Schulzio 7000 ad rem agendam in Slavonia. Reliquus exercitus sub Lotharingo & Baviaræ Electore ad *Budam* ductus.

Buda expu-
gnata.

Dictu incredibile, quantæ molis fuerit scopuli istius expugnatio: quanta fortitudine a 12000 Turcarum defensio, atque a Cæsareis expugnatus: quanto utrinque sanguine steterit: quot cuculis, tormentis, eruptionibus actum: quoties assaultum, quoties vis repressa.

Accurrebat cum 60000 exercitu Vezirius, ut urbem obsidione liberet. Ter castra Cæsarea invasit, ter grandi cum suorum strage rejectus est. Tandemque post bimestrem acerrimam oppugnationem cruento assultu capta est, prædialiis prope omnibus cum Gubernatore concisis.

Cum Segedino.

Appendix Budæ *Segedinum* fuit, a Valissio deditione acceptum, postquam Veteranus gemino certamine Turcas fregit; & Quinque Ecclesiæ, cum Siclosio, & Caposvarino, a Ludovico Badensi occupatæ.

Victoria ad
Mohazium.

Fœcundior adhuc erat anni 1687 expeditio. Quippe, castigata per Caraffam Hungarorum nova conjuratione, quam Töckelius, a Turcis in hunc finem liber dimissus, denuo excitaverat, & proditione Finkiana Budensis civitatis per Christianum adolescentem, apud Turcas servientem, feliciter detecta, Lotharingus cum Maximiliano Baviaræ Electore præclaram de Turcis ad *Mohazium* victoriam retulit, geminis eorum castris expugnatis.

Vezirius, qui nuper minabatur, se Christianos canum instar abacturum, horum moribus ita est laceratus, ut tum in pugna, tum fuga, tum rupto Dravi ponte, viginti suorum millia amissa doleret. A liberata Vienna nulla hac victoria clarior. Præda ingens relicta, tormenta variæ formæ 80, alia spolia ultra quinque milliones æstimata. Vezirii papilio, cum tabulario, & ærario castrensi, Electori, qui pars magna fuit victoriæ, obtigit. Id unum ad gloriæ fastigium defuit, quod Turcæ nunquam aut ignavius aut imperitius pugnarent, dum Janitfari & Spahii ne primum quidem nostrorum ferrent impetum.

Ut

Ut Lotharingus amplum victoriæ, Turcis timore & viribus fractis, fructum legeret, Sclavoniæ provincia Dünewaldo decreta, arduam expeditionem in Transylvaniam, Turcis hæcenus ^{Expositio in} vectigalem, magisque, quam Christianos decet, animo manibus- ^{Transylva-} que in hærentem, suscepit: ubi ad Tibiscum perventum, Prote- ^{niam,} stantes progredi ultra recusabant, piaculum rati, si in fratres suos irent. Relicti igitur in Hungaria, Veteranii agmine Cæsareo exercitui adlecto.

Cum copiæ Transylvaniam fuerant ingressæ, veniunt obviam Abassii & Ordinum legati, aurum quidem polliciti, sed urbium præsidia, & stativa suo in agro deprecantes. At ubi vim admoveri senserunt, conditionibus, quas supra recensuimus, se dederunt, admissio præsidario milite cum stativis, ingenti certe Hungariæ levamento; pars tamen exercitus Tockainum, Zattariam, & Debresinum, tunc temporis pagum, decem domorum millibus frequentem, in hyberna concessit. Lotharingus vero tot tantisque rebus gestis Oenipontum rediit.

Non minori felicitate in altero Danubii littore fines protulit ^{Et Sclavo-} *Dünewaldus*. Siquidem post Mohaziensem cladem tantus barba- ^{niam felix.} ros terror invaserat, ut *Essekium*, urbem ad Danubii & Dravi confluentes, munitam, Sclavoniæ principem, Belgradi & Sirmii clavam, 161 annis possessam, Turcæ defererent, absque ulla vi admota, imo ne quidem ullo præsentis hoste. Reperta in ea 50 tormenta ænea, annona pro 10000 sufficiens.

Secutæ mox sunt *Petrovaradinum*, *Carlovicium*, *Illokia*, ac denique etiam *Possëga*, cum tota Sclavonia (excepta Gradisca) unius mensis intervallo: ut adeo unius victoriæ fructus fuerint duæ amplæ provinciæ, longissimo inter se tractu distantes, Cæsari asfertæ, una cum *Agria*, longæ obsidionis fame debellata. 4000 ^{Hungaria} Turcarum Temesiam migrarunt. 600 Christiana Religione initiati. ^{hæreditaria.} Nihilque ex Hungaria reliquum mansit barbaris, præter Varadinum & Temesvarinum.

Magna hæc erant Domus Austriacæ incrementa, sed stabiliorem multoque amplissimum ex tot victoriis fructum inde est consecuta, quod Hungariæ Regnum, per electionem ad Austriacos ^{Wagnerus.} hæcenus delatum, in hæreditarium stabili lege transferit, Josepho Archiduce, Leopoldi Cæsaris filio per solennem inaugurationem hæreditatem amplissimam adeunte: atque hoc pacto Regnum ad primævam suam naturam rediit.

Hæreditari-
um regnum
præstat ele-
ctivo.

Quippe regnum istud a prima sua institutione per hæreditariam successionem ad proximos semper decedentis consanguineos fuit devolutum, donec Mathias Corvinus novo exemplo fuit electus, Ordinibus liberæ electionis jus deinceps sibi arrogantibus.

At vero anno 1687, cum Leopoldus Cæsar Hungariam victoricibus armis e barbarorum manibus eripuisset, Posonientibus in Comitibus Strattenmannus, Cæsaris Cancellarius, facundam ea de re ad Ordines orationem habuit, nascique Regem, quam eligi ad salutem Reipublicæ præstare persuasit.

Tum enim felicia esse regna, cum supremi eorum moderatores Rempublicam non vaga duntaxat & fluctuante possessione velut rem alienam, sibi commodatam & creditam ad tempus, sed certo & stabili patrimonio, tanquam rem suam ad posteros transmittendam intuentur; inde etenim consequi, quod studio intentione stabilem ejusdem felicitatem consequantur, subditos tanquam filios sincerius teneriusque ament, eorumque commoda, ceu propria, porrecta in omnem partem paterna sollicitudine, contra adversos incursus tueantur protegantque.

Constantius etiam, procul habitis factionibus, ambitu, privatisque affectibus, quæ regna illa ambulancia non raro versant, regnatricem diligi a civibus familiam; atque hoc pacto mutuo nexu colligatos Imperantem & populum certare officiis, illum beneficiis & mandati suavitate, istum obsequio: amore & publici boni studio utrique.

Hoc & rei natura & experientia adeo persuasum gentibus, ut florentia magis per orbem terrarum regna nativos Reges, quorum Majestatem vel in cunis jam adorarunt, adscititiis, & post noxia sæpe atque turbulenta interregna per emptam, aut extortam suffragia evectis, præferendos putarint.

Idem inclitæ Hungarorum nationi jam inde a condito per Divum Stephanum regno sanctum fuisse: injuria dein temporum interruptum, barbaris gentibus aperuisse januam, & decumanis patriam calamitatibus opplesse.

Jam vero si bene de Hungaria, sibi restituta, meritam, si potentem, si suavi imperio gubernantem familiam cupiant, quam aliam mallent hæreditariam præ Austriaca, præque Leopoldo, ejusque filio natu maximo Josepho? Nullam prope munitam esse urbem, quam ille de barbarorum manibus non vindicavit; ut adeo, licet ex Annæ Reginae sanguine non esset prognatus, jure belli sum possit regnum dicere. Nolle autem hoc uti nomine, sed hæ-

redi-

reditarii regni declarationem liberis Ordinum voluntatibus deferre.

His dictis datum deliberationi spatium. Pauculi quidam ex Statuum hac Protestantibus, quibus Austriaca pietas sudes in oculis, repugnare de re Decretum.

Conditumque decretum hujus sententiæ. *In perpetuam porro recolendorum beneficiorum tantorum memoriam Regni Status declarant, quod in posterum neminem alium, quam S. Majestatis propriis ex lumbis descendantium masculorum hæredum primogenitum in perpetuum, id ipsum etiam statuentibus articulo V. anni 1547. aliisque superinde extantibus, pro legitimo suo Rege & Domino sint habituri.* Idque in casum deficientis prolis masculæ ad Hispani etiam Regis natu maximum extenderunt.

Wagn.

Postmodum anno 1723. cum extincta jam Hispanica progenie, Carolus VI. timeretur absque prole mascula decessurus, in publicis Regni comitiis statutum, ut Hungariæ regnum Domui Austriacæ absolute esset hæreditarium, post emortuos masculos ad fœminæ sexus Archiduces devolvendum. Etiam ad fœminas devolvendum.

Abrogatum quoque in comitiis anni 1687. (in quibus hæreditariam regni successionem stabilitam diximus) Andreæ II. Regis decretum, quo concessa fuerat Hungaris facultas, resistendi & contradicendi Regi, si leges violaret. Facile enim advertebant Ordines, quam periculosum telum turbulentis hominibus daretur in manus, regnumque cum Majestatis contemptu, pro libidine miscendi occasio, violatarum legum obtentu, si multitudini censoria & judiciaria in Regem ipsum detur potestas, nemo tamen unquam perduellionis postulari, aut puniri queat.

His rebus ita compositis, Josephus Archidux anno ætatis nono solitis ritibus hæreditarius Hungariæ Rex est inauguratus.



ARTICULUS V.

SUMMARIUM.

Constantinopolitanæ turbæ. Sultanus depositus. Captum Mongazinum, Belgradum, Sigethum. Bellum Gallicum. Badensis belli in Hungaria Imperator. Salankemensem victoriam & tres alias reportat. Dünewaldi fatum. Pax Turcis improvide negata. Res retrolapsæ. Belgradum ad Turcas. Languentium expeditio. Turcæ pacem respuunt. Badensi succedit Croyus, huic Caprara, huic Augustus Elector Saxonie, huic Eugenius. Veteranius in Transylvania cæsus. Eugenii victoria ad Zentham. Pacificatio. Fructus belli.

61.
Turbæ Constantinæ.

Triumphis Vienna exultante, cædibus ac seditionibus mistum est Byzantium. Strangulantur Vezirius & urbis Præfectus. Mahometes IV. Sultanus, postquam 46 annos Imperio præfuerat, a furente milite depositus in carcerem mittitur; Solymanus ejus frater e carcere ad solium evehitur. Sed necdum posuit seditio. Janitfari Spahique velut lymphati arma, rapinas, cædes per captam veluti urbem circumferunt. Immanem pecuniæ summam exigunt, quam ærarium, bellis exhaustum, sufficere non poterat. Novus Vezirius cum aliis Proceribus frustatim dissectatur. Hanc pœnam dedit proditor Sultani, qui seditionis auctor fuerat. Placari non poterat rabies, nisi producto Mahometis, quod Divinitus ipsi datum existimant, vexillo, atque ad palatii fores a Mustio suspenso. Duo tamen adhuc interempti Vezirii, quibus Mustapha successit. (anno 1688.)

Mongazinum captum.

Quamvis autem turbæ istæ Byzantinæ opportunam rem bene gerendi occasionem suppeditarent, languidius tamen a Polonis & Moscis bellum administrabatur: Veneti autem in obsidione Corynthis militem & pecuniam frustra consumpserunt. At vero Cæsarei occasione utendum rati, rigente hyeme arcem *Mongatzinam* receperunt. Francisco, Ragozii filio, Cæsar factus tutor. Töckelii bona in fiscum redacta. Capta subin a Caprara *Alba Regali*, & a Caraffa *Lipa*, consultatum est, an Temesia, an vero Belgradum expeditionis fructus statueretur; posterius placuit, ut via in Turciam, Epirum & Macedoniam aperiretur. Certe in tanta Imperii Ottomannici perturbatione ex Europa submoveri potuisset Turcas

Turcas est creditum, nisi lentus copiarum adventus, annonæ & vecturarum defectus ultiores progressus inhibuissent.

Lotharingus febris detinebatur. Igitur Maximilianus Emanuel Bavarie Elector supremus belli Imperator, trajecto summa arte & fortitudine Savo, *Belgradum* oppugnat, tantaque virtute & constantia operi instat, ut breve intra tempus celeberrimum hoc monumentum ac Turcie clavem magnanima irruptione cepit.

Accessit deditio *Sigetbi*, aliorumque locorum munitorum, Cum Sigetho, quæ fame potissimum expugnabantur. Ulteriusque progressura fuisset victoria, nisi & annonæ curruumque inopia, & ortus ad Rhenum bellicus turbo spes nostras evertissent.

Orto quippe bello Gallico, Lotharingum cum magna copia-rum parte ex Hungaria Serviaque recedere oportuit, *Ludovico Baden-*co exorto, *denfi* ad bellum Turcicum relicto. Is, licet in toto exercitu non Lud. Baden- plures quam viginti quinque millia haberet, hostem nihilominus, sis Dux supremus. quamvis numero multum prævalentem, trino prælio fudit, ad *Moravam* primum equestri certamine, dein ad *Patoſſinum*; ad *Niſſam* denique, cum 40000 hosti essent, nostris vero tantum Tres ejus 16000, celeberrimam reportavit victoriam, *Niſſa* mox in præmi victoriæ. um cedente, strangulatus Vezirius, quod prælio abesset. Suffe- Nissa, Orfo- ctus Cuproglus. Nissæ deditioem secuta est *Orſova* & *Vidini*-va, Vidi- expugnatio, multa cum Turcarum cæde. Perfracta Bosniæ clau- num captæ. fra, Rasciani & Epirotæ, ob copiarum paucitatem, in legiones lecti; *Canisa* tandem debellata. (anno 1689.)

Turcæ, tot cladibus afflictæ, altera jam vice, quod ab ortu Turcæ ite-Ottomannici Imperii inauditum, pacem flagitant, & quidem ex rum pacem formula *uti possidetis*: id solum rogantes, ut *Belgradum* *Temesia* petunt. permutetur. Sed prout anno 1630. continuata Ferdinandi II. felicitas pacis consilia interruptit, ita hoc quoque tempore relatæ a modico exercitu victoriæ spes ampliores suggerebant.

Sed fuit, quod pœniteret. Nam imprimis *Strasseri* teme-Male nega- ritate magna clades accepta, erectique Turcarum animi. Töcke-tam. lius dein, cum viginti Turcarum & Tartarorum millibus in Tran- sylvaniam irrumpens, Heislerum profligavit. Ejectus quidem inde a Badensi, sed interim, armis in Transylvaniam & superio- Nam res re- rem Hungariam, ære vero in bellum Gallicum & comitia Augu- tro lapsæ. stana averſis, Vidinum, Orſova, Niſſa, imo & *Belgradum* ad Tur- cas redierunt. Quippe, cum nostræ copiæ morbis & secundis etiam præliis adeo essent accisæ, ut princeps exercitus vix decem millia

Ingens Tur-
carum exer-
citus.

millia expleret, Mustapha Cuproglus, novus Vezirius, vir sagax & industrius, negata a Cæsareis pace, ingentem ex Asia, Ægypto, & Turcia Europea exercitum collegit, eumque, contra morem Turcarum, in tres partes divisit, quarum primam ipse in Serviam ducebat: alteram Töckelius in Transylvaniam, & superiorem Hungariam, tertiam Seraskierius cum instructissima classe ducebat, ut hac ratione Christianus exercitus, quem ad manipulum quodammodo redactum noverant, in totidem partes divisus resistendo impar esset.

Belgradum
perit.

Ita enimvero evenit. Hinc tantæ acceptæ clades. Quamvis casus Belgradi maxima ex parte casui aut proditioni debebatur. Nam quo die Croyus Aspremontio Gubernator urbis successerat, pluribus locis in pulveraria conditoria ignis illapsus totam vix non urbem evertit, ædiumque ac murorum ruinis tot milites oppressit, ut ex quinque præsidiariorum millibus vix quingenti superessent, qui, qua cuique patebat via, diffugerunt: tantusque metus fuerat diffusus, ut etiam Viennæ trepidaretur. Leopoldo Cæsari non tam urbis, licet summi esset momenti, iactura doluit, quam *Veterani*, Turcarum hætenus toties victoris, & Hungariæ liberatoris militis. Aspremontius in suspicionem tractus, quod dolore amissi imperii ignes injecerit. Absolutus tamen Viennæ ab ea ignominia.

Wagn.

Hunc exitum habuit annus 1690. quam disparem a superiorum annorum fortuna! *Sed quid aliud expectandum ab exercitu tenui, suisque sine nervis flaccido*, interrogat Wagnerus, *ævario per voracissimas Augustæ sollemnitates in eam penuriam redacto, ut nec Strasserianus ille biatus expleri, nec tempestivis supplementis refici legiones, neque Buda, Essekium, Belgradum paulum communiuri possent.*

Felicio Venetis fuit expeditio, nam navali prælio victores, *Naupliam*, Peloponesi civitatem principem, expugnarunt. Tartari vero Poloniam crudeliter sunt populati, & injectis Camenecio comitatibus obsidionem difficilem fecerunt.

62.

Salankemen-
is victoria.

Plus Christiano orbi lætitiæ attulit expeditio anni 1691; nam *Guidobeldus Staremburgius*, præclaris in hoc bello gestis celebratus, Essekium virtute non minus, quam astu strenue defendit, & Badensis belli Imperator cum 100000 Turcarum ad *Salankemenum*, iniquissimum licet sibi locum, congressus, eximiam prorsus retulit victoriam: de tanto numero hostium non nisi 30000 Belgradum evasisse scribuntur. Cecidit ipse Vezirius *Cuproglus*, anima & spiri-

spiritus Ottomannici Imperii, superioris anni calamitatum auctor. ^{Cadit Cu-}
Sed neque nostris incruenta fuit victoria, dextro cornu, dum si- ^{proglus.}
nistrum tardius pugnam inchoat, jam pene fuso. Magnum ad
victoriam momentum attulit, quod Hoffkirchius comes, tradu-
ctis clam in averfam partem duabus dimacharum legionibus cum
Hussaris & Rascianis, Barbarorum castra, ea ex parte aperta, a
tergo sit adortus. Quæ res novi speciem exercitus ingessit, &
Turcas, duos inter ignes attonitos, in fugam compulit.

Præerat sinistro cornui *Dynewaldus*, Saxo genere, gestis ^{Dunewaldus}
clarus, & summis belli Imperatoribus comparandus, sed antiqua ^{accusatus}
cum Badensi æmulatione collisus, accusatus fuit, quod de indu- ^{obit.}
stria tardius militem in pugnam duxerit: evocatus Viennam, in
itinere obiit.

Turcæ Christianos a Mahomete excæcatos prædicabant,
quod non illico levem equitatum cum castrensis machinis ad
impediendum Savi trajectum miserint: tum enim omnes Turcas
deleri potuisse: quin tanta in perturbatione triginta millibus Ger-
manorum Belgradum ipsum potuisse recuperari.

In Transylvaniam cum prædatore exercitu sæpius irrupit
Töckelius, captivum secum Heislerum trahens, sed strenue a Ve-
teranio retusus est. Croyus vero, quæ post Belgradi casum amissa
fuerant in Slavonia, fortiter recuperavit. (anno 1691.)

Toto hoc bello nunquam minus ad rei summam actum est,
quam anno 1692 propter morbos in utroque exercitu grassantes.
Unde *Languentium expeditio* appellabatur. Ab Heußlero tamen *Languentium*
liberato *Varadinum*, superioris Hungariæ caput, & Transylvaniæ expeditio.
clavis, post lentam obsidionem expugnatione occupatum. Dedi-
titii Turcæ retenti sunt, donec Christiani, a Turcis contra pacta
capti, libertati fuerint redditi. *Fleurius* quidam, homo Sabau-
Fleurii clas-
sus, inquit, & insignis pyrata, classiculam construxit, qua Da-
nubio potiretur, ad arcendos Turcas, ripas defendendas, atque
ad militem, annonam, aliumque belli apparatus devehendum.
Explosum initio consilium, postea ex parte executioni datum, non
omni commodo caruit. Sed Fleurius, qui classiculam illam suprema
cum potestate regere volebat, invidiæ tandem victima ce-
cidit.

Neque a Turcis aliquid majoris momenti actum. Cupro-
Turcæ pa-
glio ad Salankemenum cæso surrogatus Vezirius *Halyus*, Bassa ^{cem respu-}
Messopotamiæ; qui cum Kara Mustapha Viennam oppugnaverat. ^{unt.}
Sed brevi deposito successit *Caimacanus*.

Crojus succedit Baden-
si.

Anno 1693, cum per Angliæ & Hollandiæ legatos pax peteretur, Turcæ cum acerbo scomate illam negarunt. Victos Germanos nunc pacem petere, quam nuper tanto cum supercilio respuissent. Nisi Buda reddita nullam esse cogitationem pacis.

Suscipienda igitur nova expeditio, pro more tamen fera, quia pecunia deerat ad emendum panem.

Belgradum frustra op-
pugnat.

Ludovico Badensi ad Rhenum translato. Dux *Crojus* Panonicis copiis præficitur, e Mareſchallis vetustissimus. Is dignum se tanto munere monstraturus, rem magnam suscipit: trajecto quippe Savo Belgradum oppugnat. Sed magna cum clade rejicitur: rebus nostris ad tantam urbem, a Turcis interea munitam, vindicandam non satis præparatis, id tamen fructus tulit hoc consilium, ut Vezirius, in Transylvaniam magno cum exercitu irrupturus, retraheretur.

Caprara succedit Crojo.

Anno 1694 Hungaricum exercitum *Caprara* regebat, qui triginta quinque millia armatorum complectebatur. Septembri primum mense in campum prodibant. Brandeburgici vero, Dani, & Luneburgici ineunte primum Octobri, ad hyberna nempe, veniebant.

Ad Petrovaradinum Vezirius castris castra opposuit, nostraque adortus, tempestate tandem, inundatione, frigore, tractus est. Tota expeditione nostra in defensionem abeunte.

Giula capta.

Ad deditionem tamen fame compulsa est *Giula*, ultima civitas, quam Barbari in Hungaria occupatam tenebant, probe munita, ad Varadini & Transylvaniæ securitatem, atque coercendas perduellium evagationes, opportuna. Præsidio Temesiam abire permissum.

Displicuit Cæsari, tam exilem fructum expeditionis haustum eo tempore, quo Turcicum Imperium vehementer turbatum fuerat seditione Arabica. Quippe ex regionis *Emiris* seu regulis quidam eminentior finitimos Turcas aggressus prælio vicit, atque Bassoram, Arabiæ desertæ provinciam, subigit, Byzantio non levi terrore concusso; eoque magis aucto, quod Babylonîæ, Mesopotamiæ, ac Syriæ defectio timeretur.

Jamque Emirur post plures victorias Imperatorem se dixerat, cum Mustius cum sacrificulorum choro legatus ad eum decernitur. Is argumento a religione ducto, rogabat, ut parceret Mahometis affeclis, quorum tot millia a Christianis quot annis martyres mactarentur, ni arma poneret, certam expectaret a Mahomete vindictam. Mirum! ferocem victoriis barbarum tumentes

adeo

adeo deposuisse istum telo illo spiritus, ut velut fascinatus lupum rapacem in agnum mansuetum mutaret; grandi certe Christianis documento, ut Religionem suam sanctam Divinamque sanctius colant.

Singulis prope annis optima rei bene gerendæ occasio fuit elapsa ob tardum nimis copiarum adventum; unde adulta primum ætate, aut ineunte autumno, dum altero jam oculo hyberna respiceret miles, inchoanda fuit expeditio. Ut tanto malo obviam iretur, cogitatio de construendis ad Savum castrensibus tuguriis est suscepta. Cum enim Rasciani, aliique ad Savum populi, nullas domus ædificent, sed æstate & hyeme in specubus subterraneis habitent, copiarum in remotiores Hungariæ plagas erant reducendæ, non sine finium periculo & expeditionis sequentis retardatione. Sed cum materia deesset, ædificii forma induci non potuit.

Anno 1695 aula Turcica magnam mutationem subiit. Mortuo *Achmete* Sultano nepos ejusdem *Mustapha*, Mahometis IV. de-
 Mustapha
 positi, & in carcerem detrusi filius, ad solium evectus, Martio Sultanus in
 vir spiritu, emissis quaque versum ad provinciales litteris, gran-
 dem exercitum evocavit, quem ipse, deposito Vezirio, in Tran-
 sylvaniam duxit, raptaque Lipa cum aliis quibusdam munitis lo-
 cis, ac dirutis, Veteranium, Transylvaniae Gubernatorem, quin-
 que duntaxat millibus stipatum, oppressit. Cæsi plerique, atque
 inter eos Veteranium, summis belli Imperatoribus suppar, magno
 cum Cæsaris & Christiani orbis luctu. Sultanus, velut ingenti
 parva victoria, relicta in manibus Christianorum Transylvania,
 nullaque re alia gesta, Byzantium triumphans regressus est.

Christiano exercitui præfuit hoc anno *Electo Saxoniæ*, cu-
 jus consilia, de Temesia aut Belgrado expugnando, varii dubiique
 hostium motus everterunt. Nam cum ambiguum esset, quo Ot-
 tomannicus turbo irrupturus esset, Cæsareus exercitus ad Petro-
 varadinum primo castra fixit, ut hostium motus, an in Sclavo-
 niam, Hungariam, vel Transylvaniam tenderent, observaret.
 Magnis dein & incommodis itineribus ad Tibiscum & Transylva-
 niæ fines movit; serius tamen advenit, quam ut Veteranio posset
 succurrere.

Cum Sultanus Valachiam incendiis vastatam cerneret, &
 Töckelianos calamitatis auctores intelligeret, Töckelium Con-
 stantinopolim abduci jussit, ubi in obscuro Judæorum vico dein-
 ceps contabuit.

Anno 1696 consultatum rursus Viennæ, quæ demum ratio iniri posset, ut hyberna prope hosticum solum figi possent, ne immentis itineribus fessus miles autumnales duntaxat expeditiones susceperet. Typum Aurspergius exhibuit: sed in æris præsentis ac com meatuum penuria, superius remedio malum fuerat.

Augustus Saxonæ Elector, supremus denuo belli Imperator, 14000 adduxerat; jamque Temesiam adortus, a Sultano in pugnam abstrahitur. Hæc promiscua adeo turbataque fuerat, ut velitationum potius congeries, quam justum prælium videretur. Cæsi utrinque multi, relicto dubio, quis vicisset, victusque fuerit. Cecidit alios inter *Heislerus* (quem Heidershemium quidam appellant) per omnes militiæ gradus ad summos honores eluctatus heros: militibus juxta ac provincialibus multo acceptissimus. In ejus locum *Vorsterus* suffectus. Elector, tradito Capraræ Imperio, Viennam abiit, Polonicæ coronæ felix Candidatus.

Eugenius
belli Imperator.

Anno 1697 Hungariæ militiæ Imperator a Cæsare dictus Princeps *Eugenius*, Dux Sabaudia, qui ad triumphos natus, jam antea ad Budam, Belgradum, Mohazium illustre documentum dedit, quantus Dux esset futurus. Et profecto sensit mox malo suo Ottomannica potentia præsentem Eugenium. Quamvis enim accisum, rerumque penuria laborantem accepisset Christianum exercitum, Sultanus vero ingenti, ex Europa, Asia, & Africa collecta multitudine, eaque rebus omnibus instructa, superbiret, ad *Zentam* nihilominus inaudita ab hominum memoria clade Turcæ sunt profligati, viginti minimum millibus eorum cæsis.

Vincit ad
Zentam.

Quippe, dum imposito Tibisco ponte, in superiorem Hungariam & Transylvaniam irruere conantur, superveniens trajicere parantibus Eugenius, vallo, quem tumultuarie construxerant, superato, incomparabilem victoriam refert, ad noctem usque cædendo & mactando continuatam, multis quoque millibus in Tibiscum præcipitatis, ut adeo tellus & undæ cadaveribus tumerent.

Præda ingens.

Wagn.

Capta præda ingens & penus bellica: centum tormenta, duo bubalorum millia, cameli, verveces, boves, equi, immani numero, caudæ equinæ, Prætoria nempe insignia, septem, signa majora 60, cum principe Janitsarorum vexillo: Sultani papilio, cum innumeris tentoriis. Cæsos inter Vezirius, & multi Bassæ inventi. E Christiano exercitu pedites 473 occubuerunt, equites 140, plures gloriosis vulneribus fuerunt ornati.

Sultanus, immanitate cladis amens, ejulansque, cum equitatu, qui jam ante Tibiscum trajecerat, citato cursu primum Temesiam, dein Belgradum fugit.

Pote-

Poterat tunc, concusso tam vehementer Ottomannico Imperio, peditatu ad internecionem conciso, hærente in ossibus terrore, Temesia aut Belgradum victoribus præmium cedere, si argentum, vecturæ, machinæ, aliaque ad oppugnationem necessaria præsto fuissent. Horum autem inopia, ne nullus legeretur fructus, Eugenius in Bosniam irrupit, atque per illam, interceptis multis oppidis, populationem late circumtulit, pingui inde præda reportata.

Gemina hoc anno seditio orta est; altera Asiana, brevi composita, quæ Turcas exercuit; altera Tibiscana, quæ non modico Cæsareorum & Hungarorum sanguine stetit, a Vaudemontio denique compressa, ultra millenos e rebellibus cæsis.

Vihaczium, Croatiae Turcicae caput, a Bathianio Croatiae Banno & Aurspergio nequidquam oppugnatum, Croatis & Cæsareis non levi accepta clade repressis.

Pötsii, Zenta diei itinere distante vico, Deiparae Virginis, Imago Deiparae lachrymans. Divinum infantem gestantis, rudi penicillo depicta effigies per duos menses lachrymas visa fundere. Ad miraculi novitatem infinita hominum multitudo confluit: coactique sectarii vel inviti fateri veritatem, quæ nonnullos ad Religionem nostram convertit. Leopoldus Cæsar prodigiosam iconem, solenni cum veneratione Viennam translatam in S. Stephani Basilica publico cultui exposuit.

Anno demum 1698 *Carlovizii*, ignobili ad id usque tempus Sirmii vico, pax iniri cœpta. Legati eo abs Cæsare Wolff- Legati ad pacem Carlovicensem. gangus Comes Oetinganus, Aulici Consilii Præses, & Leopoldus Comes Schlikius. A Polonis quoque, Moscis, & Venetis legati adfuere. Anglus & Batavus, volentibus etiam novo exemplo Turcis, pacis conciliatores sunt delecti. Missi a Sultano *Reis-Effendius*, seu Imperii Turcici Cancellarius, atque Maurcordatus, Græcus genere.

Polonum inter & Moscum importunum de loci prærogativa dissidium longiorem rebus gerendis moram iniecit, non sine Turcarum risu, & reliquorum impatentia. Hoc utcumque composito, uterque conciliatores, & fundamentum pacis, quod formula *uti possidetis* definiebatur, admittere recusavit. Quippe Polonus Variæ contentiones. *Camenecum*, quod pluribus annis frustra oppugnaverant, repetebat, Moscus *Kerczam*, munitam ad Borysthenem arcem.

Cum Cæsareis oratoribus dein contentio. Nam Turcæ Transylvaniam in eum, quo ante bellum fuerat, statum reponi volebant, ut scilicet Princeps sub utriusque Imperatoris clientela

provinciam regeret. Verum cum hoc postulatam jam fructum pacis fundamentum eversum iret (nam Cæsar totam Transylvaniam tunc possidebat) præcise negatum est, prout etiam tributum, quod Sultanus inde petebat.

Præsertim de
Temesiæ
finibus.

Acrior de Temesiensis Bannatus finibus fervebat disceptatio. Nam Cæsar Caransebia, Lugosio, Almaſiensi agro, Lipa, Clana-dia, Sablia, Bötſio, aliisque oppidis & arcibus Temesiensem provinciam undique circumseptam tenebat. Intolerabile hoc vitum Turcis; quapropter loca ista, velut ad Temesiensem ditionem pertinentia, cedi sibi postulabant. Verum hoc pacto fundamentum pacis, possessione præſenti circumscriptum, subruere, opponebant nostri. At illi, sententiæ suæ inhærentes, dissolutionem totius negotii minitantur, atque e loco congressus se proripiunt. Vicit tandem pertinacia: atque Cæsarei memorata superius oppida arcusque diruenda concesserunt, nulla unquam ætate restauranda.

Cedunt Cæsarei.

Quia pax
necessaria,

Fundamento, *uti possidetis*, semel labefactato, audaciores Turcæ, plura contra jus fasque in Syrmio quoque, Croatia, & Bosnienſibus limitibus exigebant, tandemque obtinebant. Siquidem Cæsar, ingravescente in dies Caroli II. Hispaniarum Regis afflicta valetudine, utroque oculo Monarchiam illam respiciens, pacem cum Turcis necessariam sibi existimabat, eaque propter nolebat, minoris momenti controversiis obiecem eidem & moram poni. Factum inde, ut, cum de limitibus postea definiendis per Marsilium comitem, & Effendium quendam (ita Jurisconsultos suos Turcæ appellant) ageretur, varia indulgerentur.

Verum minora hæc erant, quam ut negotium pacis, eo usque provectum, deberent evertere, & continuatum per viginti jam annos sumptuosum bellum protrahere. Si decem ante annos, dum Belgradum, Niſſam, Vidinum, Orſovam &c. occupata tenebamus, pax Turcis petentibus data fuisset, pinguiorem haud dubie accepissemus, atque immensis sumptibus fuisset parſum. Sed reservata fuit Eugenio illa gloria, ut Temesiam & Belgradum in triumphum duceret.

Ingentes ta-
men relati
fructus belli.

Licet autem minutiora quædam, quæ ad rei summam non multum adeo facerent, Turcarum pertinaciæ sint remissa, ingens tamen fuit hoc bello Leopoldi Cæsaris felicitas, qui tot gloriosis partis victoriis captisque provinciis Domum suam in immensum auxit. Nam cum ante e Viennæ mœnibus prope conspicerentur lunata vexilla, tota exactus Hungaria atque Transylvania, quibus occupandis ducendos annos impenderat, in Serviam atque Valachiam

chiam bello uno retusus est Turca. Quæ sane gloria nulli ante Leopoldum Magnum Cæsari obtigit, secuturo exemplum Carolo filio, ditionemque in amplius multo spatium exporrecturo.

Liberata
Hungaria, ad-
jecta Transyl-
vania.

Missus denique Byzantium legatus, qui pacem *Carlovizii* composuerat, Comes Oetinganus, cum donis amplissimis. Caustum captivis & Religioni, etiam in Palæstina. Ibrahimus, ortu Genuensis, a Sultano vicissim orator Viennam missus.

Dum tractatus pacis cum Cæsareis Legatis conficiebatur, vehementior adhuc Turcas inter, Moscos, Polonos, & Venetos fervebat disceptatio. Moscus relicto sibi, quod occupaverat, Assovio, Kerczam, in Crimæa, seu Taurica Chersoneso munitam urbem, ad Tartarorum Chamum, sub Sultani clientela constitutum, spectantem frustra repetiit. Unde relictis sociis biennes inducias pactus, rem omnem in statu, quo tunc erant, reliquit. Polonus restitutionem tandem Kameneci, munimentis suis vallati, obtinuit.

Moscos bien-
nes inducias
pangit.
Polonus Ca-
menecum ob-
tinet.

Difficultatem summam attulit res Veneta, adeo quidem, ut commotis vehementer animis semel iterumque conventus sit solutus. De *Peloponeso* maxime erat contentio, Venetis ad fundamentum pacis, fixamque in præliminaribus normam provocantibus, Effendio oppida quædam reposcente, itaque obfirmato, ut cedere oportuerit Venetum, ne totum negotium obrumpatur.

De Morea
contentio.

Superatis tandem innumeris difficultatibus, 26 Januarii 1699. pax ab omnibus legatis fuit subscripta, in 25 annos porrecta: atque 14 Martii a Principibus ratihabita: universo simul operi manus suprema imposita. Juvat, ejusdem summam hic breviter in synopsis colligere.

ARTICULUS VI.


Pax Carlovicensis.

1. Transylvania Austriaci juris esto, cum veteri Valachiam versus & Podoliam limite.
2. Temeswariensis vero civitas Sultano maneat: circumscita vero munimenta diruuntur. Ufus fluminum communis esto.
3. Regio Danubium inter & Tibiscum Cæsaris esto. Novæ tamen Tituli urbe munitiones ne eriguntur.
4. Trans Tibiscum Titulo ad Istrum, indeque ad Savum linea ducatur, quæ utramque ditionem definiat.

63.

5. Savus

5. Savus utrique genti sit communis.
6. Commissarii terminos figant; qui nunquam moveantur.
7. Urbes suas munire utrique parti fas esto: iis exceptis, quæ expressim sunt nominatæ.
8. Omnes direptiones severe prohibentor.
9. Neutra pars alterius rebelles foveat.
10. Moderni tamen Cæsaris rebelles, qui veniam non consequentur, habitare poterunt in Turcia, remotius tamen ab Hungaria: a qua perpetuo proscripti sunt.
11. Si controversiæ inter subditos ratione limitum oriantur, per Deputatos deciduntor.
12. Captivi vel lytro soluto, vel commutatione restituuntor.
13. Hominibus sacris in templis & monasteriis Jerosolymæ & per totam Turciam pristina libertas salva esto.
14. Commercia utriusque Imperii ad pristinum statum, qui fuit ante bellum, reducuntor.
15. Omnes antiquæ pactiones, nisi quid hic sit immutatum, ratæ habentor.
16. Utraque pars, in amicitiae testimonium, legatos mittat.
17. Quibus more pristino honor deferatur. Nec ad certum vestimenti genus sint adstricti.
18. Commissarii 22 Martii conveniant, & intra bimestre fines determinent.
19. Pacis hujus articuli 30 intra dies ab utroque Imperatore subscripti, ratihabentor.
20. Hæ induciæ ad 25 annos extenduntor, & Tartaros pariter obligantor.



CAPUT IX.

DE

STATU BOHEMIÆ

SÆCULO XVII.

ARTICULUS 1.

Status sub Rudolpho II.

SUMMARIUM.

Ultimis vitæ annis magnas faciunt molestias Rudolpho II Frater Mathias, & Protestantes, turbarum auctores. Litteras Majestatis extorquent. Eorum furor. Leopold. Archid. in Bohemiam. Fabula de armatis Passav. in Clementino. Obitus Rud. II. ejusque Elogium.

Quam læta erant atque augusta prima mediaque Rudolphi II Cæsaris tempora, tam tristia & acerba ultima. Geminò ex fonte malum profluxit: ex Hussitarum & Protestantium tumultibus, atque ex Mathiæ fratris inquieta indole, & regnandi cupiditate.

64-

Illi, prout alias per Europam provincias seditione & rebellionibus miscebant, ita etiam Bohemiam; acsi idem esset, a Catholica Religione deficere, & patriæ ac Reipublicæ quieti bellum denuntiare. Et quidem immanem Hussitarum furorem ex iis, quæ ad sæculum XV. retulimus, abunde licet perspicere. Cum autem illi ad pacem aliquam & obsequium se viderentur componere, Lutherani & Calvinistæ, ad tumultuandum semper accinctum hominum genus, incendium excitarunt, quod per omnem deinceps Europam est propagatum.

Atque imprimis ægerrime illos habuit, quod Archiepiscopus anno 1605 in Synodo Pragensi Canones & Decreta Concilii Tridentini promulgavit. Cumque hoc ad negotium Rudolphus Cæsar operam suam & auctoritatem attulisset, & alias novis seditis,

Pars IX.

Qq

quan-

Protestantes
turbarum
auctores.

quantum poterat, obstitisset, ab eo averſi Proteſtantes, ad Archiducem Mathiam, Rudolphi fratrem, quem indulgentiorem ſibi fore credebant, reſpexerunt.

Mathias in
fratrem.

Quamvis autem Mathias optimo eſſet in avitam Religionem animo, quia tamen ægre ſecundo loco conſiſtebat, & dominari quam parere mallet, Proteſtantium favore utendum ratus, iniquius, quam pro fratre, cum Rudolpho egit. Nam, licet ab eo adminiſtrationem Hungariæ, Auſtriæ, & Moraviæ, cum ſuprema belli Hungarici Præſectura, accepiſſet, quia tamen alieno nomine atque auſpiciis fratris omnia poſſideri gerique non ferebat, ac inſuper ea imbutus erat ſuſpicionem, id agi, ut in Ferdinandum patrualem, Styriæ Ducem, Hæreditariæ Domus Auſtriacæ provinciæ transferantur, non deſit inertiam Rudolphi, abjectis ferme Imperii curis, intra Pragenſe palatium otioſe deſiteſcentis, apud fratres, Maximilianum & Albertum, atque alios traducere

Quapropter, inita licet anno 1606 cum Turcis pace, copias tamen armatas retinuit, permiſſaque in Comitibus Poſonienſibus Religionis libertate, anno 1608 cum Proteſtantibus Hungaris, Auſtriacis, & Moravis fœdus percuffit, rectaque cum hoſtili exercitu adverſus fratrem inermem ad Pragam movit, eique Hungariam, Styriam, Carylthiam, & Moraviam extorſit. Nec multo poſt Rudolphus Hungarici Regni inſignia eidem in caſtra miſit, Bohemicæ quoque ſucceſſionis ſponſione facta.

Proteſt. in-
ſolentia.

Proteſtantes vero in Bohemia, cum deſertum prope Regem ſuum viderent, ferocius elati, præter autonomicam Religionis libertatem, ne Eccleſiaſtici ad regni negotia adhiberentur, poſtularunt, ne matrimoniales cauſæ eorum judicio definirentur, ne bonis immobilibus fruantur: ne in conferendis regni & provinciarum Præſecturis Religionis ratio habeatur, atque, ut, ſi Regni Burgravius ſit Catholicus, Judex Regni ſit Acatholicus: Neque enim ſubſidia ſe collaturos, niſi hiſce poſtularis annueretur.

Conſtantia
Rud.

Sed ea erat Rudolphi conſtantia, ut neque precibus neque minis adduci ſe paſſus ſit, quo in eorum vota concederet, per integrum adhuc annum, cum Majeſtatis, & vitæ etiam periculo, cum illis colluctatus. absque exercitu, ſenio fractus, ſolo Deo, & Religionis ſancæ zelo munitus. Preces publicas junxerunt Præſules cum ordine Eccleſiaſtico, inſtituta quoque Pragæ ſacra ad conſultandum rebus in archis Synodo. Decretum voto unanimi, concedendum nihil Acatholicis; quo plura indulgeantur, hoc plura poſtulantibus, ad Religionis & Majeſtatis detrimentum. Privilegia,

gia, si quæ per Concilium Basileense & compactata Hussitis sint concessa, ad Lutheranos & Calvinistas nihil pertinere, utpote alterius multo sectæ homines.

Verum sequenti anno 1609 majori longe furore tumultus recrudit. Plura armatorum millia per urbem discurrebant, supremum Catholicis exitium minitantium, Societatis Jesu præsertim Patribus, per quos Regem a Protestantium postulatis aversum putabant.

Rudolphus itaque ab Acatholicis undique circumseptus, ac necessitati parendum ratus, Religionem secundum Bohemicam Calixtinorum seu Hussitarum confessionem, Diplomate, quod *Litteras Majestatis* appellant, permittit, cum facultate, suo in fundo erigendi templa, utendi Consistorio, & Academia Carolina, *Directores* item & *Defensores* ex tribus Regni Ordinibus sibi constituendi. Nullis tamen minis adduci potuit Lobkovicius Regni Cancellarius, ut subscriberet, salva id fide se facere non posse, palam testatus.

Prospectabat nempe vir sapientissimus, quod secuta mox Constantiæ tempora atroci scena exhibuerunt, rictum hæresis non satiari, sed in Religionis Regisque perniciem irritari. Quippe mox, licet severe cautum esset, ut religio *sub utraque*, & Religio *sub una*, prout in litteris Majestatis appellantur, quiete inter se viverent, nec altera alterius homines turbaret, Acatholici tamen omni ope collaborarunt, ut Regis latus fidissimis Ministris, quos Catholicæ fidei addictiores credebant, nudarent, proscripto etiam Heidelio veteris urbis Primatæ, & Jesuitas, quos rebus suis minime opportunos existimabant, bonis spoliatis toto regno ejicerent. Mirum, quot direptiones, calumnias, atque calamitates sint perpeffi, præsertim a Calvinistis, eorumque Symmystis Picarditis.

Quantumvis enim sola confessio Bohemica, quam Calixtini seu Hussitæ sequebantur, fuerit permissa, tamen, sicut sub nomine confessionis Augustanæ variæ sectæ se occultaverant, ita etiam sub eo nomine confessionis Bohemicæ. Appellati sunt etiam *fratres Boleslavienses* a Boleslavia Juniore, ubi Picardi principem suam Synagogam habebant: ac si fratres essent Hussitarum, quæ in Regno tolerabantur.

Anno 1610 celebratus Pragæ conventus Electorum, & quorundam Principum, ut ineatur ratio concordie Rudolphum inter Cæsarem & Mathiam fratrem. Conclusum inter Principes, ut hic per Legatum flexis genibus a Rudolpho fratre veniam actorum, du-

Atque per tumultum in Bohemiam exercitus, precaretur. Deprecatores a Mathia rogati sunt, Maximilianus frater, & Ferdinandus patruelis, Archiduces.

Mathias
deprecatur.

His in conspectum Cæsaris venientibus, stabat ille sub conopæo: cumque hi procidere in genua coram eo pararent, detracto galero obviam-eis processit, dixitque, nolle se, ut esset exemplum, quenquam de Austriaca Domo eo deesse, ut coactus sit flexis genibus a Cæsare veniam precari. Tum vero latus ac hilarius, ac si nihil fuisset offensus, perhumane & amice habitos, magna cum honoris significatione dimisit. Honoribus Principum ab Academicis producta in Theatrum pro genio illius ætatis Eliæ Prophetæ vita, & in cœlum raptus, tragœdia, summa omnium voluptate spectata.

Quies tantisper videbatur reddita; cum anno sequenti (1611) major subito procella incubuit, quæ rem Catholicam, ipsumque Rudolphum Regem supremo discrimini exposuit. Et quidem, quod mireris, ab ipsis Catholicis, dum vel maxime & Regi & Religioni consultum volebant, initium duxit, a tumultu videlicet, uti appellabatur, *Passaviensi*.

Leopold. Archid. in Bohemiam.

Quippe Leopoldus Archidux, Passaviensis & Argentinensis tunc Episcopus, Ferdinandi (postea Cæsaris) frater, quem Rudolphus in Regno Bohemix successorem sibi optaverat, ut spes suas promoveret, atque provincias, a Mathia Archiduce abstractas, ad Cæsarem reduceret, cum novem peditum, & quatuor equitum armatorum millibus per Austriam superiorem, transmissis ad Lincium Danubio, in Bohemiam repente se infudit, occupatisque Crumlovio, Budovicio, Berauna, aliisque oppidis, militari præsidio munitis, ad Pragam ipsam exercitum admovit, atque extractis portis urbem Minorem cepit.

Sectariorum
rabies.

Tum vero sectarii, quasi cœnobitæ cum Passaviensibus conspirarent, iis direptionibus, cadibus, lanienis sacrorum hominum per veterem novamque civitatem sunt grassati, ut Ziscæ ac Tabornitarum tempora revocasse viderentur. Nihil crudelitatis & contumeliæ omissum; perque obvias Religiosas domos sparsus furor.

Commentum
de armatis
Passav. in
Clementino.

Et imminebat Clementino Societatis Jesu Collegio exitium: cum diffusus esset rumor, trecentos Passavienses milites in eo latere absconditos, cum grandi bombardarum pulveris igniarii, & bellici apparatus copia. Et irruisset plebs effera, nisi Vratislavius furori se opponens, nostros servasset; hortatus tamen amice: sinant inquiri, secus salvum esse collegium non posse: se quidem

dem alienæ esse Religionis, memorem tamen beneficiorum, quæ scholas nostras frequentando perceperit, vel capitis sui periculo cauturum, ne ea investigatio fraudi esset.

Bis excussum totum collegium, omnesque latebræ examinatæ. Sed cum armorum nihil esset inventum, frendens recessit plebeja rabies, quod sæviendi & prædandi spe fuisset dejecta. Cum autem illa de latentibus in collegio armis fabella per alias etiam late provincias fuisset disseminata, Regni ordines, quorum plerique erant Acatolici, publico Instrumento commenti vanitatem, Patrumque innocentiam sunt contestati.

Miles Passaviensis, qui Rudolpho Imperatori opitulatum venerat, majorem in eundem tempestatem concivit. Nam Bohemiæ Ordines Mathiam Archiducem, Leopoldo patrueli alioquin infensum, vocarunt in auxilium: qui collectis ex Hungaria, Austria, Moravia, Silesia, octodecim armatorum millibus, Ductore Herbersteinio, in Bohemiam movit. Subsecutus mox ipse, summa Ordinum gratulatione Pragæ fuit exceptus: cumque fratrem Rudolphum Imperatorem desertum passim ab omnibus cerneret, eo usque, quamvis renitentem, compulit, ut non modo consentiret, Mathiam Regem quoque Bohemiæ coronari, sed id ab Ordinibus etiam peteret.

Eo videlicet redacta fuerat summa per orbem Majestas, quam & Turcæ, & Tartari, & Mosci, & Persæ legationibus honoraverant, ut, relicto solo Imperatoris nomine, provinciis omnibus nudaretur, ac ipse sibi viventi & videnti velut funus maneret superstes. Rex autem Mathias, ordinatis Bohemiæ rebus, progressus primum in Lusatiam, Budissinæ, tum in Silesiam, Wratislaviæ juratam provincialium fidem recepit.

At Rudolphus Imperator fati suis & calamitatibus non diu vixit superstes, anno sequenti (1612.) ineunte apoplexia tactus, animi tamen rationibus pridie rite initis, Pragæ occubuit anno ætatis sexagesimo. Natus quippe fuit Viennæ anno 1552 ad omnem vitæ probitatem educatus in Hispania; ubi eum Catholicæ Religionis fervorem imbibit, quem tota dein vita nunquam sibi est passus eripi, Austriacæ pietatis monumentum perpetuum.

Septem & triginta annos Regnum Bohemiæ est moderatus, sede perpetua collocata Pragæ, quam ædificiis variis ita exornavit, ut dicerent Bohemi, Pragam, quam Libussa ligneam condiderat, Carolus IV. marmoream effecerat, a Rudolpho auream propemodum fuisse relictam.

Mathiæ in
fratrem Imp.
sævitia.

Obit Rud.
Imp.

Elogium.

Gloriosissimus certe, si quis unquam, fuisset Imperator, dummodo ultima tempora respondissent primis. Quantus fuerit litterarum artiumque æstimator & amator, alias diximus. Propter sapientiam, aulæ splendorem, peregrinorum, doctorum præsertim hominum, ex totâ Europa affluxum, auri gemmarumque copiam, Salomon Bohemicus dicebatur. Sed vergente in senium ætate, nihil quidem de studio virtutis & Religionis, cui omnia posthabuit, remisit, documento tamen fuit, nihil in mundo esse stabile, summamque etiam gloriam esse mortalem.

ARTICULUS II.

Status sub Mathia.

SUMMARIUM.

Mathias Rex. Sæctarii templa construunt in alieno solo. Tres Ministros Regis ex arce præcipitant. Jesuitas proscribunt. Arma corripunt Turriano ductore. Moravos, Lusatios, Silesios ad defectionem trahunt. Mors Mathiæ.

65.
Sub Mathia
Rege.

Mathias, superiore jam anno coronatus Bohemiæ Rex, quietum tantisper auspicatus Imperium, magna sapientiæ laude gubernabat Rempubicam. Sed cum inquieta & turbulenta sit adeo Novatorum indoles, ut tranquilla diu non possit subsistere, jam anno 1614. in atras nubes coit, eamque parturit tempestatem, quæ non modo in Bohemiæ stragem, sed Germaniæ, quin Europæ omnis ruinam se se effudit.

Templum
construunt
Acat. in a-
lieno solo.

Cœperunt videlicet Acatolici eo, quem dixi, anno templum ædificare *Clostergrabii* in Archiepiscopi Pragensis solo. Nuntiavit is novum opus ceu loci Dominus, atque Præcones inauspicatos expulit. *Defensores* contra fabricam jubent prosequi: publica urbibus affigunt decreta, violatas *litteras Majestatis* proclamant: querelas ad regni Moderatores deferunt. Quasi vero litteræ illæ aliena invadere, atque infontes spoliare permittant.

Vetat Rex.

Alterum templum collatio ære moliantur in oppido ad abbatem Brunoviensem spectante. Cum autem moniti non desisterent, defertur querela ad Mathiam Regem: sed neque hujus jussu cœptum opus intermiscere. Quapropter cives aliqui Brunovienses in custodiam dati sunt, & templum Brunoviense vi injecta occlusum.

Commo-

Commoti ea re Proceres Acatholici, magno numero in Academia Carolina conveniunt. Deliberatum de conservatione privilegiorum, exstruendi ubique templa, ut dicebant, libertate, & dimittentis e custodia Brunoviensibus, quos injuste attineri querebantur. Reprehensi a Rege, quod se incito invitoque seditiosos conventus agerent, jussique abstinere, adeo non acquievere, ut anno 1618. cum turbulentis concionibus populum ad libertatem & estrictam licentiam vocassent, in ipsam arcem irruperint, in qua de publicis tum Regni negotiis consultabant Ministri Regii. Cum *Ejus Mini-* que hi iniquis eorum postulatis resisterent, tres ex illis, *stros ex arce* *Sclabatam, Martinisium, & Fabricium,* violente arreptos per fenestras *præcipitant.* arcis in subjectam aream dederunt præcipites. Ubi nihil lapsu præalto læsos animadvertunt, sclopis petiti, Divina rursus ope incolumes sunt servati, & amicorum dein opera furori hæretico subtrahiti.

Mox rebus novandis factum initium. Electi triginta *Directores.* *Directores,* qui Rege absente habenas capefferent. In horum verba civis & præsidarius miles sacramento adactus. His arcis & portarum claves traditæ. Aperti carceres, & dimissi Brunovienses. Inclusi, qui his se opponebant. Conclamatum denique ad arma. Collecti undique milites, pecunia, bellicque apparatus.

Edito interim in lucem scripto contestantur, nihil se adversus Regem suum moliri. Quod tres pacis publicæ turbatores ex arce dejecerint, more Majorum esse factum. Quæ mutassent, ad suam defensionem & regni quietem pertinere.

Addita proscriptio Patrum Societatis Jesu e regno Bohemiæ. *Jesuitæ ex-* *pulsi.* Intra octiduum finibus jussi excedere. Sancita capitis pœna in regressos, eosque, qui pro illis auderent intercedere. Crimini datum, quod pacem turbent: impugnent privilegia Religioni data, immensas corradunt opes; Regum vitæ insidias struant: concionibus seducant plebem: odium ingerant Religionis Evangelicæ, omniaque sub jugum Pontificium mittere nitantur, consiliis & conatibus omnibus in perniciem Evangelicorum directis

Hæc aliaque Patres, postquam violentiæ temporumque iniquitati cedentes, Regno excefferunt, modesta apologia confutaverunt: nunquam se contra pacem & privilegia quidquam dixisse aut egisse: Religionis Catholicæ veritatem atque summi Pontificis *Apologia:* in Ecclesiasticis auctoritatem, publice privatimque asserere, ac contra heterodoxos defendere, sui muneris esse & Instituti: neque ulla Regni lege hoc esse vetitum. In concionibus suis damnasse Religio-

ligiones contrarias sine adhærentium contumelia. In toto Regno quinque esse Collegia, ære alieno omnia gravata, quorum annui proventus decem aureorum millia non excedant: has esse immensas illas opes, quæ publicam invidiam mereantur. De cædibus Regum & Principum antiquam esse calumniam, multorum jam scriptis confutatam, atque adeo ipsorum etiam Principum, quorum vitæ insidias struxisse per summam contumeliam arguerentur, testimonio.

Arma corripiunt rebelles.

Cæsar intellectis, quæ Pragæ acciderant, Turrianum autem Comitem, rebellium caput, volitare per provincias cum militum turba, atque ad defectionem omnes sollicitare, cum admonitiones & lenia remedia frustra consumpsisset omnia, cœpit & ipse ad arma respicere: scriptoque ad Ordines Imperii libello, mandat, rogatque, ne perduellibus milite aut subsidiis ullis opitulentur.

Silesii, Moravi & Lusatii ad defectionem tracti.

Mox Henricum, Comitem Tampierium, cum aliquot copiis mittit ad fines Bohemiæ, ac postea majori cum imperio Carolum Longuevallium Comitem Buquoyum: cui Albertus Belgarum Princeps, Mathiæ Cæsaris frater, duo equitum, sex millia pedum addidit. Verum Bohemorum exercitus ad 30000 jam creverat, tractis in armorum rebellionisque societatem Silesiis quoque, Moravis, & Lusatiis. Ernestus insuper Mansfeldius, a militia Sabaudica exauthoratus, suam secum legionem ad Bohemos traxit: primoque Pilsam expugnavit. In fidem Bohemiæ Directorum sacramento adacti cives.

Doluit Cæsari jactura fidæ urbis, atque post Pragam ferme præcipuæ: respexitque rursus pacis consilia: Polonum, Bavarum, Saxonem, conciliatores ejusdem adhibuit. Sed jam latius grassatum fuerat incendium, quam ut facili opera restingui posset, hæresi pro more suo ventilante sanguineas faces, quibus omnia conflagrarent. In Austriam quoque, atque ad ipsam adeo Vienneam, Cæsaris regiam, illata flamma: Protestantibus Austriacis, cum Bohemis non segniter illam spargentibus.

Spiritus Protest. non est Evangelicus.

Num spiritum istum Evangelicum dicam? Num ita Apostoli prædicarunt Evangelium? An primi Christiani ita in Imperatores Ethnicos insurrexerunt? Num Thebæa illa Mauritiæ legio hac defensione est usa? Quinam unquam ex Catholicis adversus Principes & Dominos suos propter Religionem arma corripuerunt? Est profecto, est hæc nota hæresi omnino propria, prout universim sæva est & turbulenta, ita in Dominos suos & summos etiam Magistratus solet insurgere. Testis Germania, Gallia, Belgium, Pedemon-

dementium, Anglia, Hungaria, Bohemia, Moravia, Silesia, Lusatia. Animadverterunt pro officio omni ætate legitimi Magistratus Catholici in Novatores, qui hæresin in Ecclesiæ agro disseminare nitebantur. Sed, quod Catholici armis adversus legitimum suum Dominum ac Magistratum correptis Religionem suam aut propagarint, aut defenderint, exemplum nullum in orbe terrarum exstat. Proprius omnino, quod dixi, hic spiritus est hæresis: sed quam diversus a spiritu Evangelico!

Sicut autem Rudolpho Imperatori, sic etiam Mathiæ hic spiritus vitam elisit: dum ob eam Bohemorum rebellionem animo æger anno 1619. Viennæ decessit, ætatis 62. Devexa jam ætate matrimonio sibi junxit Annam, Ferdinandi Archiducis Oenipontani filiam, patruelem suam: liberos tamen nullos suscepit. Junior Belgicis se tumultibus immiscuit, suscepto contra Hispani & Cæsaris Rudolphi voluntatem Gubernatoris officio. Alençonii artibus inde amotus, vitam privatam dominandi desiderio ægre tolerabat, nec destitit fratrem persequi, donec provinciis eundem exueret.

Has adeptus, creatusque Imperator, fortitudine, magnanimitate, pietate, Religionis studio, cæterisque Regiis virtutibus, superioris vitæ maculas prorsus delevit.

ARTICULUS III.

Status sub Ferd. II.

SUMMARIUM.

Ferd. II. Rex agnitus & coronatus. Protest. per Boh. Moraviam, Austriam ad Viennæ usque mœnia armis grassantes. Mansfeld. a Buquoio victus. Frid. Palatinus Rex intruditur. Maxim. Dux Bavarix in Austriam & Boh. Pugna Pragensis. Fructus Victoriæ. Exacti Ministelli. Reducta Religio. Mansfeld. & Jägerndorff. Rebellium Ductores. Recepta Bohemia.

Mathias Imperator, cum senium & corporis infirmitas haud longam amplius vitam promitterent, de successore sollicitus, jam anno 1617 Bohemiæ Ordines Pragæ convocaverat, iisque Ferdinandum Archiducem, patruelem suum, quem in filium adoptaverat, successorem proposuit: cedentibus jure suo
Pars IX. P P Maxi

Maximiliano & Alberto, Mathiæ fratribus. Paucis quibusdam primum retragantibus, postea vero silentio probantibus, majore haud dubie suffragiorum numero Rex dictus est Ferdinandus, atque corona Regumque insignibus magno plausu & celebritate ornatus.

Turriani fu-
ror. Ferdinandus II. igitur Regnum Bohemiæ atque Imperium post mortem Mathiæ Cæsaris undique turbatum adeptus, ut rebelles Bohemos placaret, privilegia sua mox illis confirmavit. At illi multo vehementius bellum continuabant. Quippe *Turrianus*, multitudine & unione Protestantium fretus, in Moraviam irruens, plures in ea urbes cepit. In Austriam Inferiorem deinde irrum- pens, ad Viennæ suburbia duxit exercitum.

Viçtus a Bu-
quojo
Mansfeld. Nunquam majori in discrimine fuit res Austriaca: Proceribus & civibus Lutheranis cum Turriano conspirantibus. Sed opem promisit e cruce Deus. Viçtus acie in Bohemia a Buquojo Mansfeldius. Revocatus a Regni Directoribus Turrianus. Tempestas ab Austria aversa.

Verum eo gravius Bohemiæ incubuit, quæ, machinam totam versantibus A catholicis, Imperium Austriacum penitus evertere nitebatur. Disceptatum, num Batavorum Helvetiorumque exemplo, Rempublicam liberam, an Regiam, cui hæcenus consueffent, gubernationem mallent.

Friderici Pa-
latini intru-
sio. Vicit hæc sententia: eligendum Regem, qui gratus sit multitudini, propriis quoque viribus Regnum tueri possit. Propositi Danus, Sabaudus, Saxo, Bavarus, & maxime Palatinus: simulque Ferdinando abrogatum Imperium, quod a Mathia intrusus, litteris quidem confirmarit Religionis privilegia, re ipsa autem everterit. Jam vero inducto peregrino milite hostilem in modum Regnum persequatur. Nec mora: Bohemiæ, Moraviæ, Silesiæ, & Lusatiæ Proceres diem novæ electionis decernunt.

Electus Fridericus V. Elector Palatinus, magni Regis gener, & unionis Protestantium Princeps. Is, dehortantibus frustra variis Principibus, electionem acceptavit, atque cum conjuge & liberis abiit Pragam, ubi novo ritu inauguratus est Rex Bohemiæ, suisque infusus, quibus deinceps oppressus est. calamitatibus.

Max. in Bo-
hem. Quippe sequenti mox anno (1620) solio dejectus, exulatum abiit. Maximilianus etenim Dux Baviariæ, asserta Cæsari Austria, cum exercitu in Bohemiam movit, Saxo vero Cæsaris nomine in Lusatiam. Cœptum ab utroque bellum expugnatione urbium. Sed cum hæc ratio belli gerendi lentius procederet, simulque cum ma-
jori

jori provinciarum strage esset conjuncta, nihil visum expeditius Maximiliano, quam prælio de rei summa decernere. Una victoria multas urbes & arces capi, ad quas, divisis accisisque copiis, circumduci lente deberet bellum. Adhæc hyems instabat, com-
meatus autem procul ex Bavaria petendi: Austria aut exhausta, aut in partes Bohemorum proclivis.

Statutum igitur Bavaro, Buquoio non nihil dissentiente, ipsum Bohemiæ caput, Pragam petere; quo haud dubie colligen- ^{Pugna Pra-}
dæ essent hostiles copię. Itum igitur ad illam, progredientibus ^{gentis.}
ad latus Bohemis; qui dein montem ad Raconitium leniter acclivem, sed fossa operibusque munitum, occupaverant. Cum autem Cæsarei ad Pragam tenderent, Montem Album Bohemi stationi suæ delegerant. Constituerat autem Maximilianus eo ipso in loco, quamvis arduo, hostes aggredi.

Æquo primum Marte pugnatum: tum vero capto juniore Anhaltino, Hungarisque, qui Bohemis subsidio venerant, in fugam conjectis, nutare Bohemorum acies, & instantibus acriter Cæsareis, qua via patebat, in fugam effusa est: unius horæ spatio exercitu admodum numerofo plenam Cæsareis victoriam relinquirente.

Patuit mox ingens fructus victoriæ. In Silesiam profugus ^{Fructus vi-}
Palatinus: Praga victoribus dedita; reductæ ad obsequium Pro-
vinciæ: restitutus clerus, restaurata templa, cultusque sacrorum
postliminio reductus: Moravia, Silesia, & Lusatia, a Saxone domita, exemplum Bohemiæ sequente. Prolixiorem horum tractationem parte VIII. dedimus.

Interim vero, dum Palatinus etiam ex Silesia profugeret, ^{Mansfeldii}
Mansfeldius res ejus prolapsas in Bohemia utcunque sustentabat, ^{sraudes,}
astu maxime, dolisque, quibus valebat. Nam cæteris ferme ur-
bibus ad Dominum suum redeuntibus, Pilsam adhuc & Taborem
præsidio tenebat, multis e fuga eo dilapsis. Dumque Cæsareis
spem facit, accepta pecuniæ summa, tradendi eas urbes, atque
relinquendi Bohemiam, pactus eam in rem aliquot hebdomadam
induciis, torum illud tempus reparando bello solerter impendit.

Tum vero, dispositis per hyberna Cæsareis, repente pro-
volans, Schlackenvaldam, Tachaviam, atque oppida invadit.
Ejusque exemplo excitatus *Jägerndorffensis*, Brandenburgicus Mar- ^{Jägerndorf-}
chio, Silesiam Moraviamque crebris incurſionibus infestam habuit, ^{si rebellio.}
nihil territus edictis, quibus Cæsar utrumque proſcripserat.

Interim autem Princeps Liechtenſteinus, Bohemiæ Guber-
nator a Cæsare dictus, in rebellionis auctores inquisivit. ^{Citati Rebelles pu-}
^{edito} ^{niti.}

edicto absentes, & ubi præfixo die se non stiterant, contumaciæ damnati, omnibusque officiis & bonis privati sunt. Ad Directores maxime iudicium illud pertinebat: qui munere illo abusi, rebellionis incentores, & promotores, in potestatem Cæsaris venerunt, atque habita quæstione, morte scelus luerunt. Tres & quadraginta hac pœna Pragæ sunt condemnati, quorum aliquos Cæsaris Clementia supremo supplicio exemit. Ex directoribus novem capite plexi. Idem supplicium Oeniponti subiit Tieffenbachius, Moraviæ rebellionis reus.

Ministelli
exacti.

Religio resti-
tuta.

Carassæ ope-
ra.

Insuper Præcones, qui multa indigna in Catholicos ipsumque Cæsarem ad populum dixerant, ac etiam scripserant, Regno pulsi; Catholici vero sacerdotes reducti, vineam illam horrescentem cultu impigro fertilitati reddiderunt, instaurata, Josiæ exemplo, a pientissimo Cæsare per omnes provincias re Divina, & animarum cultura. Nec sanctum illum Religionis avitæ zelum ullæ, magnorum etiam Principum, intercessionibus sufflaminare poterant.

Insignem in hanc rem operam præstitit Carolus *Carassæ*, Episcopus Averſanus, summi Pontificis ad Cæsarem Legatus, qui non modo res Ecclesiasticas præclare ordinavit, sed erudite etiam scripsit, edito opere, quod *Germaniam sacram restauratam* inscripsit.

Tabor re-
cipitur.

Sub finem anni 1621. tota Bohemia ad fidem Cæsaris reducta est: expugnata ad extremum Tabor. Urbem hanc profundo vallo ac triplici muro Zisca circumdedit, indito nomine a monte Tabor; unde & *Taborita* dicti, qui ejus factioni adhærebant. Mansfeldiani locum, spe liberationis, diu defenderant. At Mansfeldio in Palatinatum digresso, præsidarii, bimestre stipendium pacti, munimentum tradiderunt. Cives pecunia multati, Nobiles iudicio Cæsaris reservati. Taboris deditionem residua castella secuta sunt.

ARTICULUS IV.

Saxo invadit Bohemiam. Expellitur. Wallensteinii cædes. Pax Pragensis. Sueci Bob. Moraviam, Silesiam vastant. Pragæ Minorem capiunt. Major strenue defenditur. Pax West. Restorescit Religio. Elector Bohemiæ ad Comititia receptus.

Saxo Bohemiam
invadit.

Fruebatur posthac Bohemia per decennium pace, quoad sacra & politica a Cæsare sapientissime ordinata, donec post pugnam Lipsiensem Saxo per *Aræbium* eandem invasit, capto Leu-
tomeri-

tomericio, Praga, Egra, aliisque minoribus oppidis. Ad Budovicium hæsit victoria, a Marrodio strenue defensum. Superveniens, restituto militari Imperio, Wallensteinus, Saxonibus pulsus, Bohemiam liberavit. At biennio post contigit Egræ Wallensteinii cædes. Post victoriam vero Nordlinganam pacificatio Pragensis cum Saxone.

Expellitur.

Wallensteinii cædes.

Pax Pragensis.

Anno 1639. Bannerius, Suedicæ militiæ Imperator, arma per Bohemiam circumtulit, intercepto Leutomericio & Brandisio. Ejectus inde a Leopoldo Archiduce, Ferdinandi III. Cæsaris fratre.

Sueci Bohemiam,

Sed Torstensonus, Bannerii successor, anno 1642. cum exercitu rediit, percuraque Lusatia, in Silesiam irrupit, atque Glogoviam majorem, in quam Cæsarei magnam frumenti bellicique apparatus vim comportaverant, expugnavit. Cæsi præsidarii prope omnes, & magna civium pars. Urbs ipsa hostilem in modum direpta. Victo dein Lavenburgico, tota propemodum Silesia a Torstensono est subjugata.

Silesiam,

Flexa mox in Moraviam expeditione, illam quoque provinciam cum Olomucio omnem ferme occupavit, grandi ubique præda potitus. Brinna stitit volantis victoriæ impetum, a Souchio strenue defensa.

Moraviam

diripiunt,

At anno sequenti, cum Torstensohnus arma in Danum avertisset, Silesiam atque Moraviam, Glogovia & Olomucio exceptis, Cæsari recuperandi spatium dedit. Verum cum ille, non ad pacem compulsus, in Silesiam rediisset, Jankoviensi victoria elatus, Silesiam, Moraviam, Bohemiam, ipsamque Austriam cum victore exercitu percurrit. Iterum Brinna saluti fuit, a Suecis frustra oppugnata.

Brinna saluti fuit.

ti fuit.

Anno 1646. ut tristibus læta inferantur, Ferdinandus, Cæsaris Ferdinandi III. filius, solenni ritu Rex Bohemiæ est coronatus Pragæ, præsentē ipso Imperatore, & magno Procerum numero. Pridie Imperii Ordines in arce novo Regi juramentum fidelitatis præstiterunt. Die ipsa Cæsar cum Rege inaugurando, omniumque Ordinum comitatu ad templum princeps progressus, sacro Missæ officio, ab Harrachio Archiepiscopo & Cardinale, assistentibus 16 Episcopis & Prælatibus, celebrato, interfuit. Sub ipso sacro Rex ad pedem summæ aræ in genua procumbens, ab eodem Archiepiscopo veteri more inunctus est, & coronatus. Tum vero supremus Regni Burggravius ad populum conversus Regem coronatum alta voce denuntiavit. Sacro peracto Rex in folio collocatus aliquot,

Ferd. IV.

Rex.

Coronatur.

educto ense leviter tactos, Nobiles creavit. Solennitatem finiit convivium, Legatis datum atque Nobilibus, inter applaudentem tormentorum fragorem, ignes artifices, aliaque publicæ latitiæ signa.

Sueci Pra-
gam mino-
rem capiunt.

Sed brevi versa iterum rerum scena, Pragæ gaudia excepit tristis aspectus; dum Königsmarckius, cæso ad Augustam Melandro, Imperatore Cæsareo, in Bohemiam irrumpens, captis aliquot urbibus, assumptisque mille ac ducentis peditibus cum turma equitum, 26 Julii 1648. sub diluculo repente Pragam minorem, arcemque Regiam, in ea sitam, aggreditur, & priusquam pauci, qui aderant, præsidarii concurrerent, in potestatem redigit. Capti præcipui e Nobilitate Bohemica: quibusdam, qui resistere conabantur, interfectis. Urbs militi, præter paucas domos, in prædam data, opulentam omnino & præpinguem.

Major stre-
nue defensa.

Coloredus præsidii præfectus ægre per pontem in urbem veterem se subtraxit, omniaque ad defensionem comparavit; cives & Academici ad arma vocati; suæ quibusque stationes distributæ. Tantaque alacritate ab omnibus suscepta propugnatio, ut, licet Wittenbergius, Dux Suecus, ex Silesia propere cum auxiliis accurrerit, & Carolus etiam Gustavus numerosa ex Suecia subsidia adduxerit, magno tamen animo & memorabili virtute conatibus omnibus itum obviam; donec tandem sub initium Novembris de pace inita nuntiatum est: relicto dubio, an ferocia oppugnantium, an virtus oppugnatorum vicisset.

Usque ad pa-
cem West.

Religio re-
sorefcit.

Quamvis autem Protestantes in pacificatione Osnabrugensi vehementer instarent, ut Bohemis Religionis libertas permitteretur, nunquam tamen piissimus Imperator Ferdinandus III. adduci potuit, ut consentiret. Leopoldi autem Magni industria ager hic latissimus ita cultus est, ut, suffocatis zizaniis, in latissimos Orthodoxæ Religionis fructus effloresceret, prout hodie cum omnium, recte sentientium, solatio est cernere.

Electo Bo-
hem.

Tempore Josephi Imperatoris Bohemiæ Regnum aliquam mutationem subiit. Nam ab antiquissimis equidem temporibus Rex erat Elector Imperii, sed diversa a cæteris Electoribus ratione, artisque potestatis finibus. Si quando duas in partes æquales ibant suffragia, cui is accedebat, hujus rata erat electio. Sed per Bullam auream Cap. 4 §. 3 votum absolutum eidem in omnibus electionibus Cæsareis est datum, & quidem loco tertio, post Trevirensis & Coloniensem, inter Electores sæculares primo.

De cætero a collegio Electorali habebatur exclusus. Ne-Suffragii al-
que ad conscribendas capitulationes aderat, neque in comitiis ses- soluti jure
sionis & suffragii jus, aut pro Camerali Judicio deputandi assesso- gaudet.
rem, dabatur. At vero anno 1708. omnia reliquorum Electorum
jura, atque in omnibus conventibus, tam Electoralibus, quam Co-
mitialibus Statuum Imperii, sententiam dicendi potestas est conce-
sa, æquato per omnia cum reliquis Electoribus jure. Hæc res equi-
dem jam anno 1699. cum de nono Hannoverani Electoratu tracta-
retur, a Leopoldo Cæsare est agitata, sed eo demum, quem dixi,
anno perfecta.



CAPUT X.

DE

STATU LOTHARINGIÆ

SÆCULO XVII.

SUMMARIUM.

Lotharingia vetus. Media. Nova. Caroli III Ducis fata.
A Gallis & Suecis invaditur. Plures cum Gallis tractatus init.
Ducatum fratri Nicolao Francisco cedit. Interest prælio Nörd-
lingano. Nicolæam repudiat. Sociat se Hispanis. A quibus
in custodiam abducitur. Obiit Colonia. Carolus Leopold. re-
servato jure suo relinquit Ducatum in Gallorum manibus. Jos.
Leop. restituitur.

De Lotharingia in partibus præcedentibus sparsim dicta sunt
aliqua; hic autem juvat pauca colligere. Divisa olim fuit
in *superiorem*, quæ ad Mosellam sita hodiedum Lotharin-Antiqua Lo-
giæ nomen obtinet, & *inferiorem*, quæ in Brabantiam, Leodien-
sem, Mosæ & Scaldis tractum excurrerat. Utraque ex Alberone
descendens Mærovingicis Franciæ Regibus parebat, donec Infe-
rioris Lotharingiæ Duces, inter quos Ansegisus, Pipinus Heristal-
lus,

lus, Carolus Martellus, Pipinus Brevis, Majores Domus, tanta Auctoritate increverant, ut deturbatis throno Mærovingicis Regibus, Carolingicam Regum stirpem fundarent.

Lotharius I. Ludovici Pii filius has ad Mosam & Mosellam provincias in partitione obtinuit, & post eum filius Lotharius II. a lite cum Theutberga conjuge, & Waldrada concubina satis notus. Ab ejus nomine *Lotharingia* est appellata. Carolus III. Lotharii Franciæ Regis frater ab Ottone M. Imperatore Inferiorem Lotharingiam in feudum accepit, exclusus propterea a corona Galliæ.

Post extinctam stirpem Carolingicam Lotharingia Inferior ad Bullionios pervenit, quos inter gestorum gloria eminuit Godofredus Bullionius Rex Jerosolymæ. Ad Lovanienses dein comites devoluta est Lotharingia Inferior, qui deinceps Brabantia Ducis sunt appellati.

Lotharingia superior, cum Mærovingici Reges Franciæ Regnum inter se dividerent, ad *Austrasiæ* regnum pertinebat, sede Regia Metis locata. Sub Carolingicis spectabat ad Regnum *Lotbavicum*; magna autem tunc contentione disputabatur, an Lotharingia ad Germaniam, an vero Galliam pertineat, donec Imperatores prævaluerunt, qui pluribus viris nobilibus illum tractum in feudum concesserunt, quibus Ducum *Mosellanorum* nomen adhæsit.

Denique Gerhardus, Landgravius Alsatia anno 1048. superiorem Lotharingiam obtinuit, in cujus familia ad nostra usque tempora permansit. Sæculo XV. Jolantha, Renati I. Ducis Andegavenfis Regis Neapolitani filia, matrimonio juncta Friderico Valdemontio ejusdem familiæ nupsit; per quod matrimonium sublata est de successione contentio; nam Renatus II. ex eo matrimonio natus, Domus Lotharingicæ, Valdemontia, & Andegavenfis in Gallia bona conjunxit, cum præensione in Neapolim, Siciliam, Arragoniam, Jerosolimam.

Hic Renatus II. victo Helvetorum opera Carolo Audace, potente illo Burgundiæ Duce, duobus filiis suis *Antonio* & *Claudio* ineunte Sæculo XVI. ditiones suas ita distribuit, ut priori obveniret Lotharingia, Valdemontium, Barram, Mussipontum, alteri ditiones Andegavenfes in Gallia, videlicet Guisla in Picardia, Aumalia & Elleboviam in Normannia, Meduana (*Mayenne*) in Insula Franciæ. Unde Antonius deinceps lineam Lotharingicam, Claudius vero plures Gallicas, in Historia notas, propagavit, *Guifidm* videlicet, Meduanam sive *Mayennam*, *Aumaliam*, *Elboviam*, *Harcuriam*, *Lallebonam*, & *Harcuriam Armanach*; ex quibus, extinctis reliquis, sola Elbovia & Armacana sup. erant. Porro

Porro Henricus Dux Lotharingæ anno 1624 sine prole mascula mortuus, reliquit duas filias, *Nicolæam* & *Claudiam*. Cum Nova autem haberet fratrem Franciscum, comitem *Valdemontium*, orta est controversia, an ultimi possessoris filia, an vero frater succederet. Dirempta lis est per nuptias inter duas filias Henrici, & duos filios Francisci, Carolum & Franciscum. Quia igitur Nicolæa fuit primogenita Henrici Ducis Lotharingæ, & Carolus primogenitus Comitis Valdemontii, cessavit quæstio, an foemina in Lotharingia succedant.

Si quis unquam Princeps fatis asperis fuit jactatus, is certe fuit *Carolus III.* Dux Lotharingæ. Et quidem anno 1631. Gal- Caroli III. li, irruptione in Lotharingiam facta, Moyenvicum expugnarunt, fata. quod Dux asylum præbuisset Matri Regis, Duci Aurelianensi, & omnibus, qui Galliam deseruissent, quodque arma sua Cæsari adversus Suecos sociasset. Dux igitur, ad avertenda inajora mala, tractatu inito promisit abdicare omne commercium, quod Regi aut Suecis, Galliæ foederatis, posset esse præjudicio, solisque Gal- A Gallis in- lis liberum per terras suas transitum concedere, atque iis copias vaditur suas conjungere, Marsaliæ munimentum in fidei pignus tradere. Rex vero Duci protectionem spondet, & intra triennium restitutionem Marsaliæ.

Cum autem anno 1632 Sueci fines Lotharingæ urerent, & Suecia- Dux armatus adversus illos processit, sed interdictum a Gallis accepit, ne quid moveret. Cum illi Barleducum occupassent, & Nancæjo jam imminerent, Dux novo tractatu promisit, priorem ad amissim observare, & Claremontium cum arce & Stenæo Franciæ cedere, ratione Barrensis Ducatus Regi homagium præstare, nullaque in re rationes suas a Gallia disjungere.

Anno 1633. Dux Parisios in jus vocatus est, quod homagium ratione Ducatus Barrensis Regi non præstitisset. Sunt, qui scribant, Ducem id non recusasse, nisi, quod simul a Nicolæa conjugæ esset petatum, cum tamen foemina in Lotharingia, vi testamenti Renati II. successionis sint incapaces. Parlamentum pronuntiavit, occupandum esse Ducatum. Dux Lunevillam ad Regem profectus, ubi vidit, libertatem suam periclitari, Nancæjum, urbem suam principem, Gallis tradidit, 4 annis depositi instar tenendam.

Anno 1634 Dux Carolus, turbarum pertæsus, Lotharingiam in fratrem suum Nicolaum Franciscum Cardinalem translatum cedit. lit, qui, deposita purpura, Claudiam, Nicolææ sororem, sibi de-

spondit, ut gemino jure se tueretur, & suo & Conjugis. At novi Conjuges Nancæi in custodiam a Forcæo perducti, mutato habitu evaserunt, primum in Burgundiam, tum Florentiam, denique Viennam. Carolus vero, relicta in manibus Gallorum Lotharingia, cum copiis in Germaniam abiit, ubi pars non parva fuit Nördlingensis victoriæ, & aliarum expeditionum socius.

Nördlinganæ
pars victo-
riæ.

Repudiat Ni-
colæam.

Anno 1637. prout erat versatili in omnes partes ingenio, repudiata uxore sua *Nicolæa* duxit Beatricem *Cussanciam* viduam, se a patre suo Valdemontio coactum Nicolæam, a venefico baptizatam, sibi despondisse. Nicolæa ad Urbanum VIII. querelam detulit, qui separationem imperavit, donec causa esset discussa; cum autem Dux non pareret, excommunicationis sententia in eum fuit pronuntiata (anno 1642.) Tandem vero Innocentius X. matrimonium posterius irritum declaravit.

Tractatus
cum Gallis.

Anno 1641. Dux Carolus, instigante Cussantia, Parisios abiit, cum Rege de reditu suo in Lotharingiam tractaturus. Præscriptæque illi hæc leges: Dux homagium præstet: Nancæjum, Clermontium, Stenæa, Jameicum, Dunum, cum omnibus eo pertinentibus in proprietatem & dominium Regis transeant. Marsaliæ munimenta diruantur: reliqua Duci restituantur, qui toties arma sua cum Regiis conjunget, quoties requisitus fuerit: donec causa matrimonii finita fuerit, solvet annuatim Dux Nicolææ 120000 librarum: juramento confirmet hunc tractatum in Capella Regia.

Redux in Lotharingiam ingenti subditorum gratulatione & acclamatione exceptus est; verum, cum videretur, fidem datam non satis liberare, vim rursus inferente Gallia, iterum exulatum ivit, relictis tamen urbium Præfectis, qui, quantum possent, Gallis resisterent; quod maxime factum, dum turbæ domesticæ Galliam miscerent, misso etiam Lignevillio cum copiis, quæ Ducatum tuebantur.

Ad Hispanos.

Post pacem West. cum in ea Lotharingia non esset comprehensa, Dux Hispanis se addixit, & cum prædatorum exercitu Imperii etiam Principibus gravis exstitit, ut adeo vix non bellum decernerent. Tandem vero, cum Hispanis, ne ad Gallos se applicaret, & pro arbitrio copiis uteretur, non sine variis contra eum querelis, Bruxellis detentus, primum Antverpiam, Toletum dein in Hispaniam fuit deportatus, ubi 6 annos velut captivus hæret, ad pacem videlicet usque Pyrenæam.

Captus.

Franciscus Dux fratris Caroli libertatem ab Hispanis petiit; sed cum eam non obtineret, offensus ad Gallos transiit. Secutus est

est post pacem Pyrenæam Carolus, novamque cum Mazzarino tractationem suscepit. Conventum in ea, ut Nancæjum munimentis nudetur, nunquam amplius reparandis: Rex retineat Moyenvicum, Clermontium, Stenæum, Jamecium: Barrensis Ducatus Carolo reddatur, exceptis 30 locis; salva etiam via, duabus leucis lata, per Lotharingiam. His conditionibus remissus est Dux in suas provincias.

Anno 1662. Carolus aliam cum Rege conventionem confecit, qua, nullo fratris Francisci respectu habito, Franciæ Regem Lotharingiæ hæredem renuntiavit, promissa Marsalia in pignus fidei. Rex vero permisit Duci libertatem, de 100000 thalerorum redditibus annuis disponendi, in cujuscunque favorem fuerit libitum; simulque omnes Principes Domus Lotharingicæ coronæ & sanguinis Principes declarat, successionis in regno Galliæ capaces in casum, quo linea Borbonica esset expiratura. Hinc Carolus ad Condeum Principem jocando dixit, se uno calami ductu fecisse 24 Principes sanguinis, Condeum contra unicum facere potuisse.

Novus cum
Gallia tra-
datus.

Tractatus iste vehementer displicuit Duci Vindocinensi, Domui Curtenacensi, Paribus & Ducibus Franciæ, atque ipsis etiam Principibus Regii sanguinis; quippe omnes isti existimabant, per tantam Domus Lotharingicæ, quæ in multos ramos, per Galliam maxime, erat diffusa, Dignitatis prærogativam obscurari suam, Regem Franciæ non posse facere Principem sanguinis, nisi cum Regina, legitima sua conjuge.

Neminem autem magis hæc tractatio afflixit, ac Carolum Leopoldum, Nicolai Francisci Valdemontii Ducis filium; sive enim fecerint, sive non succedant, tanquam proximus agnatus unicus & Caroli, & Nicoleæ jure proprio debebat succedere, utpote utriusque nepos, illius ex fratre, hujus ex sorore. Non poterat igitur Carolus III. Dux jure quæsito, & per pacta Familiæ, providentiam Majorum, sanguinem, & perpetuam consuetudinem roborato eum privare; prout etiam ex usu, in omnibus Regnis & principatibus hæreditariis elucet.

Carolus Leo-
pold. prote-
statur.

Videtur hoc attendisse Parlamentum Parisiense, quod eum tractatum noluit habere ratum, nisi sub conditione, si omnes, quorum interest, sint consensuri, probe gnarum, Carolum Leopoldum nunquam assensurum, ut hæreditate sua avita privaretur. Quod facto ipso mox ostendit, dum, ne cogeretur assentire, ex Gallia clam profugit ad Leopoldum Imperatorem, apud quem summi belli Imperatoris officio functus, ductaque ejus sorore, con-

fenuit, nunquam viso patrimonio suo, Lotharingia; quia pace Neomagenſi tales conditiones ei a Gallia ſunt propoliſæ, ut juſ potius ſuum reſervandum ſibi cenſeret, quam ut eas incundas ſibi putaret.

Cæterum nec Galli ipſi in eo, quem dixi, donationis contractu magnum ponendum eſſe momentum exiſtimarunt, nec Caroluſ Dux aliud, quam joci viſuſ eſt; nam eo titulo, quod non omnes, quorum intereſt, conſentiant, in patriam redux, Marſaliam tradere recuſavit, atque contractum, a ſe leviter initum, complere.

Interea autem Caroluſ III. Dux, quamvis jam prope ſexagenariuſ, de novis nuptiis cogitare cœpit; ſiquidem Nicolæa prima legitima conjuge anno 1657 mortua, a Cuſſantia concubina, quam antea deperierat, abhorruit tantopere, ut nec ad conſpectum eam amplius admitteret. Suaſerunt illi quidam Galli, ut quandam Pajotam duceret, humili quidem loco natam, ſed dotibus præſtantiſſimam; nec abnuſit Dux, ſed Rex ſe oppoſuit, timore forſan, ne liberos ex ea gigneret, & ſic tractatuſ inituſ in majores adhuc difficultateſ devolveretur.

Rex enim ejus implementum urgebat, & cum Dux tergiverſaretur, Marſaliæ Gallicum præſidium recipere, Rex Forcæum cum exercitu in Lotharingiam miſit. Dux ſerio rem agi cernens, anno 1663. novum ruruſ contractum iniit, quo promiſit, Marſaliam intra triduum Regi tradere. Quod etiam factum.

Bello dein Belgico fervente Dux copias ſuaſ Regi tradere coactus, ab Electore Palatino impetituſ eſt. Caroluſ autem novuſ delectibuſ habituſ, Principem Lillebonuſ miſit, qui victoriã retulit, ſed Elector fruſtuſ, Gallo ſe miſcente.

Loth. ad
Gallos.

Anno denique 1670. Galli totam Lotharingiam occuparunt, perſcriptiſ ad comitia Imperii Ratiſbonam hiſ rationibuſ: inconstantia Ducuſ, mala fide, prævaricatione, tractatuuſ pactoruſque frequenti infractiõne, molitionibuſ contra Franciam, coactuſ Regem mittere cum copiis Crequiuſ, qui ad tria capita eundem pro publica quiete obtinenda adſtringeret, 1. ut militiam dimittat. 2. Pro centuſ violationibuſ pactoruſ ſatiſfaciat. 3. Idoneam cautionem pro futuro præſtet.

Accuſabatur præterea, quod ſociare ſe voluerit Triplici Fœderi: mercatores Galloſ, per ejuſ terraſ tranſeunteſ, veſtigaliſ oppreſſerit, aut eoruſ merceſ *arreſto* ſubjecerit: copias auxerit: in diverſiſ Germaniæ lociſ pluſ legioneſ habeat: propterea Regem

Regem ipsi diffidere, ac provincias ipsius in tutelam recipere. Proxima causa videtur, quod Rex, præparans bellum adversus Batavos, ad Mosellam poneret aggerem iis, qui Hollandis auxilium essent allaturi.

Crequius voluit ipsum etiam Ducem comprehendere; verum ille quatuor duntaxat personis stipatus evasit in Germaniam, nusquam sui satis securus, Lotharingiam vero reliquit in Gallorum manibus. Bello Hollandico anno 1672 exorto, Cæsaris partes secutus, in Burgundia & ad Rhenum militavit.

Tandem vero, postquam varias urbes exul oberravit, mortuus est Colonia Agrippinæ, ubi publica pietatis vere Christianæ exempla toti urbi complura dederat, frequens in Ecclesiis sine comitatu; cum sacra Eucharistia ad ægros deportaretur, plebi se immiscere solitus, & Corollam Marianam recitare, vanitatem mundi, ut nemo alius, expertus.

Obiit autem anno 1675, æt. 71. Ex Nicolæa, legitima conjugē, nullam prolem suscepit, ex Cussantia vero Principe reliquit Carolum Henricum, Comitem Valdemontium, qui declaratus illegitimus, anno 1698 a Rege Hispaniæ designatus est Gubernator Mediolani; filius vero ejus Thomas, Cæsarem secutus, jam anno 1704. in pugna ad Ostiliam in Italia occubuit, pater vero primum anno 1723.

Quidam Genealogistæ notant, Carolum III. Ducem post mortem Nicolæ, & Cussantiæ duxisse Aspremontiam, nullos tamen ex ea liberos suscepisse.

Habuit autem, quod supra memini, Carolus fratrem Nicolaum Franciscum, qui primum Episcopus Tullensis, dein Cardinalis, denique Nicolæ sororem juniorem Claudiam sibi despondit, atque ex ea genuit Carolum Leopoldum, inter præcipuos bellicos Heroes numerandum, cujus illustria contra Turcas & Galliam gesta alias recensuimus.

Huic igitur (mortuo patre Nicolao jam anno 1670) post obitum Caroli III. debebatur Lotharingia, sed tota vita sua nunquam in possessionem venit. In pace Neomagensi anno 1679. restituebatur, sed iis conditionibus, quas, jure suo sibi reservato, non acceptandas putavit. Relicta quippe eidem optio, an juxta modulum pacis Pyrenææ vellet restitui, relictis videlicet Galliæ Barrensi & Claremontano Ducatu, urbibusque munitis, Stenæ, Marsalia, Moyenvico, an vero Franciæ cedere velit Nancæjum cum suis confinibus, cum quatuor viis, Leuca dimidia latis, quarum una du-

ceret Nancæjum, altera Nancæjo in Alsatiam, tertia Nancæjo in Comitatum Burgundiæ, quarta Nancæjo Metas, ita, ut omne spatium, viis istis comprehensum, ad Regem spectaret, prout etiam Longvicum.

Utamque, quod dictum, respuit conditionem Dux Carolus Leopoldus, quarum prima absorberet dimidiam partem Lotharingiæ: altera præcipuam partem & communicationem Ducis cum suis terris, cum viæ illæ essent totidem aggeres, aut vincula, quibus esset ligatus.

Obit Carol.
Leopold.

Obiit Dux Carolus Leopoldus anno 1690, Welfii in Austria, dum Oeniponto Viennam tenderet, ætatem, si annos spectes, non altam (47 agebat); si gesta, profundissimam implevit. Viennensis, Barcana, Strigoniensis, Mohazensis excellentes victoriæ, Buda expugnata, Transylvania & Hungaria Cæsari assertæ, perpetua sunt trophæa Lotharingicæ gloriæ.

Leopold.
Joseph.

Ex Eleonora conjuge, Leopoldi Cæsaris sorore, Regis Poloniae vidua reliquit quinque præstantes Principes, quibus omnibus Josephi nomen impositum. Et quidem *Leopoldus Josephus*, natu maximus, successit in jura patris, restitutaque est ei Lotharingia per pacem Risvicensem in eo statu, quo Carolus III. ejus propatruus ante annum 1670 eam possederat. Josephus Ignatius Electoratum Trevirensis est consecutus. Reliqui tres Cæsari militabant.

Leopoldus Josephus anno post restitutam Lotharingiam matrimonio sibi junxit Elisabetham Ducis Aurelianensis filiam, ex qua 13 proles genuit. Reliquæ præmatura ætate sunt defunctæ. *Franciscum Stephanum* Augustissimum Imperatorem nostrum veneramur: Elisabetha Carolo Emmanueli, moderno Regi Sardiniae fuit nupta. Carolus est Gubernator Belgii, & supremus Ordinis

Teutonicus Magister. Anna Carolina cœlibem vitam elegit.



CAPUT XI.
DE
STATU POLONIÆ
SÆCULO XVII.

ARTICULUS I.

SUMMARIUM.

Suecos ad Rigam vincunt Poloni. Smolenscum expugnant: brevi tamen ad Russos rediit, & Cozimum ad Turcas. Obiit Sigism. III. succedit Ladisl. filius. Livonia ad Suecos. Casimiri Regis fata. Cosacci deficiunt. Pax sæpius illis data: sæpius fracta. Sueci discerpunt Poloniam, & Ragozius. Hujus fata.

Sigismundum III. Poloniæ Regem, Joannis Sueciæ Regis filium, a Carolo Sudermannia Duce, patruo suo, throno Suecico dejectum anno 1600, indeque bellum diuturnum enatum esse, in Suecicis memoravimus. 68.

Anno 1605 Poloni Sudermannia Principem, qui Carolum Polonorum IX se dixit, a *Riga*, quam obsederat, depulere, cæsis ad novem Suecorum millibus; tantaque fuit fugientium confusio, ut deleri ad internecionem potuissent, si Poloni alacrius acriusque quam essent persecuti victoriam. Polonorum pauci, si cum Suecis comparentur, fuerunt desiderati.

Involuta dein Polonia etiam cum Russis bello, Demetrios, qui Joannis Basilidis filios se dicebant, throno Russico imponere conata est. Felix Sigismundo fluxit annus 1611, quo *Smolenskum*, munitissimam in Lithuania ad Boristhenem urbem, post biennem oppugnationem expugnavit. Ultra centum Moscorum millia eo biennio periisse dicuntur. Mirum videri posset, quod Sigismundus hoc tempore Moscoviam sit adortus, & non potius, conciliatis sibi Russis, toto pondere in Sudermannum usurpatorem Suecosque incubuerit, ut Regnum avitum repeteret. At feliciores fuere Sueci, quod ipsi Russos nacti sint socios; quamvis Danus Polonis accesserit adversus Suecos.

Anno

**Rufus ad
Rufos.** Anno 1612, dum Sigismundus ceremoniis *Inveftitura* Borufficæ, Brandeburgo impertiendæ otiofe immoratur, Poloni victi ex Mofcovia pulsi funt; & quod dolendum maxime, Smolenskum, quod tanto sanguine sumptuque Polonis confiterat, milite & re armamentaria parum provifum, in Ruforum manus fuit relapfum.

Anno 1620 Poloni a Moldaviæ Principe, a Turcis depofito, implorati, 8000 miferunt, quæ tamen a Turcis & Tartaris partim concifa, partim in fugam funt compulfa.

Turcæ cæfi. Anno fequente Osmannus cum innumerabili exercitu Polonos & Cofaccos, castris munitis circumvallatos, eft aggreffus, fed tanta fuorum frage repulfus eft, ut pacem refpiceret, hac lege conceffam, ut Tartarorum & Cofaccorum procurfiones & rapinæ fevere cohibeantur. Vaivada Moldaviæ fit Chriftianus, fed a Sultano nominandus. *Chozimum* a Polonis eidem reftituatur.

**Chozim ad
Turcas.** Dum autem Polonorum arma in Turcas erant abtracta, Guftavus Rex Sueciæ, fractis induciis, Livoniam invafit, Riga aliisque locis expugnatis. Tum vero novas cum Sigismundo inducias pepigit.

Obit Sigism. Anno 1636 obit Sigismundus III, Poloniæ Rex, & jure paterno etiam Sueciæ; fed a patruo corona fpoliatus. Unde bellum, quod diu, fed fatis frigide geflit. Facla cum Suecis pace, occafionem Guftavo dedit, in Germaniam irruendi. Vixit annos 66, rexit Poloniam 44, Sueciam 7. Duas fucceffive fiores habuit conjuges Annam & Conftantiam, Caroli Archiducis filias, Ferdinandi II. Imperatoris fiores. Ex prima genuit Uladiflaum IV, qui patri in Regno Poloniæ fucceffit: ex fecunda joannem Cafimirum, cui poft fratris mortem fceptrum obtigit.

**Uladiflaus
IV.** Uladiflaus igitur, qui jam antea adverfus Rufos & Turcas præclara fortitudinis fpecimina ediderat, Regnum adeptus, remiffus illud, ac fper præbuerat, adminiftravit; nam deferto, cum maxime opus haberet, auxilio, Ferdinando Cæfare, avunculo fuo, inducias, cum Suecis a patre initas, Sturasdorffii in 26 annos prorogavit, ea quidem lege, ut Sueci Boruffiam Poloniæ reftituerent, Livoniam aut in retinerent ad tempus induciarum.

**Livonia ad
Suecos.** Anno 1648 mortuus eft Ladiflaus IV, æt. 53, Regni 16. Duas conjuges habuit, primam Renatam, Ferdinandi II Cæfaris filiam, fecundam Mariam Nivernenfis & Mantuani Ducis natam. Ex neutra reliquit liberos: unde fucceffit per electionem *Joannes Cafimirus* frater, qui duxit Mariam Nivernenfem, fratris Uladiflai reliquam viduam, difpenfante in impedimento affinitatis Pontifice.

**Cafimiri
II.**

Cafi-

Casimirus, optimæ quidem indolis Princeps, sed inconstantis, cum junior adhuc esset, a Rege Hispaniæ Prorex Lusitanie fuerat electus, sed in itinere a Gallis captus est. Ad fratris Vladislai instantiam liber dimissus, societati Jesu animum adjecit, Novitiatum Romæ ingressus. Inde vero extractus Cardinalium Collegio a Pontifice est aggregatus, & post mortem fratris a Polonis Rex electus.

Summum ei negotium fecerunt Cosacci, genx ferox & seu-
tum hætenus Poloniæ adversus Tartaros Turcasque; nam, cum ^{Cosacci des-}
acerbius a Polonis, quorum erant subditi, se haberi crederent, ^{ciunt.}
Kmielnicio incentore defecerunt, vocatis in auxilium Tartaris, solitis ad hæc usque tempora suis hostibus. Ad Korsum Polonos, quos Potokius ducebat, profligant, rursusque ad Constantinovum. Ecce initium belli diuturni, Polonis funesti, & Casimiro Regi calamitosi.

Anno 1649. bis cruento prælio victa a paucis Polonis innumerabili Cosaccorum & Tartarorum multitudine pax confecta est. Casimirus solvet Chamo pensionem, quam Vladislaus negaverat: veniam dabit Cosaccis, privilegia confirmabit, augebit eorum millia ad 40000 capitum: permittet in Regno exercitium Religionis Græcicæ: Palatinus Kioviæ semper sit ejusdem ritus: Chamus defendet fines Poloniæ: *Kmielnicius* de genu rogabit a Rege rebellionis veniam. Hæc pax vix annum tulit; barbaris rursus contra Polonos coeuntibus. Casi sapius.

Anno 1651. Casimirus Rex cum centum millium exercitu in campum Martium progressus contra trecenta Cosaccorum & Tartarorum millia, pugna, ad Bereteskolum commissa, eos vicit, & 6000 in acie cæsis, in fugam egit. Sed hydræ Erimanthæ instar succrescebant: licet paulo post iterum ad decem barbarorum millia sint cæsa, iterumque tria millia in Lithuania, in quam irruerant. Pax sapius data.

Concessa petentibus rursus pax: rursusque *Kmielnicius* veniam rogavit; sed eo animo, quo antea, nempe, ut, instauratis copiis, in aciem iterum prodire posset, icto etiam cum Moscis fœdere, qui una cum Cosaccis & Tartaris sequenti anno in Lithuaniam irruerunt, omnemque propemodum Poloniam barbarum in morem devastarunt. Sapius ru-
pta.

Anno 1654. Mosci post trimestrem obsidionem Smolenscum expugnarunt. Anno vero sequenti, cum omnia in Polonia miscerentur, etiam Carolus Gustavus, Rex Sueciæ, ruptis absque causa

induciis, bello repentino eandem obruit, & jam alias laceram dilaniare non erubuit. (anno 1655.)

Sueci in Poloniam.

Jamque potissimam Poloniæ partem victoriis emensus, Borussia quoque, Lutheranis scatentem, in potestatem redegit. At vero inclita natione Polonica se respiciente, & peregrinæ dominationis pertæsa, Casimirus Rex e Silesia, quo confugerat, in Regnum suum rediit, accepto nuntio, a subditis in favorem suum arma fuisse correpta.

At vero Suecus, ubi vidit, Polonos in se armatos, Electorem Brandenburgicum socium ascivit, concessa ei & confirmata Borussia Ducali, adjectis ex alieno tribus Poloniæ Palatinatibus. Portuum autem Balthicorum proventus voluerunt esse utrique communes.

Calamitas Poloniæ.

Sed Zarnefcus, Polonorum Ductor, Suecos ad Jaroslaviam adortus, aciei campo & impedimentis exiit. Verum Posnamiam inter & Gnesnam Polonis clades est reddita. Illi nihilofecius Varsoviæ receperunt. At mox cæsi rursus amiserunt. Sueci vero Brandenburgicis juncti, Massoviam devastarunt, obliquis oculis eos progressus aspicientibus Danis, Moscis, & ipsis adeo Hollandis, qui classem Balthico immiserunt, pro libertate navigationum defendenda.

Ragozi cæsus.

Anno 1657 Ragozius quoque Transylvaniæ Princeps, Suecorum socius, cum 3000 in afflictam Poloniam irruit, injuriam se passum caussatus, quod Casimirus in electione sibi esset prælatus. At vero, cum Polonia undique discerperetur, Moscus & Danus bellum Suecis denuntiavit; Cæsar quoque copias auxiliares Polonis misit. Quare Suecus, relicta Polonia, in Danum, hostem sibi proxime imminentem movit, atque Ragozium Cæsareis atque Polonis cædendum permisit. Et sane cæsus est egregie, atque, Moldavis & Valachis, Sultani jussu, eum deferentibus, ad pacem petendam adactus.

Data est hæc illi, ea lege, ut foederi Suecico renuntiet, a Casimiro Rege offensam deprecetur: quadringenta thalerorum millia Casimiro & Regi Hungariæ solvat, & insuper 150000 Tartarorum Chamo, qui & ipse, quod mirum, ex hoste amicus factus, Poloniæ fatifcenti subsidio venerat: Ecclesiasticis Transylvaniæ bona erepta restituat: Poloniæ, quoties requisitus fuerit, succurrat. Atque sic Princeps iste, ambitione turgens, coronam somniatam, & denique, ut alias dictum, & Principatum Transylvaniæ & vitam amisit, irato Sultano, vel iram simulante, quod se non consulto arma in Poloniam vertisset.

ARTI-

ARTICULUS II.

SUMMARIUM.

Polonia respirat. Pax Olivenfis, victis Suecis fecunda. Casimirus abdicat Regnum. Eligitur Coribut: post hunc Sobieski, qui rem restituit. Viennam liberat. Irruptio in Turciam minus felix: obitus & elogium Sobieski. Eligitur Augustus.

Inter hæc autem Sueco in Daniam averso, requiescere aliquantum 69.
 Poloniae licuit; ut adeo etiam in Daniam, cum reliquis fœderatis, Cæsare, Brandenburg, & Batavis; copias auxiliares posset mittere, quibus ita contritus est Carolus Gustavus, ingens illud belli fulmen, ut pacem petere, quin & mortem, rerum conversarum tædio, oppetere coactus fuerit. Rerum con- versio.

Ad pacem dein serio respiciente Suecia, Gallia interveniente, eam obtinuit. Electus illi conficiendæ locus in Borussia Polonica, Monasterium videlicet Olivæ, haud procul Gedano remotum; unde & *Pax Olivenfis* dicitur.

Conventum in hos articulos, devictæ Sueciæ nimium propitios.

1. Sit amnestia perpetua inter Polonos, Danos, Brandenburgum, Pax Olivenfis.
 Batavos ex una, & Sueciam ex altera parte.
2. In civitatibus Borussiae Regalis omnia sacra & profana in statu antiquo conserventur.
3. Casimirus Rex Poloniae renuntiat omni juri, quod habet in Sueciam & Finniam.
4. Livoniam & Estoniam Poloni cedunt Suecis. Religio tamen Polonis no- xia.
 maneat libera.
5. Sueci restituant Polonis loca, quæ in Borussia Regali præfidiis adhuc suis occupata tenent.
6. Curlandia Polonis maneat.
7. Spontent pro hac pace Principes contrahentes, & Gallus Mediator.
8. Si injuria inferatur, satisfiat; alias licebit armis prosequi.
9. Gallus præcipue est fidejussor, & obligat se ad defendendam hanc pacem. (anno 1660.)

Mosco non admodum placuit hæc pacificatio, quod Suecis addicta esset Livonia, cujus partem ipse jam occupasset; unde Polonos rursus est aggressus: sed a Zernicio & Sapieha, Polonis Du-

cibus, gravi clade affectus recessit: alteram cladem anno 1661. accepit a Lubomirskio Principe, qui dein cum pluribus Magnatibus seditionem movit adversus Casimirum Regem, cum Moscis autem 30 annorum induciæ sunt contractæ, relictis illis interim Smolensko & Chiovia magno Poloniæ detrimento. Confecta etiam pax cum Tartaris.

Casimirus
abdica-
t Re-
gnum.

Anno 1667. obiit Varsoviæ Ludovica Gonzaga seu Niver-
nensis, duorum fratrum, Uladislai & Casimiri successive uxor:
quæ nativum suum affectum in Galliam nunquam deposuit.

Factus sti-
pendiarius.

Anno 1668. Casimirus Poloniæ Rex, rerum adversarum tæ-
dio, Magnatibus ab eo averfis, corona in comitiis Varsoviensibus
deposita, in Galliam abiit, ubi a Rege, ut sustentari possit, plures
Abbatias accepit, felicior futurus, si primæ vocationi institisset, &
extra rerum humanarum, sursum deorsum euntium, turbines, so-
lum calorum Regnum, nullis curis, nullique mutationi obnoxii-
um, quæsiisset.

Coribut.

Anno sequenti Poloniæ Rex electus est *Michaël Coribut*,
Wisnoviskius, præteritis magnis competitoribus, Philippo Wil-
helmo Duce Neoburgico, qui Annam Casimiri sororem habuerat
conjugem: & Carolo Leopoldo Lotharingo, magno bellatore.

Novo Poloniæ Regi nullatenus quieto esse licuit; nam Tar-
tari rebellibus Cosaccis sociati Poloniam rursus invaserunt. Mis-
sus in eos Joannes Sobieskius, qui pluribus inclarescens victoriis
coronæ præludebat.

Camene-
cum
ad Turcas.

Verum anno sequenti Turcæ quoque insurgentes, *Camene-
cum*, Principem Podoliæ urbem, & unicum prope adversus barba-
rorum incursum in iis partibus munimentum, Polonis extorserunt:
qui cessa Sultano *Podolia*, certaue annua pensione promissa, pa-
cem emerunt. Verum probrosus hic tractatus executioni non fuit
mandatus: mox enim bellum cum Turca, Tartaro, & Cosacco
recruduit.

Obit Casimi-
rus & cum eo
familia Ja-
gellonica

Anno 1672. Niverni in Gallia turbis humanis exemptus
est Joannes *Casimirus*, Rex olim Poloniæ, affabilis, ad omnium
promptus obsequia, id velle solitus, quod alii, & præsertim uxor,
eum volebant velle: extincta cum illo est Jagellonica Familia, per
tria secula Poloniæ dominata.

& Coribut.

Anno sequente Casimirum secutus est *Coributus* Rex Polo-
niæ, æt. 33, Regni 4. Ejus vidua Eleonora, Leopoldi Imperatoris
soror, nupta postea est Carolo Leopoldo, Duci Lotharingiæ,
præmium hoc decernente Cæsare Heroi invicto: qui non procul
abfuit

abfuit a corona Polonica, Imperatore & Lithuanis faventibus, at obfistente Gallia.

Poloni vero inclinabant ad Joannem Wilhelmum, Ducis Neoburgici filium, crediturque, eligendum fuiſſe, ſi Eleonoram, Regis Coributi viduam, Polonis pergratam, naſtus eſſet conjugem. At illa ad Lotharingum reſpexit. Inter reliquos Candidatos eminebant, frater Regis Daniæ, Princeps Electoralis Brandenburgicus, filius Zari, Abaſſius Princeps Tranſylvaniæ, omnes pro corona Religionem Catholicam parati aſſumere. Mirum ſane, tot procos hanc coronam appetere tot ſpinis cinctam. Sed tamen corona eſt.

Tandem vero, cum in omnium recenti memoria eſſent *Joannis Sobieski* grandia geſta & in Rempublicam merita, maximeque *Sobieski Rex* relata nuper ad Cozum inſignis a Turcis victoria, ipſaque urbs Cozum permunita ad Poloniam reducta, perorante pro eo Palatino Ruſſiæ, conſentientibus ſuffragiis Rex electus eſt. (anno 1674.)

Nec pœnituit Polonos; quia novus Rex multas urbes & op- *Geſta.* pida Turcis extorſit, negato etiam tributo, quod Antecēſſores Sultano annuatim perſolverant. Coſaccos quoque ita attrivit, ut Ucraniam prope totam ad Poloniam reduceret.

Verum Turcæ & Tartari, majori numero venientes, Sharraſum obſederunt. Præſidio huic urbi erant impoſita 5000 Ruſſicorum, qui, cum Præſectus nollet eandem dedere, de mœnibus cum præcipitarunt. Baſſa, urbe dedita, immane hoc facinus eis exprobravit, & occiſis ſenioribus, reliquos in ſervitutem abſtraxit.

Pax Regi erat neceſſaria; cum quinque duntaxat, dilapſis *Generoſitas.* reliquis, ei ſupereſſent armatorum millia; ſed cum Turcæ Podoliam & annuum tributum peterent, Ucraniam Dorozensko, qui jam ante caput ſuſtulerat, tradi, tanquam feudum Portæ Ottomanicæ poſſidendam, omnes denique belli ſumptus ſibi refundi, experrecti Poloni indignatique, collectis viribus in hoſtem ducti *Pax honeſta* ſunt, atque Turcæ & Tartarus gemina clade affecti, ferocia poſita, *cum Turcis.* haud paulo mitiores conditiones pacis, Zurani ad Borithenem conſectæ, admiferunt. Abolitur probroſum pactum tributum annui. Retenta Podolia, & Ucraina cis Borithenem; relicta Turcis pars altera, quam Dorofencus detinuerat. Promiſit inſuper gens Muſulmanna protectionem Religionis Catholicæ in terris ſuis, reſtitutionem Ordini S. Franciſci, cui Schismatici ſacrum ſepulchrum in Palæſtina eripuerant, aſſiſtere Polonis contra omnes eorum hoſtes. Detrectavit Sultanus hæc pacta confirmare, niſi poſt-

quam Vizirius ei persuasit, nihil prosperum agi posse contra Polonos, donec Sobieskium fortuna secunda deferat.

Viennam liberat.

Sed laudem omnem Regis Joannis superat liberata a Turcarum jugo *Vienna*; quippe cum Sultanus Hungariam esset aggressus, cum Imperatore Leopoldo foedus pepigit, Bethunia conjuge, ut scribitur, quamvis Francica, persuadente, quod speraret, Jacobo filio archiducem nupturam. Quum dein Cara Mustapha Viennam arcta obsidione cingeret, quindecim aut (prout alii scribunt) viginti Polonorum millia selecti militis adduxit, atque junctus Lotharingo Turcam, praelio caesum, Vienna depulit. Varii scriptores hic nescio quantum, beneficium, Caesari impensum, memorant: & fuit; sed quid Polonia fuisset futurum, si Turca Austriam, aut etiam Hungariam tantum suam in potestatem redegisset, non satis considerant. Licet ergo Polonus magnum Austriacae Domui beneficium contulerit, una tamen securitati Regni sui consuluisse, nemo prudens est, qui ambigat. Poloniam bello Turcico non adjutam a Caesare opponunt; sed qui poterat, bello gravissimo in Occidente districtus? Cur silent de missis auxiliis, cum Polonia a Suecis opprimeretur? Ceterum Papam Innocentium XI non parum contulisse, ut Polonus in hujus societatem belli veniret, apud omnes est omnino certum; nam pecuniam etiam non parca manu submisit, ut conscriberentur auxiliares copiae.

Marigny.

Iniit etiam Rex Joannes anno 1686. foedus cum Zaro, non satis ex usu & honore Poloniae; nam pro duobus thalerorum millionibus cessit ei Ducatum Kioviensem, Zernicoviensem, Severiensem, cum Smolensko, sed tanquam depositum pro eo solummodo tempore, quo bellum contra Turcas esset gesturus, quos si aggrederetur ad Boristhenem atque in Tartaria Crimæa, mutuo si i essent auxilia; Zarus invitaret etiam Franciam, Angliam, Daniam, Hollandiam, ut junctis viribus adversus Infideles procederent.

Meditabatur nempe Rex in Moldaviam & Valachiam irrue-
re, easque provincias Domui suae hæreditarias reddere; quam in rem cum Caesare pactum arcanum contraxerat. Displicuerunt Reipublicæ hæc pacta, prout etiam, quod in comitiis filium suum natu maximum proximo sibi loco collocaret, quæ res carebat exemplo, & cum libertate sua pugnare Magnatibus visa est, quasi Sobieskius eis vellet ostendere, quem post se Regem essent habituri. Quare Jacobo filio, ut animi pacarentur, Grodno recedendum omnino fuit.

Ut autem Rex consiliis suis effectum daret, anno 1686. ^{Irruptio in} mense Julio, quo solent Poloni ad bella procedere, expeditionem ^{Turciam mi-} Moldavicam suscepit, Jassoque, principe civitate occupata, a pro- ^{nus felix.} vincialibus fidei juramentum recepit. Cumque hostem nullum inveniret, statuit, per Bessarabiam ad mare usque nigrum penetrare. Verum cum procederet, alimenta omnia a Tartaris combusta vidit; quare iter reflectere coactus, nec leve damnum a Tartaris passus, in Poloniam pervenit, expeditione plus splendoris quam utilitatis nanciscente. Id tamen commodi attulit Cæsari, ut, Tartaro in Polonos averso, suas in Hungaria facilius posset prosequi victorias.

Nec annorum sequentium expeditio venit feracior, deficientibus, milite, re armamentaria, machinarum magistris; unde Camenecum frustra obfessum.

Anno tamen 1694. propitium Polonis sidus affulsit, dum ad Boristhenem 50000 Tartarorum Turcarumque exercitum fuderunt, 4000 in loco pugnae occumbentibus, & 5000 curribus interceptis.

Sed annus 1696. grave vulnus inflixit Poloniae, dum Joannem III Regem, ^{Obit Sobies-} meritis in Regnum, & totam Christianitatem ^{ki Rex.} plenum sustulit, ætatis 72, Regni 22, Principem vivacis spiritus, bonarum artium sapientumque amantem, facundum, belli gnarum, fortemque, qui gloriosis, a Turca Tartaroque relatis vitam signavit victoriis. Vivet nomen Sobieskii, quamdiu Vienna stabit.

Ex Bethunia, quam in Francia duxit, genuit Parisiis Jacobum Ludovicum, quem, ut successorem haberet, omni studio curaque frustra contendit, gratitudine beneficiis non respondente. Jacobus porro, cum Imperatricis filiam non obtineret, sororem duxit ejusdem Hedvigem, Philippi Wilhelmi, Ducis Neoburgici Electoris Palatini filiam, ex qua suscepit *Clementinam*, Jacobo III. Angliæ Regi, quem *Prætendentem* appellant, collocatam. Jacobus porro, spe regni dejectus, excessit patria, & Olavii in Silesia sedem fixit.

Reliquit etiam Rex Joannes, præter duos filios, Alexandrum & Constantinum, Theresiam Cunigundam, Maximiliano Emmanueli Electori Bavariae nuptam anno 1695.

Anno 1697. Cardinalis Radsevicus Archiep. Gnesnensis, Primas Poloniae, ad electionem novi Regis faciendam convocavit Nobiles. Ultra duo millia convenisse dicuntur in campo ad Varsoviā, oblatamque coronam Electori Bavariae, qui eam recusasset,

Augustus
Rex.

set, ne Belgio subtraheretur. Duo autem erant magni competitores, Augustus Elector Saxoniae, jam ante biennium ad sacra Catholica transgressus, & Franciscus Ludovicus Borbonius, Princeps Contius. Uterque se stitit, uterque Rex fuit proclamatus, favente Primatæ Contio; sed prævaluit Augustus, ea tamen adjecta conditione, ut abdicet Ministros Lutheranos, munera publica Polonis conferat, Camenecum & Podoliam ad coronam reducat, libertates Regni *Electivi* conservet, pecuniam distributam ne repetat, damna per militem suum illata sarciat. Testimonium exhibeat, se coram Principe Saxo-Citico, Episcopo Javarino, professionem fidei Catholicae edidisse, eamque deinceps omni studio conservet, atque etiam conjugem suam ad eandem perducere alla-
boret.



CAPUT XII.

DE

STATU SUECIAE

SÆCULO XVII.

SUMMARIUM.

Sigismundus ob Religionem Regno Sueciae privatus. Bellum diuturnum. Gustavi Adolphi initia, progressus, finis. Christina filia succedit. Regnum abdicat, convertitur. Ejus elogium. Carolus X. Bipontinus in Polonos, Danos. Cæsus ubique pinguem tamen pacem Olivæ invenit. Ejus effigies. Carolus XI. Galliae adhæret. Omnia in Germania amittit bello: omnia recuparat pace. Ejus liberi.

70.
Sigismundus
Regno pri-
vatus.

Joanni Sueciæ Regi, in Religionis negotio nutanti, anno 1592. mortuo, successit filius *Sigismundus*, a Catharina, Sigismundi I. Poloniae Regis filia, in Religione Catholica pie educatus. Sed

Sed quia is etiam Rex Poloniæ fuit electus, Carolus, Sudermanniæ Princeps, rebellionem adversus nepotem mota, Sueciæ Regnum eidem rapuit; accedente eidem populo, cui Sigismundus, Princeps optimus, propter solam Religionem fuit exosus. Enatum inde bellum grave ac diuturnum patrum inter & nepotem, qui tandem Regno & hæreditate paterna per insignem injuriam omnino excidit.

Anno 1601. Radzivilius Princeps egregiam a Suecis victoriam retulit, caesis duobus eorum millibus. Dux Sudermanniæ, ^{Bellum} ut se vindicaret, incendiis & rapinis in terras Polonorum est grassatus. Zamoscus autem expugnavit Volmerum, capto Carolo, Sudermanni notho, urbis Praefecto.

Anno 1604 Ordines Sueciæ Nortköpingæ coronam detulerunt Carolo Duci Sudermanniæ contra jus manifestum Sigismundi nepotis, Regis legitimi, qui cum suis liberis in odium Religionis perpetuo fuit exclusus, statutumque, ut fœminæ potius Lutheranae, deficientibus masculis, succedant, quæ tamen nubant aut Sueco aut Germano ejusdem Religionis, cum assensu Statuum. Mirum profecto, quod avita Religio de throno deturbet, novella vero viam ad eundem sternat.

Anno 1605. Sueci magna cum strage ab obsidione Rigæ a Polonis depulsi sunt. Anno vero 1611. etiam Dania bellum indicit Sueciæ, illudque contra Carolum IX. tam feliciter egit, ut ad desperationem eum prope adigeret. Certe brevi post tædio, quod creditur, obiit 30. Oct. anno ætatis 61. dejecti nepotis & administrati Regni 11.

Magnus fuit in filio *Gustapbo Adolpbo*, quem in Regno & bello Polonico successorem habuit. Is, ut Polonos acrius posset opprimere, anno 1613. cum Danis pacem iniit. Hi restituunt Colmarum & insulam Oelandiam. Suecus promittit abstinere titulis, qui in præjudicium Daniæ Regis cedunt.

Anno 1617. Gustavus cum Russis quoque pacem pepigit. ^{Gustavi A-} Cesserunt eidem cum Kexholmia urbe provinciam Ingræ: ^{dolpho initia.} prote-
stante contra hanc cessionem Sigismundo Rege Poloniæ, quod Mosci res alienas donarent.

Anno 1621. Gustavus, fracta cum Polonis pace, Livoniam invasit, rapuitque, Sigismundo gravi cum Turcis bello involuto. Inita tamen rursus induciæ.

Verum anno 1626. inito cum Dano & Saxoniae Inferioris circulo foedere, Borussia Polonicam, trajecto exercitu est aggressus, direpta Elbinga, Marienburgo, aliisque locis.

Vixus jam tunc est agitare consilia adversus Ferdinandum Imperatorem, & crescentem in dies potentiam Domus Austriacae; hinc obtulisse Sigismundo pacem dicitur, & consensisse, ut Regis Sueciae titulum praeferat, illudque Regnum ad filios Sigismundi transeat, si nullum ipse masculum haeredem reliqueret: at renuisse Sigismundum, ea spe fretum, se a Ferdinando Imperatore post devictos hostes adjutum iri, ut Regnum Sueciae, patrimonium suum, consequatur.

Verum parciore adversus Suecos fortuna usi sunt Poloni, anno 1627. ad Casamartham caeli a Gustavo. Praelium vero ad Gedanum, eo non leviter vulnerato, nox diremit. Tertia pariter pugna fuit anceps, parte utraque canente victoriam.

Cæsus. Verum anno 1629. Gustavus Adolphus experiri debuit, neque heroes esse securos ab adversae ictu fortunae; nam praelio ad Maneverdam a Polonis, quibus Ferdinandus Imperator suppetias adjunxerat, profligatus, Marienburgum profugit in Borussia. Dissensio inter Polonos & Germanos spatium victo dedit, ut ibidem exercitum suum contritum repararet.

Bivotus Baro, qui Regem Daniae in summum vitae discrimen adduxerat, prope etiam erat, ut Gustavum, quem non cognoverat, sclopi explosione interimeret, fallente ictu equum, cui infederat, prostravit. Quidam scriptores referunt, Bivoti glandem non aberrasse, sed incidisse in pileum Gustavi, qui tamen singulari virtute fuerit munitus, ut globus in caput non penetraret.

Inducias cum Polonis init. Non mediocrem fuisse Suecorum cladem, ex eo quoque elucet, quod Gustavus, Conciliatoribus Francia & Anglia, ingentes Imperatoris progressus obliquis oculis aspicientibus, in sex annorum inducias cum Polonis consenserit, fatales omnino Cæsari, totique Germaniae.

Ejus postulat. Nam anno 1630. scripta ad Electores Imperii epistola con-questus adversus Imperatorem, quod Polonis hostibus suis misisset auxilia, postulavit, ut Caesareae copiae ex Inferiori & Superiori Saxonia decedant, munimenta ad Balthicum constructa diruantur: Megapolitani Duces restituantur: Stralsunda liberetur &c.

In Germaniam irruit. Verum, cum Caesar, tot tantisque victoriis munitus, Suecos non admodum timendos putaret, negligi visa est ejus postulat. Quapropter Gustavus suum militem, & genio soli nativi & diu-

& diuturno bello Polonico probe duratum subactumque, pulsus Cæsareis in Rügiam Insulam exponit, indeque in Pomeraniam, icto cum Bogislao fœdere, irrumpit.

Percussum pariter fœdus cum Gallia, ad restituendos Im-
perii Principes. Illa offert pecuniam, Suecia milites. Religioni
cavetur, & Ligæ Catholicæ, si quiescat. Pactum ad 6 annos por-
rigitur.

Anno 1631 Protestantes Germaniæ accedunt *Lipsiæ* Regi
Sueciæ. Francofurtum ad Viadrum Cæsareis eripit. Cüstrino & Lipsiacum.
& Spandavio imponit præsidium cum Electoris consensu. Rex ve-
ro Galliæ secretum init fœdus cum Maxim. Electore Baviariæ ad
mutuam possessionum defensionem, in 8 annos. Sequitur excidi-
um Magdeburgi, Sueco non afferente promissa auxilia. Suecus
Lipsiensem reportat victoriam. Oxenstirnius suadet Regi, ut recta
Viennam tendat. At ille declinat in Franconiam, ubi pingua sunt
sacerdotia. Herbipolim expugnat, Saxo Pragam, & reliquam Bo-
hemiam. Hailbronna Suecis ultro aperit portas. Moguntia vi ca-
pitur.

Anno 1632. Tillius ad Lycum vulneratus obit. Suecus Au-
gustam intrat. Ingolstadium frustra oppugnat. Bavariam vastat.
Monachium ingreditur. Ad Norimbergam, dum castra Bavari &
Wallensteinii aggreditur, plura millia perdit. Prælio Luzensi oc-
ciditur, anno ætatis 37, Regni 21. Prædicatur ceu heros incom-
parabilis & Alexander sui sæculi. Verum adversus Polonos non
adeo magnos progressus fecit, & Germaniæ ruinæ ab uno ferme
prælio Lipsiensi dependebant. Quod autem magnorum fuerit spi-
rituum Princeps, & immensæ ambitionis, nemo est, qui eat infi-
cias. Ex Electoris Brandenburgici filia genuit *Christinam*, quæ, Christina
licet 6 duntaxat esset annorum, proclamata est Regina Sueciæ.
Ex pellice autem Gustavo Adolpho natus est filius, qui *Gustavus*
Gustavi dicebatur, propter Episcopatum Osnabrugensem, quem
usurpavit, in Historia notus.

Anno 1633. Sueci, sollicitante Oxenstirnio, Regni Cancel-
lario, cum Gallia & Protestantibus Hailbrunnæ renovarunt fœdus.
Gallia promisit in annos singulos millionem librarum, Catholicæ
tamen Religioni in locis occupatis cautum voluit, licentiam quo-
que stipulata, Electori Baviariæ & reliquis Ligæ Catholicæ sociis,
partes neutras amplectendi. Solus Saxo, *Joannes Georgius*, licet Saxo dissen-
sissimè Lutheranus, quietæ tamen indolis, & Germani pectoris tit.
Princeps, qui Suecos, & Domum Vinariensem oderat, subscribere

noluit, excipiens, hæc pacta videri cum constitutionibus Imperii pugnare.

Sueci autem, mortuo licet Rege, hoc fœdere confirmati, direpta per Hornium Alsatia, atque Heidelbergæ Cæsareis abstracta, per omnem prope Germaniam truculentam vim & grassationem porrexerunt. Wallensteinus tamen non ignobilem de Suecis victoriam reportavit ad *Steinaviam*, omnemque prope Silesiam ad Imperatorem reduxit. Constantiæ quoque urbis virtus enituit, dum *Hornium* Suecum, pertinaciter eam obsidentem, constantia sua fregit. Hornius iram suam effudit in Sueviam, & Bavariam, quam tamen cum Vinariensi deserere coactus est post amissam Ratisbonam.

Mutatio re-
rum post pu-
gnam Nörd-
lingensem.

Anno 1634. Suecis ad *Nördlingam* cæsis, alia rebus facies induta est. Et vix non debellatum credebatur, nisi Gallia succurrisset Suecis, novo cum illis tractatu inito, quo simul, cum hætenus in Lotharingia atque ad Rhenum copias detinuissent, bellum Cæsari intulerunt, præsertim post captos Treviros & Electorem. (anno 1635.) Induciæ Suecorum cum Polonis, cum horum auxilio summopere indigeret Germania, in 26 annos sunt prorogatæ.

Saxo conciliatus.

Anno 1636. Suecia novum cum Gallia fœdus iniit Wismaris, conventumque, ut hæc ad Rhenum, illa in Bohemia & Silesia bellum gereret, eum in finem, ut Principes spoliati restituantur in integrum. Gallia quot annis Suecis numerabit millionem librarum Gallicarum. Fœdus tres annos vigeat. Saxo post pacem Pragensem in Suecos irruens, Magdeburgum illis eripuit; sed ad Wistochium a Baniero cladem accepit. Anno 1638. Suecia unionem cum Gallia iterum renovavit Hamburgi, de bello omnibus viribus prosequendo, ita, ut Galli in superiore Germania, Sueci vero in Saxonia & Marchia Brandenburgica illud circumferant.

Alia Suecorum gesta retulimus in relatione de Statu Germaniæ, prout etiam bellum, anno 1644. Daniæ illatum. Ragozium quoque Sueci adversus Domum Austriacam ad rebellionem concitarunt.

71.
Cartesius.

1650. Obiit Holmiæ Renatus Cartesius, vocatus eo ex Gallia a Christina Regina, cui Philosophiam explicuit, sed ab ea, quæ in scholis hætenus erat usitata, plurimum diversam, per quam multo magis inclaruit, quam per militiam, quam antea secutus fuerat. Quippe vix nata erant ejus turbinum vorticumque systemata, cum tota Peripatus, quæ ad id usque tempus in scholis regna-

regnaverat, bellum eidem denuntiavit. At ille numerosam brevi
sectatorum catervam in aciem eduxit, qui tamen pruritum novi-
tatis secuti, Samsonicarum instar vulpium, diversas rursus sectas
funderunt, in eo convenientes, ut antiquitati canos evellant.

Baillet aliique integra volumina laudibus Cartesii impleverunt, ampla adjecta panegyri de ejus Divino ingenio, meditationibus, diu noctuque continuatis, industria humanam transcendente, *Systemate adorando de motibus rapidissimis in summa quiete, Ejus Syste-* corporis extensione essentiali, animæ essentia cogitante, globulorum raptu, turbine, & stupenda syntaxe, de primis mentis ideis, *mata.* prorsus infallibilibus, de impossibilitate vacui, licet nihil sit medium, anima in sola glandula pineali hospitante, principio admirabili, de omnibus rebus & veritatibus, quantumvis evidentibus, dubitandum, nihil credendum, sed sensuum experientia explorandum, & ingenii acie penetrandum. Quæ sane omnia adeo rapiunt intellectum, bene dispositum, ut illi etiam indignantur, tam Divino viro thus non adoleri, qui nihil unquam in ejus libris legerunt.

Obiit hoc naturæ & gratiæ miraculum in Suecia, anno ætatis 54, magno, etiam mulierum, ejus Philosophiam adorantium, luctu: atque, ut reliquias saltem ejus venerari præsentibus possent, ossa in patriam fuerunt deportanda.

Anno 1650. Ordines Sueciæ conſenſerunt, ut Joannes Caſimirus Comes Palatino-Cleburgenſis, ex linea Bipontina, qui ſororem Guſtavi Adolphi habebat conjugem, Chriſtinæ in Regno ſuccederet, ſi contingeret, illam absque prole maſcula decedere. Sed, Caſimiro paulo poſt mortuo, filius ejus, Carolus Guſtavus, hujus fructum conſenſus retulit.

Nam anno 1654 Christina, raro in orbe exemplo, Regnum *Christina* abdicavit, illudque in Carolum Gustavum Bipontinum, patrualem abdicat Re-
 fuum, transfudit, reservata sibi pensione annua. Tanti operis ma-
 gnum. chinam movebat Religio, quam a Patribus societatis Jesu, sub ha-
 bitu sæculari latitantibus, fuerat edocta, non parum etiã ad id,
 ut pie credi potest, Pimentelio, legato Hispano, & Burdoloto,
 Medico Gallico, cum quibus frequentius conversabatur, contri-
 buente.

Carolus Gustavus, acerrimæ indolis Princeps, quietis per- Carolus X.
in Polonos.
tæsus, cum Poloniam a Tartaris, Cosaccis, Moscis vastari cerne-
ret, ut in partem spoliolum veniret, fractis induciis, irruit in
Poloniam (anno 1655.) ut Casimirum non modo paterno Sueciæ
Regno, sed & Polonico, depelleret, fretus & suo ingenio & vete-

rano bellisque assueto milite, & Procerum quorundam averſo a Caſimiro animo, ſibiſque addiſto.

Et ſane amplam ambitioni ſuæ meſſem invenit: occupata quippe Cracovia, magnam Poloniae & Maſſoviae partem, aut ultro deditam, aut vi expugnatam accepit; inde in Boruſſiam effuſus, omnia, ſi Gedanum exceperis, ſub jugum miſit.

At evigilavit tandem Polonia, ſeque reſpiciens, vicinorum Principum auxilia imploravit. Cæſar 16000 armatos miſit, Moſcus Rigam in Livonia obſedit, Tartari Ragozii, Suecorum ſocii, **In Danos.** copias attriverunt, Danus autem primus omnino Suecis bellum denuntiavit, quos propterea e Polonia adverſum ſe excivit, magnasque ab iis clades eſt paſſus, ut ad pacem *Rotſchildenſem*, quamvis, ob ceſſionem plurium locorum, ſibi pernicioſam, fuerit compulſus.

Verum non ſtetit ea Suecus; ſed, Regem Daniae penitus **Haffniam ex-** oppreſſurus, *Haffniam*, ſedem Regiam, oppugnavit. Periclitanti Daniae & ad extremam prope ruinam redactæ, ſuccurrerunt Cæſar, Brandenburgicus, Poloni, Moſci, Hollandique, qui, immiſſa in Balthicum claſſe, magnam Suecis cladem attulere, eoque, **Cæſus ubi-** poſt Nyburgenſem præſertim pugnam, atque direptam a Brandeburgo Pommeraniam Suecorum res ſunt redactæ, ut magnus ille totius paulo ante Septentrionis Domitor, qui duos jam Reges potentes prope ſub jugum miſerat, pacem rogare ab iis fuerit coactus.

Interceſſit pro Sueco Gallus, veteris amicitiae nexu adhucdum conjunctus, quadraginta armatorum millia comminatus, niſi honeſta pace finis bello imponeretur, referturque Lionnæus ad Bernclovium Sueciae oratorem dixiſſe, *ſe eidem ſex paces* dare: cum Cæſare videlicet, Dano, Brandeburgo, Polono, Batavo, Moſco; cum quibus omnibus Sueco erat dimicandum.

Obitus & Rebus Sueciae, paulo ante tam florentibus, jam vero acciſis & in ſummum diſcrimen adductis, Carolus Guſtavus, volubilem fortunæ rotam expertus, anno 1660 ineunte, animi mœrore & tædio obiit, æt. 38, Regni 6, indole Martia, natus bello Princeps, poſitis ſub Doſtenſonio militiæ rudimentis, ad palmas & lauros adoleverat, magno populorum, quos oppreſſit, malo. Sueciae Regnum, Chriſtinæ ceſſione adeptus, bellum decrevit ante, quam hoſtem deſignavit, Danum, an Moſcum, an Polonum invaderet, deliberans. Poloniam delegit, lento cum Cæſareis & Moſcis bello jam attritam, Procerumque factionibus & Regis infirmitate fatiſcentem. Quo rerum ſtatu veterano bellisque durato mili-
ti

ti facile erat, vel unius anni expeditione Regnum amplissimum percurrere potius quam expugnare, cum, Rege in Silesiam profugo, vix esset, qui resisteret.

Carolo Gustavo successit filius, Carolus XI. ex Hedvige Gottorpenſi natus, quinque tunc annorum puer. Sueciæ autem, tot hostibus impar, votis omnibus pacem respexit, quam, Conciliatore Gallo, opimam obtinuit, bello victa, *Olivenſi* pace victrix. Pax Olivenſis. Nam Caſimirus, abdicato jure paterno in Sueciam, Livoniam & Estoniaſiam eidem ceſſit (*vid. Polon.*)

Cum dein Gallia Hollandiam invaſiſſet, Suecus primum conciliatoris munus aſſumpſit; cum autem pax non poſſet coaleſcere, Carolus XI. ac in Gallia gratiam Electoris Brandenburgici diſtiones invaſit; quare cedit Gallia. Batavi, Hiſpani, & Dani ei bellum denuntiarunt.

Anno 1656. commiſſa in Balſtico pugna navalis, qua a Danis & Batavis victi ſunt Sueci. Complures Sueciæ urbes victoriæ præmium fuere. Sueci nempe non amplius erant Sueci: ſive, quod Omnia in deficeret veteranus duratusque miles, ſive quod Duces deeſſent, Germania ſive quod otio in torporem deferbuerint. Hinc ne deſperatio eos amittit, deſiceret, Francia Daniæ bellum indixit, prout etiam Brandenburgico, qui Pomeraniam Suecicam aggreſſus, Anclamum, Lokenicum, ac poſtea Stetinum, Stralfundam, Rugiam, Gripswaldam, totamque Pomeraniam Suecicam, incredibili celeritate expugnavit. Danus in Scaniam effuſus non modicos armorum progreſſus fecit. Luneburgici aliiſque ſocii Ducatum Bremenſem & Principatum Verdenſem abſtraxerunt, ut adeo Suecis in Germania nec palmus ſuper-eſſet. Sed profuit Gallia ſœderatæ favor; nam pacificatione Neomagenſi aliisſque omnia Sueciæ debebant reſtitui, Bremenſis tamen & Verdenſis ditio cum certa limitatione. & recuperat.

Anno 1689. Romæ pientiffime obiit Chriſtina, Regina olim Sueciæ, magni Guſtavi Adolphi filia, nata anno 1625, Regina 1632, abdicat coronam 1654, eodemque anno proſitetur fidem Catholicam Obitus Chriſti-næ & elo-gium. Bruxellis.

Vix invenias in Hiſtoria ſceminam Principem (Elifabetham Angliæ Reginam ſi excipias) tot laudibus ſuper aſtra exaltatam, totque vituperiis ad inferos depreſſam. Doluit nempe Proteſtantiſ-ſibus tam illuſtre converſionis exemplum; hinc atro carbone eandem depingunt ceu levem, inſtantem, libertinam, vagam, ſcemi-nas omnes, quaſi ſexus puderet, exoſam, cum ſolis viris converſantem, virili habitu indutam, ut varia regionum luſtratione oculos & curioſitatem paſceret, Regnum abdicantem, ac vagantem.

Alii

Alii vero meliori jure prædicant ejus virtutes, integritatem, pudicitiam, cœlibatum, ingenium, sapientiam, in Religione Catholica, propter quam Regnum, patriamque deseruit, immotam ad mortem usque constantiam. Certe fuit doctissima, & supra conditionem sexus, omnibus artium scientiarumque disciplinis multo ornatissima. Varias præter Græcam & Latinam linguas callebat, tamque apte & concinne loquebatur, ac si nativæ essent. Lætitio illi perpetua & cum sapientibus conversatio. Litteraturæ humanioris elegantia, oratorum eloquentia, Poetarum nitor, Philosophorum, antiquiorum & recentiorum systemata, Historicorum multifaria eruditio, Chymix miracula, diu noctuque habebant occupatam; nec tamen Religionis officiis defuit, ut adeo alteram Reginam Saba, aut decimam, vel omnino primam Musam quidam eandem deprædicent. Si quis hæc animi excelsi ornamenta curiositatem, levitatem, aut omnino nugas appellet, nescio sane, cujus spiritus esse debeat, certe rudis, hebetis, humilis, & abiecti, qui indignus sit, ut artium liberalium scientiarumque innocuam dulcedinem persentiscat.

Interea autem Sueci, vibicibus adhuc lividi, quieverunt ad mortem usque Caroli XI, quæ contigit anno 1697, æt. 42, Regni 37, postquam Regnum in summas calamitates præcipitaverat, non eruendum, nisi advolasset Genius ex machina.

Ex Ulrica, Friderici III. Daniæ Regis filia, reliquit tres liberos, memoria dignos. 1. Hedvigem Sophiam, Friderico V. Ducis Holstato-Gottorpiensi nuptam, ex quo suscepit Carolum Fridericum, Annæ Petrowinæ conjugatum, patrem Caroli Petri Ulrici, Moscovix Imperatoris; qui nuperrime throno dejectus, subito ex hoc mundo disparuit.

2. Carolum XII, 15 tunc annorum Principem, qui desideriis & fama totum mundum implevit, fortuna utraque notissimum.

3. Ulricam Eleonoram, Reginam postea Sueciæ, desponsam Friderico Hassiæ Principi, cui Regnum cessit.

Carolus, quem dixi, spirituum exæstuantium Princeps, patri successit in throno Sueciæ, quem pene amisit, dum alios suo deturbare voluit.



CAPUT XIII.
DE
STATU DANIAE
SÆCULO XVII.

SUMMARIUM.

Dania vetus. Dania nova, ad Oldenburgicam Domum. Christianus IV tria bella gessit, duo cum Sueco, unum cum Ferd. II. Cæsare, pace Lubecensi finitum: Frid. III. duo cum Suecis, pace Rotfchildensi & Olivensi terminata. Regnum facit hæreditarium. Christianus V varia fortuna cum Suecis configit. Pace Risvicensi coactus, omnia Suecis restituere.

Dania, olim Cimbria appellata, a Dano, primo suo Rege nomen accepit, circa annum mundi 3000, dicunturque ^{72.} 26 Antiqua Dania. Reges ante Christi nativitatem ibidem imperasse, Suibdaniam. gerum tria Borealia Regna conjunxisse, a Fronthone etiam Angliam & Hiberniam adjectas.

Seculo IX post Christum natum Haraldus & Ericus Danici Principes Moguntiae sunt baptizati, & S. Ansharius Religionem Christianam in Septentrionem propagavit.

Cum Henricus auceps sec. X. Schlesvicensem Marchionatum ad fines Imperii defendendos erigeret, Gormo III bellum eidem intulit. Haraldo VIII Otto M. persuasit, ut Christianam Religionem susciperet, atque subditos quoque ad eandem adduceret.

Canutus M. Angliam & Norvegiam subegit, & singulis ex tribus filiis Regnum reliquit (Sec. XI.)

Ericus III Archiepiscopatum Lundensem ineunte Sec. XII fundavit; nam ad id usque tempus Episcopi Daniae Bremensi Archiepiscopo fuerant subiecti. Waldemar I Vandalis Insulam Rugiam aliaque eripuit.

Waldemar II a Comite Suerinensi captus est ob violatam conjugem. Ericus VI a fratre suo Abele interfectus. Dania, a comitibus Holfatiae & Anseaticis civitatibus vastata (Sec. XIII.)

Cum Waldemar III prolem masculam non haberet, successit filia Margaretha, facta etiam Regina Sueciæ & Norvegiæ; lataque est lex, ut omnes tres coronæ in uno capite perpetuo manerent unicæ (*Sec. XIV.*)

Ericus X Pomeranus a Margaretha Regina agnata hæres declaratus, tria Regna obtinuit, sed omnia tria rursus amisit, in Pomeraniam fugatus. Christophorus Bavarus ab omnibus tribus Regnis assumptus in Regem propter matrem, Olai Regis filiam. At hoc anno 1448 sine liberis mortuo, extinctum est stemma Dani, a Dano perpetua serie propagatum, sic tamen, ut deficientibus masculis etiam fœminæ, & fœminarum filii ad coronam vocarentur.

Ad Oidenburgicos. Throno itaque vacante translatus est sceptrum ad Domum Oldenburgicam, in qua hodieum floret. Et primo quidem electus est a Danis Christianus I, Comes Oldenburgicus, a Norvegia quoque & Suecia in Regem postmodum assumptus, qui Holsatiæ Comitatum, materna hæreditate acceptum, in Ducatum mutavit, & Hassniæ Academiam fundavit. Successit in trino Regno filius Joannes. (*Sec. XV.*)

Hujus filius Christianus II, seu Christiernus, pessimæ vitæ Princeps concubiniarius, patrata Holmiæ sanguinaria Nobilium, Procerum, & Sacerdotum laniena, primus ad Lutherum defecit, atque accersitis ex Saxonia Præconibus, populum pervertere satagebat. Throno dejectus 27 annos in carcere contabuit, ultimus, qui omnia tria Regna conjuncta possederat; nam Suecia non amplius uniri poterat. (*Sec. XVI.*)

73. Bellum cum Sueco primum. Christianus IV Daniæ Rex Sudermanniæ Duci, quem Sueci post dejectum Sigismundum Carolum IX dixere, bellum anno 1611 denuntiavit, quod is Norvegiæ dimidium sibi arrogaret, subditis suis toto Balthico piscandi copiam faceret, atque varios sibi titulos attribueret, qui in præjudicium Daniæ cedant, uti Regis Laponiæ &c. Spem felicitis eventus haud dubie Christiano fecerunt bellum Polonicum & domesticæ Suecorum discordiæ, & bene se dabant initia; siquidem Danus Colmatum expugnavit, pluresque Sueco clades intulit. Irritatus animoque æger Carolus Christianum ad duellum provocavit; at respondit is, desperationis hoc argumentum esse: indigere Suecum, quo cerebrum purget, hel-leboro. Carolus brevi post tædio obiit.

Anno 1612. Hollandi cum civitatibus Hanseaticis fœdus percusserunt, in id maxime intentum, ut Danus adigatur telonium Sundi-

Sundicum abolere, & navibus ex Oceano in Balthicum liberum sine vestigali cursum permittere. Verum hoc erat Dano pupillam oculi tangere. Abolendum tamen tantisper fuit.

Anno 1613 Rex Christianus IV cum Gustavo Adolpho pacem sancit. Ille restituit ablata: hic abstinebit titulis, Daniae invisis. Miscuit se deinceps Danus turbis Germanicis & Bohemicis, Alterum cum Friderici V partes secutus; intra siparium tamen adhuc latuit, Cæsare. donec anno 1626 theatrum belli aperuit; quippe fœdere cum Hollandis, Suecis, & circulo Saxoniae Inferioris percussio, a quibus est electus caput & Imperator belli, Ferdinando II Cæsari inferendi.

Scripsit etiam ad Moguntinum, Bavarum, aliosque Catholicos Electores litteras publicas, quibus significavit, se arma corripuisse, necessitate compulsus, ut libertatem Germaniae defendat, a Domo Austriaca oppressam. Sed nescio, an minus fortunæ, an artis bellicae attulerit. Nihil ex composito procedebat. Cæsus est ad Luteram a Tillio, & in Holsatiam repulsus: iterumque a Wallensteinio ad Wolgastum.

Tandem anno 1629 *pacem Lubecensem* iniit. Renuntiavit Rex fœderi Protestantico, & amissa recepit.

Quiete deinceps fruebatur Dania, bello Suecico in Germaniam detonante ad annum usque 1644. & quia invisam habebat crescentem vicinæ gentis potentiam, plura egit, unde Sueci causam belli eidem inferendi allegabant. Terra marique infelix fuit Dania, donec, pluribus locis in hostium manu relictis, obtinuit pacem. Tertium cum Sueco.

Anno 1648 decessit Christianus IV Daniae & Norvegiæ Rex, æt. 72, Regni 60. Bellum cum Imperatore Ferdinando primum, subin cum Suecis gessit, ab utrisque cæsus. Ex Electoris Brandenburgici filia suscepit Fridericum III, qui in Regno ei successit.

Anno 1657, cum Suecus, jam alias per pacem West. pluribus in Germania provinciis dilatatus, ambitioni suæ & crescendi cupiditati terminum non poneret, sed Poloniam quoque devorare viribus omnibus contenderet, vicini Principes, potentiam vastam, in omnem partem exporrectam, veriti, alia sibi consilia ineunda putarunt.

Quare Daniae Rex, ruinæ vicinior, ut Regno suo provideat, Sueco bellum indixit, confusus Cæsareis, Russicis, & Hollandicis subsidiiis. Et primo quidem mari tentata belli alea pugnatum acriter, pari ferme utrinque damno. Congressi rursus Sueci, Quartum.

a Danis victi sunt. Sed mox cladem Dani receperunt; tantaque deinceps Sueci fortuna usi sunt, ut per concreta glacie maria, ausu stupendo penetrantes, ad ipsam propemodum Hafniam pertingerent.

Quare Dano, ni perire vellet, nihil erat reliquum, nisi ut *Rotschildensem* pacem iniret, quantumvis sibi perniciosam: per eam etenim Sueco permisit Scaniam, Bleckingiam, Hallandiam, Bornhelmiam, vestrigal Oresundicum, Nidrosiam, Bahusiam.

Quintum.
Hafnia ob-
fessa.

Pax Olivæ.

Verum hac pace mox fracta, Carolus Gustavus in Zeelandiam penetravit, & *Hafniam* oppugnavit. Accurrerunt igitur ad liberandam sedem Regiam copiae Cælareæ sub Montecuculo & Sufa, Polonica sub Zernicio, cum classe Hollandica, quam Obdamus ducebat, atque in Balthico cum Suecica feliciter conflixit. Cæso dein a fœderatis Suecorum exercitu, Carolus Gustavus non modo obsidionem Hafniæ compulsus est solvere, sed etiam pacem rogare: quæ *Olivæ*, Borussia Regalis Monasterio, anno 1660 conclusa est. Restituta Dano, quæ a Suecis fuerant ablata, de cætero ad pacem Rotschildensem fuit remissa.

Regnum fit
hæreditari-
um.

Annus 1660 felix videri poterat gemina pace, quæ arctas plagas pace Olivenfi, & meridianas occiduasque Pyrenæa pacavit. Sed Daniæ propterea etiam exoptatus venit, quod Ordines, Hafniæ collecti, Regnum ex electivo fecerint *hæreditarium*, cum suprema & independente potestate Friderico III. Regi delata, quamvis jam ante sanguini potius, quam electioni, fuerit debitum, jam inde a Dano primo Rege derivata profundissima origine, perpetuaque successione continuata in regnatrice Domo, & si masculi defuissent, a colo etiam deducto stamine, donec jam ante 300 annos ad Oldenburgicam Germaniæ Familiæ sceptrum translatum, atque in hanc usque diem continua serie fuit protensum.

Actum sane ex usu Daniæ, ut ex hac Domo non eligantur, sed nascantur Reges, quæ Oldenburgum, Delmenhorstum, magnam Holsatiæ partem, Slesvicensem Ducatum adjecit Daniæ. Fridericus autem Rex eo etiam gentis studia sibi adstrinxit, quod Hafnia adversus Suecos præstanti virtute defensa, magnis Regnum suum fœderibus communierit.


Bellum Sex-
tum.

Fatis tandem concessit Fridericus III anno 1670, æt. 61, Regni 22, successorem, jam hæreditarium, nactus est Christianum V, filium, ex Sophia Lüneburgensi susceptum. Bello is Hollandico magno fœderi accessit, & anno 1676 juncta classe sua cum Hollandica, prælio navali Suecos profligavit. Usus victoriæ fructibus,

bus, Corœnam, Elfenburgum, Christianopolim expugnavit, Suecis leviter resistentibus.

Verum anno 1676 Lundense prælium Suecis restituit, quidquid in Scania Danis accesserat. At anno sequenti pugna maritima Dani Suecos vicerunt haud procul Rostochio, navibus horum aliis captis, aliis laceratis. Sed paulo post Suecus vices reddidit: & multo magis anno 1678, quo Königsmarchius in Insula Rügen 7000 Danorum clade internecina delevit. At Dani, viribus instauratis, in Scaniam trajecti, Helsenburgum denuo expugnarunt: Bahusium autem incaſſum oppugnarunt, amissis ad hoc munimentum aliquot millibus. Mox Dani juncti Brandenburgicis in Insulam Rügen extenderunt, propulso inde Königsmarchio. Sed pace Risvicensi tam Danus quam Brandenburgus omnia, quæ Suecis eripuerant, restituere coacti sunt.

Anno 1699 obiit Christianus V æt. 54, Regni 29, successit filius Fridericus IV.



CAPUT XIV.

DE

BORUSSIA

SÆCULO XVII.

SUMMARIUM.

Investitura Borussiae a Polono collata. Lutherus cum Calvino commutatus. Dominium directum Borussiae cum utili consolidatum. Elbinga ad Borussum jure hypothecario. Fridericus Wilhelmus magnus actor sui sæculi Suecos in Balthicum propellit: sed omnia cogitur restituere. Succedit Frid. III.

Anno 1611 Sigismundus Rex Poloniæ Electori Brandenburgico *Investituram* Borussiae contulit. Anno 1619 obiit Joannes Sigismundus Elector Brandenburgicus, Dux Borussiae, qui

74.

Lutherus primus Lutherum cum Calvino permutavit, hujusque sectam, cum Calvino quantum poterat, introduxit, reclamantibus Lutheranis. Succes- permutatus. sit *Georgius Wilhelmus* filius, qui anno 1622 cum Hollandis fœ- dus iniit. Alet pro illis militum 3000, ut in plenam Juliacenſis Du- catus poſſeſſionem mittatur.

1640 obiit *Georgius Wilhelmus*, eique ſucceſſit *Fridericus Wilhelmus*, qui percuſſo cum Suecis fœdere, Poloniam, ſub Ca- ſimiro Rege jam alias miſere afflictam, invaſit, licet ratione Duca- lis Boruſſiæ illius eſſet vaſallus.

Verum, cum magnum adverſus Suecos fœdus coaleſce- ret, plus ſpei in hoc collocans, ſocius acceſſit, ſtabilito cum Po- lonia pacto, quo hæc ei *Elbingam* tradit cum aliis quibusdam locis, ita tamen, ut Poloniæ integrum ſit, eam ducentis thalerorum mil- libus redimere: ſimulque Rex & Respublica, abdicato directo in Boruſſiam Ducalem dominio, ſupremam & independentem pote- ſtatem de ea diſponendi eidem conceſſit. Suecos dein Boruſſus in Pommerania, quam diſiſam ægerrime tulerat, Caſaris auxilio ar- mis aggreſſus, totam propemodum occupavit, Stettino tamen fru- ſtra oppugnato. Secuta anno 1660 *Olivenſi pace* reſtitui quidem Sueco debuit ſua Pomeraniæ portio, ſoluta tamen Boruſſia Polo- niæ clientela, & directo dominio a Caſimiro abdicato.

Boruſſia a
Polonia ma-
numiſſa.

Cum anno 1672 Rex Franciæ Lud. XIV Batavis bellum illaturus, per Cliviennes terras tranſiret, pluresque urbes intercep- ſet, *Fridericus Wilhelmus*, Elector Brandeburgicus, ut Hollandis ſuccurreret, Cliviamque reciperet, cum Imperatore & Batavis fœ- dere inito, ad Rhenum movit, atque agrum Monaſterienſem & Co- lonienſem devaſtavit; ſed imminente Turenio trans Viſurgin ſe re- cepit, relicto Gallis etiam Marchiæ comitatu.

Verum, ut provincias ſuas reciperet, anno 1673 cum Gal- lis pactum iniit, quo promiſit, neutrius ſe partis fore, donec Im- perium maneret illaſum. Sed cum Franci procul abeſſent, arma reſumpſit, magnumque pro potentia ſua pondus addidit magno adverſus Gallos fœderi, grandi Batavorum, jam ferme conſumpto- rum, commodo.

Electoris ge-
ſta in Pom-
merania.

Verum anno 1675 Suecus, a Gallis perſuaſus, in provin- cias Electoris irrupit, ſed tam lento gradu, ut Electori ſufficiens ſpatium concederetur, copias ſuas traducendi. Mox autem, poſt- quam traduxit, in Pomeraniam Suecicam illapſus, Anclanum alias- que in ea urbes eis eripuit. Impegit tamen ad Stettinum, quo vota ejus potiſſimum ferebantur; nam poſtquam 5000 ollas ignia- rias

rias eidem iniecit, & ultra 2000 hominum amisit, obsidionem solvit.

Felicior Electori fuit annus 1677, quo Stettinum post quinque mensium obsidionem Suecis eripuit, fame ad deditionem compellente. Sueci cor suum e corpore evulsam, & Elector novam sibi animam inspiratam putabant.

Sed longe felicissimus Electori venit annus 1678, quo magna sane fortitudine Stralsundam, scopulum illum Wallensteinii, ad quem ejus olim virtus & fortuna impegit, brevi temporis spatio expugnavit, cedente in gloriæ partem Gripsvalda, ultimo, quem Sueci in Pomerania habuerant, loco.

Mira profecto rerum humanarum vicissitudo! Marchio Brandenburgicus, mediocris haud ita pridem potentiae Princeps, quam Suecia vix attentione dignam judicaret, per ipsam potissimum Sueciam in pace Westph. tot accessionibus auctus est, ut de universa jam, domitrice illa Germaniæ, Sueciæ Majestatem triumpharet, nec pugillo terræ relicto in Germania, quo pedem figeret. Sic eunt humana: revolvuntur terrarum Imperia, & quod haud ita pridem toti Europæ erat formidandum, paulo post vel ab uno obscuri antea nominis Principe vincitur. Exempla & causas asserre invidiosum fuerit. Satis oberrant oculis.

Sed ecce novas rerum vices! Fridericus Wilhelmus, Elector Brandenburgicus, tam gloriosus Suecorum victor, redhibere mox debuit omnia, quæ tanta fortitudine tantoque impendio occupaverat; quippe artibus Galliæ dissoluto magno fœdere, anno 1679 pax Neomagi confecta est, qua jubebatur Suecus restitui.

Noluit subscribere Elector. Sed desertus a sociis, Crequio jam Cliviam ingressus, suo milite ab eo cæso, quum videret, totas Galliæ & Sueciæ vires in se unum convertendas, cumque alia promissa nihil proficerent, tractatu ad S. Germanum inito, dilectum sibi Stettinum, Stralsundam, totamque Pomeraniam citeriorem Suecis reddere debuit, ira in Cæsarem innocuum versa, qui tali paci restitit, quantum poterat, sed desertus a sociis, maris potentibus, ab Hispania, a Sabaudia, pacisci necesse habuit.

Anno 1688 obiit celebratus hic Heros *Fridericus Wilhelmus* æt. 68, Regiminis 48, Marchiæ suæ Brandenburgicæ adjecit Ducatum Pomeraniæ trans Viadrum, Magdeburgensem Principatum, Mindensem, Halberstadiensem. Borussiam Ducalem a Poloniæ jure directo abstraxit, per conjugem Auriacam semina jecit ad novas accessiones. Successit filius *Fridericus III*, ex Auriaca susceptus.

Hic

Elbinga.

Hic anno 1698 Elbingam petiit a Polonis, jure pignoris sibi debitam, donec creditum restituatur, prout stipulatum esses anno 1657, moxque urbem occupavit, Augusto Rege graviter conquerente; cumque res bellum spectare videretur, Cæsare, Suecia, & Dania interveniente, conventum est, ut Elector urbem redderet, sed, si intra tres menses hypotheca pecunia soluta (ducenta thalerorum millia prætendebat) non relueretur, sibi fas esset, Elbingam cum dominio adjacente rursus occupare.

Quæ porro gesserit Elector Brandenburgicus in bello tricennali; quomodo accesserit fœderi Lipsiaco, ac dein transactioni Dresdensi; quantum auctus sit per pacem Westphalicam, quomodo divisa Pomerania; quæ ab eo acta in causa Juliacensi, pluraque alia in Germanicis sunt relata.



CAPUT XV.

DE

R U S S I A

SÆCULO XVII.

SUMMARIUM.

Russia vetus: nova. Comœdia cum quatuor Demetriis. Ad Domum Romanoviam. Alexius Michaelovicius tres reliquit liberos, qui omnes imperarunt. Frequens bellum cum Turcis, Tartaris, Suecis & Polonis. Conjunctio in Petrum Zarum detecta. Sophia sororis, & Gallicini tutoris pœna.

75.
Antiqua Russia.

Sæculo VI, gens Slavonica in eas regiones, quas Moscoviam hodie dicimus, migrasse memoratur, ductore *Russo*, fratre Zechi & Lechi; unde & nomen *Russæ* derivatur. Tres autem *Russæ* designantur, *Alba*, *Rubra*, & *Nigra*. Prima ad Lithuaniam, altera ad Poloniam spectat, tertia Moscoviam complectitur. Sæculo X. Wolodomirus Christianam Religionem suscepit.

Sæculo

Sæculo XIII. Tartari *Ruffiam* subegerunt, primusque Dani-
lovus, *Magni Ducis* nomine assumpto, sedem in urbe *Moscua* fi-
xit; unde *Ruffi Moscovitæ* appellari cœperunt. Joannes *Basilides*
I sæculo XV jugum Tartarorum excussit; *Lithuani* autem *Ruffiam*
rubram, & *Poloni* albam ad se traxerunt.

Sæculo XVI. *Basilius Czari* nomen, quod magnum Principem denotat, assumpsisse dicitur. Ejus vero filius *Joannes Basilides II*, immanis tyrannus, Regnum *Astracanum* ad mare *Caspium*, & *Calanum* Tartaris eripuit, & *Ruffiæ* adjecit. Hujus filius *Theodorus* anno 1598, cum absque liberis decessisset, seriem antiqui stemmatis clausit.

Habuerat autem *Theodorus* fratrem *Demetrium*, quem *Boris* interfecerat, seque ipsum throno intrusit. Quindecim deinceps annis omnia in *Moscovia* sursum deorsum voluta sunt. Quippe quatuor successive erant deceptores, qui *Demetrium Theodori* fratrem mentiebantur, atque *Joannis Basilidis* filios.

Et primus quidem fingebat, se esse *Demetrium Theodori* fratrem, *Boridis* crudelitati subtractum, aliumque adolescentem clam fuisse substitutum in suum locum. *Palatinus Sendomiriæ*, conciliata illi Regis & *Polonorum* gratia, propriam filiam ei despondit. Conducta decem *Polonorum*, & totidem *Cosaccorum* millia, quibus *Boris* cum centum millibus occurrit. Victus quidem est prælio *Demetrius*; plures tamen urbes illius partes sunt secutæ. Mors *Boridis* faciliorem ei ad solium gradum substravit.

Nam anno 1605 *Moscua* fuit coronatus, postquam eum *Joannis Basilidis* vidua, per lepidam sane comœdiam pro filio suo agnovit. Verum non diu tenuit *Demetrii* hujus Regnum, nam anno sequenti (1606) cum grande symposium *Proceribus* instruxisset, a conjuratis *Moscis* trucidatus fuit, & cum illo 1700 *Poloni*. Ferunt amorem *Demetrii* in *Polonos* fuisse conjurationis causam. *Basilidis* vidua noluit amplius esse mater: necessitate cogente salutatum a se filium asserens. Cæterum vero nomine *Grisca* appellatus dicitur, humili loco natus.

Suiskius, conjuratorum princeps, cui *Demetrius* vitam donaverat, renunciatus est *Zarus*. Sed haud multo post tempore comparuit alius, qui verum *Demetrium* se ferebat, cui pariter favit *Sigismundus*, haud dubie, ut *Ruffis* hostibus suis domi negotium faceret. *Sueci* vero *Suiskio* venere suppetias.

Tandem vero, postquam cum quatuor *Demetriis*, instru-
tibus comœdiam quibusdam *Polonis*, satis lusus est, & corona

Ruffia ad Ruffica aliquot capita levi saltu pertransiit, Mosci anno 1613 Za-
Domum Ro- rum sibi elegerunt *Michaelem Fæderovicium* ex *Romanowia* Fami-
manow. lia, qui Smolenskum recepit, & Polonos ex Ruffia ejecit, post-
quam illi, expugnata Novogrodo, in viscera Moscoviæ penetrantes, ipsam urbem Moscuam, Ducum sedem, suæ potestati sub-
jecerant. Cladem subin gravem passus Moscus, cum Polonis
& Suecis pacem composuit, & ad mortem usque servavit. Obiit
autem anno 1645, æt. 49, Regiminis 33.

Successit filius *Alexius Michaelovicus*, qui vindicaturus
clades, a Polonis illatas, cum Cosacco & Tartaro, id est, cum
Megæra & Tisiphone, juncta opera in Lithuaniam & Poloniam ir-
ruens, Regnum nobilissimum misere discerpfit.

Cum autem Suecus quoque superveniret in partem spoliï,
Moscus in Livoniam, quam Sueci Polonis eripuerant, arma con-
vertit, sed pro gentis illius tunc adhuc temporis imperitia, modi-
co progressu, donec post pacem Olivensem Sueci ab aliis hostibus
expediti, atque in Russos conversi, Livoniam liberarent, & paci-
ficatione anno 1661 subsecuta sibi firmarent. Alio videlicet Alci-
de opus erat, qui Herculi hanc clavam extorqueret.


Alexii 3. fi-
lii. Anno 1676 decessit *Alexius Michelovicus*, æt. 55, Regim.
31. tres ille filios reliquit, qui omnes imperarunt, videlicet Theo-
dorum, Joannem, & Petrum, qui proin *Alexiovicii* dicti sunt, id
est, Alexii filii.

Theodoro anno 1681 mortuo successit *Ivan* seu Joannes
Alexievicius frater natu proximus. At mox graves tumultus Mo-
scoviam concussere. Nam corporis custodes, *Strelizios* appellant,
Theodorum veneno enecatam suspicati, Magnatum cædibus omnia
complebant, Regia quoque ipsa & ærario expilatis. Postquam
dein Joannes, mentē & corpore debilis ac propemodum cæcus,
fratrem juniorem *Petrum Alexievicium* (cui nihil ad regendum nisi
ætas deerat) in consortem Imperii adlegisset, duobus annis satis
tranquille Ruffia conquiescebat, sub *Gallicinio*, utriusque fratris
tutore.

Conjuratio
in Petrum. Tum vero quietem turbavit *Sophia* soror, tracto etiam in
conjuratōnis societatem ipso Gallicino tutore. In Petrum præci-
pue cudebatur faba, acris ingenii & vivacis Principem, sub quo,
si ætas maturesceret, auctoritatem suam defluxuram facile prævi-
debant. Indignum igitur esse murmurabant, juniorem fratrem
habenas capeßere; majoris natu solius hanc esse prærogativam.
Sperasse dicuntur, Petro amoto a gubernaculo, ob joannis infir-
mitatem,

mitatem, totam penes se permanfuram regendi potestatem, atque, ut nexus firmitior effet, conventum, ut Sophia Gallicini filio nuberet, quo pacto pronior effet marito throni ascensus.

At Petrus, conjuratione detecta, Sophiam sororem in Monasterium, Gallicinos in exilium misit, Joanni tenacius adhærentes capite plexi. Retinuit ille quidem nomen Zari, sed nomen duntaxat, auctoritate penes Petrum residente: hanc liberius adhuc exeruit, postquam Joannes frater anno 1696 obiit. Quanta autem rerum gestarum gloria Petrus Alexievicius toto orbe inclaruerit, parte sequenti referetur.



CAPUT XVI.
DE
STATU TURCIÆ
SÆCULO XVII.
ARTICULUS I.

S U M M A R I U M.

De Mahometanorum & Turcarum origine, variisque nominibus barbarorum gentium, ad Alcoranum confluentium. Epitome de Imperatoribus Turcicis. Comœdia de Jacaja.

De Turcarum Imperio sparsim quidem in hoc apparatu facta est mentio, hic tamen aliqua in unum cumulum conjiciamus de origine & progressu barbaræ hujus gentis. Sæculo VII ineunte Mahomet Arabs, homo impius, prophetam mentitus, novam Religionem cudit, ex Christiana, Judaica, & Gentili conflata, quam ab auctore suo Mahometanam dicimus. 76.

Propter novam hanc sectam Mahomet ex Mecca, Arabiæ urbe, pulsus est; eamque fugam Turcæ Hegyram appellant, atque ab ea epocham suam ducunt. Dicti etiam Mahometis sectatores sunt Saraceni; quia a Sara se oriundum ferebat. Alii ab Agar Agarenos nominant.

Et Turcarum
origo.

Sæculo VIII *Turcæ*, ab extrema Asia profecti, cum Saracenis se junxerunt, atque promiscuo deinceps nomine *Turcæ*, Saraceni, Agareni, & postea ab Ottomanno primo suo Imperatore etiam *Ottomanni* sunt dicti, & *Mahometani* a Mahomete.

Grassatorum initio & prædonum erat manipulus, per Arabiam & Syriam vagans; sed quia illis Mahomet rapinas, carnis illecebras, omnemque vitæ licentiam indulgebat, globi instar nivei, e monte devoluti, in immensum sunt aucti, totumque prope Orientem in Asia & meridiem in Africa implebant. Denique, cum omne suum jus in armis circumferrent, etiam in Europam effusi hinc Thraciam, Macedoniam, Græciam, nobilissimas Romani Imperii provincias, occuparunt, inde Hispania rapta, atque Italia & Gallia devastata.

Negligi initio à Christianis videbatur prædator hic populus, donec una post alteram abstracta provincia, impares viribus Orientis Imperatores, expugnata Constantinopoli, totum Imperium amiserunt, Christianis Principibus, quod deplorandum, inter se collisis, & de pugillo terræ dimicantibus.

Visus quidem sæculo XII, & XIII, expergisci Occidens, dum hortatu Pontificum cruciatus in Palæstinam expeditiones suscepit; sed tandem Christianorum discordia fortiter gesta ac strenue parta rursus evertit, plaudente & in immensum se exporrigente barbaro, Christiani nominis hoste immanissimo.

In primordiis equidem gentis, dum Arabiæ & Syriæ finibus continebatur, ab uno omnes Principe, quem *Calypham* compellarent, regebantur, postea vero singulis, quas Christianis rapuerant, provinciis suis erat Calypha, donec anno 1303 *Ottomannus* novum in Natolia Principatum constituit, qui denique omnes Calyphas subegit. *Ottomannus* autem noluit appellari Calypha, sed *Sultanus*, & Imperium suum a suo nomine *Portam Ottomannicam*, aut etiam *Portam Fulgidam*, sedem autem suam fixit in urbe Bursa.

Sultanus. *Orchanes* ejus filius, ut titulum in Orientis Imperium unde undecunqueret, Joannis Cantacuzerri Imperatoris Græci filiam duxit conjugem. Concessit illam Imperator, ut, quem timebat, amicum habeat, præsentium magis sollicitus quam futurorum.

Turcarum Imperatores. Amurathes I certum genus pedestris militiæ (*Janizaros* vocant) introduxit, ex Christianorum, ut fertur, liberis, conflatum.

Bajazethes I a Tamerlane Tartarico Tyranno cavæ ferreæ inclusus, capite cratibus impacto, misere periit, ingens ambitionis trophæum.

Maho.

Mahomet I tres fratres suos, natu majores, trucidavit.

Amurathes II memoriam meretur propter insignem victoriam, quam ad Varnam anno 1444 retulit ab Uladislao, Hungariæ & Poloniæ Rege, qui cum multis Christianorum millibus in acie cecidit. Dicitur Amurathes invocasse Christianorum Deum, dum nutante pugna fugam jam circumspiceret, ut vindicaret injuriam, pace fracta sibi illatam.

Mahometes II anno 1353 Constantinopoli expugnata, finem imposuit Græcorum Imperio.

Selimus I eo tempore, quo Lutherus Septentrionem Europæum vastare cœpit, Ægyptum subjugavit, quam Caliphæ hactenus gubernaverant.

Solymanus II Turcarum Imperator, omnium potentissimus, Rhodum, Belgradum, Budam, (quanta munimenta!) expugnavit; sed ab obsidione Viennæ anno 1529 depulsus est. Imperavit 46 annis.

Selimus II anno 1570 Venetis Regnum Cypri eripuit.

Achmetes I legatum Viennam misit, qui pacem ad viginti annos extenderet, oblatis conditionibus, quæ a nullo unquam Turcarum Imperatore Cæsares obtinere potuerant; quippe concessit Sacerdotibus & Religiosis, ut in provinciis Turcicis Ecclesias construere, & officia Divina in iis peragere possint.

Ut autem pacem peteret, & indulgentem adeo Rei Catholicæ se præberet, impulere Achmetem turbæ domesticæ. Nam Jacaja se filium Mahometis III fratremque Achmetis seniore ven- Jacaja. ditabat. Matrem suam fuisse Christianam, & rumorem sparsisse, Jacajam filium suum esse mortuum, ne vitam amitteret: translatus esset in Peloponesum, ac dein in Macedoniam, ubi baptizatus esset, & ut securius lateret, habitu Monachi indutum.

Cum autem Jacaja non haberet in Turcia, qui sibi assisteret, percurrit Poloniam, Germaniam, Italiam, Galliam, obtestans Christianos Principes, ut datis subsidiiis ad Majorum suorum thronum se, Christianum Principem, promoveant; se memorem tanti beneficii toti Christianitati, quantum posset, gratiam relaturum. (*d'Avrigni Memoires Chronologiques pour servir a l'Histoire prophane de l'Europe*) sed non legitur, Christianos Principes quidquam pro eo movisse; fortassis, quia fabulam credebant, & Jacajam talem esse Imperatoris Turcarum filium, quales Demetrii Magni Russiæ Ducis.

Hæc perfunctorio opere attingere brevissime placuit, ut rudis idea tyronibus eruditionis exhibeatur. Ad sæculum jam XVII procedimus, & ea, quæ memorabilia magis videntur, uberiore aliquantulum calamo adumbrabimus, in quantum in tanta rerum vastitate breve compendium patietur.

ARTICULUS II.

De recentiore Turcia.

S U M M A R I U M.

In Moldaviam & Valachiam sibi jus Sultanus arrogat. Frequens transitus a throno ad carcerem, & e carcere ad thronum. Irruptio in Italiam. Cæsi a Polonis. Osmannus strangulatus, & Mustapha, ac Ibrahim. Venetorum de Turcis victoriæ. Candiam tamen amittunt. Bellum cum Polonis, a quibus adiunguntur ad pacem petendam. Post Viennam tentatam ubique confisi Turcæ a Cæsare & Polonis. Pax Carlovicia.

77.

Res Turcarum gestas, quæ Hungariam & Transilvaniam spectant, suo loco recensui; reliqua, quæ magis videntur digna, hic perstringam. Et quidem anno 1612 *Moldavia & Valachia* a gente illa fuit turbata. Siquidem Sultanus Constantinum provinciarum illarum Principem deposuit, eique Thomam surrogavit. Constantinus a Polonis petiit auxilia, & obtinuit 15000 Armatorum; sed gravem ab Ottomannis cladem passus est, quæ Turcam in possessione constituit, nominandi Moldaviæ & Valachiæ Principem, quem *Hospodar* aut *Woywodam* appellant.

Sultanus in
Valachiam &
Moldaviam
jus sibi arro-
gat.

Anno 1617 obiit Achmetes I, ætatis 30, Imperii 14, præterito ejus filio Osmanno, a Janizaris e carcere ad thronum ductus est Mustapha I, Achmetis frater. Sed anno 1618 hoc dejecto, & in Monasterium intruso, Osmannus ab iisdem Janizaris Imperator fuit proclamatus. Misit is Legatum in Franciam, deprecaturum injuriam, quam Mustapha Legato Gallico intulisset.

Anno 1620 Turcæ in Apuliam irruperunt, in qua Manfredoniam occuparunt, & expilarunt. Verum novo Vizirio in bellum Polonicum abrepto, Italia ab ulterioribus invasionibus conquivit, quamvis Triremes Gallicæ, Florentinæ, & Melitenfes magnum navium numerum Turcis eripuerint.

Anno

Anno 1621 Osmannus II, cum ducentis, aut trecentis, ut alii scribunt, millibus, Polonos invasit; sed amissis sexaginta millibus, ultro in pacem consensit, recepto tamen Chozimo, & jure nominandi Principem Moldaviæ & Valachiæ eidem asserto, Christianum tamen.

Mutata mox rerum scena, Osmannus, qui nuper trecentis ^{Sultanorum} satellitum millibus stipatus inceserat, a Janizaris strangulatus est, ^{miseria.} Mustapha vero ejus patruus e carcere deductus ad thronum, qui mox Viennam, in Poloniam, Venetias Oratores misit, ut pacem confirmarent. Dicuntur Janizari ad rebellionem & enorme parricidium concitati, quod Osmannus hoc militiæ genus, tam seditiosum, atque Imperatorum & Viziriorum capitibus tam periculosum, abrogare, sedemque Imperialem Constantinopoli Caurum in Ægyptum transferre conatus sit.

Sed neque Mustaphæ diuturnum fuit Imperium, quippe anno vertente Amurathes IV, Achmetis I filius, frater Osmanni II, Cydarim Turcicam induit, Mustapha in carcerem abducto, ac postea iaqueo suffocato. Ex quibus sane videas, quantam Turcia spiraret barbariem, quantumque sit paradoxum, supremum, independentem, & quasi omnipotentem esse tot populorum Dominum, & tamen in perpetuo vivere periculo capitis, aut saltem, ne a summo rerum apice in extremam miseriam præcipitetur. (*anno 1623.*)

Has inter turbas Cpolitanas *Tartari*, gens prorsus barbara ^{Tartari.} & indomita, pacem, cum Polonis conclusam, impune violare se posse rata, cum triginta grassatorum & latronum millibus in Poloniam irrupit, sed a generosa Natione tot cladibus fuit concisa, ut dimidia ne quidem pars ad gurgustia sua posset aufugere.

Cosacci, Poloniæ subjecti, uno tantum gradu minus barba- ^{Cosacci.} ri, quam Tartari, ut injuriam, ab his illatam vindicarent, in Tartariam Turcicam irrumpentes, populationem & incendia late spargebant, urso ursum devorante. (1624.)

Anno 1640 periit Amurathes IV, æt. 32, Imp. 17, successit Ibrahim frater, brevi a Janizaris strangulandus. Amurathes, contra morem Turcarum, ei vitam reliquit, quia amentem credidit, & ineptum ad imperandum.

Anno 1645 Vizirius Candiam seu Cretam, nobilissimam Venetorum insulam invasit. Occasionem dederunt Melicenses Equites, qui directas Turcarum naves, Caurum tendentes, interciperunt, atque in portum Venetum invexerunt. Turcæ, cum in Melicenses

litenſes vindictam non poſſent exerere, in Venetos illam vertērunt.

Bellum cum Venetis. Anno ſequentē Veneti prælio ad Rettimum a Turcis caſi ſunt. At anno 1648 munimentum Cliffæ expugnarunt. Cum autem Turcis bellum minus proſpero curſu procederet, & Ibrahim Sultanus ſceptro geſtando minus idoneus videretur, anno 1648 a Janiſſaris deſpoſitus, & laqueo ſuffocatus eſt. Succēſſit ei nepos ex fratre Solimanno II, *Mahometes IV.*

Nec hujus initia fuere magis proſpera; nam Veneti claſſem ejus partim merſerunt, partim ſparſo incendio delerunt. Anno ſequenti Turcæ obſidionem Candiaſ ſolverunt, poſtquam 10000 ad eandem amiſerant.

Anno 1654 Veneta claſſis in Hellesponro Turcicam aggreſſa inſignem eidem cladem intulit, & multo majorem anno ſequenti, commiſſo intra ipſas Dardanellas prælio.*

Bella Turcarum cum Cæſare in Hungaricis deſcripſi. Celebre eſt illud, quod propter Tranſylvaniam cœptum, per Victoriā Gothardenſem, & ſubſequam pacem Temeſienſem anno 1664 finitum eſt. Dicitur Divanum hanc pacem petiſſe, ut eo fortius Perſis, rebellibus in Ægypto, & Venetis poſſit reſiſtere.

Anno 1666 Venetis ad Cameam damnum paſſis, Vizirius cum numeroſo exercitu in Candiam movit, eamque infeſtare cœpit. Anno 1668 in aquis Cretenſibus conſerta navali pugna, quinque triremes Venetæ a Turcis captæ, & una demerſa.

Candia ad Turcas. Tandem anno 1669 Turcæ (dimicantibus inter ſe Chriſtianis Principibus) expugnarunt *Candiam*, poſtquam ultra biennium eandem oppugnaverant, amiſſis centum millibus hominum. Venetis relictae in illa duæ ſolummodo urbes, Suda & Spinalonga, una cum Cliffa & pluribus aliis in Dalmatia locis. Remiſſum tributum, quod ratione quorundam locorum Sultano pendere oportuit. Permiſſus egreſſus Chriſtianis cum magna machinarum bellicarum copia, ſuſpenſio armorum in 13 annos decreta. Atque ſic finiit.

* Dardanellæ appellantur duæ munitæ arces in Hellesponro, Seſtus & Abydus, quarum illa in Europa, hæc in Aſia, anguſto freto Gallipolitano ſejunctæ Propontidem inter & Archipelagum; atque hæc veteres *Dardanellæ* vocantur. Mahomet IV autem anno 1658 duo alia caſtella conſtruxit, ad initium freti, ex quibus ingreſſus navium in fretum & Propontidem tormentis arceri poſſeſt. Et hæc appellantur *Dardanellæ novæ*.

finiit bellum, per multos annos inter Venetam Rempubicam & Turcas, immanibus impensis gestum.

In Polonos deinceps versa sunt Turcarum arma, fortuna varia. Cozinum amissum, receptumque. Persis in Oriente bellum moventibus, mitius in Christianos saevitum.

A Persis reditum in Polonos, nimis prospero successu sub Ladislao & Coributo, qui etiam vectigalem Turcis fecit Sarmatiam. Verum Sobieskius, Rex electus, quas jam ante retulerat, strenue prosecutus victorias, tanta fortitudine barbaros, Turcas, Tartarosque profligavit, ut in pacem, Polonis gloriosam utilemque, consentire sint coacti. Deletum tributi dedecus. Retenta Podolia cum Ucraina cis Boristhenem. Consultum Religioni in Turcia. Promissa Poloniae defensio. Dicitur Sultanus hanc pacem noluisse approbare, donec ei ostensum fuisset, Sobieskio faventem magis fortunam assistere, quam ex usu sit gentis Ottomannicae, bellum contra eundem gerere.

Vertit postea arma in Caesarem, atque Cara Mustapha Duce ultra ducenta Turcarum millia ad obsidendam Viennam misit. Sed praelio caesi, non modo ex Austria, sed ex Hungaria quoque & Transylvania sunt propulsi. Vizirius laqueo suffocatus, Mahometes IV, anno 1687 throno dejectus, in carcerem detruditur, Solimannus III, ejus frater, e carcere ad solium evehitur. Bella varia.

Hic bella, contra Caesarem, Venetos, Polonos, Moscos, cladesque, a fratre relictas, prosecutus, pacem post amissum Belgradum, Nissam, Widdinum, petiit. Et utinam fuisset tunc concessa, antequam gravis procella ab Occidente ingrueret; qua confusus deinceps barbarus, quamvis attritus, ferociorem se exhibuit.

Nec diu tamen ei tumultuari licuit; nam anno 1691 decedens, thronum vacuum reliquit fratri juniori Achmeti II, quem frater in carcerem ante detruferat.

Anno 1694 Comes Jablonoski Polonorum, & Sapieha Lithuaniae Dux, 50000 Turcarum & Tartarorum ad Boristhenem aggressi, plenam de iis victoriam reportarunt, caesis in aciei campo 4000, captis 5000 curribus, munitionibus, annona, mercibus, & argento, Camenecum destinato, onustis. Dicuntur, eo praelio 12 solummodo caesi, & 40 sauciati. Quod si verum est, victoriam non multum fuisse disputatam necesse est. Mira victoria.

Veneti quoque bellum in Mediterraneo, Archipelago, & ipso Helleponto adversus Musulmannos fortiter sunt prosecuti,

Pars IX.


Xx

caesis

cæsis non raro nauticis eorum copiis, captis urbibus, ipsaque etiam Peloponeso Peninsula in potestatem redacta.

Anno 1695 obiit Achmetes II, Imperii 4, a Cæsare, Polono, Venetis, Mosco, contusus egregie. Successit nepos, Mustapha II, Mahometis IV filius, non magis felix, facileque tota Europa exturbandus, si Christiani Principes consensissent, imo, si aliqui non impedissent.

Tandem anno 1699 Carolovicum pacem reduxit, cum Polonis perpetuam, cum Cæsare ad 25 annos protensam, illis Camenecum cessum, huic Hungaria & Transylvania, Venetis Morea. Töckelio Turcæ Widdinum & Caransebes tradiderunt, in præmium navatæ operæ. Angli Hollandique interpositorum officio functi sunt; qui dein etiam inter Moscos & Portam pacem conciliarunt, ad 30 annos extensam.



CAPUT XVII.

CONCILIA ORIENTALIA

contra

PROTESTANTES CELEBRATA.

ARTICULUS I.

*Vani Lutheranorum conatus apud Jeremiam
Patriarcham.*

78.
Lutherano-
rum vanico-
natus.

Lutherani, ut ecclesiam suam arctis ad Septentrionem limitibus inclusam dilatarent, grandi mendacio, emissis, quibus fœcundi sunt, libellis, in vulgus sparserunt, Orientalem seu Græcam Ecclesiam, in dogmatibus fidei secum sentire, atque ne manifeste mendaces deprehenderentur, omnem moverunt lapidem, ut Augustanæ Confessionis suæ approbationem a Græcis extorquerent.

Mar-

Martinus Crusius, linguæ Græcæ Professor Tubingæ, primus aleam sibi tentandam ratus, contribules suos famosi nominis eo permovit, ut Stephanum Gerlachium, Cæsarei oratoris Constantinopoli ministrum, rogarent, Confessionem, quam diximus, offerret *Jeremiæ* Græcorum Patriarchæ Constantinopolitano, in Græcum jam ante traductam. Provinciam sibi demandatam lubens suscepit Gerlachius, nihilque non egit, ut Patriarchæ persuaderet, eam doctrinæ orientali esse conformem.

At Patriarcha aperte contestatus, Confessionem Augustanam Catholicæ fidei Deique verbo e diametro opponi, tribus doctissimis libellis, ad eos missis, errores confutavit, tandemque, cum missis epistolis patientiam Præfulis fatigarent, ne sibi amplius molesti essent, monuit, cum pervicacibus in errore nihil sibi deinceps fore negotii.

Quamvis autem Lutherani machinationibus suis caput vehementer impeggerint, Calvinistæ tamen sæculo sequenti nequaquam absteriti, ut auctoritatem sectæ conciliarent, omni ope sibi connitendum putabant, ut Europæ eam persuasionem ingererent, Græcam Orientalium Ecclesiam eandem secum religionem profiteri, quo & amplitudinem, & antiquitatem, & visibilitatem novellæ suæ Ecclesiæ extenderent. Calvinistarum fraudes.

Sed cum veritas manifesta obnixo desiderio obstaret, ad malas artes ventum & fraudes. *Cyrrillum Lucar* Hollandi pecuniæ largitione in Patriarchatum Constantinopolitanum intruserunt, hominem venalem ac nefarium, qui, ut gratiam patronis redderet, confessionem Calvinianam secreto consarcinasse dicitur, in Hollandia dein typis datam, ac pro sincera Græcorum fide per Europam vulgatam. Pulchra enim vero strophæ, & Calviniano digna ingenio! Sed mendax vafrities se ipsam in casses induit, & coram orbe palam prostituit. *Cyrrillus Lucar*.

Nam *Lucar* pseudo-patriarcha, princeps in hac fabula persona, propter scelera a *Selimo* deturbatus, atque *Euxino* merfus misere periit, & Græci, doctrinam suam Calvinianæ conformem haberi indigne ferentes, pluribus habitis synodis, eam injuriam a se sunt amoliti, proposita sua, & damnata Calvinistarum doctrina. Quæ res cum ad noscendam utriusque partis doctrinam plurimum valeat, eruditionis interesse existimo, prolixius aliquantum, quid in Orientalibus istis actum synodis, repræsentare.

ARTICULUS II.

*Concilium Constantinopolitanum I. contra Calvinistas.**Anno 1638.*

79. **C**um Orientales Græcique Præsules acceperant, quid Cyrillus Lucar attentasset, quidque de sua fidei doctrina per Occidentem spargeretur, Synodum congregarunt, atque præsentibus Alexandrino & Hierosolymitano Patriarchis, 23 Episcopis, & universo Clero Byzantino, Cyrillo Lucari ejusque Confessioni Calvinianæ anathema una voce dixerunt, hominemque exauctoratum, sede, quam inique per Simoniacam pravitatem invalerat, deturbarunt; suscepto in illius locum Cyrillo, Beroensi ante Episcopo.

*Synodus Constantinopolitana II. contra Calvinistas,**anno 1642.*

Cyrillo Beroensi Patriarcha Constantinopolitanus subrogatus est *Parthenius*, qui alteram ex Orientalibus convocavit synodum, ut Cyrilli Lucaris & Calvinistarum confessio iterato condemnetur. Prolata Calviniani erroris multa capita, & tanquam hæretica anathemate profligata. Juvat ex iis aliqua seligere, cum synodi censura.

1. Dicunt, Calvinistas abuti sacra scriptura, contra interpretationem SS. Patrum & Conciliorum Generalium.
- Calvinista- 2. Rejici ab eis Traditiones, quibus per totum mundum sit pretium errores. um, & sine quibus, secundum doctrinam S. Basilii, fides sit imperfecta.
3. Deum iniquissimum fieri a Calvinistis, tyrannica potestate utentem, cum dicunt, eum sola sua voluntate alios prædestinare ad gloriam, alios in pœnam mittere, nulla operum habita ratione. *Quo quid magis impium profervi possit?*
4. De Divina providentia blasphemare eos loqui, dum mala, quæ permittit, eidem ceu auctori attribuant.
5. Nullum hominem esse sine peccato mortali, ne quidem B. V. Mariam. *Hoc alienum a fide nostra judicatum est*, inquirunt.
6. Negant intercessionem sanctorum & custodiam angelorum, precesque, quæ a sacerdotibus per totum mundum fiunt. *Quibus Ecclesiam conservari credimus.*

7. Docent,

7. Docent, fidem salvare sine operibus: cœlestem & terrestrem Ecclesiam confundi. Tolli potestatem Episcopalem, & cum ea totam perfectionem Ecclesiæ. *Quo quid perturbatius esse possit?*
8. Ajunt, solos prædestinatos esse membra Ecclesiæ: hanc errare posse. *Quod, ut impium est damnatum a synodo.*
9. Afferere, quod bona opera nullam partem habeant in negotio salutis, esse contra S. Scripturam. Libertatem arbitrii tollere, esse naturam humanam evertere.
10. Quinque sacramenta ab illis negari. Reliqua vero duo non recte explicari. Divinam Eucharistiam ita convelli, ut nihil nisi nudam figuram ipsi relinquant, quasi adhuc in umbra veteris legis serviremus. *Hoc autem omni impietate plenum esse.* Neque enim dixisse Jesum: *hoc est figura corporis mei: sed: hoc est corpus meum: hic est sanguis meus.*
11. Repudiant solennes nobis ac legitimas pro defunctis commemorationes, per quas speramus requiem illis, & respirationem ab acerbitatibus, quæ illos premunt, a Deo esse concedendam.
12. Ad hæc omnia venerabilium & sanctarum imaginum cultum relativum respuunt, quem sancta oecumenica Synodus VII confirmavit.

Post errores istos recensitos Synodus, graviter quæsta, quod orientali Ecclesiæ per incredibilem proterviam impingantur, omnes solenni dicto anathemate tanquam hæreses condemnat. publice contestata, eos a sua Græca Ecclesia quam longissime abesse; nunquam se ista credidisse, nec unquam credituros.

Subscripserunt huic condemnationi cum Patriarcha omnes Episcopi, inter quos Petrus Mogilas, Primas Russiæ; omniaque Synodi acta cum litteris Synodalibus Parthenii Patriarchæ Jassi in Moldavia typis sunt publicata.

ARTICULUS III.

Synodus Constantinopolitana III, contra Calvinistas

anno 1672.

Dionysius Patriarcha hanc indixit. In ea Orientalis Ecclesia proficitur septem sacramenta, videlicet *Baptismum*, per quem homo a peccatorum sordibus purgatus, spiritualiter regeneratur. Sacramentum *Chrismatis*, quo Christianam fortitudinem accipimus, profitendi etiam externe fidem, quam in baptismo ac-

X x 3

cepimus.

cepimus. Sacramentum *Eucharistiæ*, qua nutrimur ad virtutem, & unionem cum Deo. *Pœnitentiæ*, per quam remittuntur peccata hominis, post baptismum lapsi. *Matrimonii*, quod ipse etiam Apostolus sacramentum appellat. *Ordinis*, per quem formantur pastores animarum, conferturque gratia ad vitam clericalem. *Extremæ unctionis*, pro salute corporis & animæ.

Verbis clarissimis confitetur *Transubstantiationem*, seu conversionem veram & realem panis in corpus, & vini in sanguinem Christi in sanctissimo altaris sacramento, in quo offerens & oblatus est Christus, qui integer a Fidelibus recipitur. Baptismum omnibus, etiam infantibus, absolute esse necessarium &c.

Ecclesiæ, ordinatione Divina, Episcopis opus esse, quorum, tanquam vicariorum suorum, officio Christus, summus sacerdos, utatur. A nemine, nisi Episcopo sacerdotem aut Episcopum consecrari posse. Necessariam esse Hierarchiam & subordinationem in Ecclesia.

Cœlibem vitam, teste apostolo, matrimoniali præstare. Catholicam Ecclesiam esse infallibilem, perpetuo visibilem. Sanctos venerandos, & tanquam Intercessores apud Deum, invocandos; hoc pluribus locis S. scripturæ doceri. Falso asseri, per cultum sanctorum honorem Dei minui. Se cultum sanctorum imaginum, ceu ritum ab Apostolorum temporibus transmissum, juxta Ecclesiastica monumenta, prorsus amplecti.

Penes Ecclesiam esse potestatem instituendi jejunia, & abstinentiam a carne præcipiendi. Hanc Ecclesiæ orientalis confessionem fidei subscripsit Patriarcha cum multis Episcopis.

ARTICULUS IV.

Synodus Hierosolymitana contra Calvinistas

anno 1672.

81.

Prolixa, sed lectu dignissima est hæc Synodus, a Dositheo Patriarcha Hierosolymitano celebrata, qua Calviniana hæresis profligatur, & Orientalis Ecclesiæ doctrina fidei, toto cœlo opposita, asseritur, adjunctis omnibus, quæ in hac causa contra Cyrillum Lucarem & Calvinistas a Cyrillo Beroensi, Parthenio, & Dionysio Patriarchis Constantinopolitanis acta sunt.

Et

Et imprimis acerbe conqueritur Synodus, Calvinistas frontem tantopere atque pudorem omnem exuisse, ut non sint veriti, suas hæreses Orientali Ecclesiæ mendacio execrabili attingere, necdumque cessent, imposturas suas defendere.

Cum enim, inquit Synodus, homines isti vaniloqui, novatores, mendaciorum architecti, ab occidentalibus jam recesserint, seque ab omni Ecclesia Catholica longe fecerint, manifestissime se probant Hæreticos, imo & Hæreticorum coriphæos; nam falsa non modo dogmata, sui supra modum amantes, induxere; si tamen dogmata fabellas licet appellare, &, formidantes, ne misere deceptæ mentes ad veritatem redeant, ut nihil ad impudentiam deesset, ad fraudes & mendacia confugere, Orientalium Christianorum fidem hæresibus suis obtendentes.

Verum quemadmodum lucis ad tenebras, aut Christi ad Belial, societas esse non potest, ita nec una adversariorum nostrorum cum Ecclesia Orientali sententia, quamdiu hæresiarcham Calvinum voluerint habere Magistrum.

Recenset dein Concilium grandem numerum articulorum fidei, in quibus Calvinistæ ab Orientalibus dissentiant; ex quibus manifeste elucet, Græcos (etiam schismaticos) retinere doctrinam Romano-Catholicam de Divina providentia, prædestinatione & reprobatione, voluntate salvandi omnes, libero arbitrio, possibilitate servandi præcepta: de merito & remuneratione bonorum operum, septem sacramentis, invocatione sanctorum, cultu sacrarum imaginum, verbo Dei tradito, auctoritate conciliorum &c. In omnibus his articulis Orientalis cum Occidentali Romana consentit Ecclesia, & penitus contradicit Calvinistis, quos blasphemus, deceptores, hæreticos appellat.

Non potest Protestantibus incognita esse Orientalis Ecclesiæ doctrina fidei (pergit synodus) postquam Martinus Crusius atque Lutherani suam confessionem ad Jeremiam Patriarcham Constantinopolitanum misit, qui tribus doctissimis responsis omnem eorum hæresim Theologice ac Catholice confutavit, hæc Jeremiæ scripta latine & græce in Germania fuisse edita, anno 1584, quam hæc illi non attendissent, qui nuntium pietati penitus remisissent.

Jam ante Jeremiam Joannem Nathanaëlem, Presbyterum Constantinopolitanum in Tractatu de Missa, Gabrielem Moteanum, Archiepiscopum Cretensem in libro de septem sacramentis, uti
&

& Petrum Archiepiscopum Kiöbensem, cum multis aliis, totam Ecclesiæ Orientalis doctrinam exposuisse, ut adeo ignorare non potuerint Protestantes illius fidem, sed ex summa impudentia ad simplicium ruinam eidem affinxerint prorsus alienam. Neque enim in 18 capitibus, sub nomine Lucari editis, contineri suam fidem, sed esse supposititium Calvinistarum partum, cum ipse Cyrillus negaverit esse suum, & in Homiliis suis contrariam prorsus doctrinam populo proposuerit: damnatum autem fuisse eundem Lucarem, quod articulos illos, sibi affictos, confutare nollet, eaque re suspectum se reddiderit, & pro hæretico sit habitus, prout tot Anathematismi a Conciliis in eum jacti satis declarant.

Anathema
Lucari.

Nam sæpius a Patribus exclamatum: Cyrillo Lucari, calumnianti, Orientalem Christi Ecclesiam cum Calvinistis consentire, Anathema! Cyrillo dogmatizanti, sanctam Ecclesiam errare posse, anathema! Cyrillo dogmatizanti, non esse septem sacramenta, anathema! Cyrillo dogmatizanti, panem & vinum non converti in corpus & sanguinem Christi, anathema! Cyrillo, neganti liberum voluntatis arbitrium, anathema! Cyrillo, neganti meritum bonorum operum, sanctos esse invocandos, anathema! Cyrillo dicenti, Deum aliquos æternæ morti devovere, absque ullo respectu ad eorum mala opera, anathema! Cyrillo, venerandarum imaginum cultum ac relativam adorationem improbanti, anathema! Cyrillo, novo Iconomacho, anathema!

His anathematismis jam pridem subscripserant Cyrillus Beröensis Patriarcha Constantinopolitanus, Metrophanes Patriarcha Alexandrinus, Theophanes Patriarcha Hierosolymitanus, cum universali Orientis synodo.

Postquam Concilium Hierosolymitanum, sub Dositheo Patriarcha congregatum, hæc omnia enarravit, adjunxit acta Concilii Constantinopolitani, sub Parthenio Patriarcha habiti, contra Lucarem, & Calvinianam ejus doctrinam, quod supra memoravimus.

Addit denique Synodus Hierosolymitana symbolum suæ fidei, Calviniano prorsus contrarium, Romano-Catholico prorsus conforme, solo articulo de processione Spiritus sancti ex Patre *Filioque* excepto.

1. Itaque capite profitentur Mysterium SS. Trinitatis.
2. Credimus, inquit, sacras scripturas a Deo fuisse revelatas, eisque

eisque propterea, non quidem, ut libuerit, sed secundum Ecclesiæ Catholicæ traditionem & interpretationem adhibendam esse fidem, omni dubitatione majorem: adduntque, idem esse, sacram scripturam & Ecclesiam Catholicam audire; quia Spiritus sanctus utriusque est auctor, & etiam Ecclesiæ columna & fundamentum veritatis. Contra vero Ecclesiam Calvinistarum esse communiter Hæreticorum.

3. Profitentur libertatem humani arbitrii cum Divina gratia, hominem videlicet libere Divinæ gratiæ cooperari. Impiam esse hæresin, si dicatur, Deum prædestinare & condemnare absque omni respectu ad bona vel mala hominum opera. Blasphemiam esse & apertam insaniam, si dicatur, Deum, absque alia causa, esse auctorem æternæ damnationis, cum Deus omnes homines velit salvos fieri.
- 4 & 5. Profitentur, Deum nunquam esse auctorem mali, sed omnia, quæ a Deo sunt, bona esse. Solum autem peccatum esse malum.
6. Peccatum originale, & 7. Incarnationem Filii Dei, & alia, quæ in symbolo Apostolorum habentur, Catholico prorsus modo.
8. Sanctos esse nostros intercessores apud Deum, & ante omnes Immaculatam ejus Matrem, uti etiam Angelos, ad nostram custodiam destinatos, Apostolos, Prophetas, Martyres, Episcopos, omnesque sanctos, quos Deus tanquam fideles servos gloriosos fecit; qui, sicut Prophetæ, ea, quæ in terris geruntur, per Divinum lumen & revelationem cognoscunt.
9. Per fidem, quæ operatur per charitatem, id est, per Divinorum præceptorum observationem, nos justificari.
10. Credunt sanctam, Catholicam & Apostolicam Ecclesiam, quæ ordinatione Divina per Episcopos a Spiritu sancto regatur. Quod autem Calvinistæ dicant, nullum esse discrimen inter Episcopos & simplices sacerdotes, absque Episcopis posse Ecclesiam subsistere, non ab Episcopo duntaxat, sed etiam a sacerdote sacerdotem posse ordinari, & a pluribus sacerdotibus Episcopum &c. hoc enim vero longissime, ut credat, ab Ecclesia Orientali abesse, quæ semper certum habuerit, Episcopos ordinatione Divina Ecclesiæ esse necessarios, magnumque, non tantum quoad potestatem Jurisdictionis sed etiam ordinis, inter Episcopum & alios sacerdotes intercedere discrimen. Nunquam

Fides Orientalium.

a sacerdote, qui non sit consecratus Episcopus, posse Episcopum consecrari, imo neque alium sacerdotem &c.

Sacerdotem, ab Episcopo ordinatum, conferre baptismum, extremam unctionem, offerre SS. sacrificium, præbere populo corpus & sanguinem Domini, assistere matrimoniis, prædicare populo; sed chrisma a solo Episcopo consecrari, sacrosque ordines conferri, ligari, solvique ab eo altiori potestate, excommunicari hæreticos, mitti ab eo prædicatores, sine cujus ordinatione non possent esse legitimi animarum pastores.

11. Omnes & solos fideles profitentur esse membra Ecclesiæ, etiam si sint peccatores, quia in istos etiam Jurisdictionem exercet.
12. Ecclesiam, a Spiritu S. illustratam, atque per Præpositos secundum sacra concilia edoctam, errare non posse.
13. Hominem non per solam fidem justificari, sed per fidem vivam & efficacem, quæ per charitatem operatur, id est, per fidem atque opera. Quod autem fides justitiam Christi veluti manu apprehendat, ac sola ad salutem sufficiat, longissime a veritate abesse credunt, alias enim quemlibet, modo credat, salvatum iri: sed recepturum quemque, prout gesserit in corpore suo, sive bonum, sive malum.
14. Per peccatum originale sublata quidem fuisse homini dona supernaturalia atque indebita, non autem quæ sunt ipsius naturæ, relictumque liberum voluntatis arbitrium, ut opus aliquod moraliter bonum viribus naturæ facere possit, secundum illud Apostoli: *gentes naturaliter ea, quæ legis sunt, faciunt*. At vero ad actum salutarem, ad vitam æternam conducentem, requiri gratiam supernaturalem, cui tamen homo per liberum suum arbitrium possit resistere, aut consentire, prout voluerit.
15. Credunt septem sacramenta; hæreticæ autem dementiæ foetum, ajunt, alium sacramentorum numerum, nec enim minus, quam cætera fidei Catholicæ dogmata, septenarius ille in Evangelio statuitur numerus, & ex ipso colligitur. Postquam dein singula in specie enumeravit, singulaque, adductis ex S. scriptura textibus, probavit, addit, ea non esse vacua signa Divinarum promissionum, alioquin nullam a circumcissione differentiam habitura, quod scandalosum foret dicere, sed esse instrumenta gratiæ, quam digne suscipientibus conferunt. Sacramentum Eucharistiæ non consistere in ipso actuali usu duntaxat,

taxat, sed jam ante usum & sumptionem per verba consecrationis fuisse perfectum.

16. Credunt, baptismum, a Christo institutum, & in nomine SS. Trinitatis collatum, absolute esse necessarium, etiam parvulis, quia peccato originali sunt infecti; cum Christus universaliter de omnibus dixerit, *nisi quis renatus fuerit ex aqua & Spiritu S. non intraturum in Regnum cælorum*. Quamvis autem ordinarius Minister hujus sacramenti sit sacerdos, in casu tamen necessitatis a quolibet homine, rationis compote, conferri posse, modo rectam intentionem habeat. Effectum baptismi esse extinctionem peccati originalis & actualium. Infantes, post baptismum mortuos salvari, per baptismum, sicut per ordinem imprimi characterem, unde reiterari non possint; peccata vero, post baptismum commissa, remitti per sacramentum pœnitentiæ.

17. Credunt sacramentum Eucharistiæ, veramque transubstantiationem his verbis: In hujus itaque celebratione sacramenti Dominum nostrum Jesum Christum credimus esse præsentem, non quidem secundum figuram aut imaginem . . . neque penes conjunctionem, qua proposito Eucharistiæ panis verbi Divinitas substantialiter uniatur, quemadmodum incite juxta ac misere Lutherani arbitrantur, sed vere realiterque, quatenus panis & vinum facta consecratione transmutentur, transubstantientur, convertantur, transeant, panis quidem in ipsum corpus Domini verum, quod natum est in Bethlehem ex semper virgine &c. vinum vero in ipsum Domini sanguinem verum converti & transubstantiari. Item facta panis & vini consecratione, nec panis nec vini manere amplius substantiam credimus, sed ipsum corpus & sanguinem Domini sub panis & vini speciebus, id est, sub panis accidentibus.

Transubstantiatio.

Item & ipsum distribui Domini corpus & sanguinem purissimum, inque communicantium, sive piorum sive impiorum, os ac stomachum introduci, illis ad vitam, his ad mortem; Christum ut Deum ac hominem sub minimis etiam specierum particulis integrum & indivisum contineri. Cum multæ simul Missæ leguntur, Christum modo supernaturali in multis simul locis realiter esse præsentem, absque ulla sui divisione. Comprehendi hoc quidem a nobis non posse, credi tamen posse tanquam veritatem nobis revelatam, sicut plura alia Mysteria (uti summæ

Trinitatis & Incarnationis) credimus, licet illa non comprehendamus.

Corpus & sanguinem Christi summo cum honore adorandum; cum Christus, Deus & homo, uno supremo patriæ cultu simul sit adorandus. Credunt, verum ac propitiatorium esse sacrificium, quod pro fidelibus omnibus, tum vivis tum defunctis, nec non & pro utilitate omnium offertur. Credunt, verum Corpus Christi in tabernaculo & sacris vasis asservari; atque ad ægrotos deportari. Neminem autem hoc sacramentum posse conficere, nisi sacerdotem, ab Episcopo consecratum.

Hanc esse epitomen doctrinæ orientalis Ecclesiæ de hoc sacrosancto sacramento, hanc confessionem & antiquissimam traditionem, de qua nihil detrahi patiantur, qui recte credunt, & ab impiis hæreticorum erroribus abhorrent. Et, qui Traditionem contemnunt, eos damnari & anathematizari à sancta Christi Ecclesia.

Purgatorium.

In 18 denique Capite continentur Purgatorium, seu locum tertium, in quo illi, quibus culpa quidem & æternæ pœnæ reatus per contritionem aut confessionis sacramentum remissus est, sed tamen, quia per orationem, lacrymas, eleemosynam, castigationem corporis, aliaque bona opera, justitiæ Divinæ necdum ex integro satisfecerunt, ob residuum reatum pœnæ, temporali supplicio puniuntur, a quo per eleemosinas, preces Fidelium, & præcipue incruentum Missæ sacrificium, quod ab Ecclesia quotidie pro vivis atque defunctis offertur, ex summa Dei bonitate & misericordia liberantur.

Solvit objectiones.

Postquam Concilium Orientalis Ecclesiæ hæc 18 capita Calvinianis Cyrilli Lucaris 18 articulis opposuit, respondit etiam ad quatuor illius quæstiones; atque ad 1. quidem, non esse consultum, ut quilibet sacram scripturam vulgari idiomate legat, quia indocti illam non intelligant, & eadem abutantur, ut adeo Ecclesia provide ac prudenter ejusmodi lectionem promiscuam & illimitatam prohibuerit.

Ad 2. an S. Scriptura omnibus sit clara, respondet: si omnibus adeo clara foret, Paulum non fuisse scripturum de gratia ac dono interpretandi: non fuisse dicturum Petrum, in epistolis Pauli esse quædam difficilia intellectu. Sensum Scripturæ sæpe esse sublimem; interpretationem ad viros, a Deo illuminatos, pertinere.

Ad 3.

Ad 3. quoniam libri ad S. scripturam pertineant, respondet Synodus, eos quoque, quos Calvinistæ tanquam apocryphos rejiciunt, uti librum Sapientiæ, Ecclesiastici, Judith, Tobie, Macchabæorum, quod a Conciliis & antiquissimis Patribus tanquam authentici ac Divini agnoscantur, quos Cyrillus Lucar insipienter, inscite aut magis malitiose apocryphos vocasset.

Ad 4. quid de sacris Imaginibus earumque veneratione sentiendum, respondet Orientalis Ecclesia, cum Sancti sint amici Dei ^{Sanctorum invocatio.} nostrique Intercessores, merito eos a se coli, & quidem sanctissimam Dei Matrem ac Virginem Mariam cultu *Hyperdulie*, quia omnibus Angelis, Prophetis, Apostolis & Martyribus est sanctior & excellentior: alios vero Sanctos cultu *Dulcie*. Insuper se venerari lignum crucis, in quo pro salute mundi Salvator noster passus est, quin & ejusdem crucis signum venerari le & adorare.

Præterea coli a se Imagines Christi & Sanctorum, secundum eam, qua quibusdam Patriarchis & Prophetis apparuissent, ^{Cultus Imaginum.} formam; denique & Spiritum sanctum sub ea, qua visus est, columbæ specie, oculis pingendo subjici. Eam porro, quam Sanctis & eorum Imaginibus cæterisque prædictis venerationem adhibeant, idololatriam esse, si qui dicant, id ceu ineptissimam & inane calumniam, nihili omnino a se fieri.

Confutant denique Calvinistarum objectamenta, dicuntque, in S. Scriptura vetitum esse idola sculpere, aut creaturæ Divinos honores deferre. Sanctorum autem Imagines non esse idola, cum nullum falsum Numen repræsentent, nec Divino honore eos coli, sed longe inferiori, eoque relativo, cum respectu ad sanctum, quem repræsentant; qui usus jam ab Apostolorum temporibus in Ecclesia perpetuo viguerit, ut ex actis Synodi VII constet, quæ contra Iconomachos est habita.

De Calvinistis autem dicit hæc in Synodo congregata Orientalis Ecclesia: ^{Effigies Calvinistarum.} *quas vero novitates induxere Calvinistæ, tum circa Deum, resque Divinas blasphemando, cum sacram scripturam perperam interpretando, decurtando, & injuriose tractando, diaboli sophismata esse dicimus & inventa.* Neque minus inepte garriunt, non posse Ecclesiam a quibusdam cibis abstinere & jejunia constituere: enimvero recte admodum, ad carnis & omnium mortificationem passionum &c. &c.

Tandem vero ita concludit Synodus: Taceant igitur inepti narratores, & novitatum artifices hæretici, & inutilis tum e

Scriptura, tum ex Patribus adversum nos sententias, quibus mendacium exstruant, furari ne moliantur, atque hoc loquantur unum, sese nimiam excusantes excusationes in peccatis, injurias in Deum, & in sanctos evomere blasphemias instituisse.

Atque hæc ex multis dixisse sufficiat ad plenam calumniæ, Ecclesiæ nostræ Orientali illatæ, confutationem. --- Ea pono, quæ diximus, non solam nostram adversus Hæreticos, nobis obtreptantes, apologiam esse volumus, verum etiam fidei regulæ instar obtinere: ex qua nova eorum emendentur dogmata, & ad Catholicam & Apostolicam Ecclesiam ipsi reducantur, quandoquidem Majores illorum olim in illa meruerunt.

Synodo huic subscripserunt anno 1672 16 Martii in urbe Jerosolyma 70 Patres Orientalis Ecclesiæ, & quidem Dositheus Patriarcha Orientalis Ecclesiæ his verbis: *Dositheus miseratione Divina Patriarcha sanctæ Jerusalem totiusque Palaestina: assero & confiteor, hanc esse fidem Orientalis Ecclesiæ, & ita alii.*

Quid jam vobis videtur, Domini Calvinistæ? An adhuc ad nuditatem vestram tegendam gloriamini, Græcam Orientalium Christianam Ecclesiam, eandem vobiscum profiteri doctrinam fidei? Certe insignis fuit impudentia, ita palam in orbem mentiri. Quid in tota hac confessione non est apprime Catholicum? Romanæ Ecclesiæ Theologum loqui crederes. Agnoscant Græci Processionem Spiritus sancti a Patre *Filioque*, & Primatum Romani Pontificis; & paries, inter Orientem & Occidentem medius, brevi facileque erit sublatus. Eandem autem, quam Græci, tota proficitur Moscovia.

Concilium Farfense in Italia anno 1685.

32.

Complura sæculo XVII in Italia celebrata sunt Concilia, Provincialia & Diocesana. Solus Cardinalis, Maria Vincentius Ursinus, Archiepiscopus Beneventanus, ad summum postea Pontificatum admotus, 34 Provincialia Beneventana celebravit, ut Cleri potissimum mores ad Ecclesiasticæ disciplinæ normam componerentur. Imitati illustre hoc exemplum alii Italiæ Præfules, zelo Domus Dei flagrantus, Synodos egerunt, puta, Federicus Borromæus, Nepos S. Caroli dignissimus, Mediolanensem, Card. Taurusus Senensem, Card. Patricius Aëlinensem, Ameri-

nam

nam Gratianus Episc. Assisensem Nerlius Card. Bononiensem Boncampagnus Card. Cæsenatensem Card. Denost. Lunensem & Sarzanensem Card. Lomellinus &c. &c.

Quia tamen harum aliarumque Synodorum idem ferme est argumentum, omnium instar juvat recensere summatim canones Concilii *Farfensis*, clarissime disciplinam Italiæ seculi XVII explicantis, in celebri Abbazia B. V. Farfensi Ord. S. Benedicti, in Ducatu Spoletano habiti a Carolo Barberino Card. præsentem etiam Francisco Albano, summo postea sacrorum Antistite.

Capite 3. præcipit *Concionatoribus*, ut Jesum Christum verbum veritatis, non se ipsos, prædicent, bono exemplo præeant, seque animarum salutem, non gloriolæ aut lucro temporali inhiare ostendant. Parentibus gravem obligationem inculcent, liberos suos pie & Christiane educandi, ad Christianam doctrinam mittendi, vitia generatim reprehendant &c.

Cap. 9. Tractat de *Eucharistia*, monetque parochos, ne quosvis indiscriminatim ad S. Communionem admittant, ut publice excommunicatos, concubinos, meretrices, blasphemos, maleficos, usurarios publicos, ac publice criminosos, itemque eos, qui in inimicitia cum scandalo proximi perseverant, ac conjuges, sine causa legitima cohabitare nolentes, nisi hi omnes certum prius poenitentiae & vitæ emendandæ signum dederint.

Cap. 11. Agit de *sacramento poenitentiae*, mandatque Confessariis, ut restitutioni famæ aut rerum obnoxios de sua obligatione exacte commoneant, nolentibus absolutionem negent, nec vanis pollicitationibus, semper effectu carentibus credant. Idem de illis, qui pravas consuetudines deferere nolunt, nisi confessarii spem moraliter certam habeant, eos firmum easdem deferendi propositum concepisse: nec pro peccatis gravissimis levissimas poenitentias injungant, seque alienorum criminum per hoc participes efficiant. Inferit etiam S. Synodus actis suis Decreta Alexandri VII & Innocentii XI, quibus laxas Casuistarum aliquorum sententias damnarunt, morumque doctrinæ puritatem omni modo commendat.

Cap. 18. de Festorum observantia præcipit parochis invigilare, ut dies festi rite observentur, in applicatione ad Divina, & operis servilis cessationem, omissionem computationum, saltationum, spectaculorum ludicrorum, comædiarum profanarum, lusuum.

Cap. 19. De Jejunio præcipit exactam ejus observantiam, prohibetque, ne tempore quadragesimæ fiant spectacula, choreæ, comœdiæ, tripudia, comotationes, convivia.

Cap. 21. de vita & honestate Clericorum, præcipit eisdem, ut libros pios crebro legant, scurriles & impuros ne nominari quidem permittant: sub pœna suspensionis a Divinis, ipso facto incurrendæ vetat, ne aleis, aut foliis lusoriis ludant, aut domum ad ludendum commodent: ne clamorosis venationibus intersint, aut conviviis secularium, choreis, spectaculis. Fœminarum ædibus aut familiaritate abstineant: negotiationem non exerceant nec per se nec per alios: aliena prædia non conducant: nullis personis sæcularibus, præsertim fœminis, in procurandis negotiis, vel domus gubernatione famulentur: raro per publicum & modeste oculis demissis incedant, totoque corporis habitu gravitatem clericalem præferant.

Cap. 40. de usuris & illicitis contractibus præcipit parochis, ut contractuum naturam, justitiam, æquitatem, tum ipsi legendo probatos auctores addiscant, & parochianos doceant, atque confessarii in hoc negotio, quo vertitur præjudicium tertii, severi sint officii exactores.

O. A. M. D. G.

Open 7.12.76
to 9.12.76

BINER
APPAR:
ERUD:ECC

IX.